

# বাংলার পুরনারী

শ্রীদীনেশচন্দ্র সেন, রায়বাহাদুর বি.এ., ডি.লিট

কলিকাতা বিশ্ববিদ্যালয়ের সদস্য, বঙ্গসাহিত্যের অধ্যাপক এবং প্রধান পরীক্ষক ও  
'বঙ্গভাষা ও সাহিত্য', 'রামায়ণী কথা' প্রভৃতি বিবিধ বাঙ্গালা ও ইংরাজী গ্রন্থপ্রণেতা



পলাশ প্রকাশনী

১০ কবি জসীমউদ্দীন রোড

ঢাকা ১২১৭

**PALASH MEDIA AND PUBLISHER**

10 Kabi Jasimuddin Rd.

Dhaka 1217

**প্রকাশক**

**খুরশীদ আনোয়ার জসীম উদ্দীন**

**পলাশ প্রকাশনী**

**১০ কবি জসীম উদ্দীন রোড, ঢাকা ১২১৭**

**ফোন : ০১৭ ৫২৪৩৫৫**

**প্রচ্ছদ**

**গ্রাফিক্স ডিজাইন**

**খুরশীদ আনোয়ার জসীম উদ্দীন**

**প্রকাশকাল :**

**প্রথম প্রকাশ : ডিসেম্বর ১৯৩৯**

**বানান সমন্বয়ক : তরুণকুমার মহলানবীশ**

**Library of Congress Cataloging-in-Publication Data**

**মুদ্রণ**

**কোঅপারেটিভ প্রিন্টিং, মতিঝিল, ঢাকা**

উৎসর্গ  
রবীন্দ্রনাথ ঠাকুর





## সূচিপত্র

|                             |     |
|-----------------------------|-----|
| রাণী কমলা : প্রথম গীতিকা    | ১৯  |
| রাণী কমলা : দ্বিতীয় গীতিকা | ৩০  |
| কাজলরেখা                    | ৪১  |
| চাকলাদারের কন্যা            | ৬৬  |
| কাঞ্চন                      | ৯২  |
| চন্দ্রাবতী                  | ১০৭ |
| রূপবতী                      | ১২১ |
| তিলক-বসন্ত                  | ১৩৫ |
| মনুয়া                      | ১৫৭ |
| আঁধা-বঁধু                   | ১৮১ |
| শীলাদেবী                    | ১৯৭ |
| মহুয়া                      | ২০৯ |
| মাণিকতারা                   | ২৩৭ |
| সোনাই                       | ২৬৩ |
| লীলা                        | ২৭৫ |
| শ্যামরায়                   | ২৯৯ |



## ভূমিকা

এই পুস্তকে যে-কয়টি প্রাচীন যুগের বঙ্গললনার আখ্যায়িকা প্রদত্ত হইল তাহাদের মধ্যে রাণী কমলা সম্বন্ধে আমরা দুইটি পল্লীগীতি পাইয়াছি, প্রথমটিতে তাঁহার নামে একটা বৃহৎ দীর্ঘিকা খনন করিতে রাজাকে রাজ্ঞীর অনুরোধ, দীঘি খনিত হইলেও জল না পাওয়া যাওয়ায় শুষ্কোদ্ধারের জন্য রাণীর আত্মবিসর্জন এবং বিরহবিধুর রাজার পত্নীশোকে মৃত্যুমুখে পতিত হওয়া। দ্বিতীয় গীতিকাটিতে সংক্ষেপে পূর্বোক্ত আখ্যায়িকা বর্ণিত হইয়াছে, কিন্তু উপসংহারে জঙ্গলবাড়ীর ভূঞা-রাজা ঈশা খাঁ কর্তৃক শিশু রাজাকে বন্দী করিয়া লইয়া যাওয়ার বৃত্তান্ত এবং সুসুপের গারো প্রজাদের অসমসাহসিক চেষ্টার ফলে কুমারকে উদ্ধার করার কথাও দেওয়া হইয়াছে।

এই গীতিকাগুলির মধ্যে কাজলরেখা ও রাজা তিলক-বসন্তের উপাখ্যান অনেকটা কল্পনামূলক। কাজলরেখা ধর্মমতি গুকের মুখে উপদেশ শুনিতেছেন এবং সন্ন্যাসী কর্তৃক সূঁচ-রাজার অদ্ভুতভাবে জীবনরক্ষা প্রভৃতি ঘটনাবলীর মধ্যে অপ্রাকৃত কথারই প্রাধান্য—বাস্তবতার সঙ্গে তাহাদের সম্পর্ক অল্প। রাজা তিলক-বসন্তের অতিথিবেশী কমপুরুষের অভিশাপে বনবাস, সূলা রাণীর স্পর্শমাত্র আবদ্ধ ডিঙ্গার জলে ভাঙা, ইষ্টমন্ত্র স্মরণ করিয়া রাণীর নিজ দেহে কুষ্ঠ রোগের আবির্ভাব করা, রাজা তিলক-বসন্তের প্রার্থী ব্রাহ্মণকে স্বীয় চক্ষু দান, রাণীর স্পর্শে চক্ষুপ্রাপ্তি ইত্যাদি অলৌকিক ঘটনার ছড়াছড়ি।

এই দুইটি কাহিনীতে নিছক কল্পনার খেলা দেখা যায়। কিন্তু বঙ্গীয় সৃষ্টির মধ্যে একটা বিষয় লক্ষ্য করিবার আছে। বাঙ্গালী যাহা কল্পনা দিয়া আরম্ভ করে ধীরে ধীরে তাহা গুছাইয়া সত্যকার বিষয়ে পরিণত করে। শিশু যেমন ঘরের বাহিরে ছুটিয়া খেলিয়া যখন ক্লান্তি বোধ করে তখন বাড়ীতে আসিয়া মা কি দিদিমাকে আঁকড়াইয়া ধরিয়া প্রকৃত বাৎসল্য উপভোগ না করা পর্যন্ত শান্তি পায় না, বাংলার প্রাচীন লেখকেরাও সেইরূপ অবাস্তব ও অপ্রাকৃত কথা দিয়া যে-সকল বিষয়ের অবতারণা করে তাহা অচিরে বাস্তব জগতের কথায় পরিণত করিয়া খাঁটি বাস্তব রস দ্বারা তাহা জীবন্ত করিয়া তোলে।

এই দুইটি কাহিনীতেও এই কথার প্রমাণ পাওয়া যায়। আরম্ভে কাজলরেখা কতকগুলি অলৌকিক কথার একটা রহস্যের মত আবির্ভূত হইল। সে নাকি পিতার সংসারে থাকিলে সংসারের সর্বনাশ হইবে, তাহাকে মৃত স্বামীর সহিত বিবাহ দিতে হইবে। এই অসম্ভব অপ্রাকৃত ঘটনার মধ্যে তাহার আবির্ভাবের পরিকল্পনা এবং ইহার ভবিষ্যদ্বাণী করিলেন একটা বনের পাখী। সেই পাখীর কথায় একান্ত নির্ভরপরায়ণ ধনেশ্বর সাধু তাঁহার হৃদয়ের মণিমাণিক্যের হারের মত দুলালী কন্যাকে নিঃসহায়ভাবে তীষণ জঙ্গলে একটা শবের পার্শ্বে রাখিয়া গৃহে প্রত্যাগমন করিলেন।

অলৌকিকতার উপর এইখানেই একরূপ তৎসময়ের জন্য যবনিকা পড়িল এবং তাহার পরে কল্পনার অদৃশ্য সলিলতল হইতে জন্মিলেন সত্যাকার কাজলরেখা। যে-সকল কল্পনার আবর্জনার মধ্যে তাঁহার জন্ম এবার তাহার কোনও চিহ্ন তাঁহার মধ্যে নাই— তিনি একান্তভাবে রমণীকুললাঞ্ছন দেবীমূর্তি, তাঁহার অমলধবল রূপের মধ্যে আবর্জনা বা কর্দমের লেশ নাই তিনি পুনঃ পুনঃ অতি কঠোর পরীক্ষার সম্মুখীন হইতেছেন এবং সোণাকে পুনঃ পুনঃ কষিলে যে রূপ তাহার রূপ আরও ফুটিয়া উঠে, সেইরূপ সেই সকল পরীক্ষায় উত্তীর্ণ হইয়া তিনি উজ্জ্বলতর হইয়া দেবীপ্রতিমা হইয়া উঠিলেন। কঙ্কণদাসীর চক্রান্তে, যিনি হইবেন রাজরাণী তিনি দাসী হইলেন। এত বড় বিড়ম্বনা সহ্য করিয়াও তিনি চূপ করিয়া রহিলেন, তিনি বুঝিলেন, তাঁহার প্রতি দৈব বিরুদ্ধ—ইহার প্রতিকূলে দাঁড়াইলে তিনি জয়ী হইতে পারিবেন না। অনেক নির্দোষ লোকে বিচারালয়ে ফাঁসিকাঠে ঝুলিয়া থাকে, এবং খুনী নির্দোষ হইয়া মুক্তি পায়। এইজন্য মহাপুরুষ বলিয়াছিলেন— যখন বুঝিবে তুমি অদৃষ্টের ফেরে পড়িয়াছ, তখন গায়ের জোরে অদৃষ্টকে ঠেকাইতে যাইয়ো না, ‘Resist not evil’, কাজল তাঁহার হাতের কঙ্কণ দ্বারা ক্রীত দাসীর হাতে কত লাঞ্ছনা পাইতেছেন, কিন্তু সত্রেটিসের মত হাসিমুখে বিষ গিলিয়া ফেলিতেছেন। যখন অহেতুক অভিযোগে তিনি নির্বাসিত হইলেন এবং তাঁহার পরম হিতৈষী শুকপাখীও তাঁহার বিরুদ্ধে সাক্ষী দিলেন, তখন তিনি বুঝিলেন, অবস্থা এখন দৈব-নিয়ন্ত্রিত। সকলের জীবনেই এইরূপ দুঃসময় আসে। তখন বন্ধু শত্রু হয়, যাহা দিবালোকের ন্যায় সত্য, তাহা কুয়াশার মত মিথ্যা ও তিমিরাবৃত হয়—এইরূপ সময়ে পরের উপর রাগ করিলে কি হইবে? তিনি কাহারও উপর কোনও রাগ করিলেন না। নির্বাসনের দম্ভটা তাঁহার প্রাণে বেশী দাগা দিল—এত কষ্টের মধ্যে এইটুকু সুখ তাঁহার ছিল, স্বামীর মুখখানি দেখা। ভগবান তাঁহাকে এই সুখটুকু হইতেও বঞ্চিত করিলেন।

কাজল চোখের জল ফেলিতে-ফেলিতে সকলের নিকট বিদায় নিতেছেন। কতটা উদারতা ও ক্ষমাশীলতা থাকিলে তিনি কঙ্কণদাসীর নিকট ক্ষমাভিক্ষা করিতে পারেন তাহা অনুমান করুন! এই ক্ষমা চাওয়া—সত্যাকার ক্ষমাগুণ, পাঠক মনে ভাবিবেন না কাজল এখানে ক্ষমাশীলতার অভিনয় করিতেছেন। সত্যিই তিনি দাসীর কাছে ক্ষমা চাহিয়াছিলেন, এখানে তিনি মানবী নহেন—দেবী। তিনি কোটীশ্বরের একমাত্র তরুণ পুত্র প্রদত্ত প্রলোভন এককথায় উড়াইয়া দিয়াছেন। এই উপেক্ষাশীলার সতীত্বধর্ম বাঙ্গালী অনেক মেয়েরই ছিল, এজন্য এ-বিষয়টি লইয়া বেশী কোনও মন্তব্য করার প্রয়োজন নাই। যেদিন তিনি বাপের বাড়ীতে ঢুকিলেন, তখন তাঁহার মাতাপিতার স্নেহনিদর্শন প্রতিটি কক্ষে দেখিয়া বাৎসল্যে তাঁহার হৃদয় ভরিয়া গেল। কোনও কক্ষে স্বর্ণঝিনুকে মা তাঁহাকে দুধ খাওয়াইতেন, কোনও কক্ষে ঘুম-পাড়ানিয়া গান গাহিয়া তাঁহাকে কোলে করিয়া ঘুম পাড়াইতেন—পর পর এই দৃশ্যগুলি দেখিয়া সেই অনাথা বালিকার হৃদয় মথিত করিয়া যে কয়েক বিন্দু তাঁহার নয়নকোণে দেখা দিয়াছিল তাহা অশ্রু নহে—মুক্তা।

রত্নেশ্বর তাঁহাকে বিবাহ করিতে চাহিলেন, কাজল এই প্রস্তাবে কতকটা রহস্য, কতকটা স্নেহের অভিনয়ের মধ্যে যে-সভা আমন্ত্রণ করিলেন, সে-স্থানটিতে আমরা

অনুমান করিতে পারি, শুকের করুণ কণ্ঠের বর্ণনা, এক কোণে দাঁড়াইয়া তখন তিনি কিরূপ মর্মবিদারী দুঃখের সহিত তাহা নীরবে শুনিতেছিলেন এবং সভাগৃহের অন্য কোণে অবস্থিত তাঁহার স্বামী সূচ-রাজার প্রতি কি অসীম প্রেমে ঘন ঘন দৃষ্টিপাত করিতেছিলেন।

সুতরাং একটা অবাস্তব কথা—জীবনের কতগুলি মহাসত্যকে কিরূপভাবে উজ্জ্বল করিয়া দেখাইয়াছে, তাহা শেষ পর্যন্ত পড়িলে পাঠক বুঝিতে পারিবেন। কাজলরেখার চিত্রাঙ্কন [ও] রন্ধনক্ষমতা, তাঁহার সুডৌল সৌম্য-সুন্দর মূর্তিতে রাজীজনোচিত মহিমা, তীক্ষ্ণ বুদ্ধি, অপার ক্ষমা, এই সকল স্বর্গীয় গুণরাশির নন্দনবনের ফুল দিয়া কবি আমাদেরকে যে উপহার দিয়াছেন, সেরূপ একখানি চিত্র আধুনিক কেহ দিতে পারিবেন না—যেহেতু সে পুরাতন আবেষ্টনী এখন আর নাই, ক্ষমাগুণ আর সহিষ্ণুতা এ যুগে তাহাদের মূল্য হারাইয়াছে।

তিলক-বসন্তের চিত্রে ও রাণী সূতার চিত্রে এইরূপ অবাস্তবের মধ্যে বাস্তব রস উদ্ভেকের সুযোগ দিয়াছে। সূতার প্রেম স্বর্গীয় পারিজাতকুসুম—কাঠুরিয়া ও কাঠুরিয়ানীরা যখন তাঁহার দুর্দশা দেখিয়া অশ্রুভারাক্রান্ত কণ্ঠে তাঁহাকে সাব্দনা দিতেছে—তখন রাণী কাঁদিতে কাঁদিতে বলিতেছেন, আমার নিজের দেহের সুখদুঃখবোধ কিছুমাত্র নাই, তোমরা আমার মাংস কাটিয়া ছিড়িয়া ফেল তাহাতে আমি দুঃখ বোধ করিব না, কিন্তু যিনি রাজ্যেশ্বর, যাঁহার মাথায় সোণার ছত্র ছিল, শত শত কিঙ্কর যাঁহার সেবায় ব্যস্ত থাকিত, সেই মহাবাজ আজ তিন দিন তিন রাত্র ভোলানাথের মত ক্ষুধার জ্বালায় বনে বনে বেড়াইতেছেন, আমি তাঁহাকে খাইবার জন্য একটু কিছু দিতে পারি নাই—এ কষ্ট যে অসহ্য! কি সুন্দর এই গল্পে কাঠুরিয়া-কাঠুরিয়ানীদের ছবি! তাহারা কেহ গাছের পাতার টোপায় তাঁহাকে জল দিতেছে; কেহ মধুর চাক ভাঙ্গিয়া তাঁহাকে মধু খাওয়াইতেছে, কেহ ব্যজনী হস্তে বাতাস করিতেছে, কেহ-বা ‘হায় হায়’ করিয়া কাঁদিতেছে! তারপর কাঠুরিয়ারা সকলে মিলিয়া কি আনন্দে রাত্রি-দিন জাগিয়া গাছের ডাল ও পাতায় রাজা ও রাণীর জন্য গৃহ নির্মাণ করিয়া দিল!

সুতরাং আমরা পূর্বে যাহা বলিয়াছি সে-কথা প্রমাণ হইতেছে যে অবাস্তব গল্পগুলি বাদ্মলী কবিদের হস্তে পড়িয়া এই দেশের অনুরাগনিষ্ঠা ও আদর্শ জীবনের প্রেরণা পাইয়া দেবদেবীর মূর্তিতে পরিণত হইয়াছে। এই গীতিগুলির অপ্রাকৃত অংশ শুধু শিশুদের মনোরঞ্জন উপযোগী হয় নাই, তাহা আপামর সাধারণের উপভোগ্য হিতগর্ভ আখ্যায়িকা হইয়া দাঁড়াইয়াছে। বনের ফলমূল দিয়া কবির দেবভোগ ও দেবনৈবেদ্য সৃষ্টি করিয়াছেন।

রাণী কমলার গল্পে কিছু অংশ অপ্রাকৃতের সঙ্গে বর্ণিত হইয়াছে। কিন্তু ঘটনার ভিত্তি দৃঢ় সত্যকার ইতিহাসের উপর প্রতিষ্ঠিত। কবি বাস্তব কাহিনীটির চতুর্দিকে একটা কবিকল্পনার সৌন্দর্য্যকূহকের পরিবেষ্টনী দিয়াছেন, যাহাতে বাস্তব স্বর্গীয় জ্যোতি লাভ করিয়া সুন্দর হইয়াছে। আঁধা-বঁধুর গল্পে অলৌকিক কিছুই নাই—তথাপি বাস্তব জগতে এমন অন্ধ ও তাহার এমন প্রণয়িনীর পরিকল্পনার দৃষ্টান্ত সুদূর্লভ। মনে হয় এই কাব্যকথা যেন বাংলার বাঁশীর একটা সুর। রাজকন্যা পতিকে ছাড়িয়া বাহিরের ডাকে বাহিরে পিছনে যাইতেছেন, অন্ধের মনে যে-অনুরাগ জন্মিয়াছে তাহার শক্তি এত বড় যে

তিনি প্রাণাপেক্ষা প্রিয় বাঁশী নদীর জলে ভাসাইয়া দিতেছেন—কবি অঘটন কত ঘটনাই ঘটাইতেছেন। রাজা বাঁশী শুনিয়া অর্ধেক রাজত্ব ভিখারীকে দিয়া ফেলিতেছেন, সতী কন্যা স্বামীকে ছাড়িয়া অসতীর মত পরপুরুষের পিছনে পিছনে যাইতেছেন—কিন্তু এই সমস্ত অলৌকিক লীলার কোনও স্থানে একবিন্দুও মনে আঘাত করে না, সকল দৃশ্যই সুখদ, সুন্দর, স্বপ্নজালজড়িত। পড়িতে পড়িতে নৈতিক তাঁহার নীতিকথা ভুলিয়া যান, পণ্ডিত তাঁহার শাস্ত্র ভুলিয়া একান্ত হইয়া শোনে। বাঁশীর সুর এমনই মিষ্ট যে পণ্ডিত, নীতিবিৎ, ইতিহাসজ্ঞ ও শাস্ত্রকার সকলে বোকা বনিয়া শুক্ক হইয়া এই সুরের মোহে ধরা দেন। রাজকন্যা স্বীয় পতিকেকে ছাড়িয়া গেলেন কোন শাস্ত্রের নজিরে—এই প্রশ্ন কেহ তুলিতে সাহস পান না।

অন্যান্য গল্পের সকলগুলিই বাস্তব। দুঃখের বিষয় নিতান্ত অশিক্ষিতের হস্তে মাণিকতারা চরিত্রটি যেভাবে ফুটিতে আরম্ভ করিয়াছিল, তাহার সমাধান পাইলাম না। এই রমণীচরিত্রে বাঙ্গালী নারী শুধু সাধ্বী নহেন—শক্তিস্বরূপিণী, তিনি শুধু স্বামীর কণ্ঠলগ্ন হইতে বা তাহার চিতাসঙ্গিনী হইতে শিখেন নাই, অলৌকিক বীর্যবত্তা ও উদ্ভাবনী শক্তিতে তিনি আমাদেরকে বিস্মিত করিয়া দিয়াছেন। এই গল্পটির মাত্র তিনভাগের একভাগ পাইয়াছি। বঙ্গের পল্লীরসজ্ঞ এমন কেহ কি নাই, ইহার অবশিষ্ট অংশ উদ্ধার করিতে পারেন? আমি যে এখন পক্ষশূন্য জটায়ু, না আছে দৈহিক শক্তি, না আছে জীবনীশক্তি!

অন্যান্য আখ্যায়িকা সম্বন্ধে আমি এই পুস্তকের প্রতি গল্পের উপসংহারভাগে আমার বক্তব্য বলিয়াছি।

বাংলাদেশ ও বাঙ্গালী জাতি কি উপাদানে গড়া—এই গল্পগুলিতে তাহার আভাস পাইবেন। বাঙ্গালী যে সমুদ্রে ও বড় বড় নদনদীতে ডিঙ্গা পরিচালনা করিতে দক্ষ ছিল—তাহার প্রমাণ এই গল্পগুলিতে প্রচুর পরিমাণে পাওয়া যাইবে। শুধু এই গল্পগুলিতে কেন, প্রাচীন বঙ্গসাহিত্যের অলিগলিতে সে প্রমাণ অজস্র! বাংলার ছোট ছোট মেয়েরা যে-সকল ব্রত ও পূজা করিত—তাহার একমাত্র লক্ষ্য ছিল—তাহাদের সমুদ্র প্রবাসী স্বগণগণের বিদেশে নিরাপদযাত্রার জন্য প্রার্থনা। ভাদুলি প্রভৃতি ব্রতের কথা পড়িলে পাঠক বুঝিতে পারিবেন, ছোট ছোট মেয়েরা তাহাদের কচি কচি হাত জোড় করিয়া দেবতাদিগকে সকাহতরে প্রার্থনা জানায় যেন ঝড়বৃষ্টি থামাইয়া হিংস্র পশু আক্রমণ হইতে রক্ষা করিয়া তাঁহারা পিতা, ভ্রাতা ও স্বামীদের বাড়ীতে ফিরাইয়া দেন। নদনদী, বনবাদাড়, বাঘভালুক, হাওয়া-ঢেউ—ইহারাই এই ক্ষুদ্র শিশুদের দেবতা, তাহাদেরই ছবি আলপনায় আঁকিয়া তাহারা শত শত বার প্রণাম করিয়া জড়-ও জীব-জগতের সবকিছুর প্রাণপ্রতিষ্ঠা করিতেছে, ইহারাই তাহাদের চোখে সত্যকার দেবতা, ইহারাই যদি কৃপা করিয়া সেই প্রাণপ্রিয় স্বগণগণের কোনও অনিষ্ট না করেন, তবেই তাহারা তাহাদের ফিরিয়া পাইয়া তাদের ঘরবাড়ী আনন্দকলরবে মুখরিত করিতে পারে। দিনরাত্রি তাহারা বাঘভালুক, জলপ্রাচীন, ঝড় ও উত্তাল তরঙ্গের কথা ভাবিতেছে এবং তাহারা তাহাদের ইষ্ট দেবতা হইয়া ব্রত উপলক্ষে প্রত্যাশ দেখা দিতেছে। ইহাদেবই রূপ তাহারা পিঠালি দিয়া আলপনায় আঁকিতেছে, ইহাদেরই নাম করিয়া তাহারা গাঙে স্নান করিয়া প্রার্থনা করিতেছে, কলায় কাণের ডিস্কিকে সাজাইয়া জলে ভাসাইয়া আত্মীয়গণের শুভকামনা

করিতেছে। বংশীদাসের মনসাদেবীর ভাসানে, বিজয়গুপ্তের মনসামঙ্গলে এবং চণ্ডীমঙ্গলগুলির বহু ছন্দে এই সমুদ্রযাত্রার কথা আছে, কিন্তু বিশেষ করিয়া বিস্তারিতভাবে পল্লীযাত্রীদের সমুদ্র ও বিশাল নদনদীতে যাত্রার কথা এই গল্পগুলিতেই পাওয়া যায়।

এই গল্পগুলিতে বাংলামাটির একটা চিত্তাকর্ষক ঘ্রাণ আছে—তাহাই পাঠককে বিশেষরূপে আকৃষ্ট করিবে। ভাদ্রমাসে কেয়া, কুন্দ এবং কেলি-কদম্ব, বসন্তকালে মালতী, জবা, নবমল্লিকা, শরৎকালে কুমুদ, পদ্ম ও জলকহার প্রভৃতি চিরপরিচিত ফুলের গন্ধে চিনাইয়া দেয় যে কবিগণ বাংলারই কথা বলিতেছেন। বর্ষার বর্ণনা যে কত প্রিয় ও প্রেমিকের হৃদয়ে কিরূপ আবেগ আনয়ন করে তাহা পুনঃ পুনঃ কল্প ও লীলার গল্পে চিত্রিত দেখা যায়।

এই গল্পগুলির সর্বত্র বিল খাল, গাঙচিল, কেয়াবন ও নীপবৃক্ষ—এসমস্তই পূর্ববঙ্গের বর্ষাকালীন চিত্রপট মনে জাগাইতেছে। চাকলাদারের কন্যা কমলার বাল্যকালের স্মৃতিতে বঙ্গদেশ কি মধুরভাবে জড়িত হইয়া আছে—তাহা পড়িয়া পড়িয়া মনে ক্লাস্তি আসে না, প্রত্যেকবারেই নূতন বোধ হয়। বাল্যকালে এই দিনে মাতা তালের পিঠা তৈরী করিতেন, ভাদ্র মাসে এই দিনে মনসাদেবীর পূজায় কত লোক নববস্ত্র পরিয়া তাহাদের পূজামণ্ডপে আসিত, এখন সেই মন্দির দেবতাশূন্য, সন্ধ্যায় কেহ সেখানে আর আরতির বাতি জ্বালে না, বাদ্যভাণ্ড থামিয়া গিয়াছে। বর্ষাশেষে কৃষকেরা সোণার ফসল কাটিয়া আনিত, রমণীরা শাঁখ বাজাইয়া, প্রদীপ জ্বলাইয়া নবান্নের গান গাহিয়া ‘জোকার’ দিয়া স্বামী-ভাইদিগকে আগাইয়া ঘরে লইয়া যাইত এবং আঙ্গিনায় ফসল ফেলিয়া মঙ্গলোৎসব করিত। কৃষিপ্রধান বঙ্গদেশ এই গানগুলির সর্বত্র আমাদের নয়নপথে দেখা দিতেছে।

বস্তুতঃ এই গল্পগুলির যে দিক্ দিয়া যাও, যে পথে হাঁট—সব স্থানেই বাংলার পুণ্য-তীর্থের মাটি। বহুকাল হইল আমরা পল্লীর মাটি হারাইয়াছি, আমরা পাথরের বন্দীশালায় আবদ্ধ, শুক পাখীর মত পিঞ্জরের সোণার শলাকাগুলির মূল্যনিরূপণ করিতেছি, কিন্তু কোথায় গেল সেই যুথী-জাতি-কুন্দ-করবী-রক্তাশোকের খেলা? কোথায় গেল সেই সন্ধ্যামালতী, নবমল্লিকা ও চাঁপা-কদম্বের সত্তার, সেই ধারাহত কহারের ঘ্রাণ, কদম্বের শোভা এবং দিগন্তশিহরন-জাগ্রতকারী কোকিলের সেই সুমিষ্ট কাকলী, ও ভ্রমরগুঞ্জরণ? এই কথাসাহিত্যের মুকুরে, পুরাতন বঙ্গপল্লী, অধুনাবিলুপ্ত সমাজ ও বঙ্গের চিরনবীন শ্যামলশ্রী আবার দেখা দিয়াছে। এই দৃশ্যগুলি এজন্য আমাদের এত প্রিয় ও এত স্নেহমাখানো।

গল্পগুলির যে আদর্শ—তাহাও বাঙ্গালীপ্রতিভার বৈশিষ্ট্যজ্ঞাপক, এমন গিরিকান্তার নদনদীপ্লাবী প্রেমের বন্যা অন্য কোনও দেশে কোনও কালে আসিয়াছে কিনা জানি না। বাঙ্গালীর যাহা কাম্য—তাহার জন্য সে না করিতে পারে এমন কিছু নাই। তাহার দেহমন মাটির পুতুলের মত উৎসর্গ করিয়া সে কাম্যবস্তুর সন্ধানে অতলে ঝাঁপাইয়া পড়ে। এই উদ্ধাম গতি—মনের এই প্রাণান্ত চেষ্টা বাংলাদেশের মাটির। বাঙ্গালী অলঙ্কারশাস্ত্র হাতে লইয়া তাহার ছাঁচে ভালবাসার আদর্শ গড়ে নাই, তাহার প্রেম কোনও শাস্ত্রের ধার ধারে

না। প্রণয়িনী তাহার স্বামীকে মুখের উপর [নিজেকে তাহার প্রেমাস্পদের হস্তে সমর্পণের অনুরোধ জানাইয়া] বলিতে পারে :

‘সত্য কর ওহে রাজা সত্য কর তুমি।....

যদি নহে আন

ধর্মসাক্ষী ওহে রাজা আমায় কর দান’

যে দেশের রমণী ফুলের কুঁড়ির মত, মনের কথা মুখে আনিতে যাহার বাধো-বাধো ঠেকে, সেই লাজশীলার এ কি স্বাধীন দুর্বীর অভিলাষ! যে-পথে বাঙ্গালী চলিবে সে-পথের শেষ নাই। পথের বিপদ দেখাইয়া তুমি তাহাকে থামাইতে পারিবে না। সে পর্বত, সমুদ্র ও শত বাধাবিঘোর ভয় রাখে না। সে নির্ভীক পথিক; তাহার পথের গণ্ডি নাই, সে গণ্ডি স্বীকার করে না, গণ্ডির ধর্ম মানে না; সে পুঁথির বুলি বলে না, সে শিখানো কথা আবৃত্তি করে না। সেরূপ বাঙ্গালী—যাহারা খাঁটি বাঙ্গালী—তাহাদিগকে যদি দেখিতে ইচ্ছা হয়, তবে এই গল্পগুলিতে পাইবে। কাজলরেখার মত ধৈর্য কাহার, মলুয়ার মত আত্মবিসর্জন কাহার, মহুয়ার মত সতত-উদ্ভাবনশীলা, সর্ব কর্মের কর্মী আবার প্রেমের জন্য সর্বস্বহারা নায়িকা কোথায়? ইহাদের অশ্রু কি শেষ হইয়াছে? তাহাতে যে শিলা গলিয়া যায়, ঐরাবত ভাসিয়া যায়! সেই শক্তিমতী নারীরা কোথায় গেলেন? তাঁহারা চলিয়া গিয়াছেন বলিয়াই কি আমরা হীনবীর্য হইয়া পড়িয়াছি?

এই পল্লীকাহিনীগুলির ভাষা খাঁটি বাঙ্গালীর ভাষা, তাহা আধা-সংস্কৃত আধা-ইংরাজীর খিচুড়ি নহে। যে ভাষাকে আমরা মাতৃভাষা বলিয়া জানি, ইহা সেই ভাষা। এই ভাষার বল বুঝাইব কিরূপে? মাতৃভাষার সঙ্গে যে ভাষার শিক্ষা হইয়াছিল—তাহা মাতৃভাষার মতই অপূর্ব দান। পাঠক দেখিবেন, মনের সমস্ত কথা এই ভাষায় যেমন বুঝানো যায়, সংস্কৃত সমাস ও অভিধানিক শব্দ চয়ন করিয়া তেমন কিছুতেই বুঝানো যায় না। এই ভাষা বার-করা কথার জোর চাহে নাই, নিজের জোরেই দাঁড়াইয়া আছে।

‘মাণিকতার’ গল্পের ভাষায় কতকগুলি [উল্লেখের যোগ্য] বর্ণবিন্যাস দেখিলাম। যেখানে আমরা ও-কার সংযোগে কথা বলিয়া থাকি, সেইখানেই আমরা সংস্কৃত অভিধানের অনুকরণে ও-কারটি লেখায় ব্যবহার করিতে ভুলিয়া যাই—এই গাথাটি পড়িয়া সে-কথা বুঝিলাম। ইহাতে নিম্নলিখিত শব্দগুলি ও-কার সংযোগে লেখা হইয়াছে :

কোম = কম

মোতন = মতন

মোন = মন

মোন্দ = মন্দ

পোণ = পণ

জোঙ্গল = জঙ্গল

সোস্তান = সন্তান

মোত = মত

জোন = জন

সোংসার = সংসার

গোণক = গণক

জোল = জল



এইসকল কথার সবগুলিই পূর্ববঙ্গে ও-কার সংযোগে কথায় ব্যবহার হয়। পশ্চিমবঙ্গেও কতকগুলি। [শব্দ] মুখে [বলিবার সময়] ও-কার দিয়া বলা হয়—কিন্তু লিখিবার সময় ‘মোন’কে ‘মন’, ‘মোন্দ’কে ‘মন্দ’ ‘যোম’কে ‘যম’ লিখিত হয়। পূর্ববঙ্গের নিম্নশ্রেণীর লোকেরা হ-কার প্রায়ই ব্যবহার করে না (যথা : অইয়া=হইয়া, এন=হেন, ইন্দু=হিন্দু, হয়ার=ইহার)। এবং কোনও কোনও স্থানে ‘স’ অনেক সময়ই হ-তে পরিণত হয়। স্ত্রীর ভাতাকে সেদেশে শ-কার দিয়া কথায় বলে না, তৎস্থলে হ-কার উচ্চারণ করে। তাহা ছাড়া, হাজি=সাজি, হাজ=সাজ, হাত=সাত প্রভৃতিরও বহুল প্রয়োগ আছে। পূর্বদেশে, বিশেষ মৈমনসিংহ-চট্টগ্রাম প্রভৃতি প্রদেশে, ও-কারের স্থানে উ-কার ব্যবহৃত হয়। যথা, ডুল=ডোল, কুনা=কোনা, ভুলা=ভোলা, ওষ (হিম)=উষ, ছোট=ছুট। অনেক স্থলে ‘ট’ স্থানে ‘ড’ ব্যবহৃত হয়, যথা ছুডু=ছোট।

অনেক ক্ষেত্রে ও-কার দেওয়ার জন্য কবিতার চরণের মিল হয় নাই বলিয়া ভ্রম হইতে পারে—কিন্তু বাস্তবিক পক্ষে কবির শ্রুতির কোনও ত্রুটির জন্য তাহা হয় নাই। যেমন ‘চুল’ শব্দের সঙ্গে ‘ঢোল’ মিল পড়ে না। কিন্তু পূর্ববঙ্গের মৈমনসিংহ-শ্রীহট্ট প্রভৃতি স্থানে উচ্চারণ ‘ঢোল’ নহে, ‘চুল’। সুতরাং লিখিতে গিয়া আধুনিক রীতিতে ‘ঢোল’ লিখিলেও উচ্চারণকালে ‘চুল’ বলিলেই এই বৈষম্য ঘটিয়া থাকে। কথায় কথায় নিরক্ষর কবির মিল দিতেন, লেখা জিনিসটা তাঁহাদের দৃষ্টি আকর্ষণ করিত না, তাই যখন ‘চুল’-এর সঙ্গে ‘চুল’-এর মিল দিয়া যাইতেন, তখন তাহাতে কোনও অসঙ্গতি হইত না। এইভাবে ‘কুন’ (কোন্) শব্দের সঙ্গে ‘চুন’ মিল পড়িত। এরূপ দৃষ্টান্ত অনেক আছে।

বৈষ্ণব কবিতার সঙ্গে এই পল্লীগীতিকাগুলির অনেক সাদৃশ্য আছে, কিন্তু তাহা সাদৃশ্য মাত্র। যাঁহারা বৈষ্ণব কবিতা ও পল্লীগীতিকা খুব সূক্ষ্মভাবে আলোচনা করিবেন, তাঁহারা দেখিবেন ইহারা দুই পৃথক বস্তু। বৈষ্ণব কবিতা বস্তুকে তাহার স্বকীয় গণি হইতে উর্ধ্বে উঠাইয়া তাহাকে আধ্যাত্মিক রাজ্যে পৌছিয়া দিয়াছে, কিন্তু পল্লী-গীতিকার মধ্যে সেই আধ্যাত্মিক জগতের ইঙ্গিত নাই। ঐক্যটি গীতিকা—যথা ‘আঁধা-বঁধু’, ‘শ্যামরায়’, ‘কাজলরেখা’, ‘কাক্ষনমালা’ প্রভৃতির মধ্যে বাস্তবের সুব খুব উচ্চগ্রামে পৌছিয়াছে। তাহা প্রায় অধ্যাত্মলোকের কাছে গিয়াছে। কিন্তু পল্লীগীতিকা অধ্যাত্মজগতের কথা নহে, তাহা বাস্তব জগতেরই কথা। বাংলায় সহজিয়ারা যুগ যুগ ধরিয়া প্রেমের তপস্যা করিয়াছে, সতীরা স্বামীর চিতায় প্রসন্নচিত্তে পুড়িয়া মরিয়াছে। এই গীতিকাগুলিতেও পাঠক দেখিতে পাইবেন, এদেশের রমণীরা প্রেমের জন্য এমন কোনও বিপদ ও ত্যাগ নাই, যাহার সম্মুখীন হন নাই। এইভাবে এদেশে প্রেম এবং কোমল ভাবসম্পদের অনেক কথা মেয়েদের মুখে মুখে চলিয়া আসিয়াছিল, বৈষ্ণব মহাজন ও পল্লীগীতিকার—উভয়ে সেই কথিত ভাষায় মুখে মুখে প্রচলিত অক্ষয় অভিধান হইতে শব্দ চয়ন করিয়াছেন, সেইজন্যই তাঁহাদের সাদৃশ্য—ইহা একের নিকট অপরের ঋণ নহে। সময় সময় চণ্ডীদাসের পদ এবং প্রাচীন পল্লীকবির পদ প্রায় অক্ষরে অক্ষরে মিলিয়া যায়, যথা বৈষ্ণব কবির ‘ঢল ঢল কাঁচা অঙ্গের লাবণী, অবনী বহিয়া যায়’ ছত্রের সঙ্গে ‘সোনাই’ গীতিকার ‘অঙ্গের লাবণী গো সোনাইর বাইয়া পড়ে ভূমে’, এইরূপ সাদৃশ্য অনেকগুলি চক্ষে পড়িবে, মনে হইবে যেন আমরা বাস্তব রাজ্য ছাড়িয়া

বৈষ্ণব জগতে আসিয়া পড়িলাম। কিন্তু পল্লীকবির বাস্তবতা খুব উচ্চস্তর স্পর্শ করিলেও তাহা অধ্যাত্মরাজ্যে পৌছে নাই। মহাজনেরা ও পল্লীকবিরা উভয়েই বাংলার দেশজ শব্দের ভাণ্ডার লুটিয়াছেন, কেহ কাহারও ঋণ গ্রহণ করেন নাই। কিন্তু সপ্তদশ শতাব্দী হইতে ঊনবিংশ শতাব্দী পর্যন্ত বঙ্গদেশে কীর্তনের খোল এরূপ জোরে বাজিয়া উঠিয়াছিল যে, তাহার প্রতিধ্বনি 'এদেশের সর্বত্র শ্রুত হইতেছিল। শেষের দিকে পল্লীকবিরা হয়ত তদ্বারা ভাষাক্ষেত্রে কিছু প্রভাবান্বিত হইয়া থাকিবেন, কিন্তু তাঁহাদের আদর্শ—মনুষ্যজগতের প্রেম, বাস্তবকে রূপকস্বরূপ ব্যবহার করিয়া তাঁহারা কোনও অধ্যাত্মতত্ত্ব প্রচার করেন নাই। শ্যামরায়, আঁধা-বঁধু ও মহিষাল বন্ধুর [চাকলাদারের কন্যা] পালায় মধুর ও কোমল কাব্যপদাবলী যুটাইয়া এবং বাঁশীর সুরের প্রাণোন্মাদকারী ব্যঞ্জন। কিন্তু তাহারা বৈষ্ণব পদাবলীর মত হইলেও বৈষ্ণব-কবিতা-সম্ভূতা কবিতা নহে। আঁধা-বঁধুর নায়িকা [বর্ণনা] 'বেণীভাঙ্গা কেশ তার চরণে লুটায়'—রাধিকার রূপবর্ণনার মত শুনায়। 'তোমায় বুকে লইয়া আমি শুনব তোমার বাঁশী। মরণে জনমে বঁধু হইলাম দামী' 'মুখেতে রাখিয়া মুখ মনের কথা কও', 'বুকেতে আঁকিয়া রাখি তোমার মুখের হাসি', 'বাঁশীর রবে মন-যমুনা বহিত উজান'—প্রভৃতি বহুসংখ্যক পদ এই লক্ষণাক্রান্ত, বাহুল্য ভয়ে আর উদ্ধৃত করিলাম না।

বাংলাদেশ যে এককালে জগতের অন্যতম সমৃদ্ধ প্রদেশ ছিল, তাহার প্রমাণ এই গল্পগুলির অনেক স্থানেই পাওয়া যায়। সোণার কলস, সোণার পালঙ্ক, সোণার ঝারির তো কথাই নাই—ধনীর গৃহে পরিবেষ্ণনের সময় সোণার থালা এবং সোণার বাটির ছড়াছড়ি হইত। ধনবান্ গৃহস্থের ঘরের মেয়েরা বহুসংখ্যক সহচরীর সঙ্গে নদীর ঘাটে স্নান করিতে যাইত, তাহাদের কাহারও মাথায় স্বর্ণকুণ্ড, কাহারও মাথায় সোণার থালায় নীলাশ্বরী, অগ্নিপাটের শাড়ী বা মেঘডুমুর বস্ত্র, কাহারও হাতে নানারূপ গন্ধতৈল ও প্রসাধনের দ্রব্য। চাকলাদারের কন্যা কমলার স্নানের বর্ণনা ও রাণী কমলার সোমেশ্বরী নদীতে শেষ স্নানের বর্ণনা পাঠ করুন। চাকলাদারের মেয়ে তখন নূতনবয়সী, সহচরীরা গান গাহিতে গাহিতে ও নৃত্য করিতে করিতে চলিয়াছে। তাহাদের উল্লাসের কলকাকলী নদীর তীর মুখরিত করিতেছে। পাঁচ শত টাকা [মূল্যের] হাতীর দাঁতের শীতলপাটীর উল্লেখ অনেক গীতিকাতেই পাওয়া যায়। চাকলাদারের কন্যা রাজসভায় তাঁহার বাল্যকালের যে বর্ণনা দিয়াছেন, তাহাতে এদেশের পল্লীচিত্র একটি সোণা-বাঁধা ফেমের ছবির মত ঝলমল করিয়া উঠিতেছে, বার মাসে তের পার্বণে পল্লীগুলি যেন সারা বৎসর নৃত্য করিতে থাকিত। সোণার বাটায় কেয়াখয়ের, চুয়া ও এলাচি দেওয়া পানের খিল লইয়া তরুণীরা বাসরগৃহে প্রবেশ করিত। গ্রীষ্মকালে দীঘির জলে অবস্থিত জলটুঙ্গী ঘর নানারূপ আসবাবে সজ্জিত থাকিত। দম্পতি নানা রহস্য ও মধুর আলাপে রজনী কাটাইয়া দিতেন, দীঘির জলের প্রস্ফুট পদ্মের সুরভি লইয়া বসন্তানিল মাঝে মাঝে সেই গৃহে ঢুকিয়া তাহা সুবাসিত করিয়া দিত। গজমোতির মালা, হীরার হার, সোণার দাঁত-খোঁচানি কাঠি প্রভৃতি অলঙ্কারপত্র ও বিলাসের সামগ্রী যে কত ছিল তাহার ইয়ত্তা নাই! 'লক্ষের শাড়ী' তো কথায় কথায় পাওয়া যায়। স্নানের সময় মেয়েরা গলার হীরার হাব এবং সোণা ও জহবতের অলঙ্কার খুলিয়া রাখিতেন, পাছে তৈলসিক্ত দেহের স্পর্শে তাহারা মলিন হয়। সাধারণরূপ ধনীগৃহস্থের

বাড়ীতে লড়াইয়ের জন্য আটটা-দশটা ষাঁড় থাকিত ; 'লড়াই করিতে আছে আট গোটা ষাঁড়' ('মলুয়া')। এবং প্রত্যেক গৃহস্থের ঘাটেই বাইচ খেলিবার জন্য দীর্ঘ সুদর্শন ডিস্কি বান্ধা থাকিত। এই সকল গীতিকায় ভৌগোলিক বিবরণ যথেষ্ট পাওয়া যায়। 'রূপবতী' গল্পে রাজা বাড়ী হইতে রওনা হইয়া ফুলেশ্বরী পাড়ি দিয়া নরসুন্দার মুখে পড়িলেন, এবং সেই নদী উত্তীর্ণ হইয়া ঘোড়া-উৎরা ও পরে মেঘনায় আসিয়া পড়িলেন,—এইভাবে কত নদনদী ও তীর্থস্থানের উল্লেখ পল্লীগীতিকায় পাওয়া যায়। মোটকথা, তখনকার দিনে লোক দুই চক্ষু বিস্তারিত করিয়া জাপান বা কাম্বোডাকা দেখিত না, তাহারা স্বপ্নবিলাসী ছিল না। তাহাদের পল্লী ও গৃহ তাহাদের বড় আদরের সামগ্রী ছিল। এখন আমরা দূরদেশ সম্বন্ধে প্রাজ্ঞ হইয়াছি, কিন্তু নিজগ্রামের নদীটির নাম পর্যন্ত জানি না। এই পল্লীগীতিগুলিতে যে-দেশ দেখিতে পাই, তাহাই খাঁটি বঙ্গদেশ। এখন সে-দেশ কোথায়? তাহার আনন্দময় শ্যামল রূপ কোথায় গেল? তাহার উৎসবগুলির কি হইল? প্রতিমা, মঠ, মসজিদ, মন্দির নির্মাণোপলক্ষে সে চারুশিল্পকলার চর্চা কোথায় গেল? এদেশে কি আর বসন্তঋতু আসে না? এদেশের কোকিল ও বউ-কথা-কও কি আর ডালে বসিয়া ডাকে না? কোথায় গেল সেইসকল সন্ধ্যামালতী ও কেয়া বনের সৌরভ? বর্ষা আসে, কিন্তু প্লাবন লইয়া বন্যা লইয়া! তাহা কুটির ভাসাইয়া লইয়া যায়। বর্ষার সে কদম্ববর্ণ ও চাঁপার ঘট ফুрайয়া গিয়াছে। এই পল্লীগীতিকার কয়েকখানি প্রাচীন চিত্রপট আছে, তাহারও অনেকগুলি লুপ্ত হইয়াছে। কে তাহাদের উদ্ধার করিবে? আমরা মোটরে করিয়া বিদেশীদের পাছে পাছে ঘুরিতেছি—এই পুঙ্খানুপুঙ্খ দিন কবে অবসান হইবে?

দীনেশচন্দ্র সেন

# বাংলার পুরনারী

# বাংলার পুরনারী



## রাণী কমলা

### পঞ্চম গীতিকা

#### দীঘি কাটাইবার অনুরোধ

আকবরের সময় ময়মনসিং ‘সুসুঙ্গ দুর্গাপুরে’ জানকীনাথ মল্লিক নামে এক জমিদার ছিলেন : তিনি সোমেশ্বর সিং নামক এক ক্ষত্রিয় সেনাপতির বংশে জন্মগ্রহণ করেন। তাঁহার সুন্দর পুরীর শ্যাম অঞ্চল চুব্বন করিয়া শুভ্রনীরা সোমাই নদী বহিয়া যাইত, সেই নদীর তরঙ্গের করতালি-শব্দে জাগিয়া উঠিয়া দুইপারের কোকিল কুহুধ্বনি করিয়া উঠিত এবং ঊষার অলঙ্কৃত রাগ আমগাছের মাথায় পড়িবার সঙ্গে সঙ্গেই কাকসকল কলরব করিয়া আকাশ-পথে লোকালয়ে উড়িয়া আসিয়া গৃহস্থের চালের উপর বসিত।

রাজা জানকীনাথ ও তাঁহার স্ত্রী কমলাদেবী উভয়ে নানারূপে অসংলগ্ন ও অর্থহীন কথার আনন্দে ‘জলটুঙ্গী’ ঘরের গ্রীষ্মের রাত্রি কাটাইয়া দিতেন ; সারারাত্রি সে কথা ফুরাইত না, সারারাত্রি সে আনন্দের প্রবাহ এক তিলের জন্য থামিত না, সারারাত্রি এক মুহূর্ত তাঁহারা ঘুমাইতেন না, সারারাত্রি স্বর্ণপ্রদীপের সুবাসিত সলিতার আলো এক মুহূর্তের জন্য নিবিত না। সেই ‘জলটুঙ্গী’ ঘরের অবিদিতগতযামা নিশিথিনীর কথা তাঁহারা সারাদিন স্মরণ করিতেন এবং স্বপ্নভারে মাতোয়ারা হইয়া থাকিতেন।

একদিন কমলাদেবী রাজাকে বলিলেন, ‘তুমি তো কতবারই বল যে আমাকে তুমি ভালবাস। সত্যি যে ভালবাস তাহা আমি সন্দেহ করি না। কিন্তু তোমার কাছে আমার এই নিবেদন, এই ভালবাসার একটা চিহ্ন দেখাও।’ রাজা বলিলেন, ‘আমাকে কি করিতে হইবে বল।’

রাণী বলিলেন, ‘আমার একটা খেয়াল হইয়াছে, তাহা তোমায় পূর্ণ করিতে হইবে। আমি সাতদিন সাতরাত্রি কাজ করিয়া এক ‘টাকিয়া’ সূতা কাটিব। সেই সূতার বেড় দিয়া যতটা জমি ঘেরা যায় ততটা জমিতে তুমি আমার নামে একটা দীঘি কাটিবে, তাহার নাম হইবে “কমলাসাগর”। চিরকাল এই রাজধানীর বক্ষে সেই দীঘি—আমার নাম বহন করিয়া আমার প্রাণপতির ভালবাসার পরিচয় দিবে।’ রাজা বলিলেন, ‘তাহাই হইবে।’

এই সময় জলটুঙ্গী ঘরের পূর্বদিক হইতে একটা গৃধ্র শাগিত ছুরির মত তীব্র চিৎকারে আকাশ ভেদ করিয়া চলিয়া গেল—ঘরটা যেন মুহূর্তের জন্য কাঁপিয়া উঠিল।

## রাণীর অভিযান : তফোদার\*

দীঘি খনিত হইতে লাগিল, শত শত মজুর রাতদিন কাটিতেছে ;—যেন তাহারা পাতালপুরীতে অভিযান করিবে, দীঘির খাদ গভীর হইতে গভীরতর হইতে চলিল, কিন্তু এক ফোটা জল উঠিল না।

রাজা চিন্তিত হইয়া পড়িলেন, সভাসদ পণ্ডিতেরা বলিলেন—‘কোন দীঘি খনন আরম্ভ করিয়া তাহাতে জল না উঠা পর্যন্ত কাজ বন্ধ রাখিলে, দীঘিস্বামীর চৌদ্দ পুরুষ নরকস্থ হইবেন।’

যাহা দাম্পত্য প্রেমের আনন্দে একটা সন্ধ্যার বেশে জানকীনাথ করিতে বসিয়াছিলেন, তাহা এইবার দারুণ দুশ্চিন্তার বিষয় হইয়া পড়িল। ‘চৌদ্দ পুরুষ নরকস্থ হইবে’—কি গুরুতর অভিশাপ! এদিকে শত-শত সহস্র-সহস্র মজুর হয়রান হইয়া গেল। রাজা প্রাণদণ্ডের ভয় দেখাইলেন ; জল না উঠা পর্যন্ত তাহারা কোদাল ত্যাগ করিতে পারিবে না, তাহারা একদিনের ছুটি পাইবে না। ভয়ে ঘোর অমাবস্যার অন্ধকারে গা-ঢাকা দিয়া তাহাদের অনেকে উর্ধ্বশ্বাসে ছুটিয়া পলাইল, এদিকে পাছে রাজার পেয়াদা আসিয়া তাহাদিগকে ধরে এই ভয়ে তাহারা ছুটিয়া পলায় ও পিছন দিকে মুখ ফিরাইয়া পুনঃ পুনঃ সতর্ক দৃষ্টিপাত করে।

রাজা একদিন দেখিলেন, মজুরের দলের ৪/১ অংশ আছে কিনা সন্দেহ। যাহারা আছে, তাহারা কাঁদিয়া কাটিয়া যোড়হন্তে রাজার নিকট ছুটি চাহিল। তাহাদের দুর্দশা দেখিয়া রাজা ব্যথিত হইলেন।

সেই রাতে রাজা বিমর্ষচিত্তে চিন্তা করিতে লাগিলেন এ চিন্তার পার নাই, শেষ নাই। মৃত্তিকার তল হইতে তাপ নিঃসৃত হইতেছে। পাহাড়িয়া জায়গা,—ভূমিকম্প, অগ্ন্যুৎপাত প্রভৃতি কোন প্রাকৃতিক বিপর্যয় হইয়া পুরী ধ্বংস করিবে না তো? এদিকে তাঁহার পূর্বপুরুষেরা উৎকণ্ঠিত নেত্রে যেন তাঁহার দিকে চাহিয়া আছেন, তাঁহাদের বিশীর্ণ বায়ুভূত নিরাশ্রয় মূর্তি যেন তাঁহাকে শয়নে-উপবেশনে ও জাগরণে দেখা দিতে লাগিল। দারুণ যন্ত্রণায় রাজা স্বর্ণ-পালঙ্কে শুইয়া ছটফট করিতে লাগিলেন।

সহসা এক দিন গভীর রাতে তিনি এক স্বপ্ন দেখিয়া অভিভূত হইয়া পড়িলেন ; যেন তিনি প্রবেশ করিয়াছেন এক অলৌকিক রাজ্যে, তাঁহার চতুর্দিক হইতে কোকিলের কুহ কুহ শব্দ ভাসিয়া আসিতেছে ; কিন্তু একটি কোকিলও দেখা যায় না ; যেন শত শত কুসুমের গন্ধ লইয়া মলয় সমীরণ তাঁহার ঘরে প্রবেশ করিতেছে, অথচ কোন ফুল-বাগান নাই। সেখানে ‘কামটুঙ্গী’+ ঘরে প্রদীপ জ্বলিতেছে,—তাঁহার কিরণে চতুর্দিক ঝলমল করিতেছে অথচ সেই ঘরখানি চিৎ বৈকুণ্ঠে, অথবা অলকায় কিবা কৈলাসে তাহা তিনি বুঝিতে পারিলেন না। এই অপরূপ স্বপ্ন হইতে তিনি যাহা গিলিল তাহাতে তাঁহার গভীর প্রাবৃত্ত করিয়া অপরূপ দুঃখ পড়িতে লাগিল।

\* তল দীঘিতে জল মজুরেরা খনন করিয়া উঠিল না।

+ কামটুঙ্গী—আলকায় ও কৈলাসে প্রদীপ জ্বলিত হইত।



তিনি সেই রাতে পাশের কক্ষে যাইয়া নিদ্রিতা রাণীর শিয়রে বসিলেন ; একখানি স্বর্ণ-প্রতিমার ন্যায় রাণী কমলা শুইয়াছিলেন । দেহের নির্মল পবিত্র মাধুরীতে যেন গৃহখানি স্বর্গীয় সুখময় ভরপুর করিয়া রাখিয়াছে—রাজা তাঁহার স্নেহ-শীতল হস্তে রাণীর অঙ্গ স্পর্শ করিলেন । রাণী জাগিয়া উঠিয়া দেখিলেন, স্বামী তাঁহার শিয়রে বসিয়া কান্দিতেছেন ।

তাঁহার স্বামী দৃঢ়চেতাঃ, ৩.হার কোন দুর্বলতার চিহ্ন তিনি কখনও দেখেন নাই । অতি করুণ ও শোকার্ত ভাবে তিনি রাজাকে আদর করিয়া তাঁহার দুঃখের কারণ জিজ্ঞাসা করিলেন । রাজার অশ্রু তখনও থামে নাই । তিনি গদগদ কণ্ঠ বলিলেন— ‘আমি বড় একটা দুঃস্থপু দেখিয়াছি, আমি যে এত গভীর করিয়া দীঘি কাটাইলাম, তাহাতে জানি না কোন্ গ্রহের দোষে জল উঠিল না, দীঘি খুব গভীর হইয়াছে, তথাপি তাহা শুষ্ক—জলশূন্য । স্বপ্নে দেখিলাম, তুমি সেই গভীর পুকুরে নামিতেছ, এবং তুমি তলদেশে পদার্পণ করা মাত্র, যেন মেদিনী ভেদ করিয়া জলরাশি ভয়ানক তোড়ে উঠিতে লাগিল এবং তোমাকে ভাসাইয়া লইয়া গেল । সেই জল যেন পাতাল হইতে উঠিয়া আমার রাজ্য আক্রমণ করিল, জল-স্থল একাকার হইয়া গেল ।

‘আমার মন বিষম আতঙ্কে কাঁপিয়া উঠিল, কোন্ দৈব আমাকে যেন দীঘি কাটাইতে প্রবৃত্ত করিয়া আমার সর্বনাশ সাধনের সঙ্কল্প করিয়াছে । রাণী, আমি রাজ্য চাই না,—ঐশ্বর্য, ধনদৌলত কিছুই চাই না, পাতার কুটির তোমাকে লইয়া থাকিব । হায়! তোমাকে হারাইয়া আমি জীবন রাখিতে পারিব না, স্থির জানিও ।’

কিন্দবন্তী আছে, যদি খনিত দীঘিতে জল না উঠে, তবে দীঘির স্বামী বা গৃহলক্ষ্মী আত্মোৎসর্গ করিলে জল নিশ্চয়ই উঠিবে । রাজা শিয়রে বসিয়া কান্দিতেছেন, সেই মর্মভেদী দীর্ঘশ্বাস ও অফুরন্ত চোখের জলে রাণী কি ইঙ্গিত পাইলেন জানি না, কিন্তু সেই মধ্য রাত্রেই রাণী ধীর পাদক্ষেপে বার-বাঙ্গলা ঘরে তাঁহার পরিচারিকাদের নিকটে চলিয়া গেলেন । রাণী ডাকিয়া বলিলেন ‘তোরা সব ওঠ,—আমি স্নান করিতে সোমেশ্বরী নদীতে যাইব,—তোরা আমার সঙ্গে আয় ।’

দাসীবা ঝাঁক বাঁধিয়া রাণীর সঙ্গে চলিল । কাহারও কক্ষে সোণার কলসী, মণিমণ্ডিত, স্বর্ণহারি, কারও হাতে অতি পরিপাটী কারুখচিত গামছা, তাহা মেচ্ছ জাতীয় শিল্পীরা তৈরী করিয়াছে, কেহ কেহ সুগন্ধি তৈলের বাটী লইয়া চলিয়াছে—নানারূপ কেশ-চৈতন্যের সুরভিতে সমস্ত পল্লী যেন সুবাসিত হইয়াছে । কাহারও হস্তে সাদা, লাল, নীল পুষ্পের সাজি, কাহারও হস্তে দেব-পূজার জন্য শ্যাম দুর্বাদল । সেই অন্ধকার রাতে বিচিত্র বশিনী পরিচারিকারা রাণী কমলাকে লইয়া সোমেশ্বরী নদীর কূলে চলিয়াছেন । যিনি অসূর্যস্প্যা ও দেবনাথীর মত দুর্লভ-দর্শন, সেই মহারাণী অন্ধকার রাতে রাজপথ দিয়া পদব্রজে চলিয়াছেন! ঘন ঘোর অন্ধকার রাত্রির আকাশে যেন কালো বস্ত্রের আচ্ছাদনের ঐশ্বর্য শত শত সোণার চাঁপা ফুটিয়া আছে, ক্ষুদ্র ক্ষুদ্র সেই তারাগুলি একটী নীলকমল ফুলের বৃক্ষের মত দেখা যাইতেছে । সেই আঁধারে সোমাই নদী উজান পথে ছুটিয়াছে । নদীর তীরে আসিয়া দাসীরা সুরঞ্জিত গামছা দ্বারা রাণীর শ্রীঅঙ্গ মার্জনা করিল, কেহ কেহ গন্ধ তৈল দিয়া রাণীর চুল সুবাসিত করিল । নানারূপ প্রসাধনের পর রাণী জলে নামিয়া স্নান করিলেন, দাসীরা তাঁহার অঙ্গ কোমল গামছা দ্বারা মুছাইয়া

দিল, আর্দ্র বস্ত্র ছাড়াইয়া ‘অগ্নিপাটের শাড়ী’ পরাইল। স্নানান্তে দেবীপ্রতিমার মত কমলারাগী পূজায় বসিলেন—তিনি ফুল-দুবাদল ও ধান প্রভৃতি মাঙ্গলিক দ্রব্য দ্বারা সোমাই নদীকে পূজা করিয়া প্রার্থনা করিলেন, ‘আমি আজ আমার প্রাণপতির বিপদ উদ্ধারের জন্য আত্মোৎসর্গ করিব,—তুমি নদী সাক্ষী থাকিও,—নদীর তীরে এই শ্যামলশ্রী তরুণাঙ্গি তোমরা সাক্ষী থাকিও, আমি স্বামীর জন্য আত্মদান করিব। আমার স্বামীর পূর্ণাঙ্গ তোমরা যেন উদ্ধার পান, পুকুর যেন জলে ভর্তি হয়। হে আকাশের তায়াসমূহ তোমরা সাক্ষী থাকিও, হে দেবধর্ম—তোমরা সাক্ষী থাকিও।’ স্বামীর শুভচিন্তায় আত্মহারা বাণী পুষ্প-বিন্দুল সোমাই নদীতে অর্পণ করিলেন। তাহার মনে হইল কেহ যেন অভয় দিয়া তাহার প্রার্থনা সিদ্ধ হইয়াছে এই আশ্বাস দিলেন।

তখন মণিমাণিক্য-খচিত সোণার কলসী ভরিয়া সোমাই নদীর জল তুলিয়া বীরপদে তিনি রাজপথে আসিলেন; দেখিলেন, পূর্বাকাশ বিকিমিকি করিতেছে, উষার পায়ের আলতার দাগ যেন মেঘে মেঘে খেলিতেছে। প্রভাতে নবজাগ্রত লোককোলাহল ক্রমেই বাড়িতেছে।

পূর্বে প্রত্যাবর্তন করিয়া রাণী নিজের শয্যায় শুইলেন,—শিশুপুত্রটিকে কোলে শোওয়াইয়া আদর করিয়া চুমো দিতে লাগিলেন, ‘আজ তোমার সঙ্গে আমার শেষ দেখা, আর তোমার চাঁদমুখ দেখিতে পাইব না’—অশ্রুপূর্ণ চোখে, ইহাই জাবিলেন। কিন্তু মুখে কথা নাই। ছয় মাসের শিশু—তাহাকে শেষ দেখার সময় রাণীর যে শোক হইল, তাহা প্রকাশ করিবার কোন ভাষা নাই।

তার পর জার্মানিগাথের কাছে আসিয়া রাণী বলিলেন, ‘কি জানি আমার প্রাণ কেমন করিতেছে, আমি আমি নদ্রি,—তবে আমাদের নয়নের মণি খোকাকে সর্বদা প্রেমের কাছে রাখিও।’ রাজা বলিলেন, ‘তুমি না থাকিলে আমিও থাকিব না।’ রাণী দাসীর দিকে মুখ ফিরাইয়া বলিলেন, ‘সূয়া দাসী, তুমি আমার বাপের বাড়ীর লোক, আমার পুত্রের হনকে তোমার হাতে অর্পণ করিয়া যাইতেছি!’ শুকশারিকে বলিলেন, ‘আমার বাপের বাড়ী হইতে তোমাদিগকে অনিচ্ছাই, তোমরা আমার ছেলেকে “মা” ডাক ডাকিতে থাকিও। যখন সে “মা” ডাক শিখিয়া ক্ষুধার সময় “মা মা” বলিয়া কাঁদিবে, তখন তোমরা তোমাদের মিষ্টস্বরে শিশু দিয়া তাহাকে সান্ত্বনা করিবে। আমি চলিলাম সূয়া—রাজত্ব ত্যাগ করিয়া যাইতেছি, তাহাতে দুঃখ নাই। কিন্তু প্রাণের পুত্রকে ছাড়িয়া যাইতে বুক বিদীর্ণ হইতেছে।’

রাণী এই বলিয়া শিশুপুত্রকে সূয়া দাসীর হাতে দিয়া কাঁদিতে সাগিলেন। কি এক অনিশ্চিত বিপদ আশঙ্কা করিয়া সূয়া আত্ননাদ করিয়া কাঁদিয়া উঠিল, অপরাপর দাসদাসীরাও চোখের জল সামলাইতে পারিল না।

### রাণীর আত্মোৎসর্গ

রাণী সেই নদীর জলে পূর্ণ স্বর্ণ-কলসী কক্ষে তুলিয়া লইলেন, তখন ছিন্ন ছিন্ন মেঘপঙ্খিত সিন্দুরের বর্ণে রঞ্জিত, পুকুর-পাড়ের দিকে লোকজনের ভিড় হইল। তাহার মহারাগীকে পায় হাঁটিয়া নদীর দিকে যাইতে দেখিয়া অব্যক্ত শোকে কাঁদিয়া আকুল

হইল। কেউ বলিল, রাজা কি স্বপ্ন দেখিয়াছেন, তাঁহার মস্তিষ্ক কি ঠিক আছে, রাণী এ ভাবে পদব্রজে পুকুরের দিকে যাইতেছেন কেন? মা—তুমি রাজবাড়ীতে ফিরিয়া এস, তুমি কি করিয়া বসিবে, আমরা ভাবিয়া পাইতেছি না, আমরা বড় কষ্ট পাইতেছি।

‘কিসের দীঘি, কিসের স্বপ্ন—

নাই সে উঠুক পানি।

এই গহিন পুকুরে যেন না যাউন মা রাণী।’

রাণী সেই শুকনো পুকুরের তলদেশে নামিলেন,—তথায় ফুল দুর্বাদল ও ধান্য ছিটাইয়া দিলেন এবং এক অঞ্জলি জল সেই দীঘির তলদেশে ছড়াইলেন। অনিদিষ্ট আশঙ্কায় শত শত লোক পাড়ে দাঁড়াইয়া ‘হায় হায়’ করিতে লাগিল। রাণী মৃদুস্বরে প্রার্থনা করিলেন—‘কায়মনোবাক্যে আমি যদি ধর্ম রক্ষা করিয়া থাকি, তবে পুকুর জলে ভর্তি হউক, আমার স্বামীর পিতৃকুল রক্ষা পাইন। যদি আমি চিরদিন ধর্মের প্রতি অচলা ভক্তি রাখিয়া থাকি, তবে যেন আমার প্রভুর মনোবাঞ্ছা সিদ্ধ হয়। পুকুর যেন জলে ভর্তি হয়। পাতাল ভেদ কবিয়া বন্যা এস—আমাকে ডাড়াইয়া লইয়া যাও।’ হাত উঁচু করিয়া রাণী কলসী হইতে জল ছিটাইতে লাগিলেন। এ যাদু-কলসীর জল কি ফুরাইবে না? যতই রাণী জল ঢালিতে লাগিলেন ততই ভরা কলসী ভরাই রহিল। জল ছড়াইয়া ফেলিতে ফেলিতে অকস্মাৎ আস্তে আস্তে পুকুরের তলা হইতে জল নিঃসৃত হইয়া রাণীর পায়ের দুখানি পাতা ভিগাইয়া ফেলিল। হাত উর্ধ্বে উঠাইয়া রাণী আরও ডাড়া ছিটাইতে লাগিলেন, রাণীর হাঁটু পর্যন্ত জলমগ্ন হইল; জল ঢালিতে ঢালিতে রাণীর মৃগাল-শুভ্র গ্রীবাদেশ জলমগ্ন হইয়া গেল, তার পর সেই সর্গমূর্তি একেবারে জলে ডুবিয়া গেল। তখন সেই প্রবল বেগ ত্র্যমশ বাড়িয়া চলিল, যেন হুসার করিয়া জলদেবী পাতালের বন্ধ জনপদ বাড়িয়া দিলেন, রাণীর মাথার সূক্ষ্ম নৈদী আবর্তের উপর ভাসিতে লাগিল, আর একটু পরে রাণীর মনে কিছুই দেবা গেল না, অগ্নিপাটের শাড়ীর অঞ্চল ক্ষণেকের জন্য তবর্ষের উপর ন্যস্তা চলিল, পরক্ষণে আর কিছুই নাই; প্রবল বেগে এল উপরে উঠিয়া পুকুরের পাড় ভাঙিয়া ছুটিল।

### রাণীর জন্য ‘শাকাত’ রাজার বিলাপ

রাজা পাগলে। মত ছুটিয়া ‘হায় রাণী’ ‘হায় আমার কমলা’ বলিয়া কাঁদিতে কাঁদিতে উর্ধ্বশ্বাসে ছুটিতেছেন, নগরের লোকদের বুটির জলেব তোড়ে ভাসিয়া যায়, সে দিকে দৃষ্টপাত না করিয়া তাহাবা ‘হায়! রাণীমা’ ‘হায়! পুরলক্ষ্মী’ বলিয়া চিৎকার করিয়া কাঁদিতেছে, প্রথম পুত্র লাভ করিয়া জননী তাহার দিকে না চাহিয়া ‘হায়! মা রাণী’ বলিয়া কাঁদিয়া আকুল হইতেছে।

বনের পাখীরা তখন আকাশে উড়িয়া উড়িয়া কলরব করিয়া কাঁদিতেছে, রাজহস্তীর গণ্ড বহিয়া অশ্রু পড়িতেছে, পিঙ্গবের পাখীগুলি যেন কি হারাইয়া ছুটাছুটি করিতেছে ও

স্বর্ণ শলাকালিতে মাথা খুঁড়িতেছে। রাজার পাত্র-মিত্র সভাসদ সকলের বাষ্পরুদ্ধ কণ্ঠে কথা ফুটিতেছে না। রাজার উদ্যানে কলি ফুটিতেছে না, প্রস্তুত ফুল অকালে ম্লান হইয়া যাইতেছে। প্রজারা দণ্ডে দলে সোমাই নদীর তীরে আসিয়া কাঁদিয়া বলিতেছে, ‘আমাদের রাজলক্ষ্মীকে কালা পানির ঢেউ কোথায় ভাসাইয়া লইয়া গেল।’ সমস্ত দেশময় যেন বিজয়া দশমীর বিসর্জনের বাদ্য বাজিয়া উঠিল, কে তাহাকে প্রবোধ দিবে তাহার ঠিকানা রহিল না।

রাজ-সিংহাসন শূন্য—রাজা তাহাতে বসেন না। শূন্যে যত পক্ষীরা উড়ে, তখন তাহা ভর্তি হইয়া যায়—তাহাই শূন্যের শোভা। আসমানে রণ চন্দ্র উঠিলে তাহার পূর্ণতা হয়—নতুবা আলমাস ধূ ধূ আঁধার, শ্রীশূন্য। রাণীতে যুদ্ধের বাগান না থাকিলে, নারীর রূপালে সিন্দুর না থাকিলে, গৃহে পুরুষের পার্শ্বে নারী না থাকিলে বে তাহাদের দিকে ফিরিয়া চায়। রাণীকে হারাইয়া রাজা একেবারে বাড়িল হইলেন : স্তম্ভা ভূষণ নাই, চুলগুলি উষ্ণশূন্য, রাজা রাতদিন সেই অলক্ষণা পুকুরের চার পার্শ্বে ঘুরিয়া বেড়ান, একটি বুহুদ দেখিলে স্থির দৃষ্টিে চাহিয়া থাকেন, ভাবেন কে যেন আসিতেছে। পাত্রমিত্রগণ রাজাকে কত প্রবোধ দেয়, কিন্তু তাহাদের কথা রাজার কণে যায় না—

‘পাত্রমিত্রগণ যত রাজারে বুঝায়।

প্রবোধ না মানে রাজা করে হায় হায়া।’

পুষ্প ছিড়িয়া ফেলিলে বোটটি যেমন শোভাশূন্য হইয়া গাছের উপর দাঁড়াইয়া পড়িল, রাজলক্ষ্মীকে হারাইয়া রাজা তেমনি শ্রীহীন হইলেন।

‘রাণ্য-ঐশ্বর্য দিয়া আমি কি করিব, আমার সাতরাজার ধন এক মাগিব কোথায় ঢেল! নার রাজ্য? আমার এত সাধের জলটুকী ঘর, নার জন্য? আমার মলম বাতাস, চন্দ্রের জ্যোৎস্না, নার জন্য আমার চন্দ্রিকা-ধবল বদর-বাঙ্গলার ঘর? কার জন্য আমার আকাশ-ছোঁয়া যোড়-মন্দির?’ রাজা বলিলেন—‘আমার রাণীকে আনিয়া দাও নতুন আমার জীবন যায়।’

পাঁচ কাহন মজুর সেচন-যন্ত্র দিয়া দীঘির জল তুলিয়া ফেলিতে নিযুক্ত হইল। সন্মুদ্র মহন করিয়া যেরূপ দেবতারা লক্ষ্যের তুলিয়াছিলেন, দীঘির জল সেঁচিয়া ফেলিয়া রাজা তাহার অন্তঃপুরলক্ষ্মীকে তুলিবেন— এই সন্দেহ। মজুরেরা যতটুকি রাত্রি নমটি দিন তাই দীঘির জল তুলিয়া ফেলিতে লাগিল, কিন্তু যেমন জল তেমন রহিল, তল এক চুলও কমিল না—

‘রাত নাই দিন নাই শিখের দীঘির পানি।

সিচনে না কমে জল গো, তল পরমাণি।’

পরন্তু সেই সেচা জল সেমাই নদীর বাবুর চর পরিপোষিত করিয়া বেশিল। প্রত্যেকবালের শিবের শিঙ্গার মত গর্জন করিয়া সেই বিশৃঙ্খল আলরাশি আকাশে উঠিল, জলগুল একাকার করিয়া ফেলিল, কুটির ঘর বাগবাগিচা ডুকিয়া গেল। জল গাছের ডাঙা পর্যন্ত ডুবাইয়া ফেলিল।

‘ভাটি ছিল সোমাই নদী উজান বহি যায় ।

পানির ফেনা উঠল গিয়া গাছের ডগায়॥

রাজার চক্ষে ঘুম নাই তথাপি এক রাতে বার-বাসলা ঘরে তিনি চোখ বুজিয়া শুইয়া আছেন এমন সময় আবার একটা অলৌকিক স্বপ্ন দেখিলেন ;—

রাণী আসিয়া শিয়রে এসিয়া তাহার দেহে হাত দিলেন, রাজার সর্বঙ্গ জুড়াইয়া গেল, রাণীর কণ্ঠস্বর শুনিলেন, সেই মিষ্টধরে কাণ ভরিয়া গেল ।

তখন মেঘরাশি উতলা হইয়া কি হারাইয়া ঘন ঘন গর্জন করিতেছে, রিমি বিমি শব্দে বৃষ্টি পড়িতেছে । ভেককুলের সমবেত সুরে যেন ঘুমের নেশা ঘোথে আসিতেছে । রাণীর স্পর্শে রাজার কাছে শত শত স্বপ্নের দরজা খুলিয়া গেল, তাহার শরীতে ঘন ঘন রোমাঞ্চ হইতে লাগিল । রাণী বলিলেন :—

‘রাজা—তোমাকে ছাড়িয়া আমি থাকিতে পারিতোঁছ না, আমার মন দিন-রাত্রি হুঁহু করিয়া কাঁদিতেছে ; এমন তোলা মহেশ্বর যাকার স্বামী, সেই হতভাগিনী হইয়া যাইয়া কিরূপে থাকিব? আমার তেলের শোকে বুক বিদীর্ণ হইয়া যাইতেছে, আমার স্তন্য তপস্যার ফল ঐ শিশু । আমার স্বামীপুত্র ছাড়া আর কোন সম্পদ আছে—সেই স্বামীপুত্রহার হইয়া আমি যে ভাবে আছি তাহা তোমাকে বেমন করিয়া বুঝাইব ।

‘আমার কথায় আর একটি কাজ কর, দাঁঘিটার পাখে একখানি বাসলাখর শীত্র তৈরী কর । সন্ধ্যাকালে প্রতিদিন আমার বাপের বাড়ীর সূর্য দালীর কোলে হেলকে দিয়া সেই ঘরে পাঠাইয়া দিও । আমি দুপুর রাত্তি সেই ঘরে যাইয়া আমার যন্ত্রকে দুধ খাওয়াইয়া আসিব ।

‘একথা যেন একটা কাঁট কি পতঙ্গ জামিতে না পারে, গোপন রাখিও ।

‘এই এক বছর যদি করে দুষ্ক পান

তবে তো হইবে ছেলে ইন্দ্রের সন্তান ।’

এই একটি বছর বুক বাঁধিয়া থাক, শোক কর না, এক বছর সময় আগমনে দিবেন তাই হবে ।’

রাজা দেখিলেন—রাণী ঠিক তেমনই আছেন, কোন বেশ ও অভরণ পরিয়া রাণী কখনও বেশভূষার দিকে আক্ষেপ করিতে ন না, এখনও সেই এলোমেলো অসম্বৃত বেশ । সেই সোণের মত—চাঁপাফুলের মত বর্ণ তেমনই আছে, পরনে সেইরূপ অগ্নিপাতের শাড়ী । পাটগুটির অঙ্গ পূর্ববৎ মান অহংভেদের অলংকার বলমল করিতেছে, সেইরূপ শাড়ীর মূঁচল ও ফেশ-পাশ বাতাসে উড়িতেছে, আর সেইরূপ দেহ-বিবলিত আদরের ডাক—‘তাহা সর্বদা স্বপ্ন অমৃতের প্রলেপ দিল ।

‘একেত বাউরা রাজা গো আরো হইল পাগল

স্বপনের দেখা শুনা—না পায় লাগল ।’

রাজা পরদিন পাত্রমিত্র সকলকে ডাকাইয়া আনিলেন, তাঁহার চক্ষে জল,—মুখের পরিমলান মাধুরী যেন করুণরসে ভরপুর। তিনি দীঘির পারে, একদিনের মধ্যে একখানি সুন্দর বাঙ্গলাঘর নির্মাণ করিতে হুকুম দিলেন। বহু কারিগর নিযুক্ত হইল, আদেশ হইল যেন গৃহে কোন রক্ত না থাকে ; রৌদ্র, হাওয়া ও জ্যোৎস্না হইতে সম্পূর্ণ মুক্ত রাখিতে হইবে এই গুপ্ত গৃহ।

কারিগরেরা গছারির কাঠ দিয়া থাম নির্মাণ করিল, সেই থাম কত বিচিত্র কারুকার্যে খচিত। উলুহনের চাল এমন শক্ত ও সুঠাম হইল যে তাহা সম্পূর্ণ হইলে পর, ওস্তাদ তাহার উপরে স্থূপে স্থূপে খড় বাখিয়া আশুন ধরাইয়া দিলেন, খড়গুলি পুড়িয়া তাহাব ছাই বাতাসে উড়িয়া গেল, কিন্তু চালের কোন অংশ পুড়িল না ; উলুখড়ের চালের উপর ছেঁচা বাঁশের ঢাকনিতে অগ্নিদেব কিছুকাল থাকিয়া উহা আরও পরিষ্কার করিয়া গেলেন, চালগুলি ঝলমল করিতে লাগিল। শীতলপাটীর নানারূপ ফুলপল্লবের গেরো লইয়া গৃহখানি যেন হাসিয়া উঠিল। সেই বেতের গেরোগুলির মধ্যে তত অঙ্গরা কিন্নরীর মুখ, কত হাতীর গুঁড়, কত অশ্বারোহী, কত বিচিত্র ও উজ্জট, গাশ্ব-গুফগুস্ত ভূত্যের মুখ—এই শীতলপাটী ঘেরা ঘরের বেড়াও নানারূপ আভের সংযোগ। ও কারুকার্যে দর্শনীয় হইল। সেই সুস্ব শীতলপাটীতে সুনির্মিত ঘরখানি একেবারে নীরুদ্ধ, একটি পিপড়ার পথও তাহাতে নাই,—গৃহের মধ্যভাগে গুল্ল দর্পণের ন্যায় একখানি পালক বাগা হইল ; সিলেটের বহুমূল্য শীতলপাটী তদুপরে সজ্জিত এবং উৎকৃষ্ট মশারি ও ফোঁদী বালিশ ও অপরাপর আসবাবে শয্যাটী সর্বাপেক্ষা সুন্দর করা হইল। সারা রাত্রি একটা পুতের বাতি স্বর্ণপ্রদীপে জ্বলিতে লাগিল। সন্ধ্যাকালে সুয়া দাসী সুগন্ধি চন্দন চুয়া ও বাটাভরা পান সহ রাজকুমারকে ত্রোড়ে করিয়া সেই গৃহে প্রবেশ করিল। সেই ঘরে আর একটা শয্যা, তাহার ওত্র শোভা দুগ্ধে বর্ণকে ও হার মানাইয়াছিল।

এইভাবে প্রতিদিন প্রত্যেকে সুয়া দাসী কুমারকে লইয়া গৃহে প্রবেশ করে এবং কারি শেষ না হইতে হইতেই তথা হইতে চলিয়া আসে। একদিন রাজা সুয়া দাসীকে লিডাশে ডাকিলেন, ‘এক বছর তো প্রায় শেষ হইল, তুমি বোজাই ত কুমারকে লইয়া এখানে রাত্রি-বাস কর ; অর্ধেকিক কিছু কি দেখিতে পাইয়াছ ?’

সুয়া বলিল, প্রতি রাত্রে রাণীমা আসিয়া কুমারকে দুপ খাওয়াহরণ যান :—

‘সেই মত হাব ভাব দেখিতে তেমন।

সেই মত দেখি রাণীর কোমল বসন।

সেই মত চাঁচর বেশ সাজ, গলে উজ্জ।

সেই মত সর্ব অঙ্গ রতনোত্তম গুড়া।

সেই মত শিকন তার অগ্নিপাটের শাড়ী।

সেই মত দেখি রাজা কোমল সোনারী।

রাজনী বঞ্চিয়া পুষ শিশু লইয়া কোবে।

রজনী পোহাইয়া পান, না দেখি সে আরো।

ঘর বাবা দুয়ার উদ্বা—সেই মত দেখা যায়,

কোন বা পথে আইসে রাণী কোন বা পথে যায়।’

রাজা সুয়াকে বলিলেন, 'এক বছরের আর একটীমাত্র দিন বাকী আছে, সুয়া, আমি আমার রাণীকে দেখিব, আমি আর সহ্য করিতে পারিতেছি না। তুমি আজ কুমারকে বৃকে লইয়া সাজের বেলা শীঘ্র শীঘ্র সেই ঘরে প্রবেশ করিও।'

সন্ধ্যায় সুয়া কুমারকে লইয়া গৃহে প্রবেশ করিল।

সোণার বাটায় পান সুপারি-চুয়া-চন্দন লইয়া সুয়া দাসী দলে যাইয়া দরজা আঁটিয়া বাঁধিল। কুমারকে পালঙ্কে শোয়াইয়া নিজে তাহার পার্শ্বে উইল।

এদিকে দ্বিপ্রহর রাত্রিতে রাজা তাহার বাহির বাসল্যায় হইতে রাণীকে দেখিতে বাহির হইলেন। তখন পৃথিবী শুদ্ধ—সেই বিশাল পুরীর একটি কোকণ জাগিয়া নাই। পুকুরের চারি পারে ফুলের গাছ, ব্যতাস নাই, ফুলগুলি হেলেও না দোলেও না, চিত্রপটের মত শুদ্ধভাবে দণ্ডায়মান। রাজা সকল পাপ ঘুরিয়া পাগলের মত, লিখিব যে দিকে পূব-দুয়ারী কুমারের ঘর, সেইদিকে চলিয়া আসিলেন।

তখন প্রায় ভোর হইয়া আসিয়াছে। সুগোখিত সোণার কোকিলের কণ্ঠের জড়তা তখনও যায় নাই, তাহার আঁপ আঁপ ভাঙ্গা সুর থমকিয়া আকাশের কোণে শোনা যাইতেছে। এই সময় পাগল রাজা যেন বাহ্যজ্ঞান হারাইলেন।

তখন পূর্বোদয় আসিল। সে কোন পাহাড়ের সর্বোচ্চ পর্বত মাণিক! একটী মাত্র মাণিকের প্রভাষ চৌদ্দভুবন আলোকিত করিতেছে। কোন কোন পর্বতশীর্ষে মাত্র বাতি জ্বলাইলেন, সেই একটী বাতিতে সবগুলি ঘর আলোকিত হইয়া উঠিল।

পূব দিকের সমুদ্রে সূর্য স্নান করিলেন, সেইখানে পাহাড়ের দাঁড়াইয়া প্রসাধন করিলেন, উষা-কন্যার সহিত মিলিত হইতে যাইলেন। তাহার বিহীন পূর্ব দিকে বাঁধার জন্য রথখানি প্রস্তুত করিতে অনুমতি করিলেন, উষা সর্বত্র সন্ধ্যার সময় সাদা সমস্ত শরীর, তাহার পাখা দুইটা আগুনের বর্ণ। কিন্তু তার পস মোড়া দান্যকে হারাইয়া দেয়—গতির চক্রাকাব আবর্ত—সে মোড়াকে মোড়া বলিয়া চিহ্নিত উপায় নাই। পূব পাহাড়ের পথে রথ উষার সঙ্গে মিলনের জন্য রওনা হইল।

এই সময় পাগল রাজা আশংক্য বেশে, জাগর হ্রাস্ত চোখে—উষ্ণ-শুষ্ক মুখে সেই গরের দ্বারে আসিয়া দাঁড়াইলেন।

'সুয়া দ্বার খোল, আমি আর সহ্য করিতে পারিতেছি না, একবার রাণীকে দেখাইয়া আমার প্রাণ বাঁচাও।'

তাঁহার পদ-শব্দে চমকিত হইয়া রাণী দ্রুত পদে আসিয়া দ্বার মোচন করিলেন—

'হায় হায় করিয়া রাজা ঘরে সাপুটিয়া  
রাজ্যব কান্দনে গলে পাখাঘের হিয়া।'

রাণী বলিলেন, 'আমার পাণপতি—আমাকে ছাড়িয়া দাও—আজ আমার পাপ মোচন হইবে, আমি দেবপুত্রের ঘাঁসিব।'

'এই কথা বলিয়া রাণী শূন্যে গেল উড়ি।  
সন্তোষে ছিড়িয়া রইল অগ্নিপাটের শাড়ী॥'

## এই গীতিকার ঐতিহাসিকতা

দীখির জলে রাণী আত্মোৎসর্গ করিয়াছিলেন, ‘শুষ্কোদ্ধার’ হইয়াছিল, যে কারণেই হউক দীর্ঘ জলে ধৌ ধৌ করিয়া পূর্ণ হইয়া উঠিয়াছিল। এই পর্যন্ত ঐতিহাসিক সত্য। তারপর বাণীর শোক সহ্য করিতে না পারিয়া রাজা জানকীনাথ মল্লিক অকালে প্রাণত্যাগ করিয়াছিলেন, ইহাও ঐতিহাসিক সত্য।

স্বামীর পূর্ণসংস্কারের উদ্ধারের জন্য শুদ্ধা অপাপবিদ্ধা, পতিব্রতা রাণী—সরল বিশ্বাসের হোনাগ্ৰিতে আত্মত্যাগ করিয়াছিলেন। শিক্ষিত লোকেরা এই কুসংস্কারের যতই দোষ বাহির করুন না কেন, এবং এই কার্যের বিরুদ্ধে বৈজ্ঞানিক টিটকারি দেন না কেন—জন-সাধারণ এই বিশ্বাসপরাধগার স্বর্ণছবি নানারূপ অলৌকিক সৌন্দর্য ও ঘটনার পরিকল্পনা করিয়া সজাইয়াছে। বৈজ্ঞানিক খুঁটিনাটি প্রশ্ন না তুলিয়া আমি এই সাধারণের পরিকল্পিত দেবমূর্ত্তমান্নিন পাদপদ্মে শ্রদ্ধা ও ভক্তির পুষ্পাঞ্জলি দিতেছি। এইরূপ আত্মত্যাগ যাহাদের দেশে গাটীনকালে দুর্গত ছিল না। যাহারা স্বামীর চিতানলে স্বামীর শবের পাশে বসিয়া দিনবরজিত ললাটে, ও অগ্নিপাটের শাড়ী পরিয়া শব্দবৎ হইতে—হাতা হস্তের চক্ষু আদর্শ দেখাইতেন, অগ্নি-জ্বালা যাহাদের অঙ্গে কোন ব্যথা পড়ে নাই—এতদেশের সেই শত শত সহস্রমরণযাত্রী সতীবৃন্দের পার্শ্বে রাণী বঙ্গলার অন্যতম প্রমোদ স্তম্ভ আছে। এই গল্পটী অপরদেশীয়দের জন্য লিখিত হয় নাই। ইহা তাহাদের জন্যই লিখিত হইয়াছে, যাহারা আত্মবলি দিয়া প্রেমের মাহাত্ম্য দেখাইয়া গিয়াছেন—তাহাদেরই বংশধর।

এই পল্লীগীতিকারী ভদ্ররচন্দ্র নামক এক পল্লী কবি রচনা করিয়াছিলেন। সপ্তদশ শতাব্দীর প্রথম ভাগে ইহা রচিত হইয়াছিল বলিয়া মনে হয়। রাজা জানকীনাথ ষোড়শ শতাব্দীর শেষ ভাগে জীবিত ছিলেন।





## রাণী কমলা

### দ্বিতীয় গীতিকা

কমলারাণী চলিয়া গিয়াছেন, পত্নীবিয়োগ-বিধুর রাজা জানকীনাথ শোকে আহার-নিদ্রা ছাড়িয়া দিয়াছেন। এমন যে দুধে আলতার বর্ণ তাহাতে কালি পড়িয়াছে ; তাহার দেহ অর্ধেক হইয়াছে, সর্বদা বার-বাঙ্গলা ঘরে কমলাসায়রের দিকে তাকাইয়া থাকেন এবং চোখের জলে অবিরত মুখমণ্ডল প্লাবিত হয়। ‘রাণী আমায় ফেলিয়া গিয়াছে। তোমাকে ছাড়া আমি থাকিতে পারিতেছি না, আর দুখের ছেলেকে কার কাছে দিয়া গেলে, আমি তাহাকে কিরূপে পালন করিব!’—সর্বদা এইভাবে বিলাপ করেন। কখনও কখনও, যেমন কোন অন্ধ ঘরনয় তাহার লাঠি খুঁজিয়া বেড়ায়, তেমনই রাজা বিছানা হাতড়াইয়া কি খুঁজিতে থাকেন। সেই গৃহে রাণীর নিশ্বাসের সুরভি আছে এবং শয্যায় সেই স্পর্শ আছে।

একদিন রাজা শয্যায় শুইয়া ‘হায় রাণী’ ‘হায় কমলা’ বলিয়া স্বপ্নঘোরে কাঁদিতেছেন, এমন সময়ে তিনি দেখিলেন, যেন রাণী দীঘির জল হইতে উঠিয়া তাহার শয্যায় বসিলেন ; রাণী তাহার গায়ে হাত বুলাইতে লাগিলেন ; সেই আদরে রাজার চক্ষু হইতে টপ্ টপ্ করিয়া জল পড়িতে লাগিল।

রাণী বলিলেন, ‘দীঘির পারে পূব-দুয়ারী একটি ঘর তৈরী করে রাখ, যখন প্রতিদিন দাসদাসীরা বু-মারকে সাজের সময় বেড়াইয়া লইয়া ঘুম পাড়াইতে আসিলে, তাহাদিগকে এই আদেশ দিও, ‘খোকা ঘুমাইলে তাহাকে সেই নূতন ঘরে যেন শয্যায় রাখিয়া চলিয়া যায়। আমি তাহাকে নিশিরাঙে যাইয়া স্তন্য পান করাইয়া আসিব। আমার স্তন্য পান করিয়া শিশু অল্পসময়ের মধ্যে বাড়িয়া উঠিবে।’

রাণীর স্বর তখনও রাজার কর্ণে ছিল, তিনি সেই সুকণ্ঠের স্বর শুনিতে শুনিতে যেন স্বর্গের আনন্দে বিভোর ছিলেন, এমন সময় সহসা ঘুম ভাঙ্গিয়া গেল। রাণীর রূপ এমনই স্পষ্ট ও তাহার স্বর এমনই মিষ্ট যে রাজা তাহা স্বপ্ন বলিয়া ভাবিতে পারিলেন না। তিনি মনে করিলেন, রাণী সত্যসত্যই আসিয়া দেখা দিয়া গিয়াছেন।

‘শরীরের মধ্যে পাইতেছি রে

রাণীর অঙ্গের পরশন।’

এই স্পর্শ এই আদর কখনও মিথ্যা হইতে পারে না। আমার কি কালনিদ্ৰাই পাইয়াছিল, হায়! তিনি আসিয়াছিলেন, আমি কেন তাহাকে আঁকড়াইয়া ধরিয়া রাখিলাম না।



“কেউবা লইল খানদূর্ব্বা দেবেরে পূজিতে ।  
ছানের যত আয়োজন কেউবা লইল মাথে ।”

‘তাকে পাইয়া হারাইলাম নিজ কর্ম দোষে  
দারুণিয়া ঘুম এসেছিল আমার চক্ষুদুটীর পাশে।’

পরদিন দীঘির পারে, পূব-দুয়ারী ঘর তৈরী হইল। তাহাতে কোমল শয্যা প্রস্তুত হইল, ঘুম পাড়ানিয়া দাসীরা কুমারকে সন্ধ্যার সময় বেড়াইয়া লইয়া আসিয়া সেই শয্যায় শোওয়াইয়া চলিয়া গেল।

রাজার মনে হইতে লাগিল, যেন দীঘির জল হইতে এক মহিমময়ীমূর্তি স্নেহের আবেগে দুই হাত বাড়াইয়া নূতন ঘরে ঢুকিলেন।

এইরূপ প্রতিদিন শিশু কুমার রঘুনাথ একাকী শয্যায় থাকেন, কিন্তু তাঁহার কান্দি দিন দিন বাড়িয়া চলিতেছে, ছয় মাসের মধ্যে শরীর বলিষ্ঠ ও কণকন্ত হইয়া উঠিল। রাজার মনে নিশ্চয় বিশ্বাস হইল, সত্যই রাণী পুত্র-স্নেহে সেইখানে আসেন এবং তাহাকে স্তন্যদান করেন—না হইলে শিশু ইহার মধ্যে এমন অলৌকিক রূপ ও কান্দি কোথায় পাইবে?

একদিন রাজা মনে স্থির করিলেন, আজ আমি নিশ্চয়ই রাণীকে একবার দেখিব। ঘুমের ঘোরে একদিন তাঁহাকে পাইয়াও হারাইয়াছিলাম, আজ আর সেইরূপ ভুল হইবে না। আমি যেরূপে পারি, তাঁহাকে ধরিয়া রাখিব।

রাণী প্রতি রাত্রেই আসেন, রাজার আদেশে সেই শয্যার এক কোণে সোণার বাটায় সুগন্ধি পান, ও চুয়া-চন্দন রাখিয়া দেওয়া হইত। কিন্তু রাণী তাহা স্পর্শও করেন না।

‘না ছোঁয় পান, না ছোঁয় শুয়া, রাণী যায় স্তন্য দিয়া।

মর্তের মাটি ছাড়িয়া আস্যাছি, তার লাগি কেন মায়া?’

রাজা ভাবেন, রাণী যদি একটী পান মুখে দেন, একটীবার চুয়া-চন্দনের গ্রাণ গ্রহণ করিলে—তবে তিনি কৃতার্থ হন। কিন্তু বিদেহী রাণী, রাজার ভালবাসা দেখিয়া মনে মনে দুঃখের সহিত একবার হাসেন; রাণী ভাবেন, ‘আমি তো সনাত সুখই ছাড়িয়া পৃথিবীর অসুখাশ কাটাওয়া আসিয়াছি, আমাকে সামান্য একটা পানের আদর দেখাইয়া আবার আমার দিকে টানিতেছেন কেন? এই জেলে বংশের একমাত্র প্রদীপ, ইহাকে হারাইলে এই রাজ্যছত্র শূন্য হইবে, ও এই অসুখাশ বাতি নিশিয়া যাইবে, এইজন্য আমার এখানে আসা।’

সেইদিন রাজা চিন্তা করিয়া সন্ধ্যার পর হইতে আরান-গৃহ ছাড়িয়া দীঘির পারে বেড়াইতে লাগিলেন। রাজা দেখিলেন কমলাসায়রে একটী ফুল্লকমল ফুটিয়াছে, তখন ‘আমার কমলা কোথায়’ ভাবিয়া রাজার চক্ষে অশ্রু টলুটলু করিতে লাগিল।

রাত্রি এক প্রহর হইল, তখনও বাজপথে জনতা কমে নাই; পথচারীর ডাকাডাকি, দোকানদারগণের হাকহাকি ও যান-বাহনের শব্দে রাস্তাঘাট সরগরম। দ্বিতীয় প্রহরেও কৃষকের ভাটিয়াল রাগ—বড় মানুষের জোলসী বৈঠকে নৃত্যগীত, টোলের ছাত্রদের ব্যাকরণ আবৃত্তি শোনা যাইতে লাগিল। দ্বিপ্রহর রাত্রে অভিসারিকার মস্তুর পাদক্ষেপ ও ঘোমটার অন্তরালে অতিমৃদু গ্রেম-আলাপন, ঘুম-ভাঙ্গা শিশুর কুন্দন ও দুধের বাটী ও

ঝিনুরের ঈনটুন শব্দ—এসকলও খামিয়া গেল, এবং তৃতীয় প্রহরে কুচিং গৃহপালিত পাখীর মিষ্ট কলরবে গুঞ্জরিত বাতাস যেন ঘুমের ঘোর ছড়াইয়া দিল। তখন নিস্তর্র আকাশে তারাগুলি নিম্পন্দ হইয়া চাহিয়া আছে, কমলা সায়বের কমলটী নিজের রূপের ভরে ঘুমের আবেশে হেলিয়া পড়িয়াছে, এবং সারা জগৎ সুশুস্তির আবেশে নিশ্চল ভাবে মোহাচ্ছন্ন হইয়া পড়িয়াছে।

রাজার চোখ দুটি একবারও মুদিত হয় নাই ; তাঁহার বিরহ-ক্লান্ত চক্ষু হইতে ঘুম চলিয়া গিয়াছে। রাজা এই নিথর নিস্তর্র রজনীতে দেখিলেন, দীঘির একটী কোণ হইতে এক অপূর্ব জ্যোতিঃ ফুটিয়া উঠিয়াছে এবং ক্ষণপরে এক জ্যোতির্ময়ী মূর্তি ধীরে ধীরে উঠিয়া দীঘির পারে চলিয়াছেন। রাজ্য দুটি চক্ষুর সমগ্র দৃষ্টি সেই মূর্তির দিক নিবদ্ধ করিয়া বুঝিলেন এ তাঁহারই কমলারাণী—যাহার জন্য তিনি এই ছয় মাস বিলাপ করিয়া কক্কাল-সার হইয়াছেন।

অমনই সেই শীর্ণ শরীরে অসামান্য শক্তির সঞ্চয় হইল, তিনি সেই মূর্তির পাছে পাছে উন্মত্তের ন্যায় ছুটিলেন। রাণী নূতন ঘরে প্রবেশ করিয়া শিওকে স্তন্য পান করাইলেন এবং তাহার পর শিশুর চোখের উপর তাঁহার কোমল কর বুলাইয়া ঘুম পাড়াইলেন। তখন রাত্রি প্রায় শেষ হইয়া আসিয়াছে, — প্রভাতের বায়ু ঘোষণা দিগন্ত হইতে মাঝে মাঝে আসিয়া সুস্তের চোখের ঘুম আবও গাঢ়তর করিয়া দিতেছে।

যখন রাণী বাস্তি হইয়া আসিতেছিলেন, অমনই রাজা তাঁহাকে জড়াইয়া ধরিলেন। তাঁহার চক্ষু দুটি কান্দিয়া জবা ফুলের মত লাল হইয়াছে, ‘দাদী! কমলা, আমাকে ফেরিগা যাইও না, আমি আর তোমার বিরহ সহ্য করিতে পারিতেছি না ; না হয় তুমি যেনায়ে যাইতেছ, আমাকে সেইখানে লইয়া যাও।’ উন্মত্ত বেগে রাণী ছুটিয়াছেন, উন্মত্ত বেগে রাজা পিছু পিছু যাইতেছেন ; হঠাৎ রাণী সেই সায়বের ঝাপাইয়া পড়িলেন, রাজা তাঁহার আঁচল দৃঢ়মুষ্টিতে ধরিয়া বলিলেন, ‘এ কাল দীঘিরে যাইও না, রাণী! দোহাই তোমার।’ বাকী রাষ্ট্রটুকু রাজা সাতরাইয়া দীঘির শেওলা হাতড়াইয়া কাটাওয়া দিলেন। প্রাতে লোকে দেখিল দীঘির মধ্যে এক রূপমান কৃশ মূর্তি। রাজাকে চিনিতে বিলম্ব হইল না। তাঁহার সমস্ত শরীর পানা শেওলা ও গন্ধ-পুকুরের পর্দেব নাগে আচ্ছন্ন ; চক্ষু দুটি লাল, কথা বলিবার শক্তি নাই, হস্তে দৃঢ় মুষ্টিতে রাণীর অগ্নিপাট শাড়ীর অঞ্চলের একটী অংশ ধরিয়া আছেন। এই ভাবে রাজার মৃত্যু হইল। সবদমে বলিষ্ঠা, ‘এ শাড়ীর অংশ রাজা কিরূপে পাইলেন?’ ইত্যত তাঁহার মনের একপ্রতা ও ভালবাসার আবেষ্টনীর মধ্যে রাণীর স্মৃতির এই অংশটুকু রূপায়িত হইয়া উঠিয়াছিল! এই বস্ত্রাংশ কোন তাঁতী বা কোলা তৈরী করে নাই, উহা তাহার মনের সৃষ্টি— প্রেম যে অমর তাহারই নিদর্শন।

শোকাহত রাজা জানকীনাথ এই ভাবে প্রাণত্যাগ করিলেন। রাজ্যে অতি পার্মিক এবং প্রজাবৎসল ছিলেন। তাঁহার অকালমৃত্যুতে সমস্ত রাজ্যময় শোকের বন্যা বহিয়া গেহা।

শিশু রঘুনাথকে উজির নাজির ও মন্ত্রীমণ্ডলী প্রাণ-প্রিয় জ্ঞানে পালন করিতে লাগিলেন, তাঁহারা প্রতিনিধি-স্বরূপ রাজ্য শাসন করিলেন। শিশু কুমারের প্রতি প্রজাদের আন্তরিক দরদবশতঃ তাঁহারা মুক্ত হস্তে রাজস্ব দিতে লাগিল, ফলে রাজ্যের আয় বাড়িয়া গেল। রঘুনাথের যখন পাঁচ বৎসর বয়স, তখন মন্ত্রীরা তাহাকে সিংহাসনে অভিষিক্ত করিলেন। তীর্থোদকে স্নান করাইয়া, চন্দন কুঙ্কমে অঙ্গরাগ করাইয়া, কস্তুরীর তিলক কপালে পরাইয়া, কজ্জলে চন্দ্র-রঞ্জিত করিয়া মন্ত্রীরা তাহার মাথায় শ্বেত ছত্র ধরিলেন ; কেহ কেহ স্বর্ণদণ্ড চামর ব্যঞ্জন করিতে লাগিলেন এবং অন্তঃপুরিকারা চোখের জল মুছিয়া জয়জয়কার ও শঙ্খধ্বনি করিতে লাগিলেন ; এদিকে যন্ত্রী-তন্ত্রী ও গায়কেরা চোখের জল মুছিয়া উৎসবে যোগদান করিলেন, ‘আমাদের কুমারকে স্বর্গগতা রাণী স্তন্য দিয়া যাইতেন এবং এই ছেলে রাজার চোখের তারা ছিল’—এই বিলাপ ধ্বনির সঙ্গে উৎসবের উচ্চ কলরব শোনা যাইতে লাগিল।

দক্ষিণে জঙ্গলবাড়ী নামক নগর তখন একটা প্রসিদ্ধ স্থান ছিল, সেখানে দেওয়ান ইশা খাঁ রাজত্ব করিতেন। ইশা খাঁর দোর্দণ্ড প্রতাপ সকলের বিদিত ছিল। তিনি দিল্লীশ্বর আকবরের সঙ্গে বহুবার যুদ্ধ করিয়াছিলেন। ভূঞা রাজাদের মধ্যে তিনি ও প্রতাপাদিত্য ছিলেন সর্বপ্রধান। ইশা খাঁ মস্তবড় পালোয়ান ছিলেন ; তিনি হাতীর গুঁড় ধরিয়া চক্রাকারে তাহাকে আকাশে ঘুরাইতে পারিতেন, তিনি যখন রোষাবিষ্ট হইয়া গর্জন করিতেন, তখন মনে হইত আকাশের মেঘ ভাঙ্গিয়া পড়িতেছে এবং যখন নদী-তটে হাঁটিয়া বেড়াইতেন, তখন তাঁহার পাদক্ষেপে নদীর পাড় কাঁপিয়া উঠিত।

কিন্তু রাজা জানকীনাথ ছিলেন ইশা খাঁর শত্রু। উভয়ে বহুবার লড়াই করিয়াছেন, কিন্তু কে বড়, কে ছোট, তাহা লোকে বুঝিতে পারিত না।

জঙ্গলবাড়ী হইতে ইশা খাঁ তাঁহার চির বৈরী জানকীনাথের মৃত্যুসংবাদ শুনিলেন। তিনি তাঁহার অজেয় সৈন্য সামন্ত লইয়া সুসুঙ্গ দুর্গাপুরের দিকে রওনা হইয়া আসিলেন।

অকস্মাৎ গ্রাভনের মত আসিয়া ইশা খাঁর সৈন্যগণ সুসুঙ্গের দুর্গ অবরোধ করিল। তিন মাস কাল দেওয়ান ইশা খাঁ দুর্গাপুর রাজধানী অবরোধ করিয়া রহিলেন। তিনি ছিলেন অতি ফদীবাজ লোক, বিনা সংবাদে এবং এরূপ দ্রুতভাবে ইশা খাঁ আসিয়া পড়িয়াছিলেন যে দুর্গাপুরের লোক পূর্বে তাঁহার অভিযান টের পাইয়া প্রস্তুত হইতে পারে নাই। তিন মাস কালের মধ্যে রাজধানীর দুর্গের রসদ ফুরাইয়া গেল এবং এক অন্তঃস্থ মুহুর্তে ইশা খাঁর সৈন্য অনাহার-ক্লিষ্ট রাজসৈন্যদিগকে হটাইয়া দিয়া অতর্কিত ভাবে রাত্রিকালে শিশু রঘুনাথকে হরণ করিয়া লইয়া গেল।

সমস্ত দুর্গাপুর অঞ্চলে হুলস্থূল পড়িয়া গেল। ‘আমাদের প্রাণের কুমারকে চুরি করিয়া লইয়া গিয়াছে, এই পুরীর আর কি রহিল? রাজার ঘরের বাতি নিভাইয়া দিয়াছে,’ এই বলিয়া কেহ বুক চাপড়াইয়া কাঁদিতে লাগিল, কেহ নদীতীরে, কেহ রাজপথে ধূলায় লুটিয়া গড়াগড়ি যাইতে লাগিল, কেহ কেহ ত্রুন্ধনেত্রের দূর দক্ষিণ মূলুকের দিকে দৃষ্টিপাত করিতে লাগিল। তাহারা রাজাকে উদ্ধার করিবার জন্য সর্বস্ব পণ করিয়া বসিল।

ইহার মধ্যে উত্তর পাহাড়ে রাজার গারো প্রজারা এই দুঃসংবাদ শুনিতে পাইল। বারুদে অগ্নিসংযোগ করিলে যেরূপ হয় তাহারা সংবাদ শুনিয়া তেমনই জুলিয়া উঠিল, ক্ষিপ্তভাবে সমস্ত পাহাড়ময় পাগলের মত কি করিবে, তাহাব উপায় স্থির করিতে ঘুরিয়া বেড়াইতে লাগিল।

‘মুল্লুক ভাঙ্গিয়া তারা পাগল হইয়া ফেরে।  
কেমন হিম্মৎ বেটার রাজারে নিছে ধরে॥  
তার মুণ্ড কাটা ফেলা মু সায়েরের মাঝে।  
তা’ নইলে পারাপার নাহি এই কাজে॥  
জঙ্গলবাড়ী সহর ভাইঙ্গা করব গুড়া গুড়া।  
ইহার শাস্তি দিতে হবে মোদের আচ্ছা কর্যা॥  
রাজার লাগিয়া তারা পাগল হইয়া ফেরে।  
কতক গিয়া দাখিল হৈল জঙ্গলবাড়ী স’রে॥’

দশফলকযুক্ত বর্ষা, রাম-কাটারি, বল্লম ও ধনুর্বাণ লইয়া ত্রিশ হাজার বাছাই-করা গারো সৈন্য বিদ্যুৎবেগে ছুটিল। পাহাড় হইতে যেন প্রচণ্ড বেগে ঢল নামিয়া আসিল। চামুণ্ডার দলের মত ভীষণ-দর্শন এই ক্ষিপ্ত গারো-সৈন্য জীবনপণে তাহাদের রাজাকে উদ্ধার করিতে ছুটিয়াছে। তাহাদের উদ্দণ্ড-তাণ্ডবে পদভরে ধরিত্রী মুহূর্মুহু কম্পিত হইতে লাগিল।

পূর্বেই বলিয়াছি, দেওয়ান ইশা খাঁ খুব ফন্দিবাদ যোদ্ধা। তিনি তাঁহার রাজধানী জঙ্গলবাড়ী সহর এমন সুরক্ষিত করিয়া রাখিয়াছিলেন যে কাহার সাধ্য তথায় প্রবেশ করে! সহরের চতুর্দিক ব্যাপিয়া পরিখাটী (গাঙ্গিনা) বিশাল ও অতল-স্পর্শ। গারোরা সেই পরিখার উত্তর পারে জঙ্গলে আসিয়া পরিখা দেখিয়া স্তম্ভিত ও হতবুদ্ধি হইয়া দাঁড়াইল। পরপারে লক্ষ সৈন্য পাহারা দিতেছে, তাহাদের অস্ত্র-শস্ত্রের অবধি নাই। বন্দুকধারী এই সকল শিক্ষিত সৈন্যের সঙ্গে বর্ষা ও বল্লম লইয়া তাহারা কি করিবে? গারোরা তাহাদের দেশের বেগবতী পাহাড়িয়া নদী সাঁতড়িয়া পার হইতে পারে, সে হিসাবে এই গাঙ্গিনাটী বিরাট হইলেও দুর্লভ্য নহে। কিন্তু গাঙ্গিনার মধ্যে ইশা খাঁ বড় বড় হাঙ্গর-কুমীর রাখিয়া দিয়াছেন, সেই জলে নামিয়া স্নান করিতে বড় বড় যোদ্ধারাও সাহস করে না। একদিকে পরিখা সেই সকল করালদংষ্ট্রী হিংস্র জন্তুতে পূর্ণ, অপর পারে ইশা খাঁর দুর্ধর্ষ সৈন্য।

তাহারা সারাটী দিন সেই জঙ্গলের মধ্যে লুকাইয়া থাকিয়া নানারূপ উপায় উদ্ভাবন করিতে লাগিল, কিন্তু কোনটাই মনঃপূত হইল না। অবশেষে এক বৃদ্ধ গারোর পরামর্শ সর্বসম্মতিক্রমে গৃহীত হইল। তিন ক্রোশ দূরে ‘ধনাইর খাল’ নামক একটী নদী আছে। সেই বৃদ্ধ গারো বলিল, ‘যদি রাতারাতি আমরা অন্ধকারে নালা কাটিয়া এই গাঙ্গিনার সহিত নদীর যোগ করিতে পারি, তবে ইশা খাঁর ভাওয়ালিয়াগুলি দিয়াই আমরা জঙ্গলবাড়ীর সহরে পৌছিতে পারিব।’

সেই রাত্রি আঁধার ও মেঘপূর্ণ ছিল, নিঃশব্দে দূরে ‘ধনাইর খাল’ হইতে তাহারা নালা কাটিতে আরম্ভ করিল। ত্রিশ হাজার সবল হস্তের কোদালের আঘাতে রাত্রি এক প্রহরের মধ্যেই নালা কাটা শেষ হইয়া গেল।





কুমার রঘুনাথকে ধরিয়া আনিয়া ইশা খাঁ জঙ্গলবাড়ীতে বিজয়োৎসব করিতেছিলেন। সেখানে সহরের সমস্ত লোক মদ্যপান করিয়া আনন্দোৎসবে মত্ত হইয়াছিল। এমন সময় যে গারোরা এরূপ কাণ্ড করিবে, তাহা কে জানিত?

ইশা খাঁর ভাওয়ালিয়াগুলি ঘাটে ঘাটে বাঁধা ছিল, মাঝিমাঝারা নিশ্চিন্তভাবে উৎসব করিতেছিল,—গারোরা সেই শত শত রণতরী খুলিয়া লইল এবং বন্যার মত যাইয়া বন্দী-শালার প্রহরীদিগকে মারিয়া রাজকুমারকে উদ্ধার করিয়া লইয়া আসিল। এই ঘটনা যেন চোখের পলকে ঘটিয়া গেল।

‘ভাওয়ালিয়ায় উঠিয়া তবে দাড় মারল টান।

পঞ্জী-উড়া করে যেমন পবন সমান॥

তিন দিনের পথ যায় প্রহরেতে বাইয়া।

ইশা খাঁ নাগাল পাবে কেমন করিয়া॥’

### মন্তব্য ও আলোচনা

যতই কেন অলৌকিক ঘটনা সম্বলিত হউক না, কমলারাণীর এই দুইটা বাহিনী ঐতিহাসিক ভিত্তির উপর দাঁড়াইয়া আছে।

কমলারাণী একটা প্রাচীন সংস্কারের বশবর্তী হইয়া জীবন বিসর্জন দিয়াছিলেন। নূতন খনিজ দীপিতে জল না উঠিলে লোকে নরবলি দিত। এইরূপ বিশ্বাস ছিল যে দীঘি কাটিতে আরও বরিয়া জল না উঠা পর্যন্ত কাজ থামাইলে দীঘি-স্বামীর চৌদ্দ পুরুষ নরকস্থ হয়। এই সংস্কারটা সামাজিক গুরুগণ জন-হিতকল্পেই লোকের মনে সুদৃঢ় সংস্কারে পরিণত করাইয়াছিলেন। তখনকার দিনে জলাশয় খনন না করিলে কোমল পত্নী বা নগরীই বাসযোগ্য হইত না। অথচ জন-সাধারণ ছিল দরিদ্র ও সহায়হীন, দৈবে কখনও প্রচুর বর্ষণ হইত, কখনও নির্মেঘ আকাশ মাসের পর মাস আকুটি করিয়া থাকিত, এক বিন্দু জলও দিত না। রাজা বা ধনী ব্যক্তিরা খামখেয়ালী। দীঘি খনন করিতে আরও বরিয়া সহজে জল না উঠিলে হয়ত তাহারা বিরক্ত বা অসহিষ্ণু হইয়া কার্য বন্ধ করিতে ইচ্ছুক হইতে পারিতেন, কিন্তু পূর্বপুরুষেরা নরক-বাসী হইবেন এই অনিশ্চাসনের মধ্যে দীঘি জল-দানের যোগ্য না হইবার পূর্বে কেহ নিবৃত্ত হইতেন না।

অপর একটা সংস্কার কুসংস্কারে দাঁড়াইয়াছিল। যদি পুকুরে কোন ব্যক্তিকে উৎসর্গ করিয়া ফেলিয়া দেওয়া হইত, কিম্বা কর্তৃপক্ষের কেহ আত্মদান করিতেন তবে পুকুরে জল উঠিলে লোকের মনে এইরূপ একটা ধারণাও ছিল।

ওষোদ্ধারের জন্য দৃষ্টিভায়া রাজা বড়ই বিব্রত হইয়া পড়িয়াছিলেন। পাহাড়িয়া দেশ, সেখানে সহজে দীঘি কাটিয়া জল আনা যায় না। এজন্য বহু চেষ্টার ফলে দীঘি অতি গভীর করিয়া খনন করিলেও যখন জল পাওয়া গেল না, রসাতল রস-শূন্য হইয়া

জলে দানে কুণ্ঠিত হইলেন, তখন দুর্ভাবনায় বিচলিত রাজা স্বপ্নে দেখিলেন যেন কমলারানী জলে নামিতেছেন এবং সঙ্গে সঙ্গে নিম্ন হইতে জলের ফোয়ারা নিঃসৃত হইতেছে। দুর্ভাগ্যবশতঃ রাজা রানীকে স্বপ্নের বৃত্তান্ত বলাতে অনর্থ উৎপাদিত হইল। রানী এই স্বপ্নে তাঁহার আত্মদানের ইঙ্গিত বুঝিতে পারিয়া দীঘিতে জীবনদান করিতে কৃতসংকল্প হইলেন।

একথা সত্য যে রাজা জানকীনাথ মল্লিক তাঁহার স্ত্রীর নামে ‘কমলাসায়র’ নামক প্রকাণ্ড একটা দীঘি কাটাইয়াছিলেন, একথাও সত্য যে কমলারানী তাঁহার দুধের শিশুটীকে ফেলিয়া স্বামীর পূর্বপুরুষদিগকে নরক হইতে রক্ষা করিবার মানসে দীঘির জলে জীবন সমর্পণ করিয়াছিলেন, একথাও সত্য যে রাজা জানকীনাথ তাঁহার ধর্মশীলা স্ত্রীর বিরহ সহ্য করিতে না পারিয়া সেই ঘটনার অব্যবহিত পরে মৃত্যুমুখে পতিত হন এবং একথাও সত্য যে সেই পিতৃ-মাতৃহীন অভাগা শিশু পরে জাহাঙ্গীরের নিকট ‘রাজা’ উপাধি পাইয়াছিলেন।

সুতরাং এই গল্পটির মূল ঘটনা সত্য। পল্লী-কবিতা ইহার করুণাশাস্ত্রক অংশগুলির উপর কল্পনার চট্টা ফেলিয়া ইহা মনোজ্ঞ করিয়া তুলিয়াছেন। সুবর্ণমূর্তি বা মর্মরের প্রতিকৃতি যেমন প্ৰকৃত না হইয়াও তাহা লোকের স্ত্রীতি-শ্রদ্ধা আকর্ষণ করে, আধো-কল্পনাবিজড়িত কমলারানীর মূর্তি তেমনই যতন বা প্রস্তর মূর্তির ন্যায় এই ৪/৫ শত বৎসর যাবৎ লোকের শ্রদ্ধাপুষ্পাঞ্জলি পাইয়া আসিতেছে। সুসুপ্ন দুর্গাপুর অঞ্চলে রানী কমলা সম্বন্ধে পল্লীকবিতা অনেক গান রচনা করিয়াছিলেন, তাহার অনেকগুলিই পাওয়া যায় নাই। ঢেঁটা বরিলে হয়ত আরো কয়েকটী উদ্ধার হইতে পারে।

রানীর সংস্কার বা অজ্ঞতা নইয়া বিজ্ঞ পাঠকেরা যতই আলোচনা করুন না কেন, রানী কমলার চিত্র কবি-কল্পনার সংযোগে এক ভিলও মনোহারিত্ব হারায় নাই বরং তিনি কল্প-লোকের কোন স্বর্ণপ্রতিমার ন্যায় আমাদের চোখে আরও বেশী বোহিনী মূর্তিতে দেখা দিয়াছেন। তাঁহার অটুট পার্শ্বীয়, সম্রাজ্ঞীর মত সংযম ও বাহ্যবিরল প্রেম—যাহা পল্লী-কবিতা আঁকিয়াছেন তাহা আমাদের দৃষ্টিকে বিম্বিত করে এবং করুণায় আমাদের মন ভরিয়া দেয় ;—Monti de Arthur-এর আখ্যানের মত জানকীনাথের অলৌকিক প্রেমিকতা ও ত্যাগ। কবি চণ্ডীদাসের দুটী ছত্র দ্বারা রানীর চরিত্র ব্যাখ্যা করা যায়।

‘পাবিত্তি না কহে কথা।

পীরিত্তি লাগিয়া

পরায় ত্যজিলে

পীরিত্তি মিলিবে তথা।’

রাজাই কাঁদিয়া কাটিয়া বিলাপ করিয়া অসহ্য বিরহবেদনা বুঝাইয়াছেন, রানী তাঁহার স্বল্পস্থায়ী জীবনে একেবারেই বেশী কোন কথা বলেন নাই! অথচ কি গভীর তাঁর প্রেম, যিনি স্বামীর পূর্বপুরুষদের জন্য অকাতরে রাজস্বামী, চোখের পুতুল দুধের ছেলে এবং রাজৈশ্বর্য পরিভ্রাণ করিয়া জীবন আহুতি দিয়াছেন! পূর্বাধ্যায়ের কবি গল্পটী কবিত্বের ইস্রজালে মগ্নিত করিয়াছেন। যেখানে সমীরা রানীর সঙ্গে নদীতে স্নান করিতে

চলিয়াছেন, সেখানকার চিত্র কি সুন্দর! যেখানে বিরহী রাজার চোখের সামনে ধীরে ধীরে সূর্যোদয় হইতেছে, সে দৃশ্যটী বৈদিক ঋষির উষার কথা মনে করাইয়া দেয়।

‘কোন্ পাহাড়ে জ্বলে মাণিক এমন প্রবল।

এক মাণিকে চৌদ্দ ভুবন করিল উজ্জ্বল॥

কোন্ জনে জ্বালাইল বাতিরে এমন আঁধার ঘরে।

এক ঘরে জ্বালাইলে বাতি সকল উজ্জ্বল করে॥’

কবি-প্রসিদ্ধির ধার কবি অধরচন্দ্র ধারিতেন না, সূর্যের সপ্তাশ্বের কথা হয়ত তিনি শোনেন নাই। উষা যে সূর্যের প্রণয়িনী, একথা তাঁহার নিছক কল্পনা; তথাপি সূর্যোদয়ের যে বর্ণনা তিনি দিয়াছেন তাহা ঋগ্বেদের সূক্তের ন্যায়ই সরল এবং সৌন্দর্যমণ্ডিত। সূর্যের রথের ঘোড়াটির দুইটী আগুনবর্ণের পাখা। স্নানান্তে সূর্যদেব উষার সঙ্গে মিলিত হইতে যাইতেছেন, সেই চিত্রটী পাঠক মূল গান হইতে পড়িয়া দেখিবেন, আমার কি সাধ্য যে পল্লী-কবির সরল বিবৃতির পদমাধুর্য রক্ষা করিব! আমরা যাহা বলি তার অর্ধেকটার ভাষা ধার-করা, কালিদাস শেফপীয়র প্রভৃতি মহকবিগণের কথা আমাদের লিখিবার সময় মনের মধ্যে উকিঝুঁকি দিয়া আনাগোনা করিয়া রসভঙ্গ করিয়া দেয়, তারপর অভিধান তো শব্দের ভাণ্ডার খুলিয়াই আছে, সেই সকল ধার-করা শব্দ দ্বারা ভাব যতটা না প্রকাশ পায়, জটিল ও গুরু শব্দের আবর্জনায তাহা ততোধিক পরিমাণে চাপা পড়ে। ইহা ছাড়া অলঙ্কারশাস্ত্রের কৃত্রিম উপাদান—উৎপ্রেক্ষা উপমা প্রভৃতি আমাদের ভাষাতে ক্রমাগত প্রস্থন্ন থাকিয়া জাল বুনিতে থাকে। কিন্তু এই সকল পল্লী-কবি মোটেই ঐ সকল সংস্কারের অধীন হন নাই—তাহাদের একমাত্র গুরু প্রকৃতি। সাক্ষাৎ দর্শন, সাক্ষাৎ শ্রুতীই তাহাদের গল্প গড়িবার একমাত্র উপাদান। এজন্য তাহাদের কথায় একটীও অবাস্তব শব্দ নাই। তাই বর্ণনা এত সরল সংক্ষিপ্ত ও উপাদেয়। তাঁহারা যখন করুণ রসের ছবি আঁকেন, তখন যেন তাঁহাদের প্রতি ছন্দ হইতে অশ্রু ঝরিয়া পড়ে, যখন কোন চরিত্র অঙ্কন করেন, তখন দু কথায় সরল স্পষ্ট চিত্র ফুটিয়া উঠে, যদিও সে রচনা সংক্ষিপ্ত, তথাপি তাহাতে প্রাকৃতিক সৌন্দর্য যথার্থভাবে প্রতিবিম্বিত হয়; বর্ণনার বাহুল্য নাই—পৃষ্ঠার পর পৃষ্ঠা ব্যাপিয়া সূর্যোদয় বা সূর্যাস্তের উল্লেখ নাই, অথচ দুই একটী পঙ্ক্তি যেন কবি, প্রাকৃতিক বেদব হইতে মণিমুক্তা খুঁজিয়া বাহির করেন, প্রকৃতি যেন পরম কৃপায় এই পল্লী-কবিদের সঙ্গে নিজে কথাবার্তা বলেন।

সুতরাং যাহারা মূল কবিতাগুলি পড়িবেন, তাঁহারা আমার বর্ণনা পড়িয়া গল্পের কাব্যভাবের প্রবৃত্ত স্বাদ পাইবেন না। যদি আমার এই লেখায় মূল গীতিকাগুলি পড়িবার জন্য আমি কৌতূহল উদ্রেক করিতে পারি, তবেই আমার লেখা সার্থক মনে করিব।

জানকীনাথ মল্লিক আকবরের সমকালিক। গল্পের রঘুনাথকে অতি শৈশবে গারো প্রজারা জীবনপণ করিয়া ইশা খায়ের বন্দীশালা হইতে উদ্ধার করিয়াছিল, এই কথার মধ্যে অবশ্যই কিছু সত্য ছিল। কিন্তু সেই রঘুনাথ মোগল সম্রাটের বিরুদ্ধে গারোরা বিদ্রোহ করিলে এই পাহাড়িয়া প্রজাদিগের বিরুদ্ধে সামরিক অভিযান করিয়া তাহাদিগকে

দমন করেন। সেই কাজের পুরস্কার স্বরূপ জাহাঙ্গীর রঘুনাথকে রাজা উপাধি এবং খেতাব প্রদান করেন; গারোরা অতি সরল সাহসী ও বিশ্বস্ত লোক, তাহারা সাধারণতঃ রাজভক্ত, কিন্তু কি কারণে তাহারা বিদ্রোহী হইল এবং কেনই বা রঘুনাথ সিংহ, যিনি ইহাদের প্রাণপণ চেষ্টার ফলে অতি শৈশবে ইশা খাঁর মত প্রবল শত্রুর হস্ত হইতে ত্রাণ পাইয়াছিলেন, সেই পরম কৃতজ্ঞতার পাত্র প্রজাদিগের বিরুদ্ধে অস্ত্র ধারণ করিলেন, এই জটিল ঐতিহাসিক সমস্যার আমরা এখনও সমাধান করিতে পারি নাই। রাজবাড়ীর দলিলপত্র ও মুসলমান ঐতিহাসিকগণের মোগল-ইতিহাসের বিবরণের কোন স্থানে হয়ত এমন কিছু আছে, যাহা সুসুঙ্গ দুর্গাপুরের ইতিহাসের এই অন্ধকার অধ্যায়ের উপর ভবিষ্যতে আলোকপাত করিতে পারে। আবুল ফজল কৃত আকবরনামায় জানকীনাথের নাম পাওয়া যায়।

রাণী কমলার নামে উৎসর্গ করা কমলাসায়র এখনও বিদ্যমান; তাহার একাংশ সোমেশ্বরী নদীর গর্ভস্থ হইয়াছে; যেখানে ৩০ হাজার গারো খাল কাটিয়া তাহাদের কোদাল ধোয়ার জন্য ৩০ হাজার কোপ কোদালের ঘায়ে একটা দীঘি করিয়াছিল, জঙ্গলবাড়ীর সেই ‘কোদাল ধোয়া দীঘি’ এখনও আছে, আর আছে সেই ‘ধানাইয়ের খাল’। এই সকল ঐতিহাসিক চালচিত্রের মধ্যে পুণ্যশীলা রাণী কমলা ও জানকীনাথের প্রাণ-দেওয়া ভালবাসার যে কল্পনাবিজড়িত চিত্র ফুটিয়াছে, তাহা আধো-আলোক আধো-আঁধারে সূর্যাস্ত ও চন্দ্রোদয়ের সন্ধিস্থলে দৃশ্যমান জগতের ন্যায় ব-তকটা স্বপ্ন প্রহেলিকাময়, কতকটা সত্যের আলোকে উদ্ভাসিত।

## কাজলরেখা

### ধনেশ্বরের দুর্ভাগ্য

ভাটী মুল্লুকে ধনেশ্বর নামক এক সম্ভ্রান্ত সদাগর ছিলেন। তাঁহার কবেরের মত ঐশ্বর্য ছিল :—বাড়ীর দুয়ারে হাতী ঘোড়া বাঁধা থাকিত এবং গৃহে এগার বছরের এক কন্যা ও চার বছরের এক পুত্র, দুইটি সাবের বাড়ির মত ঘরখানি উজ্জ্বল করিয়া রাখিয়াছিল। কন্যাটি এমন রূপবতী ছিল,—

‘হীরা মোতি জুড়ে কন্যা যখন ন্যাক হাসে।

নূতন বর্ষায় যেমন পদ্ম ফুল ভাসে।’

ছেলেটিও একটি সোনার পুতুলের মত আঙ্গিনায় খেলিয়া বেড়াইয়া যেন স্বর্ণ নৃপ্তি করিয়া যাইত। কিন্তু মানুষের সৌভাগ্য চিরদিন স্থির থাকে না।

সদাগরের দুর্ভিক্ষ হইল, তিনি জুয়া খেলায় সর্বদাত হইলেন। আশুন লাগিলে যেমত পল্ল সময়ের মধ্যে দাউ দাউ করিয়া ঘরবাড়ী পুড়িয়া যায়, এই জুয়া খেলায় দেখিতে দেখিতে তাঁহার দুর্দশার চরম অবস্থা দাঁড়াইল। এত বড় রাজস্বাসাদের ‘মাল মাণ্ড’, হাতী ঘোড়া, যানবাহন যেন ভোজবাজির প্রভাবে অদৃশ্য হইল ; বারখানি মাল-বোকাই জাহাজ তাহাদের সোণার মাস্তুল লইয়া জুয়া খেলার অতল অলে ডুবিয়া গেল। পাশায় হারিয়া মহাদান্য যুধিষ্ঠির কৌপীনবস্ত হইয়া বনে গিয়া ছিলেন, ধনেশ্বর সদাগরের অবস্থা সেইরূপ হইল।

ইহার উপর আর এক বিপদ, কন্যাটি দ্বাদশ বৎসরে গড়িয়াছে। ইহাকে এখন বিবাহ না দিলে সামাজিক সম্মান থাকে না ; কিন্তু ‘জুয়া গার মেয়ে’ বান্ধা ফেই তাহাকে বিবাহ কাহিতে রাজী হইবে না। সদাগর যেন অকূল সমুদ্রে পড়িয়া মানুষের সাহায্যে লাগিলেন।

এমন দুর্দিনে এক জটাভূটসমন্ভিত সন্ন্যাসী আসিয়া তাহাকে একটি ‘শ্রী’ চিহ্নাক্রিত মাণিক্যের আংলি ও একটি শুকপাখী উপহার দিলেন। বর্ণের বাদিয়া ভাষায় পায়ে লুটাইয়া পড়িলেন। সন্ন্যাসী বলিলেন, ‘এই শুকপাখীটির নাম “ধর্মমতি”। ইহার পরামর্শমত কাজ করিলে তোমার বিপদের অনেকটা কাটিয়া যাইবে।’

শুকটী অতি বৃদ্ধ ; তাহার লঙ্কার মত টকটকে লাল দুটী চোঁট বয়সের দরকন ধূসর বর্ণ ধারণ করিয়াছে, পক্ষ দুটীর সবুজ রং—মলিন হইয়াছে এবং স্থানে স্থানে গালক খসিয়া পড়িয়াছে—গ্রীবার রামধনু রং—এমন কি মাংস পর্যন্ত উঠিয়া গিয়া একটি শীর্ণ কঙ্কির মত দেখাইতেছে। কেবল দুইটি দীপ্ত চোখের জ্যোতি কমে নাই বরং আরও বাড়িয়াছে, সে দৃষ্টি এত তীক্ষ্ণ যেন তাহা ভবিষ্যতের ও অতীতের যবনিকা ভেদ করিয়া সত্যের আলোক দেখিতে শক্তিমান।

সাধু শুকের নিকট জিজ্ঞাসা করিলেন—‘শুক, আমার দুর্দশা দেখ। আমার রত্ন-মন্দির, “জলটুঙ্গী” “কামটুঙ্গী”\* ও মণিমণ্ডিত আরামগৃহ ভাঙ্গিয়া পড়িয়াছে। একটা মাদুর পর্যন্ত নাই, মাটিতে শুইয়া থাকি—একটা গাড়ু কি পাত্র নাই—অঞ্জলিতে করিয়া জল পান করি, পথের ফকিরের মত বনে বনে ঘুরিয়া বেড়াই। এই বংশের শেষ বাতিস্বরূপ একটা কন্যা ও একটা পুত্র বিদ্যমান, এই দুই সন্তানকে কি দিয়া প্রতিপালন করিব?’ বলিতে বলিতে সদাগরের দুই চক্ষু জলে ভাসিয়া গেল।

শুক বলিল, ‘তোমার দারিদ্র্য শীঘ্রই দূর হইবে। সন্ন্যাসীদত্ত “শ্রী আংটী” বাজারে যাচাই করিয়া বিক্রয় করিয়া ফেল এবং উদ্ধৃত টাকা দিয়া তুমি ব্যবসা আরম্ভ কর, তোমার দিন ফিরিবে।’

### অবস্থার পরিবর্তন : কন্যাকে লইয়া বিপদ

শ্রী আংটির দাম যাহা হইল, তাহার কতকাংশ দিয়া তিনি বাড়ী মেরামত করিলেন এবং বাকী টাকা দিয়া তিনি ব্যবসায়ে নামিলেন। শুভ দিনে সব দিক দিয়াই সুবিধা হইল। শুক বলিয়াছিল—‘তুমি এক বৎসর ব্যবসা করিয়া যাহা পাইবে, তাহাতে বার বৎসর রাজার হালে জীবন যাপন করিতে পারিবে।’ বস্তৃতঃ তাহাই হইল। সদাগর পুনরায় ধনী হইলেন, এবং পূর্ববৎ ধনধান্যসমৃদ্ধিত, কিঙ্কর ও দাসদাসী পরিবৃত্ত গৃহে পরমসুখে বাস করিতে লাগিলেন। ‘কামটুঙ্গী’ ‘জলটুঙ্গী’ ঘর ও ‘ময়ূরপঙ্খী’ ও ‘হাসরমুখী’ জাহাজগুলি সমস্তই যেক্ষণ ছিল, তেমনই হইল।

কিন্তু কন্যার বাব বৎসর গাঢ় হইয়া গেল, অথচ কোন বর জুটিতেছে না। এই এক দুঃখ তাহার সমস্ত সুখ মাটি করিল। সদাগর বহু অনিদ্রারাত্রি দুশ্চিন্তায় কাটাইলেন, সোণার ঘর ও মোতির থাম তাহাকে কোন সুখ দিতে পারিল না।

অবশেষে তিনি শুকের কাছে যাইয়া তাঁহাব দুলালী কন্যা কাজলরেখার বিবাহ সম্বন্ধে উপদেশ জিজ্ঞাসা করিলেন।

শুক বলিল, ‘এ কন্যাকে লইয়া তোমার আরও অনেক কষ্ট আছে। আমার কথা যদি শোন, তুমি ইহাকে বনবাস দিয়া আইস; একটা মৃত কুমারের সঙ্গে ইহার বিবাহ হইবে; ইহার কপালের খিড়না কে ঘুচাইবে? যদি কন্যার প্রতি স্নেহবশতঃ তুমি আমার উপদেশ না লও, তবে তোমার কন্যা ও তুমি ঘোর বিপদে পড়িবে।’

সদাগর তুষণায় মৃতপ্রায় হইয়া শুকের নিকট এক ফোঁটা জল চাহিতে গিয়াছিলেন, কিন্তু যেন পাইলেন একটা তপ্ত লৌহের মুখল। অনেক ভাবিয়া চিন্তিয়া তিনি সর্বনাশ হইতে সেই গৃহ রক্ষা করিতে প্রস্তুত হইলেন, কারণ শুকের কথার উপর তাঁহার অটুট বিশ্বাস হইয়াছিল।

\* জলটুঙ্গী ও কামটুঙ্গী—এীক্ষকালে নদী বা পুকুরের মধ্যে উখিত গৃহবিশেষ; বড়-মানুষদের গৃহপ্রাঙ্গণে পদ্ম পুকুরে ‘জলটুঙ্গী’ ঘর নির্মিত হইত, শীতল পদ্মগন্ধমুক্ত বাতাসে সুখান্দি হইত। ‘কামটুঙ্গী’ও সেইরূপ আরামগৃহ, তাহার সাজসজ্জা বৈঠকখানার মত হইত, তবে ‘কামটুঙ্গী’ ঘর ঠিক জলের মধ্যে নির্মিত হইত না। পুকুরপাড়ের তৈরী হইত।

এই কন্যাকে মাঘমাসের শীতে বুকে রাখিয়া রাত্রি কাটাইয়াছেন। পাছে ঘুম ভাঙ্গে—এই ভয়ে দুগ্ধফেননিভ শয্যায় শোয়াইয়া সোয়াস্তি পান নাই। কত দুগ্ধখের, কত বিপদের স্মৃতি এই আদরের কন্যার সঙ্গে জড়িত, এমন কন্যাকে কেমন করিয়া তিনি বনে পাঠাইবেন!

চোখের জল মুছিতে মুছিতে তিনি বাণিজ্যের ছপ করিয়া কন্যাকে লইয়া জাহাজে উঠিলেন। উজান বাহিয়া ডিঙ্গা এক গভীর জঙ্গলের দিকে ছুটিল। দ্বাদশবর্ষীয়া কন্যা—তিনি আকারে-প্রকারে সকল কথাই বুঝিতে পারিয়াছিলেন। এ তো বাণিজ্যের পথ নহে,—এ যে ঘোর অরণ্য, এখানে পিতা কেন আমায় আনিলেন? তিনি কাঁদিতে কাঁদিতে ভাবিতে লাগিলেন :—বাণিজ্য করিবার জন্য আসিয়াছ—বাবা, তুমি আমাকে লইয়া জলপথ ছাড়িয়া কেন এই নিবিড় অরণ্যে প্রবেশ করিলে? যদি বনে দেওয়াই তোমার অভীষ্ট ছিল, কেন আমায় আর দুটী দিন মায়ের কাছে থাকিতে দিলে না, আমার সোণামণি ভাইটিকে বুকে জড়াইয়া দুটী দিন আমার প্রাণ জড়াইত!

‘কি কারণে আইলা বনে কিছুই না জানি।

বনবাসে দিবে মোরে হেন অনুমানি॥

বনের যত তরুলতায় দেখহ জিজ্ঞাসি।

বাপ হৈয়া কন্যাকে কে কবেছে বন্যাসী॥

চার যুগের সাক্ষী ঐ চন্দ্র-স্বৰ্ণ-তারা।

ধর্মের প্রধান খুঁটি\* ধর্মের পাহারা॥

জিজ্ঞাসা করহ বাবা ইহাদের স্থানে।

বাপ হৈয়া কন্যাকে কে দিয়াছে গো বনে॥

পাহাড় থেকে ডাটিয়াল নদী মাগরে বয়ে যায়।

চার যুগের যত কথা জিজ্ঞাস তহায়॥

জিজ্ঞাসা করহ বাবা জিজ্ঞাসা কর তবে।

বনের পাহারী কথায় কে কন্যা দিছে বন্যাসী।’

বাপ ও কন্যা ঘোর বনে চলিয়াছেন, দিশাহারা পথিকের মত। চারিদিকে শাল, তাল, তমাল বৃক্ষ যেন স্তম্ভিত হইয়া জটাজুটধারী সন্ন্যাসীর মত দাঁড়াইয়া আছে। সে অরণ্যে না ছিল মানুষ না ছিল পশু—দূর নীল আকাশে একটী পাখী পর্যন্ত উড়িতে দেখা গেল না, সম্মুখে একটা ভাঙ্গা মন্দির। মন্দিরের মধ্য হইতে একটি বক্ষ। পিতা ও কন্যা যাইয়া সিঁড়ির উপর বসিলেন।

পথশ্রান্তি ও অনাহারে কাজলরেখা এত দুর্বল হইয়া পড়িয়াছিলেন যে, চাঁদার আর এক পা-ও অগ্রসর হইবার সামর্থ্য ছিল না। তিনি তাঁহার পিঠে বসিয়া বসে, ‘তৃষ্ণায় আমার ছাতি ফাটিয়া যাইতেছে, আমায় এক ফোটা জল আনিয়া আমায় প্রাণ রক্ষা কর।’





ধনেশ্বর সদাগর জল আনিতে গেলেন। কাজলরেখা ঘুরিয়া ঘুরিয়া সেই মন্দিরের চারিদিকে দেখিতে লাগিলেন। দরজা বন্ধ ছিল, কিন্তু কাজলের স্পর্শমাত্র দরজা খুলিয়া গেল, কিন্তু সেই মন্দিরে ঢুকিয়া তাঁহার ভয় হইতে লাগিল। তিনি বাহির হইতে ইচ্ছা করিলেন, কিন্তু দরজা তখন এত শক্তভাবে বন্ধ হইয়াছে যে তিনি কিছুতেই খুলিতে পারিলেন না। ইহার মধ্যে তাঁহার পিতা জল লইয়া উপস্থিত। সদাগর মন্দিরের মধ্য হইতে কন্যার স্বর শুনিয়া ডাকিয়া তাঁহাকে দরজা খুলিতে বলিলেন। কাজল বলিলেন, ‘আমি দরজা কিছুতেই খুলিতে পারিতেছি না।’ তখন তাঁহার বলিষ্ঠ পিতা ও তিনি নিজে খুব যত্নাধিকার করিতে লাগিলেন, কিন্তু দরজা খুলিল না। সদাগর মন্দিরের নিকটবর্তী একটা পাথরের স্তূপ হইতে পাথর আনিয়া দরজায় প্রচণ্ড শক্তিতে আঘাত করিতে লাগিলেন, কিছুতেই কিছু হইল না। তখন সদাগর বলিলেন, ‘কাজল, মন্দিরে কি আছে?’ কন্যা বলিলেন, ‘একটি ঘিণের প্রতি এই মন্দিরে রাত্রিদিন জ্বলিতেছে, পার্শ্বে এক পালঙ্কে শয্যার উপর একটা খুবকের মৃতদেহ।’

সদাগর বলিলেন, ‘আমার প্রাণের কুমারী, তোমার কপালে দুঃখ আমি কি করিব! এই শব্দই তোমার স্বামী, শুকের কথা সত্য। আমি ভাল বরে বিয়া দিতে চাহিয়াছিলাম, দৈব প্রতিবাদী হইয়াছেন। এখন ধর্ম সাক্ষী করিয়া এই মৃত কুমারের সঙ্গে আমি তোমার বিবাহ দিয়া গেলাম। তোমা বিহনে আমার ঘরবাড়ী শূন্য—আমার জাহাজের অমূল্য বস্তু তুমি, তোমাকে বিসর্জন দিয়া আমি কি ঘন লইয়া ঘরে ফিরিব?’ তাঁহার উচ্চ কান্নার শব্দ শুনিয়া কাজলের বুক ফাটিয়া যাইতে লাগিল। সদাগর কিছু খামিয়া স্বর পরিস্কৃত করিয়া পনিরায় বলিলেন ‘এই মৃত কুমারই তোমার স্বামী। যদি ভগ্নস্নায় গুণে ইহাকে বাঁচাইতে পার, তবে চেষ্টা করিয়া দেখিও। কপালে সিন্দূর বাখিও এবং হাতের শাখা ভাঙ্গিও না।’

পিতা কাঁদিতে লাগিলেন, কন্যার চক্ষু ভাঙ্গ পূর্ণ; চারদিগের তরুণরাজিও যেন এই নিদারুণ শোকে স্তম্ভিত হইয়া অশ্রু বিসর্জন করিতে লাগিল। কন্যার নিকট বিদায় লইয়া এখন সদাগর চলিয়া যান, তখন তিনি চোখের জল পথ দেখিতে পাইলেন না। কাজল লুটাইয়া মাটিতে পড়িয়া রহিলেন—কি কষ্ট! বিদায়কালে পিতা ও কন্যা পরস্পরের মুখ দেখিতে পাইলেন না।

### মৃত দাসীর পার্শ্ব

কাজলরেখা কিছুকাল পরে উঠিয়া গিয়া পনের পার্শ্বে আসিয়া বিলাপ করিতে লাগিলেন, ‘হে সুন্দর কুমার, তুমি জাগিয়া উঠিয়া আমার দুর্দশা দেখ, তুমি মৃত তবু তুমি ভিন্ন আমার আর কেহ নাই। বাপ বলিয়া গিয়াছেন, তুমিই আমার স্বামী—সেই কথাই আমার শিরোধার্য। চাহিয়া দেখ, তিন দিন তিন রাত্রি আমি উপবাসী। তোমার মূর্তি চাঁদের মত ঝলমল করিতেছে, অঙ্গুলিগুলি চম্পকের মত, মৃত্যু তোমার শ্রী হরণ করিতে পারে নাই।

‘চাঁদের ছুরত\* কুমার তোমার কামতনু+  
 মেঘেতে ঢাকিয়া আছে প্রভাতের ভানু।  
 তোমার যে মা বাপ না জানি কেমন  
 বংশের প্রদীপ পুত্রে রেখে গেছে বন।’

‘তোমার পিতা কি আমার পিতার মতই কপট? তিনি বনে আনিয়া সন্তানকে  
 বিসর্জন করিয়া গিয়াছেন।’

‘যে হও সে হও প্রভু তুমি তো সোয়ামী  
 যত কাল দেহ তোমার, তত কাল আমি।  
 মুখ খুলি কথা কও আঁখি মেলি চাও।  
 জাগিয়া উত্তর দেও মোরে না ভাঁড়াও॥  
 কর্ম দোষে বেহুলা রাড়ী, শিরেতে বসিয়া।  
 মরা পতির কাছে বাবা দিয়া গেছে বিয়া॥’

‘জোর করিয়া কপালের দুঃখ খণ্ডাইতে যাইও না’

খানিক পরে মন্দিরের কপাট আবার খুলিয়া গেল, চকিত ও ভীত দৃষ্টিতে কাজলরেখা  
 চাহিয়া দেখিলেন, এক তেজস্বী সন্ন্যাসী সেই মন্দিরে প্রবেশ করিলেন। পিতা ও কন্যা  
 এত ধস্তাধস্তি করিয়া যে কপাট খুলিতে পারেন নাই, তাহা সন্ন্যাসীর স্পর্শমাত্র খুলিয়া  
 গিয়াছে, একটু শব্দমাত্র হয় নাই। কাজল ভাবিলেন, সন্ন্যাসী নিশ্চয়ই কোন সিদ্ধপুরুষ,  
 তিনি সেই সাধুর পায়ে পড়িয়া কাঁদিয়া বিভোর হইলেন।

সাধু বলিলেন, ‘তুমি কাঁদিও না, মৃত কুমার এক রাজার পুত্র। তাঁহার মাতা প্রসব  
 করার পর আমি দেখিলাম—এই মৃতপ্রায় শিশুর প্রাণরক্ষা হইতে পারে। রাজাকে  
 কহিয়া এই ভাঙ্গা মন্দিরে আমি ইঁহার সর্বাঙ্গ সূচিবদ্ধ করিয়া রাখিয়াছি। কতকগুলি দৈবী  
 প্রক্রিয়ার ফলে কুমারের দেহেয় শ্রী অক্ষুণ্ণ আছে এবং ইঁহার নৈসর্গিক দেহবৃদ্ধি থামে  
 নাই। তুমি একটা একটা করিয়া ইঁহার সূঁচগুলি খুলিয়া ফেল, কেবল চোখের দুটী সূঁচ  
 এখনই খুলিও না। দেহমন সূঁচ উদ্ধার হওয়ার পরে, আমি তোমাকে যে পাতা দিয়া  
 যাইতেছি, চোখের দুটী সূঁচ খুলিয়া সেই পাতার রস দিলে ইনি জীবন পাইবেন।

‘কিছু কাজল, তোমার আরও অনেক কষ্ট আছে,—তুমি কষ্ট সহিয়া থাকিও এবং  
 যে পর্যন্ত ধর্মমতি শুক তোমার পরিচয় না দেন, সে পর্যন্ত তোমার পরিচয় নিজে দিতে  
 যাইও না। জানিও কপালের দুঃখ জোর করিয়া কেহ খণ্ডাইতে পারে না।’

\* ছুরত = মূর্তি, শ্রী।

+ কামতনু = লাবণ্যময় শরীর।

এই বলিয়া সন্ধ্যাসী চলিয়া গেলেন। কাজল শয্যাপার্শ্বে বসিয়া একটী একটী করিয়া সেই সূঁচগুলি খুলিতে লাগিলেন, ইতিপূর্বে তিনি তিন দিনের উপবাসী ছিলেন। এখন আরও সাত দিন সাত রাত্রি উপবাসী থাকিয়া তিনি সর্বাস্থের সূঁচ খুলিয়া ফেলিলেন।

তারপর শুদ্ধস্নাতা হইয়া চোখের সূঁচ দুটী খুলিয়া স্বামীকে দেখা দিবেন, এই ইচ্ছা করিয়া নিকটবর্তী এক সরোবরে স্নান করিতে গেলেন।

পুকুরের জলের রং ডালিমের মত এবং উহার চারিদিকেই বাঁধা ঘাট আছে। পূর্ব ঘাটে বসিয়া তিনি গাত্র মার্জনা করিয়া স্নান করিলেন, প্রভাতের কিরণে তাঁহার রূপ ঝলমল করিয়া উঠিল। এমন সময় একটী বৃদ্ধ চীৎকার করিয়া যাইতেছিল, ‘দাসী নেবে গো।’ বৃদ্ধের পলিত কেশ, সামান্য একটা কটিবাস, না খাইয়া শরীর বিশীর্ণ, তাহার সঙ্গে একটী মেয়ে,—সাধাসিধা চাষার ঘরের মেয়ে, পরনে একখানা ময়লা শাড়ী। বৃদ্ধ কাজলের কাছে আসিয়া বলিল, ‘আমি অতি গরীব, আমার দিন অনেক সময়ই উপবাসে যায়। গ্রহবৈগুণ্যে কন্যাটিকে বিক্রয় করিতে উদ্যত হইয়াছি, তাহা না হইলে নিজেই বা কি খাইব ইহাকেই বা কি খাওয়াইব? এই জনহীন জঙ্গলাদেশে কেহ ইহাকে কিনিতে চাহিল না—এ জায়গা জনমানবহীন। কিন্তু এক সন্ধ্যাসী এই পুকুরের ঘাট দেখাইয়া বলিল, ‘ঐ ঘাটে একজন রাজকুমারী স্নান করিতেছেন, তিনি হয়ত তোমার কন্যাকে কিনিতে পারেন।’

কাজল ভাবিলেন, ‘আমি এক দুর্ভাগা কন্যা, কর্মদোষে আমার বান্ধা আমাকে বনবাস দিয়াছেন; এই কন্যাও আমারই মত জন্মদুঃখিনী, তাহার বাবা পেটের দায়ে ইহাকে বিক্রয় করিতে আসিয়াছে।’ কাজলের প্রাণ সহানুভূতিতে ভরিয়া গেল—‘এই মেয়ে আমার দুঃখের দোসর হইবে।’ সুতরাং কন্যার দুঃখে দুঃখিত হইয়া তিনি তাঁহার হাতের কঙ্কণ দিয়া কন্যাটিকে কিনিলেন।

‘কর্মদোষে কাজলরেখা হৈল বনবাসী

কঙ্কণ দিয়া কিনিল ধাই\*, নাম কঙ্কণদাসী॥’

কাজল ভাস্মা মন্দির দেখাইয়া তাহাকে বলিলেন, ‘তুমি ঐ মন্দিরে যাও, সেখানে একটী মৃত কুমার আছেন, তুমি ভয় পাইও না। আমি স্নান করিয়া শীঘ্র যাইতেছি। আমি যাইয়া তাঁহার চোখের দুটী সূঁচ খুলিয়া ফেলিব এবং শিয়রের কাছে গাছের পাতা আছে তাহার রস চোখে দিব, তবেই তিনি বাঁচিয়া উঠিবেন। তুমি সেই পাতা বাটিয়া রস করিয়া রাখিও।’ তখন হঠাৎ তাঁহার বুক দুক দুক করিয়া কাঁপিয়া উঠিল এবং প্রকৃতি যেন নিঃশব্দে দুর্লক্ষণ দেখাইয়া তাঁহার ভাবী দুঃখময় জীবনের আভাস দিলেন।

\* ধাই = ধাত্রী, দাসী।

## কঙ্কণদাসীর কৃতজ্ঞতা

কঙ্কণদাসী মন্দিরে প্রবেশ করিয়া সেই পাতাল বস প্রস্তুত কবিল, এবং কুমারের চোখের শল্য উদ্ধার করিল এবং পাতাল বস চক্ষে ঢালিয়া দিল। রাজপুত্রের যেন বহুদিনের ঘুম ভাঙ্গিল। তিনি জাগিয়া উঠিয়া দেখিলেন—সম্মুখে তাঁহার জীবনদাত্রী রমণী। এদিকে কঙ্কণদাসীর মনে তখন অসুরবুদ্ধি জাগিয়া উঠিয়াছে। সে বলিল, ‘কুমার আমাকে বিবাহ কর।’

‘এক সত্য করে কুমার চিনিতে না পারে।  
 পরাণ দিয়াছ আমার, বিয়া করব তোরে॥  
 দুই সত্য করে কুমার দাসীকে ছুঁয়া।  
 পরাণ বাঁচিয়াছ আমার, তুমি পরাণ-পিয়া॥  
 তিন সত্য করে কুমার ধর্ম সাধী করি।  
 আজি হতে হেলা তুমি আমার ঘরের নারী॥  
 রাজ্য ধন যত আছে লোক আর লঙ্কর।  
 কাননে ফেলিয়া মোরে গেল একেশ্বর॥  
 কৃপাতে তোমার কন্যা পরাণ যে পাই।  
 তোমা বিনা এ সংসারে মোর অন্য নাই॥’

কুমারের হৃদয় কৃতজ্ঞতায় পূর্ণ হইয়া গেল। তিনি দাসীর পরিচয়াদি কিছু না লইয়াই তাহাকে বিবাহ করিতে প্রতিশ্রুতি দিলেন।

সংরে ইহা ঘৃণের বসি সদাই অগ্নি জ্বলে।  
 সারে ছুঁয়া কুমার প্রতিশ্রুতি করে॥’

এই সময়ে সদ্যঃমাতা কাজলরেখা আদিয়া মন্দিরে প্রবেশ করিলেন এবং দেখিলেন গহনমুখ চন্দ্রেন ন্যায় পুনর্জীবিত রাজপুত্রের রূপ অলমল করিতেছে। কুমারও কাজলরেখাকে দেখিয়া বিম্বিত হইলেন, এমন রূপ সংসারে কাহারও আছে বলিয়া তিনি জানিতেন না, তিনি বলিলেন, ‘তুমি কে?—তোমান মাতা ও পিতা কোথায়—এই ঘোর বন পদেণে এমন রূপসী কন্যাকে তাহার ক্রুরূপে হত্যা দিয়াছেন?’

ব্রীড়নতা কাজলরেখা উত্তর দিবার পূর্বেই কঙ্কণদাসী অগ্রসর হইয়া বলিল, ‘এ আমার দাসী’,

‘আণ্ড হৈয়া পরিচয় কহে কঙ্কণদাসী।  
 কঙ্কণে ক্রিমেছি নাই নাম কঙ্কণদাসী॥’

এইবার ভাণ্ডার বিপর্যয় হইয়া গেল :

‘রাণী হৈল দাসী আর দাসী হৈল রাণী ।  
কর্মদোষে কাজলরেখা জনু-অভাগিনী॥’

সন্ন্যাসীর আদেশে কাজল নিজের পরিচয় দিতে পারিলেন না, দাসী হইয়া স্বামীর রাজ্যে চলিয়া গেলেন ।

কাজল রাজপুরীতে নকল রাণীর দাসীর মতন আছেন । তাঁহার কাজ হইল ঘর ঝাঁট দেওয়া, গৃহ মার্জনা করা, বাসন মাজা এবং প্রতিনিয়ত নকল রাণীর পরিচর্যা করা । এত করিয়াও তিনি নকল রাণীকে তুষ্ট করিতে পারেন না, দিন-রাত্রি তাহার গালাগালি খান ; পাছে কাজল তাহার প্রকৃত পরিচয় বলিয়া ফেলেন এই আশঙ্কায় কঙ্কণদাসী সর্বদা তাঁহাকে কাছে কাছে রাখে, চোখের আড় হইতে দেয় না । কিন্তু রাজার সতর্ক দৃষ্টিতে কিছুই এড়াইয়া না । তিনি কাজলের হাব-ভাব, চাল-চলন, আদব-কায়দা এবং সকলের উপর তাঁদের মত তাঁহার রূপের ছটা দেখিয়া মনে মনে তাঁহার অনুরক্ত হইয়া পড়িলেন ।

রাজা পুনঃ পুনঃ কাজলের পরিচয় জিজ্ঞাসা করেন, ‘কে তুমি সুন্দরী কন্যা? এই দাসীবৃত্তি মোটেই তোমাকে মানায় না, তুমি কোন্ রাজকুল অলঙ্কৃত করিয়াছ, তুমি কোন্ রাজার দুলালী কন্যা, আমায় সত্য করিয়া বল,’

‘তোমার সুন্দর রূপ কন্যা চাঁদ লজ্জা পায় ।  
ভাঁড়ায়ো না কন্যা মোরে বল গো আমায়॥’

মাথা নত করিয়া কাজল কৃতার্থভাবে উত্তর করিত :—

‘আমি যে কঙ্কণদাসী রাজা শুন দিয়া মন ।  
তোমার নারী কিনিল দিয়া হাতের কঙ্কণ॥’

‘এ কথা তো তুমি তার মুখে শুনিয়াছ ।’

‘বনে ছিলাম, বনবাসী দুঃখে দিন যায় ।  
ভাত কাপড় জোটে মোর তোমার কৃপায়॥  
মা নাই, বাপ নাই, নাই সহোদর ভাই ।  
আসমানের মেঘ যেন ভাসিয়া বেড়াই॥’

প্রত্যহ এইরূপ উত্তর পাইয়া রাজা আরও বেশী কৌতূহলী হইলেন । তাঁহার মন যাহা বুঝে, বাহিরে কাজলের কথায় তাহার প্রমাণ হয় না ; অথচ কাজল যে কোন গূঢ় কথা ক্রমাগত তাঁহার নিকট গোপন করিতেছেন—তাহা তিনি হৃদয়ে হৃদয়ে অনুভব করেন । ‘কি দুঃখে তুমি নিজেকে গোপন করিয়া দাসী হইয়া হাড়ভাঙ্গা খাটুনি খাটিতেছ ।’ মনে মনে এই প্রশ্ন করিয়া তাঁহার দুটি চক্ষু অশ্রুপূর্ণ হয় । অপর দিকে নকল রাণীর বাক্যে ও ব্যবহারে, কথাবার্তা ও ব্যাখ্যানের চোটে রাজপুরীর হাওয়া বাংলায় পুরনারী—৪

তাঁহার নিকট দুঃসহ হইল। রাজা খাওয়াদাওয়া ছাড়িলেন, তাঁহার ঘুম নাই, পৃথিবীটা তাঁহার কাছে ফাঁকা। একদিন তিনি বৃদ্ধ মন্ত্রীকে বলিলেন—‘মন্ত্রী, আমি ছয়মাস-ছয়পক্ষের জন্য দেশ ভ্রমণে যাইব, তুমি এই সময়ের মধ্যে কাজলরেখার প্রকৃত পরিচয় জানিতে চেষ্টা করিও। আমার সন্দেহ হয়—এই কন্যা দাসী নহে।’

নকল রাণীর নিকট অন্তঃপুরে যাইয়া রাজা বলিলেন, ‘আমি কিছুকালের জন্য বিদেশে যাইব, তোমার জন্য কি আনিব বলিয়া দাও।’ রাণী সোৎসাহে বলিল, ‘আমার জন্য একটা বেতের ঝালি ও বেতের কুলা আনিও,’ তারপরে একটু ভাবিয়া আবার বলিল, ‘শুনছ, আমলি কাঠের একটা টেকী, পিতলের নখ, কাঁসার বাক্ খাদু ও কাঠের চিরুনী লইয়া আসিও।’ রাজা শুনিয়া লজ্জিত ও বিরক্ত হইলেন, কাজলরেখার কাছে যাইয়া বিদায় চাহিতে গেলে তাঁহার মুখখানি বিষাদে যেন সাদা হইয়া গেল ; তাঁহার জন্য কি আনিতে হইবে, এই প্রশ্ন লইয়া রাজা গীড়াগীড়ি করিলেন—কাজল বলিলেন, ‘আমি তো তোমার এখানে খুব সুখে আছি, আমার কোন অভাব নাই। আমি আর কিছু চাই না।’ তথাপি রাজা ছাড়িবেন না—নিতান্ত বাধ্য হইয়া কাজল বলিলেন—‘আমাদের “ধর্মমতি” নামক একটা শুকপাখী ছিল, যদি পার সেইটাকে আনিও।’ নকল রাণীর ফরমাইসী জিনিস সংগ্রহ করিতে রাজার মোটেই কোন বেগ পাইতে হইল না, নিতান্ত দরিদ্র-পত্নীর বাজারেও তাহা পাওয়া যায়। কিন্তু কাজলের প্রার্থিত ধর্মমতি শুক খুঁজিয়া রাজা হয়রান হইলেন। অথচ কাজলের ফরমাইস, ইহা পালন করিতেই হইবে। তাহা না লইয়া তিনি বাড়ী ফিরিতে পারেন না। এক রাজার মূলুক হইতে অন্য রাজার মূলুক, এবং এক সদাগরের এলাকা হইতে অন্য সদাগরের এলাকায় টেড়া দিয়া খোঁজ করিতে লাগিলেন।

অবশেষে কাজলরেখার পিতৃরাজ্য ধনেশ্বর-মূলুকে টেড়া পিটাইয়া দিলেন—‘ধর্মমতি শুকপাখী যদি কেহ বিক্রয় করে, তবে প্রচুর মূল্য দিব।’ ধনেশ্বর ভাবিলেন, ‘ধর্মমতি শুকের কথা তো আমি এবং কাজলরেখা ছাড়া আর কেহ জানে না। নিশ্চয়ই কাজল বাঁচিয়া আছে, এবং সুখে থাকুক, দুঃখে থাকুক সে-ই এই শুক পাখীটা খুঁজিতেছে।’ এই মনে করিয়া তিনি সূঁচ-রাজার লোকের কাছে ধর্মমতি শুক আনায়া দিলেন।

সূঁচ-রাজা অতিশয় আনন্দে বাড়ী ফিরিলেন। নকল রাণীকে তাহার ফরমাইসী দ্রব্যাদি দিলেন এবং কঙ্কণদাসীর হাতে শুকপাখীটা দিয়া তাঁহার মুখখানিতে যে আনন্দের দীপ্তি দেখিলেন, তাহাতে তাঁহার সমস্ত পরিশ্রম সার্থক মনে করিলেন।

### নকল রাণী ও কাজলরেখা

রাজা বিদেশে গেলে মন্ত্রী রাজকার্য সম্বন্ধে অনেক কথাই রাণীকে জিজ্ঞাসা করিতেন ; রাণী সে সকলের কিছুই বুঝিত না, অথচ যা তা বলিয়া একটা ছকুম জারি করিত। সেইরূপ ভাবেই মন্ত্রী কাজ করিতেন, রাণীর মর্যাদা তিনি লঙ্ঘন করিতেন না ; কিন্তু তাহাতে অত্যন্ত ক্ষতি হইত। এক দিন একটা বিপদের সম্মুখীন হইয়া মন্ত্রী কাজলের সঙ্গে পরামর্শ করিলেন, কাজল এমনই উৎকৃষ্ট উপায় বলিয়া উপদেশ দিলেন যে

তাহাতে রাজ্যের সমস্ত বিপদ কাটিয়া গিয়া বরং ইষ্টই হইল। মন্ত্রী বুঝিলেন, কঙ্কণদাসী কখনই নিম্নশ্রেণীর কন্যা নহেন।

কিন্তু আর কোন পরিচয় পাওয়া গেল না। ইহার মধ্যে রাজার এক বন্ধু অতিথি হইয়া উপস্থিত হইলেন। সূচ-রাজা রাণীর উপর তাঁহার আতিথ্যের ভার দিলেন। নকল রাণী রাখিল ডোয়ার ঝাল, চালতার অম্বল, কচু শাক—তাহাতে লবণ পড়ে নাই। রাজা বন্ধুর সঙ্গে খাইতে বসিয়া লজ্জিত হইলেন।

### পরদিন দাসীর উপর আতিথ্যের ভার

কাজল অতি প্রভাতে উঠিয়া ভোরের স্নান সমাধা করিলেন, শুদ্ধ শান্ত হইয়া রান্না ঘরে প্রবেশ করিলেন, একখানা ছোট শাড়ী পরিয়া উঁচু করিয়া মাথার চুল বাঁধিলেন। গঙ্গাজল দিয়া রান্নাঘরখানি মার্জন করিলেন। একটা বাটিতে মসল্লা প্রস্তুত করিয়া রাখিলেন; মানকচু কাটিয়া তাহা ভাজিয়া লইলেন, একজোড়া কপোতের মাংস রাখিলেন, তারপর নানা প্রণালীতে নানাবিধ মাছের ব্যঞ্জনাদি রান্না হইল। পায়েস-পরমান্ন রান্নায় কাজল সিদ্ধহস্ত।

‘নানা জাতি পিঠা করে গন্ধে আমোদিত।

চন্দ্রপুলী করে কন্যা চন্দ্রের আকৃত।’\*

চিতই, পাটিসান্টা, মালপোয়া প্রভৃতি পিষ্টকের গন্ধে গৃহ সুবাসিত হইল।

‘ক্ষীর পুলি করে কন্যা ক্ষীরেতে ভরিয়া।

রসাল করিল তাহা চিনির ভাজ দিয়া।’

পরিবেষণের স্থানে জলের ছিটা দিয়া সেখানে একটা উত্তম কাঁটালের পিড়ি পাতিয়া স্বর্ণ থালায় খাদ্যগুলি সাজাইলেন। অতি সরু শালীধানের চাউলের ভাত বাড়িয়া থালার একপাশে পাতিলেবু কাটিয়া রাখিলেন। ‘ঘরে মজা+ মর্তমান কলা কাটিয়া অপরাপর ফলের সঙ্গে পরিবেষণ করিলেন।

‘সোণার বাটিতে রাখে দধি দুধ ক্ষীর।’

তারপরে স্বর্ণ গাড়াতে জল রাখিয়া দিলেন। কেওয়া খয়েরে সুগন্ধ করিয়া সোণার বাটাতে পান রাখিলেন, এবং রান্না ঘরের এক কোণে যাইয়া বিনীতভাবে অপেক্ষা করিতে লাগিলেন।

এইসমস্তই মন্ত্রী-উপদেশ মত কাজলকে পরীক্ষা করার জন্য ব্যবস্থা হইয়াছিল। আর এক দিন কোজাগর লক্ষীর পূজা। রাণী ও কঙ্কণদাসীকে ভাল করিয়া আলপনা

\* আকৃত = আকৃতি।

+ ঘরে মজা = যাহা ঘরে থাকিয়া পাকানো হইয়াছে,—অত্যন্ত পাকিয়া সুস্বাদু হইয়াছে।

আঁকিতে বলা হইল। রাজা বলিলেন, ‘আমার বন্ধু আজ আবার আসিবেন, আলপনা যত ভাল পার,—করিবে।’

নকল রাণী আঁকিল বকের পা, সরিষার টাইল (পাত্র), কাকের ঠ্যাং এবং ধানের ছড়া।

কাজল সরু শালীধানের চাউল আগের দিন জলে ভিজাইয়া তাহা বাটিয়া অতি মসৃণ পিটালীর প্রলেপ তৈরী করিলেন। সর্বপ্রথম বাপমায়ের পাদপদ্ম আঁকিলেন,—উহা তাঁহার প্রাণে গাঁথা ছিল। তারপরে ধানের গোলা আর ধানের ছড়া আঁকিলেন এবং অবকাশস্থানগুলি লক্ষ্মীর পদচিহ্ন দ্বারা পূর্ণ করিলেন।

কৈলাসে শিবদুর্গার যুগল ছবি, হংসরথে মা বিষহরি দেবী, ও ডাকিনীদের মূর্তি—দিক্‌প্রান্তে সিদ্ধ বিদ্যাধরীদের ও বনদেবীর ছবি এবং আরও কত কি আঁকিলেন; শেওরা গাছের নিম্নে বনদেবীর মূর্তি অতি সুন্দর হইল। তার পরে রক্ষাকালীর ছবি,—রাম লক্ষ্মণ সীতার মূর্তি চিত্রিত হইল। কার্তিক গণেশ প্রভৃতি কোন দেবতাই বাদ পড়িল না।

এসকল অঙ্কন করিয়া কাজলরেখা হিমাঙ্গি পর্বত, লঙ্কার পুষ্পকরথ, ইন্দ্র, যম ও তাহাদের আবাসস্থল, গঙ্গা-গোদাবরী প্রভৃতি নদী, সমুদ্রের ঢেউ, চন্দ্র-সূর্যের চিত্র, প্রভৃতি কত ছবিই যে আঁকিলেন, তাহার সীমাসংখ্যা নাই।

শেষ চিত্র ভাস্কা মন্দির। ঘোর অরণ্য এবং মৃত কুমারের চিত্র; কিন্তু কাজল কোনখানেই নিজের ছবি আঁকিলেন না। সূঁচ-রাজা ও তাঁহার সভাসদদিগের চিত্রও এই সুদৃশ্য আলিপনা অলঙ্কৃত করিল। অবশেষে ঘূতের বাতি জ্বালিয়া চিত্রকরী তাঁহার অঙ্কিত আলপনাকে গলবস্ত্র হইয়া প্রণাম করিলেন।

নকল রাণীর আলপনা দর্শনান্তর রাজা, তাঁহার বন্ধু ও পারিষদবৃন্দ—কাজলরেখার আঁকা ছবি দেখিয়া বিস্মিত হইলেন।

এদিকে শুকপাখীকে পাইয়া গভীর রাতে কাজলরেখা জিজ্ঞাসা করেন—

‘পক্ষী আমার মা বাবা কেমন আছেন বল,

প্রাণের দোসর\* ছিল মোর ছোটভাই

নিশার স্বপনে তার মুখ দেখতে পাই।’

তারপরে মৃতকুমারকে দর্শনাবধি পরবর্তী দুঃখের অধ্যায় কাজলরেখা কাঁদিতে কাঁদিতে বর্ণনা করিয়া শেষে বলিলেন;—

‘হাতের কঙ্কণ দিয়া কিনিলাম দাসী।

সে হইল রাণী আর আমি বনবাসী॥

সত্যযুগের পক্ষী তুমি কও সত্য বাণী।

কোনদিন পোহাইবে মোর দুঃখের রজনী।

দশ বছর গোয়াইলাম পাইয়া নানা দুঃখ।

একদিন না দেখিলাম মা বাপের মুখ।’



‘কত দিন আমার কপালে এই কষ্ট আছে?’

শুক বলিল, ‘শেষরাত্রে আমার কাছে আসিও, আমি উত্তর দিব।’

‘নিশিরাতে পুনঃ কন্যা ডাক দিয়া কয়।  
জাগ জাগ শুক পাখী রাত্রি যে ভোর হয়।  
বাপের বাড়ী দাস-দাসী লেখা জোখা নাই।  
কর্মদোষে দাসী হৈয়া জীবন কাটাই।  
বাপের বাড়ীতে খাট পালঙ্ক আছে শীতলপাটি।  
কর্মদোষে আমার পাখী শয়ন ভূঞা মাটী॥  
বাপে তো কিনিয়া দিত অগ্নিপাটের শাড়ী।  
সেই অঙ্গে পইরা থাকি জোয়ার পাছাড়ী॥  
হাতের কঙ্কণ দিয়া কিনিলাম দাসী।  
সে হইল রাণী আর আমি বনবাসী॥  
সত্য যুগের পাখী তুমি কহ সত্য বাণী  
কোনদিন পোহাবে মোর দুঃখের রজনী॥’

কাজলের কান্নায় ব্যথিত হইয়া শুক গদগদকণ্ঠে বলিল, ‘কাজল আর কাঁদিও না, তোমার বাপের বাড়ীর সমাচার বলিতেছি। তোমাকে বনবাস দিয়া এই দশ বছর তোমার পিতা বাগিজে যান নাই। কাঁদিয়া কাঁদিয়া তোমার মা বাবার চক্ষু অন্ধ হইয়া গিয়াছে। দাসদাসীরা এই দশ বছর সর্বদা তোমারই কথা বলিয়া চোখের জল ফেলে। নিরপরাধ কন্যাকে বিনাদোষে ঘোর জঙ্গলে বনবাস দেওয়া হইয়াছে—এই সংবাদ যেন গৃহপালিত পশুপক্ষীরাও মর্মে মর্মে অনুভব করিয়াছে,—হাতী, ঘোড়া ঘাস জল খায় না, তাহাদের চোখে জল টল টল করে। যে দিন হইতে তুমি বাড়ী ত্যাগ করিয়াছ, সেই দিন হইতে তোমাদের পুরীতে সূর্যের আলো মলিন হইয়াছে, রাত্রে জ্যোৎস্না নাই :—

‘জ্বালালে না জ্বলে বাতি পুরী অন্ধকার’

‘বনের পাখীগুলি আকাশে উড়িয়া উড়িয়া আর্তনাদ করিতে থাকে—বাপ মায়ের দুলালী কন্যার অভাবে সমস্ত পুরী শূন্য হইয়া গেছে। দশ বছর গিয়াছে ; আরো দুই বছর তোমার কপালে দুঃখ আছে।’

এই ভাবে রোজ রাতে কাজল শুকের কাছে আসিয়া কথাবার্তা বলেন ; দুঃখীর দুঃখের কথা,—তাহা আর ফুরায় না।

ইহার মধ্যে রাজান্ন সেই বন্ধু কাজলের রূপ গুণ দেখিয়া মুগ্ধ হইলেন। তিনি খুব উঁচু দরের জ্ঞানী ছিলেন না, ধর্মাধর্মের জ্ঞান ততটা ছিল না। তিনি ভাবিলেন, ‘এই

কন্যা নিশ্চয়ই কোন রাজার বিয়ারী,\* কর্মদোষে দাসীবৃত্তি করিতেছেন। যদি ইঁহাকে কোনক্রমে আমি এই প্রাসাদ হইতে লইয়া যাইতে পারি, তবে আমি ইঁহাকে বিবাহ করিব।’

নকল রাণীরও বিপদের অন্ত নাই। রাজা কঙ্কণদাসীর প্রতি এতটা অনুরক্ত হইয়াছেন যে, তিনি মধুগন্ধে অন্ধ অলির ন্যায় সর্বদা কাজলের কাছে কাছে থাকেন—রাণীর দিকে ফিরিয়াও চান না। রাণী ঠিক করিল যে করিয়া হউক, কঙ্কণদাসীকে সেখান হইতে দূর করিয়া দিতে হইবে। রাজপত্নী ও রাজবন্ধুর উভয়ের উদ্দেশ্য এক হইল, তখন তাহারা ষড়যন্ত্র করিয়া কোন এক রাত্রে কাজলের ঘরের সিঁড়ির উপর সিন্দূর ছড়াইয়া রাখিল। রাজবন্ধু সেই সিঁড়ির উপর পদচারণ করিলেন; দুইটা স্পষ্ট পদচিহ্ন হইল, তাহাতে বোঝা যায় যে কোন একব্যক্তি ঘরে ঢুকিয়া পুনরায় চলিয়া আসিয়াছে।

পরদিন নকল রাণী চীৎকার করিয়া পুরীটা মাথায় করিয়া তুলিল। রাজার কাছে প্রচার করিল, কঙ্কণদাসী কলঙ্কিনী।

### কাজলের খা কলঙ্কিনী

কাজল বলিলেন :—

‘একলা করি নিশি রাইতে ঘরেতে শয়ন,  
কোন জন হৈল মোর এমন দুশমন।  
সাক্ষী হৈও দেব ধর্ম তোমরা সকলে  
সাক্ষী হৈও চন্দ্র তারা দেখেছ সকলে।’

‘আর এই ঘরের বাতিটী সারারাত্রি জ্বলে, আমি ইহাকেই সাক্ষী করিতেছি—  
কালকার রাত্রি সাক্ষী,—আর সাক্ষী কোথায় পাইব?’

‘ঘরে থাকে শুক পাখী সাক্ষী মানি তারে।  
সেই ত বলুক ধর্ম সভার গোচরে॥’

সোণার পিঞ্জরে ধর্মমতি শুক—সেই সভায় আনীত হইল।

‘কও কথা পাখী—ধর্মসাক্ষী করি,  
কাল রাতে ছিল কিনা কন্যা একেশ্বরী।  
দোষী কি নির্দোষী কন্যা কও সত্যবাণী  
ধর্মসভায় আজ পাখী সাক্ষী হৈলা তুমি॥’

\* বিয়ারী = কন্যা

অতিশয় বিপদের সময় একান্ত অন্তরঙ্গ ও বিরূপ হয়। পাখী যাহা বলিল, তাহা তো কন্যার অনুকূল হইলই না, পরন্তু বিপক্ষের অভিযোগ যেন কতকটা সমর্থন করিল—  
পাখীর সেই প্রহেলিকাময় উক্তি এইরূপ :—

‘কইব কি না কইব রাজা শুন দিয়া মন।

কাইল রাতের কথা নাহিক স্মরণ॥

কপালে করাইছে দোষ পড়িয়াছে দোষে,

কলঙ্কী বলিয়া কন্যায় দেও বনবাসে।’

রাজা তাঁহার বন্ধুকে বলিলেন, ‘সমুদ্রের ধারে বালুচড়ায় ইহাকে নির্বাসন করিয়া আইস।’ বন্ধুর অভীষ্ট সিদ্ধ হইল, কিন্তু এই আদেশ দিতে রাজার মর্মান্তিক কষ্ট হইল।

সকল দুঃখে সকল বিপদে কাজল স্বামীর মুখখানি দেখিতে পাইতেন। আজ তিনি সর্বতোভাবে বঞ্চিত হইয়া বিদায় গ্রহণ করিতেছেন। স্বামীর মুখের দিকে চাহিতে পারিতেছেন না, অশ্রুতে গণ্ড ভাসিয়া যাইতেছে। তিনি বলিতেছেন ‘এখানে বড় সুখে ছিলাম, আপনার পায়ে যেন কত ক্রটি হইয়াছে, আমাকে ক্ষমা করিবেন। আপনি দাসী বলিয়া আমাকে মনে রাখিবেন।’ এই বলিয়া কথাটি সংশোধন করিয়া লইলেন—  
‘আমাকে মনে রাখিবেন’ এই অনুরোধ করিবারই বা তাঁহার কি দাবী আছে? তিনি বলিলেন, ‘আপনি আমায় মনে রাখুন বা না রাখুন, আমার একটা অনুরোধ পালন করিবেন ; যেখানে যেভাবে আমার মৃত্যু হউক, আপনি জানিতে পারিলে মৃত্যুকালে আমাকে দেখা দিবেন।’ মুখখানি অশ্রুর প্লাবনে ভাসিয়া গেল, আঁচলে চোখ মুছিতে মুছিতে তিনি নকল রাণীর নিকটে গেলেন। নকল রাণী তাঁহাকে দেখিয়া বিরক্তির ভাবে মুখ ফিরাইল, কিন্তু কাজলের মনে কোন ক্ষোভ বা ক্রোধ নাই :—

‘নকল রাণীর কাছে কন্যা মাগিল বিদায়

চোখের জলে কাজলরেখা পথ নাহি পায়।

করেছি অনেক দোষ চিতে ক্ষমা দিও।

দাসী বলিয়া মোরে মনেতে রাখিও।’

ইহা শ্রবণে রহস্যের কথা নহে, সত্য সত্যই কাজল অত্যাচারীর অত্যাচার ভুলিয়াছিলেন, শত্রুর শত্রুতা ভুলিয়াছিলেন,—এরূপ একটা দৃশ্য কোন সাহিত্যে আর একটা পাওয়া যাইবে কিনা, সন্দেহ। ইহা ক্ষমাশীলতা ও সাধুত্বের গৌরীশঙ্কর শৃঙ্গ। এই নারীর চরিত্রে, যাহা কিছু বুদ্ধ বা ক্রাইস্ট বলিয়াছেন, সেই সমস্ত উপদেশামৃতের উৎস বহিয়া গিয়াছে ; বঙ্গনারীর চরিত্রে যে কি মাধুরী, কি ধৈর্য, কি আত্মবিলোপী পরার্থপরতা ও সর্বসংসা ক্ষমা বিদ্যমান—তাহা এই চিত্রে একাধারে বিরাজিত।

‘অবশেষে—বিদায় মাগিল কন্যা শুক পক্ষীর কাছে।

চক্ষের জলেতে কন্যার বসুমতী ভাসে॥

চন্দ্র সূর্য সাক্ষী কৈল উঠিল ডিঙ্গায় ।  
পুরবাসী যত লোক করে হায় হায়॥'

যাহারা শাস্ত্র পড়ে নাই—পুরোহিতের মন্ত্র শোনে নাই,—চোখের সম্মুখে যাহা ঘটে, তাহা দেখিয়া নিজেরা বিচার করে এবং লোকচরিত্রের মূল্য নির্ধারণ করে, তাহাদের বোধ হয় ঠিকে ভুল হয় না। এই জন্য কাজলের মর্ম-বিদারী বিদায় দৃশ্যে পুরবাসীরা হায় হায় করিয়া কাঁদিয়া উঠিল।

অতল অসীম সমুদ্র গর্ভে ডিঙ্গা ভাসিতে লাগিল, রাজার বন্ধু কাজলকে নির্জনে একলা পাইয়া বলিল :—

‘আমার বাড়ী কাঞ্চনপুর। আমার পিতা মন্তবড় রাজা—তাহার নাম কোটীশ্বর। আমাদের সিংহদ্বারে কত যান-বাহন, কত ঘোড়া-হাতী বাঁধা, আমাদের বাখানেতে\* চরে নবলক্ষ গাই। সমুদ্রের ধারে স্বর্ণমণ্ডিত জলটুঙ্গী ঘর আছে—আমি পিতার একমাত্র সন্তান,—এখন পর্যন্ত অবিবাহিত। আমি তোমাকে বিবাহ করিতে চাই, চল যাই—তোমার সম্মতি লইয়া আমি কাঞ্চনপুরে তোমাকে বিবাহ করিব। শত শত দাস-দাসী ও কিঙ্করী তোমার সেবা করিবে। আমি স্বর্ণালঙ্কারে তোমার দেহ মুড়িয়া দিব।’

কাজল বলিলেন, ‘তুমি রাজার বন্ধু, আমি সেই রাজার দাসী। তুমি নিজে রাজপুত্র হইয়া দাসীকে কেন বিবাহ করিবে? আর রাজা আমায় বনবাস দিতে সক্ষম করিয়া তোমার সঙ্গে পাঠাইয়াছেন, তুমি তাঁহাকে সেইরূপ প্রতিশ্রুতি দিয়া আসিয়াছ, তুমি সে প্রতিশ্রুতি ভঙ্গিবে কেমন করিয়া?’

সদাগর-পুত্র বলিলেন, ‘তুমি আর দাসী থাকিবে না। আমি তোমাকে রাণী করিব। সুবর্ণমন্দিরে আমার সোণার খাটপালঙ্ক আছে, সেইখানে তোমার স্থান হইবে।’

কাজল বলিলেন, ‘দেখ কুমার, আমার পিতা আমাকে কলঙ্কী বলিয়া বনবাস দিয়াছেন, যাহার আশ্রয়ে ছিলাম তিনিও কলঙ্কী জানিয়া আমাকে বনবাস দিবার জন্য তোমার সঙ্গে দিয়াছেন। যাহার সর্বত্র এই অপবাদ, তাহার নিকট তোমার এরূপ প্রস্তাব করা অসঙ্গত, বরং তুমি আমাকে গলায় কলসী বাঁধিয়া এই সমুদ্রের জলে নিক্ষেপ কর। পৃথিবী হইতে এই কলঙ্কিনীর নাম চিরতরে মুছিয়া যাক। মনুষ্যসমাজে আমার মুখ দেখাইবার কোন ইচ্ছা নাই।’

কিন্তু সদাগর-পুত্র কাজলের কথায় কর্ণপাত করিল না, সে সমুদ্রের পথ ছাড়িয়া সেই অরণ্যপ্রদেশ অতিক্রম করিয়া কাঞ্চনপুরে তাহার স্বীয় গৃহের দিকে ডিঙ্গি চালাইয়া দিল।

তখন নিঃসহায়া, বিপন্না কাজলরেখা সাশ্রুনেত্রে আকাশের দিকে তাকাইয়া বলিলেন, ‘হে দেবধর্ম আমায় রক্ষা কর। কায়মনোবাক্যে যদি আমি নিষ্পাপ হইয়া থাকি, তবে আমাকে উদ্ধার কর। কলঙ্কিনী জানিয়া স্বামী আমাকে ইহার হাতে দিয়াছেন বনবাস দিতে’ :—

\* বাখানে = প্রান্তরে।

‘মড়ার উপর দুষ্ট তুলিয়াছে খাড়া।

সতী নারী হই যদি, সমুদ্রে পড়ুক চড়া॥’

সেই অব্যর্থ অভিশাপে, সতীনারীর উত্তপ্ত দীর্ঘশ্বাসে সমুদ্র দুলিয়া উঠিল, সেইখানে ধু ধু বালির চড়া পড়িল, সদাগর-পুত্রের ডিঙ্গা সেই বালিচড়ায় ঠেকিয়া অনড় অচল হইয়া রহিল।

মাঝিমান্নারা বলিল, ‘এই কন্যা ডাকিনী, ইহার মন্ত্রণে ডিঙ্গার এই দুর্গতি হইল। যে করিয়া হউক, ইহাকে এইখানে নামাইয়া দেওয়া হউক—নতুবা এই জনমানবশূন্য বালির চড়ায় আমরা অনাহারে শুকাইয়া মরিব। সদাগর-পুত্রের অনেক প্রতিবাদ সত্ত্বেও লোকজনেরা কন্যাকে সমুদ্রের চড়ায় নামাইয়া দিল, তখন সত্যসত্যই অচল ডিঙ্গা পুনরায় জলপথে চলিল। সদাগর-পুত্র নিরাশার ঘোরে ঐকান্তিক মনোবেদনায় সেই বালির চড়ায় বিসর্জিতা রূপসীর দিকে চাহিয়া রহিলেন। দেখিতে দেখিতে সেই নির্জন চড়াভূমি তাহার দৃষ্টিপথের বাহিরে চলিয়া গেল।

### রত্নেশ্বরের ভুল

ধনেশ্বর সদাগর মরিয়া গিয়াছেন, কন্যার শোকে তিনি জীবনূত হইয়া ছিলেন, এবার উপর হইতে তাঁর ডাক পড়িয়াছে।

রত্নেশ্বর যৌবনে পদার্পণ করিয়াছেন, তিনি বাণিজ্য করিবার জন্য সমুদ্রপথে ডিঙ্গা বহাইয়া দিলেন। কত গ্রাম-প্রান্তর ঘুরিয়া ভাটীর বাগে একটা বিস্তৃত চড়ায় আসিয়া ঝড়ের মুখে ডিঙ্গা ঠেকিল। হুহু করিয়া বাতাস বহিতেছে, ডিঙ্গি খালি টলমল করিতেছে, মাঝিমান্নারা বহু কষ্টে ডিঙ্গির দড়িকাছি বাঁধিয়া নোঙ্গর করিয়া রাত্রি কাটাইল। প্রাতে সুস্বিঞ্চ বায়ু বহিল, পবনদেব উগ্রভাবে ত্যাগ করিয়া শীতল স্পর্শে যাত্রীদের দেহ জুড়াইয়া দিলেন।

রত্নেশ্বর চড়ায় নামিয়া দেখিলেন, বিশাল নলখাগড়ার বন, সেখানে মলিনবসনা এক পরমা সুন্দরী কন্যা। সেই কন্যা যে কাজলরেখা—তাহার সহোদরা ভগিনী, তাহা তিনি চিনিতে পারিলেন না, কাজলরেখাও তাহাকে ভাই বলিয়া বুঝিতে পারিলেন না, কারণ যখন তিনি বাড়ী ছাড়িয়া যান তখন রত্নেশ্বর ছিলেন চার বৎসরের শিশু। প্রায় দুই মাস সেই চড়ায় পড়িয়া কাজলরেখা নলখাগড়ার রস চিবাইয়া জীবন ধারণ করিয়াছিলেন।

রত্নেশ্বর নিজের জাহাজে তুলিয়া কাজলরেখাকে বাড়ীতে লইয়া আসিলেন, তখন কাজলরেখা সমস্তই চিনিতে পারিলেন।

‘আছে, আছে হাতী ঘোড়া রে যে যাহার ঠাঁই।

অভাগিনী কাজলরেখার মা বাপ নাই॥

বড় বড় দালান কোঠা রয়েছে পড়িয়া।

জন্মের মত মা বাপ গিয়াছে ছাড়িয়া

এই ঘরে মায়ের কোলে পালকে শয়ন,

ঘুমাইয়া দেখেছি কত নিশার স্বপন ।  
 এই ঘরে থাকিয়া মায় দিছে ক্ষীর ননী ।  
 সেই মায় হারিয়েছি জন্ম-অভাগিনী  
 কোথা বাপ ধনেশ্বর গেলা কোথাকারে ।  
 তোমার কন্যা ঘরে আসিছে বার বৎসর পরে ।  
 মা নাই বাপ নাই নাই শুক পাখী ।  
 বড় বাড়ীর বড় ঘরে রয়েছে একাকী ।’

সেই বহু বাল্যস্মৃতিজড়িত ঘরবাড়ী দেখিয়া তাঁহার মনের শোক উথলিয়া উঠে । তিনি দিবারাত্র বিমর্ষ চিত্তে, চিত্রার্পিত মূর্তির ন্যায় ঘরের এক কোণে পড়িয়া থাকেন । দাসী ও পরিচারিকারা প্রতিনিয়ত তাঁহার দুঃখের কারণ জিজ্ঞাসা করে, কিন্তু সেই স্তব্ধ দেবীমূর্তির ন্যায় বিষণ্ণ কন্যা কোন কথা বলেন না । একদিন রত্নেশ্বর স্বয়ং আসিয়া তাঁহাকে বলিলেন, বিধুমুখী কন্যা তুমি সমুদ্রের চরায় ভাটীবাগে পড়িয়া ছিলে—

‘ভাটীবাগে\* পড়েছিল সমুদ্রের চরে ।  
 তথা হইতে রূপসী কন্যা উদ্ধার করলাম তোরে॥  
 হাঙ্গর কুমীর তোমায় করিত ভক্ষণ ।  
 বাড়ীতে আনিলাম, তোমা করিয়া যতন ।’

‘আমি বিবাহ করি নাই, তুমি যদি অনুমতি দেও আমি কালই তোমাকে বিবাহ করিয়া জীবন সার্থক করি ; বস্তুতঃ আমি এজন্য উদ্যোগের ক্রটি করি নাই, আমার পিতা মাতা নাই, সুতরাং আমার বিবাহ কাহারো মতের প্রতীক্ষা করিবে না । আত্মীয় বন্ধু, জ্ঞাতি সকলকে খবর দিয়া আনাইয়াছি, পুরোহিত সমস্ত আয়োজনপত্র ঠিকঠাক করিয়া রাখিয়াছেন, বাজনদার, গায়ক ও যন্ত্রধারী-বাদ্যকর সকলেই উপস্থিত আছে । এখন তোমার মত হইলে কালই আমাদের বিবাহ হইতে পারে । এখানে আমাদের কোন দুঃখ বা অসুবিধা নাই, বাসরঘর নানারূপ স্বর্ণ-পালঙ্ক ও তৈজসপত্রে সাজাইয়াছি । দাসদাসী মঙ্গলাচরণে নিযুক্ত হইয়াছে, আমি শুধু তোমার মতের প্রতীক্ষা করিয়া আছি ।’

কাজল উত্তরে বলিলেন, ‘কুমার আমার বিবাহের একটা সর্ত আছে, তাহা তোমাকে পূরণ করিতে হইবে । আমার বংশপরিচয়, পিতামাতা কে—ইহার কিছু না জানিয়াই তুমি আমাকে বিবাহ করিতে চাহিতেছ? আমি হাড়ি কি ডোমের কন্যা এ সকল তো জানা চাই, তাহা না জানিয়া বিবাহ করা বৈধ হইবে না ।’

রত্নেশ্বর বলিলেন, ‘যাঁহার এমন চাঁদের মত মুখখানি, এত রূপ যার সে কখনও কি হাড়ি ডোমের কন্যা হয়! আচ্ছা, তুমি তোমার বংশপরিচয় আমাকে বল, তোমার পিতামাতা কে? কেনই বা একাকী তুমি নলখাগড়ার চড়ায় পড়িয়া ছিলে?’

\* ভাটীবাগে—নদীর দক্ষিণ দিকে ভাটীর মুখে :

কাজল বলিলেন, ‘কুমার আমি দশ বছরের সময় বাড়ী ছাড়িয়াছি, সে সময় আমার বংশের পরিচয় জানার কথা নহে। সূঁচ-রাজার ঘরে একটি শুকপাখী আছে, তাহার নাম ধর্মমতি। সেই পাখী আমার সমস্ত কথা জানে এবং সেই আমার বিবাহের ঘটকালি করিবে। তুমি তাহাকে খোঁজ করিয়া আন—সেই সর্বসমক্ষে আমার পরিচয় দিবে।’

এই কথা শুনিয়া রত্নেশ্বর দেশবিদেশে ধর্মমতি শুকের খোঁজে লোক পাঠাইলেন। সূঁচ-রাজার দেশে এক ভিসি বোঝাই ধনরত্ন লইয়া শুক পাখীর খোঁজে লোকজন রওনা হইল। সূঁচ-রাজার দেশে আসিয়া রত্নেশ্বরের দূতেরা দেখিলেন, রাজা দেশান্তরী হইয়া কোথায় চলিয়া গিয়াছেন। কঙ্কণদাসী ধনের লোভে রত্নেশ্বরের দূতদের কাছে শুকপাখী বিক্রয় করিল।

### ধর্মমতি শুক কর্তৃক পরিচয় দান

এদিকে কাজলরেখাকে বাড়ী হইতে নির্বাসন করিয়া সূঁচ-রাজা একবারে পাগল হইলেন, তিনি বাড়ীঘর ছাড়িয়া রাজ্যে রাজ্যে দেশ বিদেশে তাঁহার হারানো রত্নটী খুঁজিয়া বেড়াইতে লাগিলেন। রত্নেশ্বরের মূল্যকে আসিয়া শুনিলেন রাজা চড়ায় কুড়াইয়া একজন পরী লইয়া আসিয়াছেন, ধর্মমতি শুকের নিকট তাহার পরিচয় লইয়া তিনি আজই তাহাকে বিবাহ করিবেন। রাজসভায় ভয়ানক ভীড় হইয়াছে। রাজসভায় একটা বনেলা\* পক্ষী সেইজন পরীর পরিচয় দিবে, তখন বহু রাজা ও রাজপুত্র এই আশ্চর্য কাণ্ড দেখিবার জন্য রত্নেশ্বরের বাড়ীতে উপস্থিত হইয়াছেন। সভার এক কোণে সূঁচ-রাজাও পাখীর মুখে এ অলৌকিক কাহিনী শুনিতে বসিয়া গেলেন।

সভায় স্বর্ণশলাকাবিশিষ্ট পিঞ্জরে শুকপাখীটা আনীত হইল। শুক সভ্যদিগকে প্রণাম করিয়া নিবেদন করিলেন—

‘ভাটিয়ালদেশে ধনেশ্বর নামক বণিকরাজ বাস করিতেন। তিনি কুবেরের মত ধনশালী ছিলেন, তাঁহার একটা পুত্র ও একটা কন্যা। যখন কন্যাটির বয়স ১১ এবং ছেলের বয়স মাত্র চার, তখন জুয়া খেলিয়া তিনি সর্বস্বহারা হইলেন। কোন সন্ধ্যাসী তাঁহাকে একটা শ্রী আংটী ও ধর্মমতি নামক একটা শুক পক্ষী দিয়া বলিলেন, পাখীটির উপদেশমত যদি তুমি চল, তবে তোমার ইষ্ট হইবে। শ্রী আংটীটী বিক্রয় করিয়া সাধু অনেক ধন পাইলেন, তাহার দ্বারা তাঁহার বিশাল পুরী মেরামত করিয়া উদ্ভূত অর্থ লইয়া বাণিজ্যে গেলেন। এইবার তাঁহার ভাগ্য ফিরিল। তিনি বাণিজ্য করিয়া এত লাভবান হইলেন যে তাঁহার পুরী ধনধান্যে পূর্ণ ও সমৃদ্ধিশালী হইয়া পূর্ববৎ হইল।

‘কিন্তু তাঁহার মেয়ে তখন দ্বাদশবর্ষে পড়িয়াছে। জুয়া খেলার জন্য তাঁহার দুর্নাম হইয়াছিল; জুয়ারীর কন্যাকে কেহ বিবাহ করিতে রাজী হইলেন না।

‘আমার কাছে সদাগর পরামর্শ চাহিলেন; আমি বলিলাম, এই কন্যা অতি দুর্ভাগা, তুমি আজই ইহাকে বনঝাসে দিয়া আস—যদি সন্তানস্নেহে তুমি তাহা না পার, তবে

\* বনেলা—বন্য

কন্যা ও তুমি ঘোর বিপদে পড়িবে। একটী ভাঙ্গা মন্দিরে একটী মৃত রাজকুমার আছেন, কন্যার অদৃষ্ট সেই মৃত কুমারই ইহার স্বামী হইবে।

কাঁদিয়া কাটিয়া ধনেশ্বর সে ভাটী অঞ্চলের নিবিড় অরণ্যে কন্যাকে সেই মৃত রাজকুমারের নিকট ফেলিয়া আসিলেন। তিন দিন তিন রাত্রি কন্যা কিছু খান নাই। এক সন্ধ্যাসীর উপদেশে সাত দিন সাত রাত্রি জাগিয়া কন্যা একটী একটী করিয়া রাজকুমারের সর্বাঙ্গের শল্য উদ্ধার করিলেন, কিন্তু সন্ধ্যাসীর উপদেশে চক্ষের দুটী সূঁচ তিনি তখনও উঠান নাই। সর্বশেষে সন্ধ্যাসীদত্ত পাতার রস চোখে দিয়া সেই সূঁচ দুটী তুলিতে হইবে, এই ছিল সন্ধ্যাসীর নির্দেশ। কাজলরেখা পুকুরঘাটে স্নান করিয়া শুদ্ধ শান্ত ভাবে স্বামীর চক্ষের সূঁচ তুলিবেন, এইজন্য সেই ঘাটে বসিয়া অঙ্গ মার্জনা করিতেছিলেন, এমন সময় একটী বৃদ্ধ তাহার কন্যা বিক্রয় করিতে সেখানে আসিল। বৃদ্ধ একটী চাখা, তাহাকে নিজ হাতের কঙ্কণ দিয়া কাজল কন্যাটীকে ক্রয় করিয়াছিলেন। পিতা হইয়া কন্যাকে বিক্রয় করিতেছে, ইহা শুনিয়া কন্যাটির প্রতি তাঁহার আন্তরিক সহানুভূতি হইয়াছিল। কিন্তু কন্যার ছিল আসুরিক বুদ্ধি, সে কাজলের কাছে সমস্ত অবস্থা শুনিয়া তাড়াতাড়ি মন্দিরে ঢুকিয়া রাজার চোখের সূঁচ নিজেই তুলিয়া ফেলিয়া সন্ধ্যাসীদত্ত পাতার রস তাঁহার চক্ষে দিল।

‘রাজপুত্র পুনরায় জীবনলাভ করিলেন, তখন এক অশুভ মুহূর্তে সেই কঙ্কণদাসীকে তাঁহার প্রাণদাত্রী মনে করিয়া তাহাকে বিবাহ করিতে প্রতিশ্রুতি দিলেন। এমন সময় স্নানান্তে লক্ষ্মীপ্রতিমার ন্যায় কাজলরেখা মন্দিরে প্রবেশ করিলেন। সূঁচ-রাজার প্রশ্নের উত্তর দিবার পূর্বেই কঙ্কণদাসী অগ্রসর হইয়া কাজলরেখার পরিচয় দিল, সে বলিল, “এটী আমার দাসী, আমি কঙ্কণ দিয়া ইহাকে ক্রয় করিয়াছি, ইহার নাম কঙ্কণদাসী।”

এই কথা বলিতে বলিতে বৃদ্ধ শুকের চক্ষের জল আর থামে না,—কঙ্কণদাসী এইভাবে রাণী হইল এবং প্রকৃত রাণী তাহার দাসী হইলেন; কাজলকে দাসী যত দুঃখ দিয়াছে, তাহা বর্ণনা করিতে যাইয়া গদগদকণ্ঠে অশ্রুপূর্ণচক্ষে পাখী সব কাহিনী বর্ণনা করিতে লাগিল; তাহাতে সভার সকল লোক কাঁদিয়া উঠিল। তারপরে কিভাবে বৃথা অভিযোগ করিয়া কলঙ্কিনী করিয়া তাহাকে সেই সদাগর যেভাবে সমুদ্রের চড়ায় ফেলিয়া আসিয়াছিল, শুক তাহার একটা বিবৃতি দিল।

এই সময়ে সূঁচ-রাজা সম্পর্কেও শুক এক অলৌকিক কাহিনী শুনাইল। চম্পানগরের রাজমহিষী এই মৃত কুমারকে প্রসব করেন। এক সন্ধ্যাসীর উপদেশে এই মৃত কুমারকে সেই ভাটী অঞ্চলের ভাঙ্গা মন্দিরে রাখা হয়, সন্ধ্যাসীর বরে দেহের শ্রী তাঁহার থাকিয়া যায় এবং দেহের বৃদ্ধি স্থগিত হয় না। সন্ধ্যাসী ইহার সর্বাঙ্গে সূঁচ বিধাইয়া ভাঙ্গা মন্দিরে রাখিয়া যান এবং তাঁহারই কথায় কাজল ইহার শল্য উদ্ধার করেন।

সর্বশেষে শুকপাখী বলিলেন, রত্নেশ্বর কাজলকে বিবাহ করিতে চায়।

‘উড়িতে উড়িতে পাখী সভার আগে কয়।

ভাই হয়ে রত্নেশ্বর বিয়া করতে চায়॥



আজ হৈতে কন্যার বার বছর গত হয় ।

এই কথা কহি পাখী শূন্যেতে মিলায়।'

### নকল রাণীর শাস্তি

রত্নেশ্বর বিষম লজ্জা পাইয়া অন্তঃপুরে যাইয়া দিদির নিকট ক্ষমা প্রার্থনা করেন ।  
এতকাল পরে দুই ভ্রাতা ভগিনীর মিলনে যে আনন্দ হইয়াছিল, তাহাতে রাজপুরী যেন  
সুখের বন্যায় ভাসিয়া গিয়াছিল । সূচ-রাজা তাহার হারানো ধন পাইয়া পরম হুঁচকিতে  
গৃহে ফিরিলেন । তিনি স্বগৃহে যাইয়া একটা অতি গভীর ও প্রকাণ্ড গর্ত খনন করাইলেন  
এবং অন্তঃপুরে যাইয়া নকল রাণীকে বলিলেন, 'ভাটীদেশের রাজা ধনেশ্বর আমাদের  
বাড়ী লুটিতে আসিয়াছেন, সুতরাং আইস আমরা প্রাণ লইয়া এই বেলা পলাইয়া যাই ।'  
নকল রাণী কালবিলম্ব না করিয়া সর্বাত্মে তাহার মূল্যবান রত্নগুলি কোঁটায় পুরিয়া সেই  
গর্তে প্রবেশ করিল । রাজার ইঙ্গিতে লোকজন আসিয়া সেই গর্ত মাটি দিয়া পূর্ণ করিল,  
এইভাবে কঙ্কণদাসীর সেইখানে সমাধি হইল ।

### আলোচনা

কাজলরেখা, ভারতীয় আদর্শের একটি সর্বোচ্চ পরিকল্পনা । এই চিত্র যেন আত্মত্যাগশীল  
রমণী-মহীকুহদের মধ্যে উন্নত গৌরীশঙ্কর ।

পত্নী-কল্পনা যে সকল রমণীচিত্র আমাদের গোচর করিয়াছে, তাহার প্রত্যেকটীতে  
কোন না কোন গুণ বিশেষভাবে ফুটিয়াছে । সাধুত্ব ও চরিত্রগুণে সকলেই পূজা ও  
শ্রদ্ধাভাজন, কিন্তু কাহারও মধ্যে অপূর্ব সংযম দৃষ্ট হয় ; প্রত্যেকেরই মধ্যে একটা  
বৈশিষ্ট্য বিদ্যমান, এবং আশ্চর্যের বিষয় এই যে প্রায় এক শত পত্নীচিত্র আমাদের  
হস্তগত হইয়াছে, তন্মধ্যে পুনরাবৃত্তি দোষ, এবং একটা আদর্শকেই বারংবার  
বেশপরিবর্তনপূর্বক প্রদর্শন, অনর্থক বাক্যবাহুল্য প্রভৃতি অসঙ্গতি ও অপূর্ণতা নাই ।  
প্রত্যেক চরিত্র ভিন্ন ভিন্ন এবং সুস্পষ্ট রেখায় অঙ্কিত ; এদেশে যে সকল কবি প্রাচীন  
কালে মহিলা-চরিত্র আঁকিতে গিয়াছেন, তাহার সমস্ত স্থানেই সে সকল চরিত্র-সীতা-  
সাবিত্রীর ছাঁচে ঢালাই করা হইয়াছে ; কিন্তু বাঙ্গালার এই পত্নীর ঐশ্বর্য কি বিরাট ! এই  
চিত্রশালায় প্রায় ৫০টা আদর্শ রমণী পাইতেছি, তাহার কাহারও সাহস দুর্জয়, কেহ  
উগ্রপ্রকৃতি, কেহ নানা বিরুদ্ধ অবস্থার পরীক্ষায় ও স্থায়ী অকুণ্ঠিত নির্ভীকতাবলে  
সর্বত্রজয়ী । এই সকল চিত্রপরিকল্পনায় পাঠক কোন নৈতিক বা ধর্ম-সূত্র পাইবেন না ।  
পত্নী-কবির হাতের কাছে একটীমাত্র শাস্ত্র ছিল, অন্য কোন পণ্ডিতী অনুশাসন ছিল না ।  
সে শাস্ত্র—প্রকৃতি । এই গুরুই কবিকে ভালমন্দের বিচার শিখাইয়াছেন, তিনি অন্য  
কোন শাসনের অনুবর্তী হন নাই ।

কাজলরেখা মূর্তিমতী সহিষ্ণুতা । এদেশের নারী-জীবন নিরবচ্ছিন্ন কষ্টের  
ইতিহাস,—নানাবিধ সামাজিক দুর্দশা ও অবস্থার বৈগুণ্যে নারীকে প্রায়ই সকল কষ্ট

নারীবে সহ্য করিতে হয়। এই সহিষ্ণুতা কুলরমণীর স্বাভাবিক সাধুত্ব ও লজ্জাশীলতার উপর দাঁড়াইয়া দেবলোকের কি অপূর্ব পারিজাতপুষ্প উৎপন্ন করিতে পারে, কাজল তাহারই দৃষ্টান্ত।

কাজলকে পিতা ভীষণ জঙ্গলে ভাস্মা মন্দিরে একটি শবের পার্শ্বে রাখিয়া গৃহে ফিরিয়া আসিলেন। ইতিপূর্বেই তিন দিন কাজল উপবাসী ছিলেন, তারপর সাত দিন সাত রাত্রি মৃত কুমারের শয্যায় বসিয়া তিনি তাঁহার সর্বাস্থের শল্য উদ্ধার করিলেন। কিন্তু যে মুহূর্তে ভাগ্য-চক্রনেমির পরিবর্তন হইবে এবং তিনি সুখের মুখ দেখিবেন, তখনই কি অভূতপূর্ব বিপদ উপস্থিত হইল! যাহাকে সমদুঃখী মনে করিয়া তাঁহার হৃদয় করুণায় বিগলিত হইয়াছিল, যাহাকে দুঃখের সহচরী ভাবিয়া অতি স্নেহে হাতের কঙ্কণ দিয়া কিনিয়াছিলেন, সেই রমণীর মনে ‘অসুরভাব’ জাগিয়া উঠিল এবং সে এমনই আঘাত দিল, যাহাতে তাঁহার জীবনের প্রথম অংশ একান্ত ভাবে ব্যর্থ হইয়া গেল।

কিন্তু সমস্ত অবস্থাই সহিতে হইবে, সন্ন্যাসী বলিয়া গিয়াছেন ‘জোর করিয়া কপালের দুঃখ খণ্ডাইতে যাইও না।’ দৈবের বিধান ও সন্ন্যাসীর উপদেশ মানিয়া কাজল চূপ করিয়া রহিলেন; এত বড় একটা মিথ্যার ব্যাপার তাঁহার চক্ষের উপর বহিয়া গেল, কোথায় রাগী হইবেন, তৎপরিবর্তে তিনি তাঁহার নিজের দাসীর দাসী হইলেন!

এই অকম্পিত দীপশিখার মত নির্বাক রমণীচিত্রে আমাদিগের পরম বিশ্বাস উৎপাদন করে। অন্য কেহ হইলে কত আর্তনাদ, কত ক্রোধ, কত যুক্তি, কত প্রমাণ উপস্থিত করিয়া সমস্ত বায়ুমণ্ডল আলোড়িত করিয়া ফেলিতেন। কিন্তু কাজল নিষ্পন্দ নিশ্চল,— তিনি দৈব মানিয়া মহাদুঃখের জীবন বরণ করিয়া লইলেন।

দৈব কি? লক্ষণ যখন ধনুর্বাণ আক্ষালন করিয়া বলিতেছিলেন, ‘হনিষ্যে পিতরং বৃদ্ধং কৈকেয়্যাসক্তমানসম্’ পুরুষকারের এই জুলন্ত মূর্তিকে প্রবোধ দিয়া রাম বলিলেন—‘লক্ষণ, ইহা দৈব! যে ঘটনা সম্পূর্ণ অপ্রত্যাশিত, যাহা কোন্ দিক দিয়া ঘটে—মানুষ তাহা বুঝিতে না পারিয়া হতবুদ্ধি হইয়া দাঁড়ায়,—সেই সকল ঘটনা দৈব। রাজা দশরথের আমি প্রিয়তম সন্তান,—কৈকেয়ী আমাকে কৌশল্যা অপেক্ষাও স্নেহ করিয়া আসিয়াছেন—আজিকার ব্যাপার সম্পূর্ণরূপে কল্পনাতীত, এই অঘটন কি করিয়া ঘটিল তাহা আমি জানি না; ইহা দৈব, পুরুষকার দিয়া ইহার প্রতিকার হইবার নহে।’

প্রত্যেকের জীবনে সময়ে সময়ে এইরূপ দৈবের খেলা দেখা যায়; তখন যাহা সত্য, যাহা দিবালোক, তাহা প্রমাণ করা যায় না, যাহা হৃদয়ের দরদ দিয়া সম্পূর্ণ নিঃস্বার্থভাবে করা যায়—নিতান্ত অন্তরঙ্গের এমন কি যাহাদের ইষ্টের জন্য নিজ সুখ জলাঞ্জলি দিয়া শত দুঃখ বরণ করিয়া লওয়া হইয়াছে, তাহারাও সকলেই সম্মুখের সরল পথ দেখিতে পায় না, প্রত্যেকটি কার্যের কূট অর্থ করিয়া তাহা হীন প্রতিপন্ন করে;—যখন নিতান্ত স্বগণেরা ভুল বুঝিয়া শত্রুতা করে, বহু প্রমাণ লইয়া আসিয়া এইরূপ বিপন্ন ব্যক্তি দুর্ভাগ্যের প্রতিরোধ করিতে চেষ্টা করিলে আবর্জনার স্তূপ দিয়া আগুন নিবাইবার প্রচেষ্টার মত, তাহাতে সেই দুর্ভাগ্যের আগুন দাউ দাউ করিয়া আরও বেশী জুলিয়া উঠে, তখন যতই প্রমাণ সে আনিবে, তাহা বিপক্ষের অনুকূল হইবে, আদালতের বিচারে নিরপরাধের ফাঁসি হইয়া যাইবে।

যাঁহারা জীবনের এই রহস্য জানেন তাঁহারা বুঝিতে পারেন 'দৈব' কি। সন্ধ্যাসী এজন্যই বলিয়াছেন, 'কপালের দুঃখ জোর করিয়া খণ্ডাইতে যাইও না।' শাস্ত্রে আছে, যখন দৈব প্রতিকূল হয় তখন সমস্ত গুণ দোষে পরিণত হয়, নিঃস্বার্থ ব্যবহার স্বার্থের রূপ বলিয়া প্রমাণিত হয়,—কিন্তু দৈব অনুকূল হইলে দোষগুলি গুণরূপে প্রতিপন্ন হয় এবং যাহা পাপ ও অধর্মের স্বরূপ—তাহা পুণ্য বলিয়া সকলের চক্ষে প্রসংশিত হয়।

এইরূপ দুঃসময় কখনও কখনও উপস্থিত হয়, যখন যাহা কিছু পুস্তকে পড়া গিয়াছে, জীবনে তাহার অন্যথা প্রমাণিত হয় ; সত্য কথা, সহানুভূতি ও উদারতা জীবনে ব্যর্থ হইয়া যায়।

এজন্য খ্রীষ্ট বলিয়াছেন, 'Resist not evil'—যখন দুঃসময় আসে তখন প্রতিরোধ করিতে যাইও না।

এক কৃষক ঝড়ের সময় বিপরীত দিকে ঠেকা না দিয়া—যেদিক হইতে ঝড় আসিতেছিল, সেই দিকে ঠেকা দিয়াছিল। লোকে উপহাস করাতে সে বলিয়াছিল, 'আমার কি সাধ্য খোদার মর্জির বিরুদ্ধে চলিব? বরং যদি নিজেকে তাঁহার বিধানের অনুকূল করিয়া তুলিতে পারি, তবে লাভ আছে।'

এই গল্পের নীতিকথা এই : যদি নিতান্ত বিপদের সময় আফালন ও স্বশক্তিতে তাহা খণ্ডাইবার চেষ্টা না করিয়া ধৈর্য ধরিয়া থাক, তবে নির্দিষ্ট সময়ে বিপদের ঘোর কাটিয়া যাইবে এবং আকাশ-বাতাস নির্মল হইবে এবং লোকে তোমার মূল্য বুঝিতে পারিবে। কিন্তু তাহা কি সহজ? বিপদের সময় কি কেহ আত্মরক্ষার চেষ্টা না করিয়া থাকিতে পারে? কিন্তু নিজের উদ্ধার-সাধনের জন্য বিপন্ন ব্যক্তি যে চেষ্টা করিবে, নির্বিকার হইয়া দৈবের উপর স্বার্থকে নির্ভর করিয়া থাকিতে তদপেক্ষা শতগুণ শক্তির দরকার ; কাজল সেই অপরিমিত ধৈর্য ও সহিষ্ণুতার আদর্শ। কাজলের স্বভাবটী ছিল সহিষ্ণু—তাহার উপর তিনি পরম গুণবতী ও ক্ষমাশীলা ছিলেন। কঙ্কণদাসীর সঙ্গে তিনি যে ব্যবহার করিয়াছেন, অন্য কেহ কি তাহা পারিত? তাঁহার চরিত্রের মাধুর্যের সর্বাপেক্ষা বড় প্রমাণ সেই দিন তিনি দিয়াছিলেন যে দিন রাজপুরী হইতে বিদায়ের প্রাক্কালে তিনি কঙ্কণদাসীর নিকট ক্ষমা চাহিয়াছিলেন, তখন তাঁহার চক্ষু দুটী জলে ভরা।

পাঠক হয়ত মনে করিতে পারেন, এসকল কথা মাথা ডিঙ্গাইয়া যায়, কোন স্ত্রীলোক কি বাস্তব জগতে এতটা উদারতা দেখাইতে পারে? কিন্তু আমি আমার দেশের মেয়েদের হয়ত কিছু জানি, কারণ পল্লীজগৎ আমার পরিচিত ; এখন সে জগৎ আর নাই। আমার ধারণা আমাদের দেশের পূর্বেকার মেয়েরা ধর্ম ও নীতির সর্বোচ্চ শৃঙ্গ অনায়াসে আরোহণ করিতে পারিতেন।

জ্ঞানী ছিল গুণপাখী, তাহার কাজলের উপর দরদের অন্ত নাই। শেষ অধ্যায়ে যখন সে কাজলের দুঃখে জীবন বর্ণনা করিতেছিল, তখন সে অশ্রুধারা কণ্ঠে সময়ে সময়ে থামিয়া স্বর পরিষ্কার করিয়া লইয়াছে। কাজলের দুঃখে সে নিজে অত্যন্ত দুঃখ পাইয়াছে। অথচ সে সত্য কথা বলিয়া কাজলকে রাজসভায় সমর্থন করিল না। যাহা কিছু বলিল তাহা দিবা ও রাত্রির সন্ধিস্থলের মত, প্রহেলিকাময় ও অস্পষ্ট। এরূপ করার

কারণ কি? পাখী জানিত, কাজলের মাথার উপর দিয়া তখন প্রবল দৈব ঘূর্ণিবায়ুর মত চলিয়া যাইতেছে। এসময় সত্য বলিয়া চিৎকার করিলে তাহা প্রমাণে টিকিবে না ; দৈব তাহা উড়াইয়া লইয়া যাইবে, এজন্য দুঃখার্হ কণ্ঠে সে দ্ব্যর্থবোধক কথা বলিল। কাজলের অদৃষ্টের দুঃখ তাহাকে ভোগ করিতেই হইবে—সময়ের পূর্বে তাহা খণ্ডিবে না, বরং বাধা পাইলে তাহার গতি আরো বৃদ্ধি পাইবে।

এই গল্পটী সম্ভবতঃ বৌদ্ধ যুগে পরিকল্পিত হইয়াছে। ইহাতে খুব বড় বড় বিপদ ও দুঃখের কথা আছে, কিন্তু ‘চণ্ডীর চৌতিসা’ অথবা ‘শ্রীকৃষ্ণের শতনাম’ নাই। বিপদের সময় ভগবানের সহায়তার জন্য চেষ্টা নাই—নিজের সহিষ্ণুতা ও উদারতা মাত্র লইয়া কাজল সর্ব বিপদের অবস্থার সম্মুখীন হইয়াছেন।

সেই যুগে মেয়েদের চিত্রাঙ্কন, রন্ধন, শিল্প প্রভৃতির বিশেষ চর্চা হইত। কিন্তু কোন স্থানেই ব্রাহ্মণ্যের প্রভাব দৃষ্ট হয় না। চিত্রাঙ্কনের সময় গণেশের নাম চিত্রকরীর মনে প্রথম উদয় হয় নাই, রন্ধনশালায় অনুপূর্ণা বা লক্ষ্মীকে প্রণাম করিয়া কাজল রাঁধিতে বসেন নাই। দেবদেবীর কথা আছে,—তাহা চালচিত্রের ন্যায়, কিন্তু বৌদ্ধাধিকারে প্রতিষ্ঠিত কতকগুলি পল্লীদেবতার নাম পাওয়া যায়—যথা ডড়াই, ডাকিনী, শ্যাওরা গাছতলায় বনদেবী ইত্যাদি। সমস্ত অবস্থান্তরের মধ্যে বিপদের ঘোরে এবং নৈরাশ্যের আঁধারে কাজলরেখার যে দেবীমূর্তি ফুটিয়াছে তাহা সূর্যারশির মত কিরণজাল প্রক্ষেপ করিয়া বিয়োগবিধুর গল্পটীকে স্বর্ণচ্ছটায় মণ্ডিত করিয়াছে এবং কাজলের ক্ষমাশীল আত্মদান সমুজ্জ্বল ও সহিষ্ণু পরিচর্যায় মূর্তিকে বরণীয় করিয়া দেখাইতেছে। চতুর্দিকে লবণ-সমুদ্র, মধ্যে ক্ষুদ্র দ্বীপের ক্ষুদ্র দীঘিটির জল এক মিষ্ট কিরূপে হইল? কাজলের স্বভাব সেইরূপ মিষ্ট। তাঁহার উপর দিয়া কৃতঘ্নতা, নিষ্ঠুরতা ও মিথ্যার বন্যা বহিয়া যাইতেছে কিন্তু এই অমৃতকুণ্ডের জল কেহ বিশ্বাস করিতে পারে নাই। কাজল অমৃতলোকের মানুষ, কি সাধ্য পার্থিব আবর্জনা তাহাকে মলিন করিবে? ‘ঘৃষ্টং ঘৃষ্টং ত্যজতি ন পুনঃ চন্দনং চারুগন্ধং’ এই অমর পুষ্পের সুরভি নষ্ট করিবার অধিকার জড়শক্তির নাই।

এই কাজলের চিত্রে হিন্দু রমণীর যে আদর্শ আছে, তাহা এক সময়ে বঙ্গের পল্লী ও নগরের আকাশে বাতাসে ছিল ; সেই ত্যাগ ও সহিষ্ণুতা ও সেই প্রাণ-দেওয়া নীরব সেবা ও সর্বস্বহারার জীবন উৎসর্গ কতবার সকলের গোচর হইয়াছে, কখনও বা লোকচক্ষুর অন্তরালে কোনরূপ ঘোষণা বা স্মৃতি না রাখিয়া তাহাদের লোপ হইয়াছে। কিন্তু এই সকল মহৎ গুণ কোন কালেই ব্যর্থ হইবার নহে। বনের কুসুম শত শত ঝরিয়া পড়িয়া বনের মাটিতে মিলাইয়া যায়, কেহ তাহাদিগকে দেখে না। কিন্তু যে পবিত্র ভূমিতে তাহাদের জন্ম তাহার কাছে তাহাদের প্রতিটী রেণুর ফর্দ আছে ; সেই ভূমি নানা বর্ণের—নানা গন্ধের রেণু কুড়াইয়া রাখেন, এবং পরে যে সকল ফুল ফোটে তাহা ভূমি হইতে সেই বিগত বৈভবের রেণু লইয়া পুষ্ট হয়। আমাদের ধরিত্রীর ভাঙারে তাহা হারায় না। পুনঃ পুনঃ তাহা কলেবর পরিবর্তন করিয়া নূতন রূপ ধরিয়া পৃথিবীকে লাভণ্যময় করিয়া তোলে।

কাজলরেখার মত কত রমণী এই দেশে রহিয়াছেন, সন্ন্যাসিনীর মত সাধুত্ব লইয়া ত্যাগ ও আত্মদানের চূড়ান্ত নিদর্শন দেখাইয়া চলিয়া গিয়াছেন। কেহ হয়ত তাঁহাদের মহিমা বুঝে নাই। বিরুদ্ধ বেষ্টনীর মধ্যে তাঁহাদের লোকাভীত সৌন্দর্যের ও সরস প্রাণের রস-বোদ্ধা কেহ ছিল না ; অকথ্য কষ্ট সহিতে সহিতে তাঁহারা চলিয়া গিয়াছেন ; কিন্তু এ দেশের বাতাসে এখনও তাঁহাদের সুরভি আছে এবং অনুকূল গ্রহের বিধানে হয়ত আমাদের রমণী-সমাজে আবার সেইরূপ শাখা সিন্দূরের অভিমান ফিরিবে,— হয়ত সেই গেরুয়ার নিষ্পৃহতা ও সংযমের কষায়বাস আবার জীবন্ত হইয়া দেখা দিবে, তখন বৌদ্ধসঙ্ঘের পবিত্র বহির্বাস, হিন্দু ও অন্তঃপুরের পটবাসের মহিমা আবার উজ্জ্বল হইয়া এই দেশে প্রতিষ্ঠা পাইবে। এদেশ কোনকালেই তাহার অধ্যাত্মসম্পদ বিচ্যুত হয় নাই। যাহারা চিতায় পুড়িয়া প্রেমের অকুতোভয়তা এবং একনিষ্ঠা দেখাইয়াছেন, যাহারা গার্হস্থ্য ধর্মপালন করিতে যাইয়া ব্রহ্মচারিণীদের অপেক্ষাও একব্রত হইয়াছিলেন, সেই সকল অঙ্গনা চলিয়া গিয়াছেন, প্রতিষ্ঠা তাঁহারা চান নাই—এজন্য পান নাই, কিন্তু প্রকৃতি তাঁহার আঁচলে সেই সকল চিতা-ভস্ম রাখিয়া দিয়াছেন। আবার দেশের ভাগ্য ফিরিলে সেই রিক্তাদের মহাবৈভব লোকচক্ষুর গোচর হইবে এবং ভারতবর্ষ অধ্যাত্মসম্পদের অধিকারী হইবে।

এই গল্পের সামাজিক অবস্থা যাহা পরিকল্পিত হইয়াছে, তাহাতে বঙ্গদেশের পালযুগের বিপুল ঐশ্বর্যের কথা আছে, সেই সময়কার অপরাপর অনেক গল্পেই তাহা পাওয়া যায়। হয়ত অনেক অতিরঞ্জন আছে, কিন্তু তথাপি বাদ সাদ দিয়া যাহা সত্যিকার আভাস দিতেছে, তাহাতে মনে হয় বাঙ্গালার তখনকার ধনৈশ্বর্যের তুলনা ছিল না। এই গল্প নিছক গল্প—ইহা ইতিহাসমূলক নহে। এই সকল গল্প রূপকথার পর্যায়ে পড়ে। শিশুর কল্পনা ও কৌতুহল ও শ্রবীণের চিন্তাশীলতার অনেক উপাদান এই সকল রূপকথায় আছে। যখন বাঙ্গালী জাতি ধন-জন ও ঐশ্বর্যে সমৃদ্ধ ছিল, এবং বাঙ্গালার ডিপি বাণিজ্যপথে জগৎ পর্যটন করিত, এসকল রূপকথা সেই যুগের। ভাষার অনেকটা পরিবর্তন হইলেও ইহার বিষয়বস্তু অতি প্রাচীন,—সম্ভবত, আমরা পূর্বেই বলিয়াছি, পালযুগের। সমাজ যে তখন উন্নত সুনীতির পৃষ্ঠপোষক ছিল, তাহার প্রমাণ এই যে জুয়াড়ীর কন্যাকে কেহ বিবাহ করিতে চাহিত না। অবশ্য তাত্ত্বিক বিদ্যার বিশেষ চর্চা থাকার দরুন অলৌকিক ঘটনার প্রতি লোকের বিশ্বাস থাকাতে অনেক সময়ে সামাজিক দুর্গতি হইত।

## চাকলাদারের কন্যা

ময়মনসিংহে নন্দাইল ষ্টেশন হইতে দশ মাইল দূরে ছলিয়া (বর্তমান হালিউড়া) গ্রামে মাণিক চাকলাদার নামে একটি প্রতাপশালী ভাগ্যবন্ত লোক বাস করিতেন। সেই অঞ্চলের রাজার অধীনে তিনি বিস্তৃত জমিদারী ভোগ করিতেন।

তাহার বাড়ীতে উলুছনের ছাউনি ও সুঁদি-বেতের বেড়াযুক্ত ২০ খানি বাঙ্গলা ঘর ছিল ; সে আমলে অধিকাংশ অবস্থাপন্ন লোকই এরূপ ঘরে বাস করিতেন—পাকা ঘর নির্মাণের বড় একটা রীতি ছিল না। নদীমাতৃক দেশে পাড়'ভাস্কর বিপদ আছে, ইষ্টকালয়ে বাস নিরাপদ নহে, এবং অনেক সময় বহুব্যয়ে যাহা নির্মিত হইত তাহা পাড় ভাস্কায় নদী গর্ভে পড়িয়া যাইত।

কিন্তু এই সকল উলুছনে নির্মিত গৃহ যেরূপ ব্যয় ও যত্নের সহিত গঠিত হইত, তাহা অনেক সময় পাকা ইমারত অপেক্ষা শুধু অধিক আরামপ্রদ ও বাসযোগ্য হইত না, তাহা নির্মাণ করিতেও বহু ব্যয় পড়িত। আইন-ই-আকবরিতে বাংলাদেশের এইরূপ ঘর নির্মাণের কথা আছে,—পাঁচ হাজার টাকার উপরে এক একখানি ঘরের পাছে ব্যয় হইত, কোন কোন সৌখিন লোক একখানি ঘরের পাছে ২৫/৩০ হাজার টাকা খরচ করিয়া ফেলিতেন। বেতের দ্বারা সে সমস্ত হাস্রমুখ, ব্যাঘ্রমুখ এবং ভীষজন্তুর মূর্তি রচিত হইয়া চালের কাঠগুলির শোভাবর্ধন করা হইত। আভ ও ক্ষুটিকের স্তম্ভে কত বিচিত্র কারুকার্য প্রদর্শিত হইত। টাকার মসলিন ও সোণারূপার কাজ যেরূপ অতুলনীয় ছিল, এই খড়োঘরগুলিও সেইরূপ বাঙ্গালী কারিগরের অপরূপ দক্ষতার নিদর্শনস্বরূপ পল্লীতে পল্লীতে শোভা পাইত।

চাকলাদারের বাড়ীর ঘরগুলি বেত ও ছনে নির্মিত বলিয়া উপেক্ষণীয় ছিল না। তাহার বাড়ীতে বহু লোকজন খাটিত। দশটি হাতী এবং ত্রিশটি ঘোড়া তাহার বাড়ীতে সর্বদা ব্যবহারের জন্য ছিল এবং গো-শাসনে শত শত মহিষ, ভেড়া ও দুগ্ধবতী গাভী বিচরণ করিত। তাহার চল্লিশ 'কুড়া' খামারের জমি ও বিস্তর সরু শস্যের গোলা ছিল।

অতিথি ও বৈষ্ণব আসিলে সে গৃহে কতই না আদর অভ্যর্থনা পাইত এবং আশাতীত দানে আপ্যায়িত হইত। ব্রাহ্মণ আসিলে নববস্ত্র ও দক্ষিণা পাইয়া গৃহস্থামীকে আশীর্বাদ করিয়া যাইতেন এবং খজু, কাগা ও অন্যান্য ভিখারীরা কাঠা ভরিয়া চাউল ভিক্ষা পাইত। ধনেধান্যে লক্ষ্মীমন্ত মাণিক চাকলাদার দয়াদাক্ষিণ্য ও সুবিচার দ্বারা সে অঞ্চলে সুনাম অর্জন করিয়াছিলেন ; তাহার একটি কিশোরী কন্যা ছিল, নাম তার কমলা—যেন পদ্মাসনা পদ্ম ছাড়িয়া ভূতলে আবির্ভূত হইয়াছিলেন, এমনই তাহার রূপ। তাহার কালো চোখ দুটি নীলাজ বা অপরাজিতার মত সুন্দর ছিল এবং দীর্ঘ কেশগুলি কালো মেঘের লহরীর মত

উড়িতে থাকিত, সেই কেশে ‘কখন খোপা বাঁধে কন্যা, কখন বাঁধে বেণী’—যৌবনাগমে এই কুমারীর রূপ শত গুণ বাড়িয়া জোয়ারের নদীর মত পূর্ণতা লাভ করিল।

রাজাদের নীচে কয়েকজন চাকলাদার বা জমিদার থাকিতেন—এই পদের নীচে রাজার আদায় উসুল করার জন্য রাজারা ‘কারকুন’ নামক একশ্রেণীর কর্মচারী নিযুক্ত করিতেন। মাণিক চাকলাদারের অধীনে একজন তরুণ বয়স্ক কারকুন ছিল। জমিদারী সেরেস্তার সমস্ত দলিল ও কাগজপত্র তাহার হেপাজতে থাকিত এবং চাকলাদারের হিসাবপত্র এই কারকুনই রাখিত।

একদিন বৈকাল বেলা গ্রীষ্মের উত্তাপে কমলা স্নান করিতে নিকটবর্তী দীঘির ঘাটে গিয়াছে। একটা দারুণ গাছের আড়ালে কারকুন তাহাকে দেখিতে পাইয়া মুগ্ধ হইল। সে কমলাকে লাভ করিবার জন্য একবারে উন্মত্ত হইয়া সেই গ্রামের চিকন গোয়ালিনী নামক এক দুশ্চরিত্রা রমণীর শরণাপন্ন হইল। এই নারী প্রায় বার্ধক্যে উপনীত হইয়াছিল। সে দুধ বেচিয়া জীবিকা নির্বাহ করিত; কিন্তু যৌবনকালে দুধ অপেক্ষা কথা বেচিয়াই সে অধিক সংখ্যক গ্রাহক সংগ্রহ করিত। ‘...এই চিকন গোয়ালিনী/ এক সের দৈয়ে দিত তিন সের পানি।’ এখন আর তাহার রূপের বাহার নাই।

‘যদিও যৌবন গেছে, তবু আছে বেশ।  
বয়সের দোষে মাথার পাকিয়াছে কেশ।  
কোন দন্ত পড়িয়াছে, কোন দন্তে পোকা।  
সোয়ামী মরিয়া গেছে, তবু হাতে শাঁখা।’

যৌবন চলিয়া গেলে এই শ্রেণীর রমণীরা মস্ততন্ত্র ও টোনা প্রভৃতি শিখাইয়া দুশ্চরিত্র যুবকদিগের কু-অভিপ্রায় সিদ্ধ করিতে সহায়তা করিয়া থাকে। চিকন গোয়ালিনীও সেইরূপ অনেক ‘টোনা’ জানিত, তাহার পানপড়া একরূপ অব্যর্থ ছিল—সে তাহা দিয়া যুবক-যুবতীদের অসৎ অভিপ্রায় পূর্ণ করিতে সাহায্য করিত।

‘আর একটা ঔষধ শুনি আছে তার কাছে।  
গৃধিনীর কাণ আর কালপনা মাছে॥  
কিছু কিছু পোঁচার মাংস বাটিয়া ওটিয়া।  
তিল পরিমাণ বড়ী করে শুকাইয়া॥  
এক এক বড়ীর দাম পাঁচ বুড়ি কড়ি।  
এরে খাইলে পাগল হয় পাড়ার যত নারী॥’

কারকুন কমলাকে বশীভূত করিবার উপায়ের জন্য এই দুশ্চরিত্রা গোয়ালিনীর বাড়ীতে গেল।

কেওয়া খয়ের ও সুগন্ধি সুপরিযুক্ত পানের খিলি দিয়া চিকন কারকুনের অভ্যর্থনা করিল; সে অঞ্চলের খাজনা তহসিলের ভার যে কর্মচারীর উপর, তিনি স্বয়ং তাহার বাড়ীতে আসিয়াছেন এই গৌরবে উৎফুল্ল হইয়া চিকন গোয়ালিনী তাহার হাতে একটা

গুড়গুড়ির নল দিতে দিতে জিজ্ঞাসা করিল, এত বড় সৌভাগ্য তাহার কিসে হইল যে স্বয়ং কারকুন তাহার কুঁড়ে ঘরে পায়ের ধূলা দিয়াছেন?

কারকুন অতি গোপনে তাহাকে তাহার অভিপ্রায় জানাইল। গোয়ালিনী এই কথা শোনা মাত্র দাঁতে জিভ কাটিয়া তাহার অক্ষমতা জানাইল, ‘তিনি তোমার উপরিওয়ালা, একথা জানিলে তিনি তোমার গর্দান লইবেন। আর আমি চাকলাদারের বাড়ীতে দুধ ও দৈ বেচিয়া কায়ক্ৰেশে দিন গুজরান করি, তাঁহার কন্যাকে আমি বিপথগামিনী করিতে চেষ্টা পাইতেছি—একথা শুনিলে কি আমার নিস্তার আছে? এই বুদ্ধি পরিত্যাগ কর।’

কারকুন বলিল, ‘দৈবের উপর বল নাই, তুমি যে সকল মন্ত্রতন্ত্র জান, তাহাদের প্রক্রিয়া ব্যর্থ করিতে পারে—লোকের এমন কোন শক্তি নাই। তুমি তোমার মন্ত্র ও ঔষধের গুণে কমলাকে আমার প্রতি অনুকূল করিয়া দাও।’—এই কথা বলিয়া কারকুন বহু মিনতিপূর্বক এক তোড়া টাকা চিকনের হাতে দিল। সেই তোড়াতে ১০০ টাকা ছিল।

যদিও চিকনের বুক ভাবী বিপদের আশঙ্কায় দুরন্দুর করিয়া উঠিল, তবু একসঙ্গে এতগুলি টাকার লোভ তাহাকে কতকটা বিচলিত করিল। সে ভাবিয়া চিন্তিয়া টাকাগুলি গ্রহণ করিল এবং কমলার নিকট লিখিত কারকুনের একখানি পত্র আঁচলে বাঁধিয়া লইয়া তাহাকে কতকটা আশ্বাস দিয়া বিদায় করিল। এই কার্যের ফলাফল চিকন সন্ধ্যাকালে কারকুনকে জানাইবে—এই বলিয়া গোয়ালিনী চাকলাদারের বাড়ীতে যাওয়ার উদ্যোগ করিল। কারকুন উৎকণ্ঠিতভাবে প্রতীক্ষা করিয়া রহিল।

চিকন যাইয়া দেখিল, বকুল ফুলের মালা জড়ানো খোঁপা হেলাইয়া কমলা একখানি রেশমী বস্ত্রের উপরে জরোয়া কাজ করিতেছে; চিকনকে দেখিয়া হঠাৎ ত্রুদ্বভাবে বলিল, ‘তোমার দৈ এখন ক্রমশঃ অভক্ষ্য হইয়া উঠিতেছে, বলতো দৈ এত দুর্গন্ধ ও জলো হয় কেন? এরূপ করিলে আমি বাবাকে বলিয়া তোমায় শাসন করিব।’

চিকন বলিল—‘এ আমার দৈয়ের দোষ নহে, কপালের দোষও নহে বয়সের দোষে হইয়াছে। যৌবনে যাহা করিতাম, সকলেই তাহার প্রশংসা করিত; আধজল মিশাইলেও আমার গাহেক কমিত না।’

‘এখন বয়স গেছে নদী ভাটিয়াল।

পাকা দই টক হয়, এমনি জঞ্জালা।’

‘এখন যাহা করি সকলেই তাহার দোষ ধরে।’ এই কথা বলিয়া চিকন কাঁদিতে লাগিল। এবং বলিল ‘দৈ না বেচিব আর ছাড়িব বেসাতি/শেষ কালে কিষ্ট মোর খা করেন গতি।’ কমলা একটু অনুতপ্ত হইয়া হাসিয়া কথা কহিল। চিকন উৎসাহিত হইয়া বলিতে লাগিল—‘তোমার মত সুন্দরী কন্যার এখনও বিবাহ হইল না—যৌবন চলিয়া গেলে কি ভাল বর পাইবে?’



‘আঁধারে বসিয়া কন্যা থাকহ অন্দরে,  
বিয়া যদি হত তোমার বনদুর্গার বরে ।  
ভাল দৈ আন্যা দিতাম খুসী কর্তাম বরো।’

ক্রমে চিকন গোয়ালিনীর রসিকতার ফোয়ারা ছুটিল এবং সময় বুঝিয়া সে একটা মাখ্যানের ছলে কারকুনের কথা পাড়িল । তাহার নাম করিল না, কিন্তু তাহাকে কল্পিত কোন দেবতা বলিয়া তাহার রূপগুণের ব্যাখ্যা করিতে লাগিল । কমলাও এগুলি শুধুই রহস্য মনে করিয়াছিল । কিন্তু যখন চিকন মুখ টিপিয়া হাসিয়া কমলাকে কারকুনের প্রণয়-পত্রখানি হাতে দিল, তখন ফুলবনে আশুন লাগিলে যেরূপ রক্তরাগে বাগানের সমস্তটা রঞ্জিত হইয়া উঠে, তাহার মুখমণ্ডলে, সমস্ত দেহে,—এমন কি তাহার চলাঞ্চলে পর্যন্ত রক্তের আভা খেলিতে লাগিল ; সে একটা থাপড় মারিয়া চিকনের পড়ন্ত দাঁতগুলি ফেলাইয়া দিল এবং এমন প্রহার করিল যে সেই রূপসী মূর্তি যেন মহিষমর্দিনী রূপ পরিগ্রহ করিল । ক্রুদ্ধ দৃষ্টিতে চিকনকে দগ্ধ করিয়া কমলা বলিল—

“কারকুনে কহিস তার মুখে মারি ঝাঁটা ।  
বাড়ীর চাকর হৈয়া এত বুকের পাটা॥  
পায়ের গোলাম হৈয়া শিরে উঠতে চায়  
গোবরা পোক পদ্মধু খাইবার যায়॥”  
চুপি চুপি গোয়ালিনী আসিল বাহিরে  
দন্ত বাহিয়া তার রক্তধারা ঝরে॥’

এদিকে কারকুন বড় আশা করিয়া চিকনের পথের দিকে চাহিয়া রহিয়াছিল ; পথের লোকেরা গোয়ালিনীকে তাহার ভাঙ্গা দাঁত ও রক্তপাত সম্বন্ধে কত প্রশ্নই না করিয়াছিল,

‘পথের লোক জিজ্ঞাসা করে “রক্ত কেন দাঁতে?”  
গোয়ালিনী কহে “মোর মারিল সান্নিকে ।”  
আরও লোক জানিবারে চাহিত খোলসা  
যতই জিজ্ঞাসা করে তত হয় গোসা ।’

কারকুনকে নিজ কুটীরে অপেক্ষা করিতে দেখিয়া সে যেন জ্বলিয়া উঠিল,

‘কারকুনের দেখিয়া কয় “আটকুড়ির বেটা ।  
মোর বাড়ী আইলে পুন মুখে মারব ঝাঁটা॥  
তোর লাগি মোর এত অপমান ।  
পুরুষ হইলে তোর কাইট্যা দিতাম কান ।” ’



কারকুন আকার ইস্তিতে সবই বুঝিতে পারিল এবং শপথ করিয়া বলিল—

‘আর না আসিব ফিরে গোয়ালিনীর বাড়ী।

ছারখার করিব চাকলা সাতদিনের আড়ি।’

রাজার নাম দয়াল রায়—তিনি রঘুপুরে বাস করেন। সহসা তিনি এক বেনামী চিঠি পাইয়া উত্তেজিত হইয়া উঠিলেন। চিঠিতে লেখা ছিল,—

‘ধর্মাবতার, আপনার চাকলাদার মাণিক রায় আপনার জমিতে সাত ঘড়া মোহর পাইয়া নিজে আত্মসাৎ করিয়াছে। আপনার জমিতে প্রাপ্ত এই ধনের মালিক আপনি। কিন্তু চাকলাদার খুণাক্ষরে ইহা হজুরে না জানাইয়া নিজে দখল করিয়াছে, আমি আপনার একজন দীনাত্তিদ্দীন প্রজা, আমি চিঠি লিখিয়া মহারাজকে সংবাদ দিয়াছি একথা জানিলে চাকলাদার আমাকে খুন করিবে—এই ভয়ে নিজের নাম গোপন করিলাম।’

রাজা মাণিক চাকলাদারকে বাঁধিয়া আনিতে হুকুম করিলেন। এক শত অশ্বরোহী সেনা হুকুমনামা লইয়া ছলিয়া গ্রামে উপস্থিত হইল, এবং চাকলাদারকে তখনই বাঁধিয়া রঘুপুরে রাজধানীতে লইয়া গেল।

রাজা বিচারাসনে বসিয়া ছিলেন। মাণিক চাকলাদারকে দেখিয়া ক্রুদ্ধভাবে বলিলেন, ‘তুমি কত ধন পাইয়াছ? আমাকে না জানাইয়া তাহা আত্মসাৎ করিয়াছ!’

চাকলাদার বলিলেন—‘কিসের ধন? আমি তো কিছুই জানি না।’

রাজা তাঁহার কথা বিশ্বাস করিলেন না, ধনলোভে তিনি উত্তেজিত অবস্থায় ছিলেন। চাকলাদারকে বন্দীশালায় লইয়া যাইতে আদেশ করিলেন, সেখানে তাঁহার পায়ে লোহার শৃঙ্খল পরানো হইল এবং বুকে পাথর চাপা দিয়া ধনের কথা প্রকাশ করিবার জন্য পীড়ন করিবার ব্যবস্থা হইল।

এদিকে মাণিক চাকলাদারের পরিবারে যখন এই অচিন্তিতপূর্ব বিপদ, এবং তাঁহার দুগ্ধে অবসন্ন, তখন কারকুন যাইয়া চাকলাদারের দ্বাদশ বর্ষীয় বালক সুধনের কাছে বন্ধুর ছদ্মবেশ ধরিয়া উপদেশামৃত বর্ষণ করিতে লাগিল। চাকলাদার গিয়াছেন, সুধন তরুণবয়স্ক হইলেও তো সে পুরুষ—এবং তাহার উদ্দেশ্য সফলতা লাভের বিঘ্ন স্বরূপ। সুতরাং এই কষ্টকটিকেও পথ হইতে সরাইতে হইবে।

কারকুন বলিল—‘তোমার এই মহা বিপদের সময় তোমার পিতার জন্য কি করিতেছ? কি আশ্চর্য, তুমি তোমার পিতার উদ্ধারের জন্য কিছু করিতেছ না! ধনপতি সিংহলে যাইয়া রাজারোষে বন্দী হইলে তাহার দ্বাদশবর্ষীয় পুত্র মাতার নিষেধ না শুনিয়া পিতাকে উদ্ধার করিয়া আনিবার জন্য—সুদূর দক্ষিণদ্বীপে রওনা হইয়া গিয়াছিল। পিতার আদেশে রাম-লক্ষ্মণ রাজত্বের আশা ছাড়িয়া দিয়া কৌপীন ও জটা পরিয়া বনে গিয়াছিলেন,—পরশুরাম তাঁহার পিতার আদেশে তাঁহার মাতা রেণুকার শিরশ্ছেদ করিয়াছিলেন। পিতা মহাগুরু, নিজের জীবন বিসর্জন করিয়াও তোমার তাঁহাকে রক্ষার জন্য প্রাণপণ চেষ্টা করা উচিত।’

সুধন অশ্রুপূর্ণ চোখে বলিল, ‘কি করিতে পারি? আপনি উপদেশ দিন।’

কারকুন বলিল, ‘তুমি অগৌণে রঘুপুরে চলিয়া রাজার সঙ্গে দেখা করিয়া তিনি যাহাতে সন্তুষ্ট হন, তাহার চেষ্টা কর। আর দেখ, এক থলিয়া মোহর লইয়া যাও এবং তাহা রাজাকে নজর দিও।’

কারকুনের উপদেশ অনুসারে সুধন তখনই এক থলিয়া মোহর লইয়া রঘুপুর রাজধানীতে রওনা হইয়া গেল।

রাজা বলিলেন, ‘তোমার পিতা সাত ঘড়া মোহর আত্মসাৎ করিয়া কোথায় রাখিয়াছেন, তাহা তুমি অবশ্যই জান।’

সুধন বহু মিনতি করিয়া বলিল, ‘এ খবর সম্পূর্ণ মিথ্যা!’

কারকুনের কথামত রাজাকে সন্তুষ্ট করিবার জন্য মোহরের থলিয়াটী নজরস্বরূপ দেওয়া হইয়াছিল; ফল উল্টা হইল, রাজার ধারণা বদ্ধমূল হইল যে চাকলাদার নিশ্চয়ই মোহর পাইয়াছে, সেই মোহর হইতে এই থলিয়া আমাকে দিয়া আমার রাগ দূর করিতে চেষ্টা করিতেছে। তিনি সুধনকে বলিলেন, ‘এ কয়েকটী মোহরে কি হইবে? তুমি সমস্ত মোহর আমাকে দাও—তাহা হইলে আমি তোমার পিতার বিষয় বিবেচনা করিতে পারি।’

সুধন যতই অস্বীকার করিতে লাগিল ততই রাজার ক্রোধ বাড়িয়া চলিল। অবশেষে তিনি সেই বালককেও বন্দীশালায় শৃঙ্খলিত করিয়া রাখিতে আদেশ দিয়া বিরক্তির ভাবে দরবারগৃহ ত্যাগ করিলেন।

পিতা পুত্রকে গৃহ হইতে এইভাবে বিতাড়িত করিয়া কারকুন—সেই অঞ্চলের বাকী খাজনা খুব জোরে আদায় করিতে লাগিয়া গেল। অল্প সময়ের মধ্যে প্রচুর খাজনা আদায় করাতে রাজা কারকুনের দক্ষতার পরিচয় পাইয়া সন্তুষ্ট হইলেন এবং মাণিক রায়ের স্থলে তাহাকেই চাকলাদারের পদে নিযুক্ত করিলেন।

এইভাবে সমস্ত অঞ্চলের সর্বময় কর্তা হইয়া কারকুন—কমলার সঙ্গে দেখা করিয়া তাহার নিজের গুণপনার অনেক ব্যাখ্যা করিতে লাগিল এবং চাকলাদারীপদের নিয়োগপত্রখানি কমলাকে দেখাইয়া বলিল :—

‘কমলা, আমি চাকলাদারী পাইয়াছি, এই দেখ হুজুরের আদেশ। এখন তোমার কাছে আমার প্রস্তাব—তুমি আমাকে বিবাহ কর, চাকলাদারী কাজে বহাল থাকিয়া আমি তোমার সেবা করিব, দুজনে পরম সুখে জীবন যাপন করিব। আর যদি সম্মত না হও, তবে আমি তোমার এমন হাল করিব যে, তোমার দুঃখ দেখিয়া গাছের পাতা পর্যন্ত ঝরিয়া পড়িবে।

‘আর এক কথা,—যে ঘরবাড়ীতে তোমরা আছ তাহা রাজার। আমি এখন চাকলাদার, সুতরাং এ বাড়ীঘর আমার অধিকারে। আশা করি তুমি বিবাহে সম্মত হইবে, তাহা হইলে এই বিশাল প্রাসাদ তোমারই অধিকারে থাকিবে, অন্যথা তোমাদের এখানে থাকা চলিবে না। তোমাকে শীঘ্রই স্থানান্তরে যাওয়ার ব্যবস্থা করিতে হইবে।’

একটা অগ্নিস্কুলিঙ্গের মত কমলা জুলিয়া উঠিল এবং কারকুনকে ‘পশুর অধম, নরপিশাচ’ প্রভৃতি নামে অভিহিত করিয়া ভর্ৎসনা করিল, কমলা বলিল—

‘আমার বাপের লুন খাইয়া বাঁচিলি পরাণে

তার গলায় দিতে দড়ি না বাধিল প্রাণে ।

পরানের দোসর ভাইয়ে যে সব দুঃখ দিল’

‘এই পাপিষ্ঠের মুখ দেখিলে পাপ হয় ; আমরা মায়ে ঝিয়ে ভিক্ষা করিয়া খাইব, গাছের তলায় শয়ন করিব—তবু তোর এই ঘৃণ্য বাড়ীতে থাকিব না ।’ উদ্ধতভাবে কারকুনকে বিদায় করিয়া দিয়া কমলা আন্দী-সান্দি নামক দুই ভাইকে ডাকিয়া পাঠাইল । ইহারা দুইজন এই পরিবারে বহু কালাবধি পাক্কী-বেহারার কাজ করিতেছে ।

এই দুই বিশ্বস্ত ভৃত্য কমলা ও তাহার মাতাকে সেই দিনই কমলার মাতুলালয়ে পৌছিয়া দিল ।

এই সংবাদ পাইয়া কারকুন তখন সেই মামাকে চিঠি লিখিল—

‘আপনার ভাগিনেয়ী কমলা অতি দুঃখিত্রা, কোন চণ্ডাল যুবকের প্রতি তাহার আসক্তির কথা প্রকাশ হইয়া পড়াতে সে নিজের দেশে না থাকিতে পারিয়া তাহার মাতাকে লইয়া আপনাদের বাড়ীতে গিয়াছে । কিন্তু আপনি জানিয়া রাখুন, যদি এই কুলকলঙ্কিনীকে আপনার বাড়ীতে আশ্রয় দেন, তবে আপনার ধোপা-নাপিত বন্ধ হইবে এবং পুরোহিত আপনার বাড়ীতে পূজা করিবে না । এই বিষয়টীর গুরুত্ব আপনি বিশেষ করিয়া বুঝিতে পারিবেন ; ইহা রাজার কর্ণগোচর হইয়াছে এবং তিনি বলিয়াছেন, যে কেহ এই দুষ্ট মেয়েকে আশ্রয় দিবে, সে তাঁহার কোপানলে পড়িবে ।’

কমলার মাতুল বিষয়কর্মোপলক্ষে বিদেশে থাকিতেন কিন্তু পরিবারবর্গ বাড়ীতেই থাকিত,—তিনি কমলার বিরুদ্ধে এই পত্র পাইয়া তাহার পত্নীকে লিখিলেন—

‘ভারাই চাঁড়ালের সঙ্গে ঘরের বাহির হইল ।

বিয়া না হইতে কমলা কুল মজাইল॥

এমন কন্যারে তুমি নাহি দিবা স্থান ।

ঘরের বাহির কৈরা দিবা করি অপমান॥

এক দণ্ড যেন নাহি থাকে মোর ঘরে ।

চূলে ধরি ঘরের বাহির কৈরা দিবা তারে॥

সমাজে না লৈবে মোরে কমলা থাকিলে ।

পতিত হইয়া রৈব, মজব জাতি কুলে॥

মামী এই পত্র পাইয়া অত্যন্ত দুঃখিত হইলেন । ‘সহোদরা ভগিনী আর তার অবিবাহিতা কন্যা ইহাদিগকে কেমন করিয়া ঘরের বাহির করিয়া দিব?’

‘জাতিকুল লৈয়া কন্যা যাবে কার কাছে ।  
 এমন কমলার ভাগ্যে কত দুঃখ আছে॥  
 মায়ে ঝিয়ে কাঁদবে যখন কিবা কইব কথা ।  
 এমন কোমল প্রাণে কেমনে দিব ব্যথা॥

ভাবিয়া চিন্তিয়া মামী কি করিবেন তাহা সিদ্ধান্ত করিতে পারিলেন না । চিঠিখানি কমলার শয্যার উপরে ফেলিয়া রাখিলেন ।

সন্ধ্যাবেলা, কমলা নিজের শয়নকক্ষে আসিয়া দিবসের ক্লান্তির পর একটু বিশ্রাম ইচ্ছা করিয়াছিলেন ; হঠাৎ বিছানার উপরে চিঠিখানির উপর দৃষ্টি পড়িল—

‘পত্র পড়ি চক্ষের জলে ভাসিছে কমলা ।  
 এত দুঃখ ভাগ্যে মোর বিধি লিখেছিল্লা॥’

বাপ-ভাই কারাগারে বন্দী, শত্রু সর্বস্ব লুটিয়া লইয়া গিয়াছে, তাহারা দুটী প্রাণী গৃহত্যাগ করিয়া মাতুলালয়ে আশ্রয় লইয়াছে—কিন্তু ইহার পরেও অদৃষ্টের লাঞ্ছনা কমিল না । কমলা পত্রখানির উপর পুনরায় চক্ষু বুলাইতে লাগিল :—

‘পড়িতে পড়িতে কন্যার চক্ষে বহে পানি ।  
 সম্মুখে যে আইসে তার কি কাল-রজনী ।  
 চন্দ্র সূর্য ডুবে গেছে আঁধার সংসার ।  
 এক দণ্ড এই ঘরে না থাকিব আর ।’

কমলার দুঃখ সহিবার ক্ষমতা অসাধারণ ছিল, কিন্তু সে অপমান সহিতে পারিত না । যেখানে নারীমর্যাদা ক্ষুণ্ণ হয়—সেখানে সে ভবিষ্যৎ ভাবিয়া লাঞ্ছিত জীবন বহন করিতে চায় না । তাহার অন্তরদেবতা তাহাকে বুঝাইয়াছিলেন, যেখানে হীনতা ও কলঙ্ক সহিয়া—অপমান ও নির্যাতন ভোগ করিয়া শুধু প্রাণরক্ষার জন্য মানুষ লালায়িত হয়—তখন সে একেবারে অধম হইতে অধম হইয়া পড়ে । সেই ঘৃণা জীবনের প্রতি সে বীতাকাঙ্ক্ষ ।

‘বাপের বেটা হৈয়া থাকি যদি হই সতী ।  
 বিপদে করিবে রক্ষা দুর্গা ভগবতী॥  
 জলে ডুবি, বিষ খাই, গলে দেই কাতি ।  
 মামার বাড়ী না থাকিব আর এক রাতি ।’

যাহারা ভবিষ্যতে পরিবারের কি বিপদ হইবে—সেই আশঙ্কায় অন্যায় অপমান ও লাঞ্ছনা সহ্য করিয়া জোঁকের মত পরপদতল ধরিয়া থাকে, কমলা সে শ্রেণীর লোক ছিল না ।

‘খা করেন বনদুর্গা মনে মনে আছে ।  
 একবার না গেল কন্যা আপন মায়ের কাছে॥

একবার না গেল কন্যা মামীর সদনে ।  
 একবার না চাইল কন্যা মায়ের মুখপানে॥  
 একবার না ভাবিল কন্যা জাতিকুলমান ।  
 একবার না ভাবিল কন্যা পথের আন্ধান\* ।  
 একবার না ভাবিল কন্যা কি হবে মোর গতি ।  
 একেলা পথেতে পড়ি কি হবে দুর্গতি॥  
 একবার না ভাবিল কন্যা আশ্রয় কেবা দিবে ।  
 সন্ধ্যাকালে তারা ফুটে, সূর্য ডুবে ডুবে ।’

এই কালরজনী সম্মুখে করিয়া কমলা বনজঙ্গলের পথে রওনা হইল। তাহার সর্বাপেক্ষা কোমল স্থানে—নারীমর্যাদায় ঘা পড়িয়াছে। সহিষ্ণুতা নারী-চরিত্রের ভূষণ, কিন্তু এই সহিষ্ণুতা সর্বত্র প্রশংসনীয় নহে। এমন সময় জীবনে আসে, যখন সহ্য করার প্রশ্নই উঠে না, তখন মানুষকে সর্বস্ব পণ করিয়া দাঁড়াইতে হয়—তখন খুড়া, কাকা, বাবার পরামর্শের প্রতীক্ষা করিলে মনুষ্যত্বের গৌরব নষ্ট হইতে পারে,—তখন ভবিষ্যৎ ভাবিয়া অপেক্ষা করিয়া থাকিলে নৈতিক বল-বিচ্যুত হইয়া মানুষ একবারে হীনবীৰ্ষ ও অধম হইয়া পড়ে। কমলা চূড়ান্ত বিপদ সহ্য করিয়া যে অকুতোভয়তা দেখাইয়াছে—তাহা তাহার নারীপ্রকৃতিকে দেবী-মহিমা-মণ্ডিত করিয়াছে—তাহার তেজ, সাহস ও পণ প্রকৃতই বীরাজনার মত। এদেশে নারী ও পুরুষ সেই তেজস্বিতা ও সাহস হারাইয়াছে, তজ্জন্য আমাদের এত দুর্গতি। কমলার চরিত্রে এমন উপাদান আছে, যাহা হইতে আমাদের ভণ্ড ভীরা সাধুরা কিছু শিক্ষালাভ করিতে পারেন, মর্যাদা-হীন জীবন একেবারে রিঙ। একসময় জ্ঞানীর দীর পাদক্ষেপ ও সতর্কতা প্রশংসনীয় কিন্তু অন্য সময়ে তাহা ভীরতা ও জাতীয় অধোগতির লক্ষণ।

এই সন্ধ্যাকালে কমলা বনদুর্গাকে স্মরণ করি। পথে চলিতে লাগিল—

‘আঁখি জলে ভরে, কন্যা নাহি দেখে পথ ।

বারে বারে চক্ষু মুছে, নাহি চলে রথ॥’

ক্রমশঃ নির্জন রাস্তায় আঁধারের ঘোরে কমলা এক বিস্তৃত হাওরের\* ধারে আসিয়া পড়িল। কখনও পথ পর্যটনের অভ্যাস নাই, আঁধার পথে একবার উঠিতেছে, একবার বসিতেছে—তাহার দেহে আর শক্তি নাই। নিতান্ত অসহায় অবস্থায় তাহার অন্তর কাঁদিয়া উঠিল। একান্ত নির্ভরপরায়ণার সেই অন্তরের ক্রন্দন বুঝি বিধাতার কর্ণে পৌছিল।

সেই পথে আর একটা মাত্র পথচারী, বৃদ্ধ একটা মহিষপালক। কমলা তাহাকে দেখিয়া যেন প্রাণ পাইল। অগ্রসর হইয়া—তাহাকে বলিল, ‘আমি নিরাশ্রয়—আমার কেহ নাই, তুমি আমার ধর্মের বাপ, এই রাত্রিটীর জন্য আমাকে আশ্রয় দাও। বাবা,

\* হাওর = নলখাগড়াপূর্ণ বিলা জায়গা।

\* হাওর = নলখাগড়াপূর্ণ বিলা জায়গা।

আমি বড় বিপদে পড়িয়াছি, তোমার বাড়ীর গোয়াল ঘরের একটী কোণে আমি আঁচল পাতিয়া শুইয়া থাকিব, আমি ভাত-জল চাই না, গোয়াল ঘরের এক কোণে আজ রাতে থাকিবার একটু জায়গা পাইলেই কৃতার্থ হইব।’

মহিষাল তাহার চক্ষুকে বিশ্বাস করিতে পারিল না,—এমন রূপ, এমন গা-ভরা গয়না—এ তো মানুষের মূর্তি নহে, এ যে সাক্ষাৎ মা লক্ষ্মীর মূর্তি। তাহার একান্ত বিশ্বাস হইল লক্ষ্মী স্বর্ণ হইতে তাহাকে ছলনা করিতে আসিয়াছেন ; সে করযোড়ে বলিল, ‘যদি দয়া করিয়া এই বুড়ো ছেলেকে দেখা দিয়েছ, তবে মা ছেড়ে যেও না। আমার ঘরে আইস, আমাকে বর দেও, যেন আমার মহিষ ও গরু দ্বিগুণ দুধ দেয়, যেন আমার ক্ষেতে সোণার ফসল হয়, আইস আমার ভাঙ্গা ঘরে মা লক্ষ্মী, আমার ভাঙ্গা ঘর সোণার ঘর হইয়া যাইবে।’

কমলা মহিষালের বাড়ীতে আসিল। প্রতি দিনে তিন বার মহিষালকে রাঁধিয়া খাওয়ায় ; গামছা-বাঁধা দৈ তৈরী করে, গোয়াল ঘরে ধোঁয়া দেয়, ঘর দোর ঝাঁট দিয়া ঝকঝকে তক্তকে করিয়া রাখে, মহিষালের আনন্দের সীমা নাই। তাহার ঘরে সত্যই লক্ষ্মী আসিয়াছেন, ভাবিয়া দিনরাত সে পূজার উৎসবে মতিয়া আছে।

সন্ধ্যাকালে মহিষ চরাইয়া মহিষাল বাড়ী আসিয়া দেখে, খড় বিছাইয়া কমলা তাহার জন্য বিছানা করিয়া রাখিয়াছে, গরম ভাত কলার পাতে পরিবেষণ করিয়াছে, তাহা হইতে ধোঁয়া উঠিতেছে। বিন্মি ধানের খই, খেজুরের গুড় ও গামছা-বাঁধা দৈ খাইয়া বুড়োর কি স্কৃতি! সে যেন মা লক্ষ্মীকে পাইয়া আবার ছেলেমানুষ হইয়া গিয়াছে।

তিন দিন কমলা মহিষালের কুটীরে বাস করিল।

একদিন এক শিকারী সেই মহিষালের কুটীরে উপস্থিত হইলেন। তিনি তরুণবয়স্ক, অতি সুদর্শন,—শরীরের বর্ণ কাঁচা সোণার মত এবং সেই অঙ্গে স্বর্ণময় পোশাক ঝলমল করিতেছিল। তাহাকে কোন রাজার ছেলে বলিয়া মনে হইল।

বৃদ্ধ মহিষালকে এই কুমার বলিলেন :—‘আমি কুড়া শিকার করিতে জঙ্গলে গিয়াছিলাম। বড়ই পরিশ্রান্ত হইয়া পড়িয়াছি, আমাকে একটু জল দিয়া প্রাণ বাঁচাও, তৃষ্ণায় কথা পর্যন্ত বলিতে পারিতেছি না।’

কমলা গাছের পাতার পাত্রে জল দিয়া গেল। সমস্ত জলটা এক নিশ্বাসে পান করিয়া অতিথি বলিলেন :—

‘এই যিনি আমাকে জল দিয়া গেলেন ইনি তোমার কে? ইঁহাকে দেখিয়া কোন রাজকুমারী বলিয়া মনে হইতেছে, ইঁহার পিতামাতা কে? তুমি ইঁহাকে কিরূপে পাইলে? ইনি বিবাহিতা বা কুমারী? অথবা কোন জনের তপস্যার ফলে দেবতার বরে তুমিই ইঁহাকে কন্যারূপে পাইয়াছ?’

মহিষাল বলিল—‘আমি ইঁহার পরিচয় জানি না। আমি ইঁহাকে স্বয়ং লক্ষ্মী বলিয়াই মনে করি ; হয়ত কোন দেবতার প্রসাদে ইনি আমাকে কৃপা করিয়াছেন। যে কয়েকদিন যাবৎ ইনি আমার কুটীরে পায়ের ধূলা দিয়াছেন, তদবধি আমার ভাগ্য ফিরিয়াছে,



বহুদিনের বন্ধা মহিষ গাভীন হইয়াছে। আমার গোয়ালে দুধ ও দৈ চারগুণ বাড়িয়াছে, আমার এই ঘরে যেন আনন্দের ঢেউ বহিয়া যাইতেছে। শেষের কয়টা দিন বোধহয় আমার সুখেই কাটিবে।’

কুমার বলিলেন, ‘তুমি ইহাকে আমায় দাও, আমি ধামা ভরিয়া তোমাকে ধন মণি-মুক্তা দিব, বাবাকে বলিয়া তোমাকে চৌদ্দ “পুরা” জমি দিব ; তোমার কোন অভাব থাকিবে না।’

মহিষাল এই কথা শুনিয়া অতি আত্মকণ্ঠে বলিল, ‘আমি ধন-দৌলত ও চৌদ্দ পুরা জমি চাই না। আমি আমার মায়ের প্রসাদে সবই পাইয়াছি। এই কয়টা দিনে আমি এত সুখী হইয়াছি যে, বাড়ীতে দেবতা প্রতিষ্ঠা করিলে কেউ এত সুখী হয় না। ইহাকে ছাড়িয়া দিলে আমার জীবন দুঃসহ হইবে।’

সারাদিন বাদানুবাদ চলিল, অবশেষে মহিষাল রাজী হইয়া বলিল, ‘আমি বিনিময়ে কিছু চাই না—মা যেন আমায় আশীর্বাদ করেন এবং অন্তিমকালে ইঁহার পাদপদ্মে যেন মাথা রাখিয়া মরিতে পারি।’ বলিতে বলিতে বৃদ্ধ কাঁদিয়া ফেলে,—অবিরত বর্ষণশীল দুটা চোখের জলে তাহার উঠানের উলুখড় ভিজিয়া গেল।

কন্যাকে লইয়া কুমার নিজের দেশে চলিয়া গেলেন।

রাজবাড়ীতে কমলা আসিয়া তথাকার ঐশ্বর্য ও বৈভব দেখিয়া চমৎকৃত হইল কিন্তু দিবা রাত্রি মাতার বিরহে সে কাঁদিতে থাকিত। দুর্ভাগা মাতাকে না কহিয়া না বলিয়া সন্ধ্যাকালে ছাড়িয়া আসিয়াছে,—ভয় হইল, তাহার পলায়ন—মিথ্যা কলঙ্ককথার সঙ্গে জড়াইয়া লোকে কত রকম ব্যাখ্যাই যেন করিতেছে! মাতার লাঞ্ছনা ও অপমানের কথা আশঙ্কা করিয়া কমলা মরমে মরিয়া আছে। কুমার যখনই কমলার কক্ষে প্রবেশ করেন, তখনই দেখেন পালঙ্কের উপর বসিয়া গালে হাত দিয়া সে কাঁদিতেছে। কুমার আদর করিয়া তাহাকে কত কথাই বলিতে থাকেন। ‘তুমি কে পরিচয় দাও, আমি যে তোমা-ছাড়া অন্য সমস্ত চিন্তা ছাড়িয়াছি। আমার এত সখের বাগানে কোন ফুল ফুটিলে, কোন লতা ও গাছের কুঁড়ি হইলে নিত্য উষাকালে আমি তাহা দেখিতাম—কতদিন হইল আমার সে বাগানের কথা একটীবারও মনে হয় না। শিকারে যাওয়া আমার সর্বপ্রধান আমোদের বিষয় ছিল, কিন্তু সেই যে আসিয়াছি তদবধি শিকারে যাওয়া ছাড়িয়াছি। বন্ধুদের সঙ্গে এখন আর ভাল লাগে না ; তোমাকে আমি আমার গলার হার করিয়া রাখিব, মণি-মুক্তা জ্ঞানে যত্ন করিব, তোমার পরিচয় দাও, আমি তোমাকে বিবাহ করিয়া সুখী হই। কি দুঃখে তোমার চক্ষে দিনরাত অশ্রু ঝরিয়া পড়ে, তোমার দুঃখ দেখিলে যে আমার প্রাণ বিদীর্ণ হয়, তুমি সে কথা আমায় বল, আমি প্রাণ দিয়া তোমার দুঃখ মোচন করিতে চেষ্টা করি।’

সহৃদয় তরুণ কুমার এইরূপ শত প্রশ্ন লইয়া বারংবার কমলার নিকট আসেন, কমলা কোন কথা বলে না, তাহার অশ্রুই সে সমস্ত প্রশ্নের একমাত্র উত্তর।

একদিন কমলার মুখ একটু ফুটিল, সে বলিল, ‘কুমার ব্যস্ত হইবেন না, সময়-সুযোগ হইলে আমি আপনা হইতে পরিচয় দিব, কিন্তু এখন সে সময় হয় নাই। আপনি

মহিষালের কাছে যে প্রতিশ্রুতি দিয়াছেন, আশা করি তাহা আপনার মনে আছে। আপনি জোর করিয়া আমার পরিচয় লইতে চেষ্টা করিবেন না, আমার প্রতি যেন বলপ্রয়োগ না হয়।’

কুমার প্রাতে ঘুরিয়া গিয়া মধ্যাহ্নে পুনরায় অনুনয় বিনয় করিয়া সেই একই প্রশ্ন জিজ্ঞাসা করেন। আবার সন্ধ্যায় আসিয়া সেই ম্রিয়মাণা শোকার্তা কুমারীর মনের দুঃখ জানিতে চাহেন, কিন্তু কোন উত্তর না পাইয়া বিমর্ষ হইয়া ফিরিয়া যান।

ভ্রমর উষাকালে একবার কুঁড়ির কাণে কাণে শ্রোমের কথা গুঞ্জন করে, কিন্তু কুঁড়ি ফোটে না, পুনরায় ঘুরিয়া ফিরিয়া আসে এবং সেইরূপ চেষ্টা করে—কিন্তু কুঁড়ি বাতাসে মাথা হেলাইয়া—তাহাকে বিদায় করিয়া দেয়—সে ফোটে না। কুমারের সেই অবস্থা।

‘এইরূপে কুমার যে প্রতিদিন আসে।  
বিফল হইয়া ফিরে আপনার বাসে॥  
অন্তর গোপন, কলি নাহি ফুটে মুখ।  
ভূঙ্গ যেমন উড়ি যায় পাইয়া মন দুখ॥’  
এইরূপ করিয়া যে তিন মাস গেল।  
এক দিন রাজপুরে বাদ্য যে বাজিল॥’

কমলা জিজ্ঞাসা করিল :—

‘কিসের বাদ্য বাজে আজি রাজপুরীর মাঝে।’

উত্তরে শুনিল :—

‘নরবলি দিয়া রাজা রক্ষাকালী পূজে॥’  
‘কেবা নর কিসের পূজা—  
পরিচয়কথা কন্যা শুনিল সকলি  
বাপ ভাই বলি হবে শুনে চন্দ্রমুখী।  
কমলার কান্দনে কাঁদে বনের পশু পাখী॥’

এই সময় প্রদীপকুমার সোৎসাহে কমলার কক্ষে প্রবেশ করিয়া বলিলেন—‘কমলা, শুনেছ, আজ পিতা নরবলি দিয়া রক্ষাকালী পূজা করিবেন। চল, আমরা দুজনে যাইয়া নরবলি দেখিয়া আসিব।’

কমলা বিষণ্ণকণ্ঠে জিজ্ঞাসা করিল—‘বলির নর কোথা হইতে পাওয়া গিয়াছে, কত মূল্যে ক্রয় করা হইয়াছে?’ কুমার সমস্ত বিবরণ বলিলেন এবং পরিচয় দিলেন। বাপ ভাইয়ের এই দুর্দশার কথা শুনিয়া কমলার কণ্ঠ রুদ্ধ হইল। প্রবল শক্তিতে পতনোন্মুখ

ভূঙ্গ যেমন....দুখ = এত অনুনয় কবিতাও কলিটির মুখের কথা না পাইয়া ভ্রমর যেরূপ ফিরিয়া যায়।

অশ্রু নিরোধ করিতে লাগিল ; একটা কী দুইটা বিন্দু অশ্রু গণ্ডে গড়াইয়া পড়িতে উদ্যত হইয়াছিল—কুমারী তাহা দেখি বা না দেখি করিয়া মুছিয়া ফেলিল—প্রদীপকুমার তাহা দেখিতে পাইলেন না ।

স্থিরভাবে কমলা বলিল :—

‘কুমার, আজ আমি নিজের পরিচয় দিব কিন্তু এখানে নহে ; রাজার ধর্মসভার কাছে আমার অভিযোগ বলিব, আশা করি তাঁহারা আমার কথা শুনিতে রাজী হইবেন ।

‘কিন্তু তৎপূর্বে তুমি একটা কাজ করিবে । হুলিয়া গ্রামে মাণিক চাকলাদারের কারকুনকে, এবং সেই গ্রামের আন্দী-সান্দি নামক দুই জন পাক্ষীবাহককে তুমি ডাকাইয়া আন, এই দু-তিন জন ছাড়া আরও কয়েকজন লোককে এখানে আনার প্রয়োজন ; হুলিয়া গ্রামে চিকন নামা আধবয়সী এক গোয়ালিনী আছে, তাহাকেও সাক্ষীস্বরূপ রাজসভায় অবিলম্বে উপস্থিত করা হউক ।’

নিজের সম্পর্ক ও পরিচয় সম্বন্ধে কোন ইঙ্গিত না দিয়া কমলা তাঁহার মাতুল ও মাতুলানীকে উপস্থিত করিতে অনুরোধ করিল । ইহা ছাড়া

‘মহিষাল বন্ধুকে তুমি আন শীঘ্র করি ।

আমাকে পাইয়া ছিলে তুমি যার বাড়ী॥’

‘এই সকল লোক উপস্থিত হইলে ধর্মসভায় আমি আমার পরিচয় দিব ।’

রাজসভা সরগরম : এতগুলি সাক্ষী মান্য করিয়া প্রদীপকুমার কর্তৃক রাজ-অস্তঃপুরে আনীতা অনিন্দ্যসুন্দরী তরুণী নিজের পরিচয় ও অভিযোগ শুনাইবে । এদিকে রাজপুরীতে রক্ষাকালীর পূজার উপলক্ষে নরবলির বাজনা বাজিতেছে । নানারূপ কৌতূহলে রঘুপুরের লোকদের চক্ষের ঘুম উড়িয়া গিয়াছে ।

রাজসভার এক কোণে দাঁড়াইয়া কমলা তাহার দুঃখের কথা নিবেদন করিতেছে, তাহার আর্ত কণ্ঠের ধীর ও করুণ সুরে ধর্ম-সভা নিস্তব্ধ হইয়া গেল । ‘অভাগিনীর দুঃখের কথা আপনারা শুনুন’—এই বলিয়া কমলা চন্দ্র-সূর্য, গ্রহ-উপগ্রহদিগকে সাক্ষী মানিয়া, পশুপক্ষী কীটপতঙ্গকে সাক্ষী করিয়া বলিল, ‘আমার সাক্ষী ইহারা—ইহারাই সকল জানে’, অদূরে রক্ষাকালীর মন্দির,—যোড় হস্তে মন্দিরকে প্রণাম করিয়া বলিল, ‘মা আমার প্রতি গৃহে প্রতি ঘটে আছেন—সেই জগন্নাথ আমার সাক্ষী ।’ কার্তিক, গণেশ, লক্ষ্মী, সরস্বতী প্রভৃতি দেবতাকে কমলা সাক্ষী মান্য করিল । যে অগ্নি মানুষের সর্বকার্যের সহায়—যে জল মানুষকে জীবিত রাখিয়াছে—সেই সর্বত্রপূজিত জল ও অগ্নিকে কমলা সাক্ষী মান্য করিয়া বনের অধিষ্ঠাত্রী বনদেবতাকে প্রণাম করিল ।

দেবতাদিগকে ও আকাশ ও পৃথিবীর সকল প্রাণীকে কমলা ধর্ম-সভায় সাক্ষী মান্য করিয়া পিতা মাতাকে সাক্ষী করিল এবং প্রাণের ভাই সুবলকে সাক্ষী মান্য করিবার সময় চোখের জলে ভাসিতে লাগিল ।

পরিশেষে সন্ধ্যাতারাকে সাক্ষী করিয়া বলিল—‘তুমি জগতের সকল বস্তুর দিকে চাহিয়া আছ, আমার সমস্ত কাজ তুমি নির্বাক দৃষ্টিতে দেখিতেছ, হে মৌন দ্রষ্টা, তুমি

আমার সাক্ষী। আমার চোখের জল আমি রোধ করিতেছি না, ইহাকেই আমি সাক্ষী মান্য করিতেছি, আমার অন্তরের বেদনা ও অকপটতার ইহা অপেক্ষা বড় সাক্ষী নাই।’

‘সন্ধ্যাকালের তারা সাক্ষী,

সাক্ষী চোখের পানি।’

তারপর স্বীয় মাতুলানীকে সাক্ষী করিয়া মাতুল তাহার নিকট যে পত্রখানি লিখিয়াছিল, তাহাই ধর্ম-সভায় প্রমাণ স্বরূপ দাখিল করিল, চিকন গোয়ালিনী ‘ভাঙ্গা দস্ত যার’, সম্মুখে উপস্থিত ছিল,—কমলা তাহাকে দেখাইয়া দিল, কারকুনকে দেখাইয়া দিল এবং গোয়ালাজাতির বৃদ্ধ সাধুপুরুষ মহিষালকে শ্রদ্ধার সহিত দেখাইয়া বলিল—

‘গলুর\* গোষ্ঠী সাক্ষী আমার মহিষাল ছিল।

সন্ধ্যাকালে বাপের মত আমায় আশ্রয় দিল॥’

সর্বশেষ প্রদীপকুমারের উল্লেখ করিয়া কমলা বলিল :—

‘সর্বশেষ সাক্ষী আমার রাজার কুমার।

যাহার কারণে আমি পাইলাম নিস্তার॥’

‘ইনি শুধু আমার প্রাণদাতা নহেন, ইনি আমার প্রাণের দেবতা।’

ইহার পরে কমলা তাহার জীবনকাহিনী বলিতে লাগিল। তাহার সুর কখনও স্নেহ-মধুর, কখনও পূর্বস্মৃতিতে গৌরবে ভরপুর, কখনও বিপদের কথা বলিতে যাইয়া গদগদকণ্ঠ ও আতঙ্কিত, কখনও পিতৃগৃহে দেবপূজার উৎসববর্ণনায় ভক্তি-কৌতুহল-মিশ্র ম্লিঙ্ককণ্ঠ। কখনও বা বঙ্গের পত্নীর শান্তি ও পার্বত্য নদীর বর্ণনায় তাহা উদ্দীপনাময় ; পরিসমাপ্তির সময়—তাহার নিজের অশ্রু অপেক্ষা শ্রোতৃবর্গের অশ্রুর বন্যায় ধর্ম-সভা একবারে ভাসিয়া গেল। এই দুঃখের কাহিনী শুনিয়া ইহার সত্যতা সম্বন্ধে প্রশ্ন করিবার প্রয়োজন হইল না, কমলা যে সকল প্রমাণ উপস্থিত করিয়াছিল তাহা সকলে হৃদয় দিয়া অনুভব করিল। তখন কারকুনের বিরুদ্ধে সভাসদগণের ক্রোধাগ্নি জ্বলিয়া উঠিল।

কমলা স্বীয় শৈশবের ইতিহাস এইরূপে কহিল :—

‘জ্যৈষ্ঠ মাস, ষষ্ঠী তিথি, শুক্রবার শেষ রাত্রে যখন আকাশ মেঘমণ্ডলে আবৃত ছিল এবং ঘোর অন্ধকার সমস্ত দিগ্দেশ ব্যাপিয়া রাজত্ব করিতেছিল, সেই সময় এই অভাগিনীর জন্ম। মাতা আমার নাম রাখিলেন কমলা। আমার বয়স যখন চার, তখন আমার এক সহোদরের জন্ম হইল।

‘পূর্ণিমার চাঁদ যেমন দেখি মায়ের কোলে

সর্ব দুঃখ দূর হল তার জন্মকালে॥

কোলে করি কাঁখে করি, করি দোলা-খেলা।

এইরূপ যায় নিত্য শৈশবের বেলা॥’

‘এই ভাবে নীলাখেলা করিয়া আমার সুখের শৈশব অতীত হইল। কিশোর বয়সে আমাকে মা সর্বদা সতর্ক করিতেন,—একা বাহিরে যাইতে নিষেধ করিতেন। আমার গায়ের গৌরবর্ণ আরও উজ্জ্বল হইল এবং নানা অলঙ্কার আমার অপের শ্রীবৃদ্ধি করিল। আমি প্রত্যহ দীঘির শানবাধা ঘাটে সহচরীদের সঙ্গে স্নান করিতে যাইতাম, তাহারা চাঁপার কলি ও বকুল ফুল দিয়া আমার দীঘল চুল বাঁধিয়া দিত, শরীরে গন্ধতৈল মাখাইত, এবং আভের চিকরনী দিয়া চুল আঁচড়াইয়া দিত।

‘একদিন পৌষমাসের প্রভাত। বার মাসের মধ্যে সর্বকনিষ্ঠ পৌষমাস,—দেখিতে দেখিতে সূর্যোদয় হয়, আমি প্রত্যাষে উঠিয়া বনদুর্গার পূজা শেষ করিলাম এবং স্নানের জন্য প্রস্তুত হইলাম। আমার সখীরা আমার দেহে ও চুলে গন্ধতৈল মাখাইয়া দিল। তাহার পূর্বে সহচরীরা আমার হীরামোতির হার গলা হইতে খুলিয়া রাখিল। আমরা আনন্দে মাতিয়া দীঘির ঘাটে গেলাম, আমার কাঁখে সোণার কলসী—কেহ নৃত্য করিতে লাগিল, কেহ গান গাইল; এই ভাবে আমরা তরল পাদক্ষেপে হাসি ঠাট্টা ও রং তামাসা করিতে করিতে ঘাটে যাইয়া পৌছিলাম। সেখানে যাইতে মাটিতে পা ঠেকিয়া আমি বাধা পাইলাম, আমি কি জানি সে পথে আমাকে দংশন করিতে বিষধর প্রতীক্ষা করিতেছে! সে দিনের সাক্ষী এই কারকুন, জলের ঘাটে ইহাকে দেখিয়াছিলাম—তখন কিছুই বুঝিতে পারি নাই।

‘পৌষ গেল, মাঘ আসিল—একদিন ঐ যে চিকন গোয়ালিনী—আমাদের বাড়ীতে দুধ দৈ জোগাইত, সে আসিল এবং আমাকে একখানি পত্র দিল,—সেই পত্র আমার কাছেই আছে, আমি তাহা এখানে দাখিল করিতেছি।

‘ধর্ম অবতার রাজা ধর্মে তব মতি।

আমার দুঃখের কথা কর অবগতি॥’

‘চিকন গোয়ালিনীর দাঁত ভাঙ্গিল কেন, আপনারা উহাকে জিজ্ঞাসা করুন।

‘আমি যে পত্র দাখিল করিলাম, তাহাতেই রাজসভা আমার বিচার করিবেন, আমার বলিবার কহিবার কিছুই নাই।

‘না বলিব না কহিব—পত্রে লেখা আছে।

এই পত্র রাখিলাম আমি সভার কাছে॥’

‘ফাল্গুন মাসে বসন্ত ঋতু দেখা দিল :—

‘ভ্রমরা কোকিল কুঞ্জ গুঞ্জরি বেড়ায়

সোণার খঞ্জন আসি আগুনা জুড়ায়।’

‘এই সুখ-বসন্তকালে বাবা মা আমার বিবাহের কথা চুপে চুপে বলিতেন, আমি আড়াল হইতে কাণ পাতিয়া শুনিতাম। মহারাজ, আমার কপালে যে এত দুঃখ ছিল, তাহা স্বপ্নেও ভাবি নাই।

‘এই সময় মহারাজের দূত আসিয়া আমার পিতাকে হুজুরের দরবারে তলব করিয়া লইয়া গেল।

‘হাতী-ধোড়! লোক-লঙ্কর লইয়া বাবা পুরী অঙ্ককার করিয়া চলিয়া গেলেন

‘আইল চৈত্রের মাস অকাল দুর্গাপূজা ।  
 নানা বেশ করে লোক নানা রঙ্গের সাজা॥  
 ঢাক বাজে, ঢোল বাজে পূজার আগিনায় ।  
 ঝাঁক ঝাঁক শঙ্খ বাজে নটী গীত গায়॥  
 মণ্ডপে মায়ের মূর্তি দেখিতে সুন্দর ।  
 চান্দ্যোয়া টাঙ্গাইয়া করে ঘর মনোহর॥  
 পাড়াপড়শি সবাই সাজে নূতন বস্ত্র পরি ।  
 ঘরের কোণায় লুকাইয়া আমি কেঁদে মরি ।  
 মায়ে ঝিয়ে কাঁদি ঘরে গলা ধরাধরি ।  
 বিদেশী হইল পিতা অঙ্ককার পুরী॥  
 এমন সময় দেখ কি কাম হইল ।  
 রাজার বাড়ী হৈতে পত্র যে আসিল॥  
 সেই পত্র সাক্ষী করি ধর্ম-সভার আগে ।  
 আমার বাপ হইল বন্দী কোন্ অপরাধে॥  
 বাড়ীর কারকুন ভাইরে বুঝাইয়া কয় ।  
 বাপেরে আনিতে যাইতে উচিত তোমার হয়॥  
 সরল অবুঝ ভাই কিছুই না জানে ।  
 বিদেশে চলিল ভাই পিতার স্বন্ধানে॥  
 মায়ে ঝিয়ে কাঁদি মোরা ধূলায় পড়িয়া ।  
 বার পূজা কেবা করে না পাই ভাবিয়া॥  
 গলায় কাপড় বাঁধি পড়িয়া ধূলায়॥  
 বাপ ভাইয়ের বর মাগি ঝিয়ে আর মায়॥’

‘তারপলে জ্যৈষ্ঠ মাস—তখন আমারে কুঁড়িতে ডাল ভর্তি—

‘পুষ্প ফোটে—পুষ্প ডালে ভ্রমর শুঞ্জরি  
 আর বার আসে পত্র মায়ের গোচর ।  
 পিতা পুত্র দুই জন বন্দী পরবাসে ।  
 মাতার চোখের জলে বসুমতী ভাসে॥  
 মায়ে ঝিয়ে ধন্বা দিলাম চণ্ডীর দুয়ারে ।  
 তার পরের কথা কহি সভার গোচরে॥’

‘জ্যৈষ্ঠ মাসে আমাদের বাগানে কত ফল পাকিল, কে তা দেখে?

‘রাত্রি দিবা না শুকায় নয়নের জল  
 মায়ে করে ষষ্ঠী পূজা পুতের লাগিয়া  
 প্রাণের ভাই বিদেশে আমার দুগ্ধে কাঁদে হিয়া॥’

‘আমি এক হাতে নিজের চোখের জল মুছিতাম, অপর হাত দিয়া মাকে জড়াইয়া ধরিয়া সান্ত্বনা দিতে দিতে ঘরে ফিরাইয়া আনিতাম।

‘এই দুঃসময়ে দুষ্ট কারকুন “আমার বাপ ভাই বন্দী” সোলাসে এই খবর দিয়া নিজে যে চাকলাদারী পদ পাইয়াছে তাহা আমাদের বাড়ীতে আসিয়া ওনাইল। সে ভুলে তাহার নিয়োগপত্রখানি ফেলিয়া আসিয়াছিল, সেই দলিল আমি এখানে উপস্থিত করিতেছি।

‘গৃহখানি হইতে বিতাড়িত হইলাম। সেই সন্ধ্যাকালে একটা কানাকড়ি না লইয়া মা ও আমি আন্দি-সান্দি এই দুই পাঙ্কী-বাহকের সাহায্যে মামাবাড়ীতে আসিলাম।

‘তখন আষাঢ় মাস—নদী জলে ভরা, আমরা কাঁদিতে কাঁদিতে আশা করিয়া থাকি, একদিন না একদিন এই নদী বাহিয়া আমাদের ডিঙ্গা বাপ ভাইকে লইয়া আসিবে, বৃথা আশা! ইতিমধ্যে মাতুলের পত্র আসিল।

‘এই পত্রের কথা মাতা কিছুই জানেন না, আমি পত্রখানি এইখানে দাখিল করিতেছি।

‘দুঃখের কপালে দুঃখ লিখিল বিধাতা।  
কাকে বা কহিব আমি এই দুঃখের কথা॥  
আগুনের উপরে যেন জ্বলিল আগুনি।  
এই কথা নাহি জানে অভাগী জননী॥  
সন্ধ্যা গুঞ্জরিয়া যায় না দেখি উপায়।  
একেলা হাওরে পড়ি করি হায় হায়॥  
মামার বাড়ীর অনু না খাইব আমি।  
গলায় কলসী বাঁধি তেজিব পরাবী॥  
সাপে না খাইল মোরে, বাঘে নাহি খায়।  
কোথায় যেয়ে লুকাই মুখ না দেখি উপায়॥  
দেবেরে ডাকিয়া কই আশ্রয় দিতে মোরে।  
কেবা আশ্রয় দিবে মোরে এই অন্ধকারে?  
চক্ষুর জলেতে মোর বুক ভাসি যায়।  
অঞ্চল ধরিয়া মুছি পানি না ফুরায়॥’

দুই চক্ষের জলে পথ দেখিতে পাই না।

‘সাত জনের সুহৃৎ মোর মহিষাল ছিল  
গোয়ালে যাইবার কালে পথে দেখা হৈল॥  
জন্মের সুহৃৎ মোর বাপের সমান।  
তিন দিন দিল মোরে গোয়ালেতে স্থান॥  
মায়া মমতায় সে যে বাপের হৈতে বাড়ী।  
এইখানে পাইলাম, সুখের আশা॥’\*

\* আশা - আশ্রয়।

‘এইখানে সেই মহিষাল সাক্ষীকে আপনারা জিজ্ঞাসা করুন।

‘শ্রাবণ মাসের ঘন বর্ষণে ও গর্জনে কুড়া পাখী বিলের ধারে ধারে উড়িয়া আসিয়া বসে। মেঘের সুরে সুর মিশাইয়া তাহারা গর্জন করে, শিকারীরা এই বিল-অঞ্চলে প্রায়ই আনাগোনা করে।

‘একদিন রাজকুমার শাওনিয়া মেঘ মাথায় করিয়া মেঘ-নির্মুক্ত রৌদ্রে তৃষ্ণার্ত হইয়া মহিষালের কুটীরে আসিলেন; তাহার রূপ দেখিয়া আমার মন জুড়াইয়া গেল। কুমার আমার পরিচয় চাহিলেন, আমি বলিলাম, ‘সময় হইলে আপনি আমার পরিচয় পাইবেন—এখন নহে।’ কুমার আমার দেওয়া জল অঞ্জলি ভরিয়া খাইয়া তৃপ্ত হইলেন। এত দুঃখের মধ্যেও কুমারকে দেখিয়া আমি মুগ্ধ হইয়াছিলাম। আমি তাহার সুন্দর ময়ূরপঙ্খী নৌকায় রাজবাড়ীর অভিমুখে রওনা হইলাম। সোণার পানসী ক্রীড়াশীল বাতাসে পাল খাটাইয়া দ্রুতবেগে চলিল। আমার মনের ঠাকুরের সঙ্গে আমি আনন্দে আসিলাম। কিন্তু তাহাকে আমার মনের ভাব জানিতে দেই নাই।

‘এখানে আসিয়া আমি রাণীর সেবাকার্যে লাগিয়া গেলাম; আমার প্রাণের যত দুঃখ গোপন করিলাম—মায়ের জন্য যত ব্যথা তাহা গোপন করিলাম, পিতা ও ভাইয়ের জন্য অহর্নিশ প্রাণ কাঁদিয়া উঠে—এই দুঃখ কাহাকে বলিব? তথাপি আমার বিষণ্ণ মুখ দেখিয়া রাণী বুঝিতে পারিতেন, আমি কোন গুরুতর বেদনা বৃকে বহন করিতেছি। রাজকুমারের জন্য তখন আবার নূতন আশা-নিরাশা আমাকে বিচলিত করিতে লাগিল :—

‘মনের আশুন মোর মনে জ্বলে নিতে।

আর কত দুঃখ মোর পরাণে সহিবে?’

‘ইহার মধ্যে একদিন দেখিলাম, নগরের মধ্যস্থলে বহু নরনারী একত্র হইয়া উৎসব করিতেছে—তাহাদের সকলেই নববস্ত্র পরিহিত এবং আনন্দে উৎফুল্ল, তাহাদের কেহ গাহিতেছে, কেহ নাচিতেছে, তাহাদের মিষ্ট কলরব বাতাসে ভাসিয়া আসিতেছে। দাসদাসীদের যার যে বেশভূষা ছিল, তাহা পরিয়া কি উৎসব করিতেছে! এই বাদ্যগীতি ও ঢোলের বাজনা কিসের জন্য জিজ্ঞাসা করিলাম। শুনিলাম :—

‘শ্রাবণ সংক্রান্তে রাজা—মনসারে পূজে’

‘আমার দুই চক্ষু ছাপিয়া জল উথলিয়া উঠিল, বৃকে যেন শক্তিশেল বিধিল। এই শ্রাবণ সংক্রান্তিতে আমাদের বাটীতে কি ঘট! করিয়াই না দেবীর পূজা হইত!

‘এখন বাপের বাড়ীর মণ্ডপ শূন্য কেবা পূজা করে?

অভাগিনী মা আমার কেঁদে কেঁদে ফিরে।

একদণ্ড না দেখিলে হত পাগলিনী।

সন্ধ্যাবেলা ছাড়ি আইলাম আমি অভাগিনী।

ভাদ্র মাসে তালের পিঠা খাইতে মিষ্ট লাগে।

দরদী মায়ের মুখ সদা মনে জাগে।’



‘দিনের বেলা আমার চক্ষু অশ্রু বিসর্জন করিত। আর রাত্রে সকলই আমার চক্ষে অন্ধকার বোধ হইত। ভাদ্রমাসের চাঁদনী এমন উজ্জ্বল—সমুদ্রের তলদেশ পর্যন্ত সেই চাঁদনীতে দেখা যায় :—

‘ভাদ্রমাসের চান্নি দেখায় সমুদ্রের তলা।  
সেও চাঁদনী আঁধার দেখি কাদিত কমলা।’

‘ভাদ্র মাস গেল, আশ্বিন মাসে দেবীপূজার ধুম পড়িল। চারিদিকে আনন্দের হিল্লোল, জলে স্থলে আনন্দের ছবি ভাসিয়া বেড়াইতে লাগিল। আমার বাবার বৃহৎ মণ্ডপে দেবীপ্রতিমা নাই,—ভাবিতে আমার প্রাণ হ হ করিয়া কাদিতে লাগিল। দশমীতে নৌকা বাচ হওয়ার পরে দেবীপ্রতিমা নদীর জলে বিসর্জিত হইত। যাহা দেখি তাহাতেই আমাদের বাড়ীর উৎসবের কথা মনে হইলে প্রাণ ফাটিয়া যাইতে লাগিল।

‘আশ্বিন গেল, কার্তিক মাসে ঘরে ঘরে কার্তিকপূজা। পুরুষ ও স্ত্রীলোকেরা সারারাত্রি জাগিয়া আমোদ-অহ্লাদ করিতে লাগিল—আমি আমার কক্ষের জানেলা খুলিয়া সেই উৎসব দেখিতাম ও চোখের জলে ভাসিতাম। অগ্রহায়ণে লক্ষ্মীপূজা—গৃহস্থ ধান মাথায় করিয়া সাঁঝের বেলায় বাড়ী ফিরিত,—মেয়েরা শঙ্খধ্বনি করিয়া হলুধ্বনি-সহকারে প্রদীপ জ্বালাইয়া সেই নূতন ধান্য বরণ করিয়া লইত। ঘরে ঘরে দীপশিখা, নূতন ধান্য, কত আনন্দ! নূতন ধানের নূতন অন্ন, নূতন চিড়া—তাহাতে পিঠা তৈরী হয়, পায়স-পিষ্টক রাঁধিয়া সকলে নবান্ন-উৎসব করে, লক্ষ্মীকে নিবেদন করিয়া দেয়।

‘আমার বাবা কোথায়, ভাই কোথায়? উৎসবের দিনে তাঁহাদিগকে বেশী করিয়া মনে পড়ে, প্রাণ ফুকারিয়া কাদিয়া উঠে।

‘এই সময়ের আমার দুঃখের সাক্ষী স্বয়ং রাণীমাতা।

‘সেইদিন রাণীর মাথায় তৈল মাখাইয়া আমি কলসীকক্ষে জলের ঘাটে গিয়াছি, সেই শীতল জলে রাণীকে স্নান করাইব। পথে শুনিলাম, আবার বাদ্যভাণ্ড বাজিতেছে, লোকে দেবীর মন্দিরের কাছে ছুটাছুটি করিতেছে, জিজ্ঞাসা করিলাম “আজ আবার কিসের উৎসব?” লোকেরা বলিল, “তাও জান না! আজ নরবলি দিয়া রাজা রক্ষাকালীর পূজা করিবেন।”

‘কেবা নর কোথা হইতে আনিব ধরিয়া।

নরবলি হইবে শুনি স্থির নহে হিয়া॥

লোকে করে বলাবলি পথে কানাকানি।

বাপে ভাইয়ে দিবে বলি এই কথা শুনি॥’

‘আর ঋণমাত্রও পথে দেবী করিলাম না। অতি শীঘ্র বাড়ী ফিরিয়া সেই শীতল জলে রাণীকে স্নান করাইলাম।

‘রাণী দেবীর মন্দিরে যাইতে সাজসজ্জা করিতে লাগিলেন। আমি একা অজ্ঞানের মত নিজের কক্ষে আসিয়া বিছানায় পড়িয়া রহিলাম :—

‘আঁচল ধরিয়া মুছি নয়নের পানি  
উপায় না দেখি মোর, আমি অভাগিনী।’

‘এই সময়ের সাক্ষী রাজপুত্র স্বয়ং ; আমার কক্ষে আসিয়া পুনরায় বলিলেন—  
“আমার সঙ্গে বিবাহে সম্মতি দাও, আমাকে পরিচয় দিয়া আমার প্রার্থনা পূর্ণ কর।”  
‘আমি সে কথার উত্তর না দিয়া বলিলাম :—

‘আজ কেন রাজপুরে আনন্দের রোল,  
কিসের লাগিয়া আজ বাজে ঢাক ঢোল।  
কহিলা রাজার পুত্র মনেতে ভাবিয়া,  
কালী পূজা করে বাপে নরবলি দিয়া।’

‘আমি বলিলাম—“আজ রাজপুত্র, তোমাকে নিজের পরিচয় দিব,—তুমি বহুবীর  
যাহা জিজ্ঞাসা করিয়াছ, তাহা আজ সকলই শুনিবে ; কিন্তু এখানে নহে, চল দেবীর  
দুয়ারে, যেখানে কোচ ঢুলীরা নরবলির বাদ্য বাজাইতেছে।”

‘কুমার আগে আগে চলিলেন, আমি তাঁহার পিছু পিছু চলিয়া এখানে আসিয়াছি,  
আমার বাপ ভাই বন্দীবেশে এখানে আছেন, আমার অভাগিনী জননী এই ধর্ম-সভায়  
সাক্ষী হইয়া আসিয়াছেন, মহারাজ তুমি নরবলি দিবে, কিন্তু আগে প্রকৃত বিচার কর—  
তার পর রক্ষাকালী পূজা করিবে।’

এই বলিয়া কমলা পরিশ্রান্ত ও শোকাহত হইয়া সেইখানে বসিয়া পড়িল।  
শ্রোতৃবর্গ, মন্ত্রীমণ্ডলী ও স্বয়ং রাজা সেই করুণ দেবীপ্রতিমার বুক-ফাটা দুঃখে অভিভূত  
হইয়া পড়িলেন।

রাজা বিচারগৃহে সিংহাসনে বসিলেন, সভাসদ ও মন্ত্রীরা যথাযোগ্য স্থানে আসন  
লইলেন, সর্বপ্রথম কারকুনের ডাক পড়িল। রাজা ক্রুদ্ধ হইয়া তাহাকে গুরুতর  
অভিযোগের উত্তর দিতে বলিলেন। তাহার নিজ হাতের লেখা চিঠি—সূতরাং উত্তর  
দিবার তাহার কিছু ছিল না ; আকাশ ভাঙ্গিয়া মাথায় পড়িলে যেরূপ হয়—বজ্রাহত  
ব্যক্তির মত সে স্তব্ধ হইয়া শুধু কাঁদিতে লাগিল। তার পর চিকন গোয়ালিনীর  
জবানবন্দী, রাজা তাহার দাঁত ক্রুরূপে ভাঙ্গিল জিজ্ঞাসা করিলেন। প্রথমতঃ সে খতমত  
করিয়া বলিতে চাহিল, ‘সান্নিধ্যে পড়িল দত্ত আর নাহি জানি’—তার পর যখন রাজার  
ইঙ্গিতে যমদূতের মত কোটাল যাইয়া তাহার চুল ধরিল, তখন উপায় না দেখিয়া  
কারকুনকে গালি পাড়িতে লাগিল :—

‘পত্রে কি লেখা ছিল নাহি জানি তার।  
দোষ ক্ষমা দিয়া মোরে করহ নিস্তার।’

আন্দ-সান্দি দুই ভাই তাহাদের সাক্ষ্যে বলিল, তাহারা কমলা ও তাহার মাতাকে  
পাকীতে লইয়া মামাবাড়ীতে পৌছাইয়া দিয়াছে। মামা ও মামী সত্য ঘটনা বলিলেন,

এবং মহিষাল বন্ধু কমলার সহিত সাক্ষাতের পর, রাজকুমারের তাঁহাকে লইয়া যাওয়া পর্যন্ত সকল কথা সাশ্রুনেত্রে বর্ণনা করিল। রাজকুমার বৃদ্ধ গোয়ালার বাড়ীতে যাওয়া করূপে কমলাকে দেখেন এবং রাজবাড়ীতে লইয়া আসিয়াছিলেন তাহার সাক্ষ্য দিলেন। প্রদর্শিত পত্রগুলি বিচারসভায় আলোচিত হওয়ার পর মন্ত্রীরা কারকুনকে ঘোর অত্যাচার ও মিথ্যাচারণের জন্য দোষী সাব্যস্ত করিলেন; তাঁহারা পাপিষ্ঠকে শূলে দিতে বলিলেন, রাজা বলিলেন, ‘রক্ষাকালী পূজায় নরবলি মানত আছে। কারকুনের ন্যায় পাপিষ্ঠকে সেই দণ্ড দেওয়াই উচিত হইবে।’

তখন নাকাড়া, কাড়া, ঢাল-ঢোল আবার বাজিয়া উঠিল এবং পুরোহিত দেবীপূজার মন্ত্র উচ্চৈঃস্বরে পড়িতে লাগিলেন; মন্দির ও মণ্ডপগৃহ ধূমধ্বন হইল, সেই ধূমে ঝাড় ফানুস প্রভৃতির আলো প্রায় ম্লান হইয়া গেল, কেবল পঞ্চপ্রদীপের ক্ষীণ রশ্মি সেই ঘন অন্ধকার ভেদ করিয়া কারকুনের কর্তিত শোণিতার্দ্ৰ মুণ্ডটি আভাসে দেখাইল।

### বিবাহ ও শেষ

ইহার পরে কমলার সঙ্গে প্রদীপকুমারের বিবাহের প্রস্তাব পাকা হইয়া গেল। সোণার কালিতে লেখা পত্রের উপর সাতটা সিন্দূরের দাগ দেওয়া হইল এবং সেই সংবাদ দেশ-বিদেশে আত্মীয়বন্ধুদের মধ্যে প্রচারিত হইল। শত শত ময়রা মিঠাই প্রস্তুত করিতে নিযুক্ত হইল এবং সাতদিন সাতরাত্রি বাদ্যভাণ্ডের শব্দে ও নৃত্যগীতে রাজপুরী প্রমত্ত হইয়া রহিল। গুরু-পুরোহিত ও পণ্ডিতমণ্ডলীর কলরবে প্রাসাদ মুখরিত হইল; বনদুর্গা, একচূড়া প্রভৃতি দেবতার পূজা হইলে জোড়া পাঁঠা দিয়া ইহাদের পূজা সমাপ্ত করা হইল, ‘ডরাই’ নামক গ্রাম্যদেবতার পূজায় মহিষ বলি হইল। অতঃপর অন্তঃপুরিকারা নান্দীমুখের মাটি কাটিল, এবং কমলার মা ও মামী মাথায় ‘সোহাগের ডালা’ করিয়া এয়োদিককে লইয়া গান করিতে করিতে বাড়ীতে বাড়ীতে সোহাগ মাগিতে গেলেন—তাঁহাদের পশ্চাৎ পশ্চাৎ বাদ্যকরেরা বাজনা বাজাইতে বাজাইতে চলিল। গীত ও হলুধ্বনিতে বিবাহের মণ্ডপ মুখরিত হইল। বর ও কনে জলের ঘট সম্মুখে করিয়া বসিলেন। নবদ্বীপ হইতে নাপিত আসিয়াছিল, সে সোণার ক্ষুর দিয়া কামাইতে লাগিল, সেই সময় মেয়েরা ক্ষৌরকার্যের গান করিতে লাগিল। তখন বরকন্যাকে হলুদ মাখাইয়া স্নান করানো হইল, গায়ে-হলুদের যত গান জানা ছিল—মেয়েরা তাহা গাহিল।

কমলকে ‘আসমানতারা’ নামক শাড়ী পরানো হইল, তাহা হাতে লইলে ঝলমল করিয়া উঠে, শূন্যেতে লইলে তাহা উড়িয়া যায়, মাটিতে রাখিলে মনে হয়, নীলতারা-ভূষিত আকাশের এক খণ্ড মাটিতে পড়িয়া গিয়াছে। কমলার কাণে স্বর্ণ-চম্পক দুল ও মণিমণ্ডিত ঝুমকা পরানো হইল, নাকে সোণার ‘বলাক’, মস্তকে স্বর্ণসিঁথি, পায়ে গুঞ্জরী ও হাতে বাজুবন্ধ ও কঙ্কণ পরাইয়া তাহাকে যখন দাঁড় করানো হইল, তখন সত্য সত্যই সে দেবীপ্রতিমার মত দেখাইল। ‘গলায় পরাইল এক হীরার হাঁসুলী’ মেয়েলী আচার-মত ছাতনাতলায় বরকন্যার বরণ হইল।

তখন ঢাক ঢোলের বাদ্যে আকাশ পরিব্যাপ্ত হইল, বন্দুকের আওয়াজে মেদিনী কম্পিত হইল।

‘তুবড়ি ছাড়িল যেন আগুনের গাছ পারা।

হাউই ফানুস ছুটে আসমানের তারা॥’

কুমার কমলাকে পাইয়া আনন্দিত হইলেন।

‘এই মতে বিয়া কাজ হৈয়া গেল শেষ।

পুত্রসহ চাকলাদার গেল নিজ দেশ॥’

### আলোচনা

এই গল্পের প্রধান চরিত্র কমলা। কমলা স্বভাবতঃ রহস্যপ্রিয়, শৈশব ও সুখ-কৈশোরে তিনি একটা আনন্দের পুতুলের মত ছিলেন ; প্রথম অধ্যায়ে তিনি চিকন গোয়ালিনীকে লইয়া যে সকল রঙ্গরঙ্গ ও কৌতুক করিয়াছেন, তাহা আমি গল্পভাগে দেই নাই। সেই সকল বর্ণনা পড়িলে মনে হইবে কমলা কতকটা তরল প্রকৃতির। পিতামাতার আদরিণী ও নানা সোহাগে লালিত-পালিতার স্বভাবের এই একটু চাপল্য স্বাভাবিক। কিন্তু দুঃখই মানুষের প্রকৃত উপাদান চিনাইয়া দেয় ; যখন বিপদের দিন আসিল, তখন এই চঞ্চল বিদ্যুৎপ্রভ মূর্তি সূর্যের মত একটা স্থির জ্যোতিষ্কে পরিণত হইল।

উপস্থিত-বুদ্ধি কমলার যথেষ্ট ছিল, কিন্তু কমলার বিপদ এমনই সাংঘাতিক যে, শত উদ্ভাবনী শক্তি সত্ত্বেও সেই সকল বিপদ হইতে উত্তীর্ণ হওয়া তাঁহার পক্ষে সহজ ছিল না। তাঁহার চরিত্র ছিল দৃঢ়, ন্যায়-অন্যায় বোধ এবং সততার উপর প্রতিষ্ঠিত। বৈষয়িকের সতর্কতা তাঁহার ততটা ছিল না, থাকিলে কতকটা চাতুরী খেলিতে পারিতেন এবং হুলিয়া গ্রামে নিজবাটীতে আর কয়েকদিন কারকুনকে ভুলাইয়া—থাকিতে পারিতেন। পূর্ববঙ্গীতিকায় ভেলুয়া ভোলা সদাগরকে এইভাবে ভাঁড়াইয়া রাখিয়াছিলেন, এমন কি দেওয়ান জাহাঙ্গীরকে মলুয়াও নানাছলে প্রতারিত করিয়াছিলেন—আদর্শ সততা ও সাধীর পবিত্রতা থাকা সত্ত্বেও ইহারা উপস্থিত ক্ষেত্রে চতুরতাপ্রদর্শনে দ্বিধাবোধ করেন নাই। কিন্তু কমলা কারকুনকে বিবাহ করার প্রস্তাব শুনিয়া মুখের উপর যে উত্তর দিয়াছিলেন তাহাতে দেখা যায় তাঁহার সততা একেবারে সাংসারিক হিতাহিত-জ্ঞানের সীমার বাহিরে, তাহা অমোঘ ও বজ্রকঠোর, সুতরাং তাঁহাকে মহাবিপদের সম্মুখীন হইতে হইয়াছিল। তাঁহার প্রকৃত পরীক্ষা আরম্ভ হইল সেইদিন—যেদিন নিজের শয্যার উপর তিনি মাতুলের চিঠিখানি পাইলেন। এই চিঠি পাওয়ামাত্র তাঁহার সংকল্প স্থির হইয়া গেল,—সাংসারিক হিতাহিত জ্ঞান এবং ভবিষ্যতের জন্য চিন্তিত দুর্বল চিওর সতর্কতা, এমন কি মাতায় প্রতি অসীম স্নেহ পর্যন্ত এই দুলালী কন্যাকে বিচলিত করিতে পারিল

না। মাথায় বজ্রপাত হউক, জলে ডুবিয়া মরি অথবা দস্যুর হাতে প্রাণ দিই, সব সহ্য করিব, কিন্তু কিছুতেই আর মাতুলের বাড়ীর অনু খাইব না।

হায়! আমাদের দেশের কত শত বলিষ্ঠকায় মনস্বী পুরুষ পরপদাঘাত সহ্য করিয়াও চাকুরীটিকে আঁকড়াইয়া ধরিয়া আছেন, কেবল স্ত্রী-পুত্র-কন্যা ও আশ্রিতদের প্রতি বাৎসল্যরশতঃ; চাকুরী গেলে তাহাদের দশা কি হইবে ইহাই তাহাদের আশঙ্কা। কিন্তু কমলা স্ত্রীলোক, একান্ত নিরাশ্রয়; তাঁহার আশ্রয়ের একমাত্র ঝুঁটি—স্নেহাতুর মাতা, তাঁহাকে হারাইলে তিনি শোকে পাগল হইবেন অথবা মরিয়া যাইবেন, একথা কমলা একবার চিন্তা করিলেন না, নিরাশ্রয়ভাবে অন্ধকার রাতে হাওরের পথে কোন্ দস্যুর হাতে পড়িবেন, তিনি তো অপূর্ব সুন্দরী,—এসকল চিন্তা তিনি মনে স্থান দিলেন না। তাঁহাঙ্গ অপেক্ষা শতগুণে বলিষ্ঠ, পণ্ডিত ও জ্ঞানী ব্যক্তির উপস্থিত বিপদে যে সতর্কতা অবলম্বন করেন, তিনি তাহা একটী বারও করিলেন না,—ঘৃণায় মুগ্ধ ফিরাইয়া কপালে আরও যাহা আছে হউক, এই সঙ্কল্প করিয়া—সেই ভীষণ রাতে নিজেকে অদৃষ্টের হাতে ছাড়িয়া দিলেন। কিন্তু এই ভাবে নিজের সততার উপর সম্পূর্ণ নির্ভর করিয়া যে অপর সমস্ত সাবধানতা ত্যাগ করে, সুবিধাবাদীদের অপেক্ষাও সে পরিণামে অধিকতর জয়ী হয় এবং বিপদে উত্তীর্ণ হয়—কমলার জীবন তাহারই উদাহরণ। এজন্য কমলা আমাদের মত এ দেশের সহস্র সহস্র লোকের অপেক্ষা প্রশংসনীয়—তাঁহার চরিত্র পূজ্য। যে ব্যক্তির বা জাতির এইরূপ তীব্র আত্ম-মর্যাদা বোধ আছে, তাঁহারাই বিজয়ীর স্বর্ণকুণ্ডল পরিতে পারে সুবিধাবাদীরা তাহা পারে না, উপস্থিত বিপদ এড়াইয়া কোনরূপে টিকিয়া থাকিতে পারে মাত্র।

কমলা বড় ঘরের মেয়ে, তাঁহার আত্মমর্যাদা জ্ঞান ও সংযত সহিষ্ণুতা আমাদের শ্রদ্ধা বিশেষ করিয়া আকর্ষণ করে। তিনি কিছুতেই তাঁহার আত্ম-পরিচয় কুমারকে দিলেন না। রাজঘরে তাঁহার পিতা ও ভ্রাতা চৌর্যাপরাধে ধৃত ও বন্দী; তাঁহার পরিচয় পাইলে কুমার তাঁহাব প্রতি কি ব্যবহার করিবেন তাহা অনিশ্চিত। সুতরাং যাহাতে তাঁহার অটুট সন্ত্রম, চরিত্র-গৌরব ক্ষুণ্ণ হয়, এমন কাজ করিতে তিনি স্বভাবতঃই কুণ্ঠিত হইলেন।

কিন্তু এই গল্পের শেষভাগে আমরা কমলার স্বরূপ দেখিলাম। পোশিয়া যেরূপ বক্তৃতা করিয়া শাইলকের হস্ত হইতে নিজের স্বামীকে উদ্ধার করিয়াছিলেন, কমলা সেইরূপ এক বিষম পরীক্ষার সম্মুখীন, তাঁহার বন্দী পিতা ও ভ্রাতা নির্মম মৃত্যুদণ্ডে দণ্ডিত। শেখপিয়র গল্পের একটা প্রাচীন কাহিনী পাইয়াছিলেন। সেই কাহিনীর উপর তাঁহার অলৌকিক কবিত্বপ্রতিভার ছটা দিয়া উহা সাজাইয়াছিলেন। কিন্তু এই গল্পের রচক কবি ঈশান সেরূপ কোন প্রাচীন গল্পের খসড়া পাইয়াছিলেন বলিয়া মনে হয় না। তথাপি কমলার বিবৃতিতে যে অপূর্ব সংযম ও তীক্ষ্ণ বুদ্ধি এবং নারীজনেচিত সন্ত্রম এবং অব্যর্থ প্রমাণ প্রয়োগের বহর দৃষ্ট হয়, তাহাতে এই বাঙ্গালী নারীর প্রতি পরম শ্রদ্ধায় আমাদের মাথা নত হইয়া পড়ে। এই অতি জঘন্য অভিযোগ প্রমাণ করিতে যাইয়া তিনি তাঁহার উচ্চকুলোচিত শীলতা এক বিন্দুও হারান নাই।

তিনি উচ্চকুলসম্ভূতা মেয়ে হইয়া রাজসভায় তাঁহার অভিযোগ উচ্চারণ করিবেন কিরূপে? প্রগল্ভার মত তিনি কি কারকুনের জঘন্য চেষ্টার সকল কথা এমন বিশিষ্ট সভায় বলিতে পারেন? অথচ আত্মপক্ষ সমর্থনে সেই সকল কথা একরূপ অপরিহার্য।

কমলা তাঁহার অভিযোগে নিজের কথা কিছুই বলেন নাই, অপরের সাক্ষ্যও যতটা প্রমাণ দেওয়া হইয়াছে, তাহাতে সেই সকল ঘৃণ্য কথার উল্লেখমাত্র নাই। কারকুন যে প্রণয়-পত্র খানি লিখিয়াছিল, সেই পত্রখানি প্রথমতঃ প্রদর্শিত হইল, তাহাতেই কারকুনের চরিত্রের কথা সভায় বিদিত হইল। তারপরে চিকন গোয়ালিনীর ভাঙ্গা দাঁতের প্রমাণে এই সাব্যস্ত হইল, যে সে-ই অশিষ্ট প্রস্তাব ও চিঠিখানি লইয়া কমলার কাছে যাওয়াতে তিনি তাহাকে উচিত শাস্তি ও শিক্ষা দিয়াছেন। আন্দ্রি-সান্দ্রির সাক্ষ্যে প্রমাণ হইল, কমলা কোন দুষ্ট লোকের সঙ্গে গৃহত্যাগ করেন নাই, মাতার সঙ্গে মাতুলালয়ে গিয়াছেন। তাহার পর মাতুলের চিঠিখানি উপস্থিত করা হইলে সকলে বুঝিতে পারিলেন, কারকুন তাহাকে গৃহ হইতে তাড়িত করিয়াই ক্ষান্ত হয় নাই, মাতুলালয় হইতে কলঙ্কের কালিমা মাথায় লেপিয়া তাহাকে একেবারে পথে আনিয়া নিতান্ত নিরাশ্রয়ার উপর আরো অত্যাচার চালাইবে, এই তাহার মনোভাব। মহিষালের সাক্ষ্যে প্রমাণিত হইল, কোন দুষ্ট লোক তাহাকে ফুসলাইয়া মাতুলগৃহ হইতে লইয়া যায় নাই। বৃদ্ধ মহিষাল তাহাকে নির্জন হাওরের পথে যেভাবে পাইয়াছিল তাহাতে তাঁহার একনিষ্ঠ সরল চরিত্র, চরম দুর্দশা ও নিতান্ত নিরপরাধের প্রমাণ উপলব্ধি হইল।

ইহার পরে রাজকুমার যাহা বলিলেন, তাহাতে বুঝা গেল, মহিষালের গোয়ালঘরে কিরূপে পঙ্কের মধ্যে পঙ্কজের মত তিনি এই পবিত্রতা ও সৌন্দর্যের খনির আবিস্কার করিয়াছিলেন।

এই সভ্যবর্ণনা ও উজ্জ্বল সাধুত্বের মূর্তি সভাসমক্ষে প্রকটিত হওয়ার পর কারকুনের ষড়যন্ত্র এমনভাবে ধরা পড়িল যে তৎসমক্ষে কোন দ্বিধার অবকাশ রহিল না। রাজসভার ভাব কমলার জন্য করুণায় ভরপুর হইয়া গেল।

কমলা নিজের কথা নিজে কিছুই কহেন নাই। দলিলের প্রমাণই যথেষ্ট হইয়াছে। যাহারা সাক্ষ্য দিয়াছেন, তাহারাও যাহাতে জঘন্য কথাগুলি যথাসম্ভব এড়াইয়া যান অথচ মামলাটি সম্বন্ধে বিচারকগণ নিঃসন্দেহ হন, কমলার বিবৃতি তাহারই অনুকূল। কমলার উক্তি তীক্ষ্ণ বুদ্ধি ও নিজের পদ-মর্যাদা তথা নারীজনোচিত সন্ত্রম এবং লজ্জা বজায় রাখিয়া আত্মসমর্থনের উজ্জ্বল দৃষ্টান্ত-স্থলীয়। তিনি প্রারম্ভে সমস্ত দেবদেবীকে সাক্ষী করিয়াছিলেন, কিন্তু প্রাধান্য দিয়াছিলেন সন্ধ্যাতারা ও স্বীয় চক্ষুজলের উপর। প্রকৃতই সেই প্রবনক্ষত্র যাহা প্রতি সন্ধ্যায় জগতের কার্যাবলী নিশ্চিতভাবে দেখে—এবং তাঁহার চক্ষুজল—যাহা সমস্ত হৃদয় মথিত করিয়া অন্তরের ব্যথার পরিচয় দেয়—এই দুই সাক্ষীই তাঁহার কাহিনীর যথার্থ পরিচয় দিয়াছিল।

কমলার চরিত্রের আর একটা বৈশিষ্ট্য—তাঁহার বাঙ্গলা দেশের প্রতি আন্তরিক দরদ। বাঙ্গলার শ্যামল প্রকৃতি, আম্রমুকুলের গন্ধে ভরপুর, কোকিলকূজনে এবং

ভ্রমরগুঞ্জরণে মুখরিত বাঙলার কুটীর, দুর্গাপূজা, বনদুর্গাপূজা, কার্তিক ও ধান্যালক্ষ্মীর পূজা—বাঙ্গলার বার মাসে তের পার্বণের মনোহারিত্ব কমলার এই দরদ-পূর্ণ বিবৃতিতে এমন স্পষ্ট হইয়া মনোজ্ঞ ভাবে ফুটিয়া উঠিয়াছে যে আমরা এই কাহিনী পড়িবার সময় চোখেঃ জলের সঙ্গে আমাদের পল্লীমাতাকে বারংবার স্মরণ করিয়াছি। এই গীতিকাটি পরিপূর্ণভাবে পল্লীরসমাধুর্যে ভরা। কমলা দুঃখ কষ্টের চূড়ান্ত সীমায় যাইয়াও পল্লীর আনন্দ ভোলে নাই। পল্লীরসে চিরদিনই তাঁহার মনকে সরস রাখিয়াছে। ঘোর বিপদের দিনেও নদী বাহিয়া সোণার ময়ূরপঙ্খী নৌকায় প্রিয়জনের সঙ্গসুখ তাঁহাকে আনন্দ দিয়াছে। দুঃখের অন্ধকারাচ্ছন্ন রাত্রিতেও ক্ষণতরে হইলেও বিধাতার দান আনন্দটুকু উপভোগ করিবার শক্তি তিনি রাখিয়াছেন।

কমলার বিবাহের বর্ণনায় আমরা তৎকালিক সমাজের যে চিত্র পাইতেছি, তাহা কৌতূহলকর। ২/৩ শত বৎসর পূর্বে পূর্ববঙ্গে বড়লোকের বিবাহে, নবদ্বীপ হইতে নাপিত আনা হইত, তাহারাই ‘গৌরচন্দ্রিকা’ আবৃত্তি করিত এবং সোণার ক্ষুর দিয়া ক্ষৌরী করিত। ‘ডড়াই’ নামক পল্লীদেবতার পূজায় মহিষ বলি হইত। মেয়েদের বিবাহে নানারূপ বস্ত্রের উল্লেখ এই পল্লীসাহিত্যের সর্বত্র পাওয়া যায়। এই গল্পেও ‘আসমানতারা’ নামক একপ্রকার শাড়ীর উল্লেখ আছে, তাহা মসলিনের প্রকার-ভেদ বলিয়া মনে হয়। পূর্বেই বলিয়াছি, দ্বিজ ঈশান নামক এক পল্লী কবি এই গানটি রচনা করিয়াছিলেন. অনুমান—সপ্তদশ শতাব্দীর প্রথমভাগে ইহা রচিত হইয়া থাকিবে।

## কাঞ্চন

### রাজপুত্র ও ধোপার মেয়ে

এক ধোপার পরমাসুন্দরী কন্যা ছিল ; সেই অঞ্চলের রাজপুত্র কন্যার অসামান্য রূপ দেখিয়া মুগ্ধ হইলেন। কাঞ্চনমালাও রাজপুত্রের রূপে-গুণে মুগ্ধ ; উভয়ে উভয়ের অনুরাগী। কাঞ্চন রাজকুমারের বাঁশী শুনিয়া ঘরে থাকিতে পারে না, বাহির হইয়া আসে—কিন্তু যখন রাজপুত্র তাঁহার আঁচল ধরিয়া টানেন, তখন কিছুতে ধরা দিতে চান না। তাঁহার গায়ের বর্ণ চাঁপাফুলের মত, তাঁহার চক্ষু দুটি অপরাজিতার ন্যায় নীলকম্বু, মাথার চুল পৃষ্ঠদেশ হইতে নিবিড় মেঘের লহরীর মত নিম্নে লুটাইয়া পড়িয়াছে, রাজকুমার বলেন, ‘কাঞ্চন, আমি যে তোমার ঐ অপরাজিতা ফুলের ন্যায় দুটি চক্ষু দেখিয়া ভুলিয়াছি, আমি তোমার মাথার চুল দেখিয়া ভুলিয়াছি।

‘আমি যে পাগল হৈছি দেখি মাথার চুল।’

‘আমি তোমাকে বিবাহ করিব, তোমার সম্মতি পাইলে আমি রাজার সম্মতি নিতে পারিব।’

কাঞ্চন কুমারের আবেদন নিবেদন শোনে, তাহার প্রাণ ফাটিয়া যায়, অথচ মুখে বলিতে পারে না। কতদিন আঁধার রাতে বর্ষায় রাজকুমার ধোপার কুটারের আঙ্গিনার এককোণে দাঁড়াইয়া থাকেন, বর্ষার জলে তাঁহার সর্বাঙ্গ সিঁক্ত হয়—কাঞ্চন—রাজপুত্রের কেশ-বেশ মুছাইবার জন্য হাত বাড়াইয়া ফিরিয়া আসে—কত করিয়া কুমারকে বুঝায়—‘তুমি এত কষ্ট পাইও না, আমাকে কষ্ট দিও না। তোমার বাঁশীর সুরে আমার অন্য সমস্ত চিন্তা ভুবিয়া যায়—আমার মনে হয় চরাচর শুদ্ধ, কেবল বাঁশীই সত্য, বাঁশীর সুর আমার মর্ম বিদ্ধ করে, আমাকে পাগল করে।

‘তুমি কি জান না কুমার তুমি কে আর আমি কে ? আমি তোমায় কি বলিব? আমার পিতা তোমাদের রাজবাড়ীর ধোপা—আমি ধোপার মেয়ে, তোমার সঙ্গে কি আমার মিলন সম্ভব? আমার পক্ষে এরূপ আশা করা বামন হইয়া চাঁদ ধরিতে যাওয়া, তুমি তোমার যোগ্যা কোন নারীকে বিবাহ করিয়া সুখী হও।’

রাজকুমার বলেন, ‘তোমার বাড়ী হইতে যখন রাজবাড়ীতে ধৌত বাস আইসে, তখন আমার ধূতি চাদরে তোমার পাঁচটী আঙ্গুলের স্পর্শ ও সুগন্ধ চিহ্ন আমি দেখিতে পাই, সেই দাগ দেখিয়া আমি আর আমাতে থাকি না। তোমার মালার গন্ধে সেই বস্ত্র



ভরপুর, আমি ঘুরিয়া ঘুরিয়া এই সকল নিদর্শন পাইয়া—তোমার জন্য পাগল হইয়া থাকি। এখানে তোমার সঙ্গে আমার বিবাহে অনেকে বাধা দিবে, তুমি যদি ইহাই মনে কর, তবে চল আমরা দুজনে এই রাজ্য হইতে চলিয়া যাই। কোকিল কেবল আমাদের রাজ্যে ডাকে না, ফুল কেবল এদেশের বাগানে ফোটে না, চাঁদের জ্যোৎস্না আর আর দেশে তাহার রজতজালে তরুণলালতা গৃহাদি পরিশোভিত করে, এদেশ হইতে আমরা দুজনে যাইয়া অন্য কোন দেশে কুটীর বাঁধিয়া থাকিব,—এইসকল ফুললতা ও পাখীর কৃজন আমাদের মিলন-মঙ্গল গান করিবে—তাহার তুলনায় রাজ্যসুখ আমার কাছে তুচ্ছ।’

কাঞ্চন তাহার কর্তব্য বুঝিতে পারিল না। একদিকে কুল মানের ভয়, অপর দিকে রাজকুমারের এতাদৃশ অনুরাগ—একদিকে তাহার চিত্ত ভয়ে দুর দুর করিয়া কাঁপিতেছে অপর দিকে অদৃষ্ট যেন তাহাকে কোন যাদুকরের রাজ্যের দিকে জোর করিয়া টানিতেছে। অবশেষে কাঞ্চন রাজকুমারের কথায় ভুলিল, রূপে ভুলিল এবং অনুরাগে ভুলিল।

তাঁহারা উভয়ে নদীতীরে মিলিত হইতেন। তাঁহাদের রাত্রি-ভোর আনন্দের কথা, শত আশা ও ভবিষ্যৎ জীবনের স্বপ্নের কাহিনী শুনিতে শুনিতে রাত্রি প্রভাত হইয়া যাইত। রাত্রিজাগরণে ক্লান্ত রাজকুমার নদীর তীরে বাঁশপাতার বিছানায় ঘুমাইয়া পড়িতেন। কাঞ্চন ভাবিত, ‘কি দূরদৃষ্ট আমার! যাঁহার শয্যা স্বর্ণপালঙ্ক, তিনি আমার জন্য এই কঠিন মৃত্তিকার উপর গাছ-পাতার বিছানায় পড়িয়া আছেন, এখুনি তো লোকের চলাচল হইবে। সারারাত্রি জাগিয়া দুইটা ক্লান্ত চক্ষু ঘুমে এই মাত্র বুজিয়া আসিয়াছে, আমি কেমন করিয়া ইহার কাঁচা ঘুম ভাঙ্গি, তথাপি না করিলে নয়’—কোমল হস্তে তাঁহাকে ঠেলিয়া উঠাইয়া দেয়।

কাঞ্চন বুঝিল, রাজকুমারের এত স্নেহ এত অনুরাগ, তিনি তাহাকে জীবনে ছাড়িবেন না, হয়ত কোন দূর দেশে যাইয়া তাঁহার দাম্পত্য জীবন কাটাইবেন, ‘স্বর্গের দেবতার আামাদের এই একনিষ্ঠ পবিত্র প্রণয়ের মূল্য বুঝিবেন।’

### কানাকানি ও শান্তি

ক্রমশঃ জানাজানি হইয়া গেল। রাজদরবারে এই ব্যাপার লইয়া কানাকানি হইতে লাগিল। রাজাকে এক মন্ত্রী সংবাদ দিলেন—‘মহারাজ আপনি কি করিতেছেন? আপনার বুড়া ধোপীর কন্যা কাঞ্চন তাহার রূপ দিয়া রাজকুমারকে ভুলাইয়াছে। রাজকুমার এই কন্যার প্রতি আসক্ত হইয়াছেন, এ যেন চাঁদ ও রাহুর মিলন হইয়াছে, অধম কাপড়-কাচা ধোপীর ঘরে রাজপুত্র যাতায়াত করেন, ইহা হইতে ঘৃণার বিষয় আর কি হইতে পারে?’

এই কথা শুনিয়া রাজা আগুনের মত জ্বলিয়া উঠিলেন এবং তখনই ধোপাকে আনিতে লাঠিয়াল পাঠাইয়া দিলেন।

কাঞ্চনের পিতার নাম গোদা, সে অতি বৃদ্ধ; রাজার হুকুমে কাঁপিতে কাঁপিতে লাঠি ভর করিয়া দরবারে আসিয়া উপস্থিত হইল। দরবারগৃহে মস্ত বড় ফরাসি বিছানা পাতা, লোক লঙ্করে ঘর ভর্তি, এমন সময় ধোপা হাত জোড় করিয়া সেই ঘরের এককোণে

দাঁড়াইয়া বলিল ‘হুজুর, এ কয়েক দিন ধরিয়া ক্রমাগত ঝড় তুফান ও বাদলা চলিতেছে, কাপড় শুকাইতে পারি নাই। এইজন্য এবার একটু দেৱী হইয়া গিয়াছে।’

রাজা রাগে কাঁপিতে কাঁপিতে বলিলেন, ‘তোমার এক কন্যার বিয়ের বয়স উত্তীর্ণ হইয়া গিয়াছে, আমার ছেলে সেই কন্যার জন্য পাগল হইয়াছে, শুনিতে পাইলাম। আজ রাত্রির মধ্যে যদি তুমি তাহার বিবাহ না দিস, তবে কাল সকালে পাইক পাঠাইয়া তাহার চুলের মুঠি ধরিয়া এখানে আনিয়া তাহাকে জাতিচ্যুত করিব।’

ধোপা কাঁপিতে কাঁপিতে বলিল, ‘মহারাজের বাগানে যে মালীর কাজ করে, কালই সকালে আমি তাহার সঙ্গে আমার কন্যার বিবাহ দিব।’

এই বলিয়া লাঠি ভর করিয়া ধোপা বাড়ীতে ফিরিয়া গেল, এবং সারারাত্রি সে ও তাহার স্ত্রী কাঁদিয়া কাটাইল।

কিন্তু প্রাতে রাজকুমার ও কাঞ্চনের খোঁজ কেহ দিতে পারিল না, তাহারা কোথায় গেল?

‘কই বা গেল রাজার পুত্র, কই বা কাঞ্চনমালা  
দেশেতে পড়িল ঢোল—ধর এই বেলা।’

### পলায়ন

পরিশ্রান্ত রাজকুমার ও কোমলাঙ্গী কন্যা সমস্ত রাত্রি জাগিয়া পথে চলিয়াছেন। কাঞ্চন আতঙ্কে বলিল, ‘বঁধু, আমি দুর্বল হইয়া পড়িয়াছি, বনের পথ অন্ধকারে চিনিতে পারিতেছি না, নদীর ধারে কেওয়াবন—ফুলের গন্ধে ভরপুর, ঐখানে যাইয়া আজ যে একটুখানি রাত বাকী আছে, চল শুইয়া কাটাই, আমার পা আর চলিতেছে না।’

রাজপুত্র বলিলেন, ‘আর একটু চল—আমার পিতার মূলুক হইতে অন্য মূলুকে যাই। রাত্রি শীঘ্রই পোহাইবে, পূর্বগগনে একটুখানি ঝিলিমিলি ছটা দেখা যাইতেছে। আমরা প্রভাত হইতে না হইতেই অন্য রাজার মূলুকে যাইয়া পৌছিব, তখন যদি কোন গৃহস্থ আমাদের আশ্রয় দেন তবে ভাল, নতুবা—

‘বনে বনে ফিরিব লো কন্যা তোমারে লইয়া।  
ক্ষিদা পাইলে বনের ফল খাইব পাড়িয়া॥  
গাছের তলায় বাড়ীর পাতার বিছানা।  
বনের বাঘ ভালুক তারা হইবে আপনা॥’

পরিশ্রান্ত কাঞ্চনমালা রাজপুত্রকে বলিল, ‘পূর্বদিকে চাঁদের ঝিলিমিলি দেখা যাইতেছে, চাঁদ অস্ত যাইতেছে। বোধ হয় আমরা তোমার বাপের মূলুক ছাড়িয়া অন্য রাজার রাজ্যে আসিয়া পড়িয়াছি। তুমি তোমার ঘরবাড়ী ঐশ্বর্য ছাড়িয়া আসিয়াছ, আমি আমার কুল মান ছাড়িয়াছি। আমার বুড়া বাপ নদীর তীরে বসিয়া কাঁদিবেন। মা আমার



পাষাণে মাথা ভাঙ্গিবেন। আমি দুর্বল স্ত্রীলোক হইয়া নির্মম পাষাণের মত তাহাদিগকে আঘাত দিয়া আসিয়াছি।

‘রাত্রি পোহাইয়া যায়, হয়! আর খোয়াই নদীর ঘাট দেখিতে পাইব না। বাড়ীর কাছে যে বিস্তৃত শালী ধানের মাঠ তাহা জন্মের মত দেখিয়া আসিয়াছি। প্রভাত হইলে আর তাহা দেখিব না। আমার পাড়াপড়শীদের ছেলেমেয়েরা রোজ প্রাতে বাড়ীর চৌদিকে কলরব করে, সেই মিষ্ট প্রিয়জনের স্বর আর শুনিতে পাইব না, রাত্রি প্রভাত হইলে আমাদের গাছগুলিতে নানাবর্ণের পাখীর গান করে, আজ প্রাতে আর তাহা শুনিব না, আমাদের বাড়ীর পূর্বে যে আকাশ রৌদ্রে ভাণিয়া উঠে, সেই প্রিয় আকাশ আজ প্রাতে আর দেখিতে পাইব না,—কত সাধে বাগান করিয়াছিলাম, সেই বাগানের ফুল ফোটা আজ প্রাতে আর দেখিব না—জন্মের মত বাড়ীঘর ও দেশের মায়া কাটাইয়া চির বিদায় লইয়া আসিয়াছি।’

‘রাত্রি না পোহালে দেখব খুয়া নদীর ঘাট।  
 রাত্রি না পোহালে দেখব শালী ধানের মাঠ॥  
 রাত্রি না পোহালে দেখব তোমার আমার বাড়ী।  
 রাত্রি না পোহালে দেখব পাড়ার নরনারী॥  
 রাত্রি না পোহালে শুনব অইনা পাখীর গান।  
 রাত্রি না পোহালে দেখব ভোরের আসমান॥  
 রাত্রি না পোহালে দেখব সেই না বাগের ফুল।  
 জন্মের মত ছাড়ি আইলাম মা বাপের কুল॥’

রাজপুত্র কাঞ্চনের পাশে বসিয়া তাকে সান্ত্বনা দিতে লাগিলেন, তাহার চোখের জল মুছাইয়া আদর করিয়া বলিলেন,—

‘না কাঁদ না কাঁদ কন্যা চিত্তে দেও ক্ষমা,  
 ঘর ছাড়ি বনচারী হ’লাম দুইজনা।’

‘আর কাঁদিও না, আমরা এক সূতায় গাঁথা দুটি বনফুলের মত হইলাম। তোমার আমার দুঃখ তোমার আমার মুখের দিকে চাহিয়া ভুলিব।

‘এ নদীর ঘাটে অনেক লোক দেখিতে পাইতেছি। আমরা অপর এক রাজার রাজ্যে আসিয়াছি।’

তাহারা অগ্রসর হইয়া এক বৃদ্ধ ধোপাকে দেখিতে পাইলেন। রাজপুত্র সেই ধোপাকে বলিলেন, ‘দেখ আমরা বড়ই দুরবস্থায় পড়িয়াছি, পিতা ক্রুদ্ধ হইয়া আমাদের তাড়াইয়া দিয়াছেন। তুমিই আমার ধর্মের বাপ, তুমি কি আমাদের আশ্রয় দিবে?’

বৃদ্ধ ধোপা সেই দুই জনের রূপ দেখিয়া চমৎকৃত হইল—

‘সূর্যের সমান পুরুষ, চাঁদের সমান নারী।  
 ইহারা হইবে কোন রাজার বিয়ারী॥’

বিশ্বয়ে ও ভয়ে ধোপা খানিকক্ষণ হতবুদ্ধি হইয়া রহিল, তারপরে বলিল,—‘আমার পুত্র কন্যা নাই, তোমরা আমার বাড়ীতে আসিয়া থাক, আমার স্ত্রী অদুনা ঘরে আছে, তাকে মা বলিয়া ডাকিও। তোমরা আমার পুত্র কন্যা হইবে। রাজার বাড়ীর কাপড় কাচিয়া খাই, তাহাতেই আমাদের দিন গুজরান হয়।’

রাজপুত্র বলিলেন, ‘আমিও ধোপার ছেলে, আমি তোমার কাপড় কাচিয়া দিতে পারিব। এই মেয়ে ঘরের সব কাজ জানে, আমরা সব বিষয়ে তোমাদিগকে সাহায্য করিতে পারিব এবং চিরকাল তোমার ঘরে থাকিয়া যাইব।’

### রুশ্বিণী

রাজকুমারী রুশ্বিণী তাহার এক পরিচারিকাকে বলিলেন, ‘এতদিন যাবৎ ধোপা কাপড় কাচিতেছে, কিন্তু এমন সুন্দর পাইট করা কাপড় কাচা তো কখনও দেখি নাই।’

পরিচারিকা বলিল, ‘তা বুঝি জান না, কিছু দিন হইল এক নূতন ধোপা আসিয়াছে, সে-ই এখন কাপড় কাচে।’

‘চাঁদের সমান রূপ দেখিতে সুন্দর।

এই ধোপা হইবে কোন রাজার কুমারী।’

‘তার সঙ্গে একটী তরুণী মেয়ে আসিয়াছে, তাহার সে পাগল-করা রূপ দেখিলে চোখ ফিরিতে চায় না। বর্ণ অতসী ফুলের মত ও মুখখানিতে কাঁচা সোণার দীপ্তি, মাথায় একরাশ চুল যেন চামর। যে তাহাকে দেখে সেই চমৎকৃত হয়।’

কুমারী রুশ্বিণী ধোপানীকে ডাকিয়ে পাঠাইলেন এবং তাহাকে বলিলেন, ‘হঠাৎ দৈবের কৃপায় নাকি তোমাদের আপনা হইতেই কন্যা-জামাই মিলিয়া গিয়াছে। কন্যাটী নাকি বড় সুন্দরী, একবার তাকে আমার কাছে পাঠাইয়া দিও, আমি তার সাথে সই পাতাইব।’

কাঞ্চন এইভাবে রাজকন্যা রুশ্বিণীর সখী হইল। সে অনেক সময় রাজবাড়ীতে থাকে এবং অতি ঘনিষ্ঠভাবে রুশ্বিণীর সঙ্গে কথাবার্তা বলে। উভয়ে উভয়কে প্রীতির চক্ষে দেখে এবং একদিন না দেখিলে পরস্পরের জন্য উতলা হইয়া পড়ে।

একদিন গুরু-গুরু মেঘ ডাকিতেছে ; দুপুর বেলা, কাঞ্চন রাজপুরীতে রুশ্বিণীর কক্ষে বসিয়া তাহার চুল আঁচড়াইয়া দিতেছে ; বর্ষার নূতন জলে কাঞ্চনের মনে পুরাতন ব্যথা জাগিয়াছে। সে নিবিষ্ট হইয়া তাহার বাল্যজীবনের কথা ভাবিতেছে। এমন সময় রাজকুমারী তাহাকে জিজ্ঞাসা করিলেন,—

‘কোথা বাড়ী কোথা ঘর কোথা মাতা পিতা।

কোথা হইতে কেন আইলা যাইবে বা কোথা।

মা ছাড়িলা বাপ ছাড়িলা নবীন বয়সে।

দেশ ছাড়িলা বাড়ী ছাড়িলা কোন্ কর্মদায়ে।’

‘অতি সুপুরুষ এক যুবক তোমার সঙ্গী, এই ব্যক্তিই বা কে? জোর করিয়া কি তোমাকে এই লোকটী লইয়া আসিয়াছে, না স্বৈচ্ছায় তুমি ইহাকে আত্মসমর্পণ করিয়া ঘরবাড়ী ছাড়িয়া চলিয়া আসিয়াছ?’

একে তো কাঞ্চনের মন দুঃখে ভরা—পূর্বস্মৃতিতে ভরপুর ছিল ; সে না ভাবিয়া না চিন্তিয়া সরলভাবে রুশ্বিণীর নিকট তাহার জীবনের সমস্ত কথা বলিয়া ফেলিল ।

রুশ্বিণীর মনে নূতন এক অনুভূতি জাগিয়া উঠিল । রাজকুমারের প্রতি দরদে তাঁহার মন ভরিয়া গেল । তাঁহার মন কুমারের রূপে মুগ্ধ হইল, রাজকন্যা ভাবিতে লাগিলেন, ‘রাজকুমার! এমন সুন্দর রূপ তোমার! তুমি কি দুর্ভাগ্যের ফলে জন্মিয়াছিলে যে একটা ধোপানীর জন্য এত কষ্ট সহিয়া আছ? তুমি যখন কাপড়ের বস্তা মাথায় করিয়া রাজবাড়ীতে আইস, তোমার কষ্ট দেখিয়া আমার কলিজা ফাটিয়া যায় ; আমি খিড়কীর পথে তোমার দিকে চাহিয়া থাকি ; তুমি ভ্রমর হইয়া জন্মিয়াছিলে, কর্মদোষে গোবরাপোকা হইয়া পড়িয়াছ!’

‘ভ্রমরা আছিল তুমি হৈলা গোবরিয়া ।’

এইরূপ ভাবিতে ভাবিতে রাজকুমারী রুশ্বিণী সত্যসত্যই একখানা চিঠি লিখিয়া কাপড়ের ভাঁজে রাখিয়া দিলেন । ধোপার ছদ্মবেশী রাজকুমার যথা সময়ে সে চিঠিখানি পাইলেন ।

রুশ্বিণী লিখিয়াছেন :—

‘প্রাণের বঁধু তোমায় চিনি বা না চিনি, আমি তোমার রূপ দেখিয়া পাগলিনী হইয়াছি । তুমি নিজেকে ভাঁড়াইয়া এই রাজার রাজ্যে বাস করিতেছ!’

‘আইল বসন্তকাল এই নব ফাল্গুন মাসে ।

কোকিলের কলরবে ফুলে জোয়ার আসে॥

আবীর লইয়া খেলে নাগর-নাগরী ।

এমনকালে কাপড় লৈয়া আইস রাজার বাড়ী॥

এক দণ্ড পাইতাম তোমায় কইতাম মনের কথা ।

সঙ্কেতে বুঝিয়া লৈবা রুশ্বিণীর মনের ব্যথা॥’

### ঋ বাসে গমন : ঋ তীক্ষ্ণা

একদিন রাজপুত্র কাঞ্চনকে বলিলেন, ‘বহুদিন একস্থানে থাকিয়া আমার মনটা কেমন করিতেছে, তুমি বলিলে আমি তিনটা মাস একটু ঘুরিয়া আসি । এই সময়টা এইখানে তুমি থাকিও, তিনমাস পরে আমরা আবার মিলিত হইব ।’ সরল কাঞ্চন না ভাবিয়া না চিন্তিয়া সম্মতি দিল ।

‘অত না ভাবিল কন্যা শত না ভাবিল ।

সরল হৃদয়ে কন্যা নাগরে বিদায় দিলা॥’

একমাস দুই মাস করিয়া তিন মাস গেল। একদিন রাজবাড়ী নানা আনন্দের বাজনার রবে পূর্ণ হইল ; ঢাক, ঢোল, বেণু, বীণা ও বাঁশীর রব বাতাসে ভাসিয়া আসিল। কাঞ্চন তাহার ধর্মমাতা অদুনাকে জিজ্ঞাসা করিল—‘রাজবাড়ীতে এই সকল বাদ্যভাণ্ড কিসের?’ অদুনা জানিয়া আসিয়া বলিল, ‘রাজকুমারী রুশ্বিণীর বিবাহ হইবে। ভিন্দদেশী এক রাজপুত্রের সঙ্গে তাহার বিবাহের কথাবার্তা ঠিক হইয়াছে।’

কাঞ্চন দিন গুণিতে আরম্ভ করিয়া দিল। তিন মাস অন্তে কুমার আসিবেন, এখন তো চার মাস অন্ত হইতে চলিল। পাঁচ মাসও গেল, ছয়মাস পরে কাঞ্চন খাওয়া ছাড়িল ; সাতমাস গেল, রাত্রে দিনে কাঞ্চনের চোখে ঘুম নাই। তারপর আশার আলো নিবু নিবু হইতে চলিল। দশমাসে আশার দশ কোঠায় শূন্য পড়িল। ক্রমে এক বছর অতীত হইল। কাঞ্চন কাঁদিয়া কাটিয়া তাহার ঘরের বাতি নিভাইয়া ফেলিল।

‘রাত্রিতে জ্বালাইয়া বাতি কাঁদিয়া নিভাইল।’

কাঞ্চন শোকে উন্মত্তা হইয়া নদীর তীরে ঘুরিয়া বেড়ায়, মনে মনে বলে, ‘হে নদী, তুমি কোন্ দূর দেশ হইতে আসিয়াছ, কোন্ দূর দেশে যাইবে—জানি না। হয়ত তুমি যে দেশে কুমার গিয়াছেন, তাহার সন্ধান পাইবে—অতি গোপনে তাঁহাকে আমার কথা বলিও, আমি যে কত দুঃখ পাইতেছি, তাহা তাঁহার কাণে কাণে বলিও।’

শত শত ডিঙ্গা নদী বহিয়া যায়—তাহাদের পাল হাওয়ার জোরে স্ফীত হইয়া নদীর ঢেউ কাটিয়া যায়। কাঞ্চন মনে ভাবে, ‘এই সকল ডিঙ্গায় যে সব বণিক আছেন, তাহাদের মধ্যে হয়ত কেহ রাজকুমারের সন্ধান জানেন। হয়ত আমার জন্য আমার বঁধু হীরামোতির ফুল আনিবেন, আমি অতি দুঃখিনী, আমি কৃতজ্ঞতায় ও স্নেহে গলিয়া যাইব, প্রতিদানে তাঁহাকে কি দিব? আমার আর কিছু নাই, এই দুঃখিনীর সম্বল দুটি চোখের জল—তাহাই মূল্য স্বরূপ দিব।’

‘আমার লাইগা আনবে বঁধু হীরা-মোতির ফুল।

দুই ফোটা চক্ষের জল দিব সে ফুলের মূল্য।’

তসিলদার : তমসা গাজি

রাজার তসিলদার সেই ধোপাকে ডাকিয়া গোপনে কহিল, ‘তোমার বাড়ীতে একটা সুন্দরী মেয়ে আছে, আমি তাহাকে চাই। প্রতিদানে আমি তোমাকে নগদ পাঁচ শত টাকা ও ঘরবাড়ী জমি দিব। যদি তুমি সম্মত না হও, তবে তো তুমি আমার প্রতাপ ভালরূপই জান, এ অঞ্চল আমার ভয়ে কম্পমান। তোমার ঘরবাড়ী জ্বালাইয়া সর্বনাশ করিব।’

বুড়ো ধোপা কাঁপিতে কাঁপিতে বাড়ীতে আসিয়া তাহার স্ত্রী অদুনাকে বলিল,— ‘কাঞ্চনকে আর কি করিয়া রাখা যায়। পরের মেয়ের জন্য আমরা কি এই বয়সে অপমৃত্যু মরিব?’

অদুনা চোখের জল মুছিতে মুছিতে কাঞ্চনের কাছে যাইয়া তাহাকে বলিল, ‘মা, তুমি এক বছর এইখানে আছ, আমরা এই সময়ের মধ্যে তোমাকে ভালরূপই চিনিয়া তোমার মায়ায় ঠেকিয়াছি। কিন্তু এখন উপায় নাই। এদেশের দুরন্ত তসিলদার কি করিয়া যেন তোমার সন্ধান পাইয়াছে, এখন আর রক্ষা নাই। আমি তোমার ধর্মের মা, তুমি সতী কন্যা ; আজ রাত্রের মধ্যে যদি তুমি আমাদের বাড়ী না ছাড়, তবে আমাদের সকলেরই ঘোর বিপদ। হে ঠাকুর! আজ রাত্রি আমাদের রক্ষা কর।’

পীরকান্দা গ্রামের তমসা গাজি তাহার পাঁচখানি ধান-বোঝাই জাহাজ লইয়া বাণিজ্য করে। উত্তর হইতে ধান ভাঙ্গাইয়া সে খোরাই নদীতে ভাগীদারের সঙ্গে চলিয়া যাইতেছিল। নদীর তীরে একটা ভাল জায়গা দেখিয়া সে পাঁচখানি ডিসি নোঙ্গর করিয়া ধান চালের হিসাব করিতেছে ও কোন্ স্থানে গেলে ব্যবসায় ভাল হইবে তাহার পরামর্শ করিতেছে, এমন সময় ভাগীদার জানাইল যে নদীর ঘাটে একটা অপূর্ব সুন্দরী কন্যা বসিয়া কাঁদিতেছে। তমসা গাজির কোন সন্তান ছিল না,—তাহার মন বাৎসল্যরসে ভরপুর ছিল। কন্যাটিকে সে যত্ন করিয়া তাহার ডিসিতে তুলিয়া আনিল।

তমসা গাজির বাড়ীতে কাঞ্চন দিনরাত গৃহকর্ম করে, যখন রাঁধিতে বসে, তখন দুই চক্ষের জলে তাহার শাড়ীর আঁচল ভিজিয়া যায়, উঠানে ঝাঁট দেওয়ার সময়ে সে শোকাকুল হইয়া অবসন্নভাবে পড়িয়া যায়, কখনও কখনও জল আনিতে নদীর ঘাটে যাইয়া অশ্রু দিয়া যেন বিনা সূতায় মালা গাঁথে। তাহার হাড়ভাঙ্গা খাটুনি দেখিয়া তমসা গাজি ও তাহার স্ত্রী তাহাকে এত পরিশ্রম করিতে নিষেধ করে ও তাহাকে কত সোহাগ ও মমতা দেয়, কিন্তু এই বিষণ্ণ প্রতিমা যে কি দুঃখে এরূপ কাতর থাকে, একবার হাসে না, কোন আমোদে যোগ দেয় না, কি দুঃখে যে সে এমন বিমনা হইয়া থাকে—তাহা তমসা গাজি অথবা তাহার স্ত্রী কিছুই বুঝিতে পারে না।

একদিন তমসা গাজি কাঞ্চনকে বলিল :—

‘বাণিজ্যে যাইব লো কন্যা মোরে দেও কইয়া।

কি চিজ আনিব আমি তোমার লাগিয়া॥

তুমি তো ধর্মের ঝি, আমরা বাপ মায়।

না পাইয়া পাইয়াছি ধন খোদার দোয়ায়॥’

কাঞ্চন কি আনিতে বলিবে? সে কাঁদিয়া আকুল হইল। সে যে রত্ন হারাইয়া পাগল হইয়াছে, তাহার কথা তো মুখ ফুটিয়া বলিতে পারে না!

ঠিক তিন মাস তের দিন অতীত হইলে গাজি বাণিজ্য করিয়া বাড়ীতে ফিরিয়া আসিল। সে দেশ-বিদেশ হইতে নানাদ্রব্য লইয়া আসিয়াছে ; কতকগুলি কৌটা ভরিয়া সে ঝিনুকের ফুল আনিয়াছে ; সমুদ্রের উপকূল হইতে সে কতকগুলি মোতির মালা সংগ্রহ করিয়াছে—কাঞ্চন তাহা যদি পরে, তবে তাহার মূর্তি দেখিয়া চক্ষু সার্থক করিবে। কাঞ্চনের জন্য অগ্নিপাটের শাড়ী আনিয়াছে—তাহার সুগৌরব কান্তিতে সেই শাড়ী খুব মানানসই হইবে। তাহার কোমরে পরিবার জন্য ঘুঙ্গুর আনিয়াছে, নাকের



‘বলাক’ (নোলক) পায়ের বাক-খাড়ু, ও ‘বেকী’ আনিয়াছে ; মধুর মাছি তাড়াইয়া রসপূর্ণ বড় বড় মোচাক গাজি মেয়েকে খাওয়াইবার জন্য সংগ্রহ করিয়াছে। সে দেশের উপাদেয় খাদ্য শূঁটকি মাছ বাদ পড়ে নাই, আঁটি বাঁধিয়া প্রচুর পরিমাণে তাহা ও অন্যান্য বিবিধ দ্রব্য সে ডিসা ভর্তি করিয়া বাড়ীতে লইয়া আসিয়াছে।

গাজি কি কি দেশে গিয়াছে, কোথায় কোথায় গিয়াছে, বিস্তারিতভাবে তাহা স্ত্রীর নিকট বর্ণনা করিল ; এক দেশে সে দেখিয়াছে, কি চমৎকার উলুছনের ঘর, তাহাতে কত কারিগরী। আর এক জায়গায় দেখিয়াছে, সেখানে লম্বা লম্বা গাছ, তাহাদের ‘মাথার উপর পানী’। সে দেশে পুরুষেরা রাঁধে বাড়ে এবং মেয়েরা হাল বায়, হাট বাজারে অবাধে মেয়েরাই বিকি-কিনি করে। কত নদীর তীরে মহিষের ‘বাথান’ দেখা গেল, ছড়াতে (নির্বারে) পড়িয়া হরিণগুলি জলপান করিতেছে :—

‘নদীর কিনারে দেখিলাম মহিষের বাথান।

ছড়াতে পড়িয়া হরিণ করে জলপান॥

পাহাড় পর্বত কত যাই ডিসাইয়া।

কত কত দূরের দেশ আইলাম দেখিয়া॥

কত কত নদী দেখিলাম তীরে ছুটে পানী।

কত কত দেখিলাম সাধুর তরণী॥

কত কত রাজার মলুক আইলাম দেখিয়া।

গৃহিণীর কাছে কথা কয় বিস্তারিয়া॥’

তারপর গাজি বলিল :—‘একখানে একটা মানুষ দেখিলাম, তাহার দুঃখে আমার প্রাণ গলিয়া গিয়াছে, তাহার কথা কিছতেই ভুলিতে পারিব না ; লোকটি একজন বুড়ো ধোপা। সে সে-দেশের রাজার বাড়ীর কাপড় কাচে ; অদূরে রাজপ্রাসাদ—তার এক পার্শ্বে সেই ধোপার কুঁড়ে ; সে জরাজীর্ণ, গায়ে কোন সামর্থ্যই নাই, চোখ দুইটি ঘোলা, খুব উচ্চ স্বরে কথা না বলিলে সে কাণে শুনিতে পায় না ; গায়ে একটুকু বল নাই, একদিনের কাজ সাত দিনে করে, দেখিলাম, সে এক একবার কাপড় কাচিতেছে ও পুনঃ পুনঃ বসিয়া পড়িতেছে ও তাহার বুক বাহিয়া চোখের জল পড়িতেছে। তাহার সেই দুঃখ দেখিয়া আমার বড় কষ্ট হইল, আমি নৌকা হইতে নামিয়া গিয়া তাহার কি দুঃখ জিজ্ঞাসা করিলাম। সে আমার দয়াদ্র কণ্ঠের স্বর শুনিতে পাইয়া হাউ মাউ করিয়া কাঁদিয়া উঠিল এবং বলিল—“ভগবান আমায় কেন বাঁচাইয়া রাখিয়াছেন জানি না, আমার মৃত্যুই মঙ্গল।”

‘তাহার পরে বলিল, “আমার পুত্র বা অন্য সন্তান নাই, একটা কন্যা ছিল, সে কুলটা হইয়া বাড়ী ছাড়িয়া গিয়াছে, আমার কলঙ্কিত জীবনকে ঘৃণা করিয়া সমাজ আমাকে জাতিচ্যুত করিয়াছে। মেয়েটি আমার চোখের মণি ছিল,—আমি কাণে শুনি না, চোখে দেখি না, আমার ক্লেদ নাই, তবু সে আমাকে ত্যাগ করিয়া চলিয়া গেল ; তবু তো দিনরাত তাহার শোকে আমার প্রাণ হহ করিয়া জ্বলে,” এই বলিয়া সে নদীর কূলে বসিয়া মা মা বলিয়া কাঁদিতে লাগিল, তাহার দুঃখ দেখিলে পাষণ্ডও বুঝি বিগলিত হইত।’

কাঞ্চন আর শুনিতে পারিল না, উচ্চঃস্বরে কাঁদিয়া গাজিকে বলিল—‘তুমি যাহাকে দেখিয়াছ সেই ধোপা আমার বাপ, আমিই তাহার কলঙ্কিনী কন্যা,—আমি তাহার বুকে বড় দাগা দিয়া ঘর ছাড়িয়া চলিয়া আসিয়াছি। তুমি আমার ধর্মের বাপ, আমাকে আমার বাবার কাছে লইয়া যাও, আমার বুকে দিন রাত্রি তুষের আগুন জ্বলিতেছে।’

### মিলন : শেষ দর্শন ও দেহত্যাগ

বৃদ্ধ ধোপা কন্যাকে বুকে জড়াইয়া ধরিয়া বলিল :—‘তোকে আর কি বলিব, শিশুকাল হইতে কত যত্নে কলিজার হাড়ের মত করিয়া পালিয়াছি ; সেই কন্যা এত নির্মম হইলি, আমাদের ছাড়িয়া চলিয়া গেলি। তোর শোক তোর মাতা সহ্য করিতে পারিল না, ঐ খোরাই নদীর শ্মশানঘাটে সে চিরতরে শয়ন করিয়া আছে।’

‘এই ঘাটে কাপড় ধুই চক্ষু বহে পানী।

কন্যা হইয়া হইলা তুমি নিদয়া পাষণী॥’

কাঞ্চন পিতার বুকে মুখ লইয়া কাঁদিয়া তাহার দুঃখের কাহিনী শুনাইল, কন্যার হৃদয়ের ব্যথা পিতার মন বিদীর্ণ করিল। রাজার বাড়ীর সংবাদ কাঞ্চন পিতার মুখেই শুনিতে পাইল। রাজপুত্র এক রাজকন্যা বিবাহ করিয়া পরম সুখে জীবন যাপন করিতেছে। বিবাহ করিয়া সে সুখী হইয়াছে, একদিনও কাঞ্চনের কথা মনে করে না।

কাঞ্চনের মস্তকে যেন বাজ ভাঙ্গিয়া পড়িল। বৃদ্ধ ধোপা তাহার দুঃখ বুঝিতে পারিল এবং অতিশয় দুঃখার্ত স্বরে বলিল :—

‘বড়র সঙ্গে ছোটর প্রীতি হয় অঘটন।

উঁচা গাছে উঠলে যেমন পড়িয়া মরণ॥

জমি ছাড়িয়া পা দিলে শূন্য না সহে ভর।

হিয়ার মাংস কাইটা দিলে আপনা না হয় পর॥

মেঘের সঙ্গে চাঁদের প্রীতি কতকাল রয়।

ক্ষণে দেখি অন্ধকার ক্ষণেক উদয়॥

কুলোকের সঙ্গে প্রীতি শেষে জ্বালা ঘটে।

জিহ্বার সঙ্গে দাঁতের প্রীতি সুবিধা পাইলে কাটে॥

না বুঝিয়া না শুনিয়া আগুনে হাত দিলে।

কর্মদোষে অভাগিনী আপনি মরিলে॥’

বৃদ্ধ বলিল—‘প্রীতি (পীরিত) দোষের জিনিস নহে। এক প্রেমে মানুষ বাঁচে, অন্য প্রেমে মৃত্যু ঘটে। চোখের কাজল কি সুন্দর, কিন্তু অস্থানে পড়িলে তাহার নাম হয় কালি। “চোখের কাজল কন্যা ঠাঁই গুণেতে কালি।” অস্থানে প্রেম অর্পণ করিলে তাহা কলঙ্কের কারণ হয়।’

‘শিরেতে বাঁধিয়া লইলে কলঙ্কের ডালি ।  
বাপে কাঁদে খিয়ে কাঁদে গলা ধরাধরি॥’

কিন্তু কাঞ্চন যে বাড়ী ফিরিয়াছে, তাহা কেহ জানে না। সকলে বলে, এক পাগলী রাস্তা, গাছতলা, নদীর পার ও হাট ঘাট ঘুরিয়া বেড়ায়, তাহার কোথায় বাস, কি করে কিছুই জানা নাই। হঠাৎ ঘূর্ণিবায়ু যেমন ধূলি উড়াইয়া লইয়া যায়, এই নারী তেমনই কিছুকাল একস্থানে থাকিয়া ছুটিয়া অন্যত্র যায়।

‘গাছের তলা নদীর পারে এই আছে এই নাই’ ; কখন বিনা কারণে কাদে, তখনও হাসে, কখন করতালি দিয়া গান গায়।

একদিন সকলে দেখিল যে সে রাজ-অন্তঃপুরে ঢুকিল ; পালঙ্কে রুক্ষিণী বসিয়া ছিল, খানিক স্থির দৃষ্টিতে তাহার দিকে চাহিয়া রহিল। বাহিরে আসিয়া দেখিল, রাজকুমার দরবারে আসীন, তাহার রূপ চাঁদের মতন আরো বেশী ঝলমল করিতেছে। সেইখানে কয়েক মুহূর্ত দাঁড়াইয়া পাগলী চলিয়া গেল। কোথায় সে গেল, আর কেহ জানে না, তদবধি তাহাকে সে রাজ্যে আর কেহ দেখিতে পাইল না।

রাজবাড়ী হইতে বাহির হইয়া সে ছুটিয়া নদীর পারে গেল। কাঞ্চন নদীর পারে আসিয়া নিজ মনে বলিয়া যাইতে লাগিল—

‘আমি তোমার জন্য এতদিন বাঁচিয়াছিলাম, সে সাধ আজ মিটিয়াছে, তোমাকে চক্ষু ভরিয়া দেখিয়া লইয়াছি। তোমার সুন্দরী স্ত্রী লইয়া আজন্ম সুখে থাক, চিরকাল সুখে গৃহে বাস কর, এই আমার প্রার্থনা :—

‘না লইও না লইও বঁধু কাঞ্চনমালার নাম ।  
তোমার চরণে আমার শতেক পরণাম॥’

‘নদীর এই ঘাটে পাতার বিছানায় তোমাকে পাইয়াছিলাম, সুখে দুজনে কত রজনী যাপন করিয়াছি। তুমি সে সকল দিনের বথা মনে করিও না,—তখন যে উভয়ে উভয়ের জন্য নিবিষ্ট হইয়া মালা গাঁথিতাম—সে সকল দিনের কথা একবারে ভুলিয়া যাও। সারারাত জাগিয়া আমি তোমার বাঁশীর গানে বিভোর হইয়া থাকিতাম। সে সকল দিনের কথা স্মরণ করিও না। অভাগিনীর সকল কথা ভুলিয়া যাও।’

নদীতীরে বসিয়া কাঞ্চন বলিল, ‘নদী! নদী! আমি তোমার ক্রোড়ে স্থান পাইতে আসিয়াছি। আমি যে মরিতেছি তাহা যেন কেহ জানে না, তোমার চেউগুলি যেন কাঁদিয়া কাঁদিয়া সে কথা প্রচার না করে। হে টুনটুনি পাখী, নদীর চরার হলদে পাখী, তোমরা আকাশে উড়িয়া আমার মৃত্যুর কথা কাহাকেও বলিও না। হে আকাশব্যাপী বাতাস, জলস্থলের সকল কথা তুমি জান, আমার কলঙ্কের কথা তুমি সবই জান, কাহারও কানে কানে আমার মৃত্যুর কথা বলিও না, তুমি রাত্রির সাক্ষী, দিনেরও সাক্ষী, সকলই তুমি জান, আমার মৃত্যুর কথা গোপন রাখিও।’

‘দেশের লোকে যেন নাহি জানে আমার মরণ-কথা ।  
কি জানি শুনিলে বঁধু পাইবে মনে ব্যথা॥’

পিতার উদ্দেশে কাঞ্চন মনে মনে প্রণাম জানাইয়া বলিল—‘আমি যে দেশে ফিরিয়াছি সেই কথা কাহাকেও বলিও না। কলঙ্কিনীর নাম মন হইতে মুছিয়া ফেল।’ চন্দ্রতারা, পশু-পক্ষী সকলকে ডাকিয়া কাঞ্চন তাহার মৃত্যুর কথা গোপন করিতে অনুরোধ জানাইল।

রাত্রি নিথর, নিবুম—নদী নীরবে সমুদ্রের দিকে চলিয়াছে। তারকারা নিষ্পন্দ নিশ্চল চোখে সংসারের দিকে চাহিয়া আছে—শেষবার কাঞ্চন নদীকে প্রণতি জানাইয়া বলিল :—

‘কোন দেশ হইতে আসিছ টেউ যাইবা কোথাকারে।

আমারে ভাসাইয়া নেও দুস্তর সাগরে॥

...

...

তারা হৈল নিমি বিমি রাত্র নিশাকালে।

ঝাঁপ দিয়া পড়ে কন্যা সেই না নদীর জলে॥’

### আলোচনা

কাঞ্চনমালা যে যুগের রচনা, তাহা চণ্ডীদাস-যুগকে স্বরণ করাইয়া দেয়। সে সময় বঙ্গদেশে সহজিয়া তান্ত্রিক অনুষ্ঠানের ঢেউ চলিতেছিল। সহজিয়াদের প্রেম-রাজ্যে নাপিতবধু, ধোপানী ও বাঙ্গলার অপরাপর নিম্নশ্রেণীর মেয়েদের সঙ্গে প্রেমের অনুষ্ঠানের বিধি আছে। এই যুগের পল্লীগীতগুলিতে বড়লোকের সঙ্গে নিম্নশ্রেণীর মেয়েদের ভাবের আদানপ্রদানের কথা প্রায়ই পাওয়া যায়। শ্যামরায়ের গান, মহুয়া, আঁধাবঁধু প্রভৃতি কতকগুলি পল্লীগীতি এই ভাবের। এটা একটা বিশেষ উল্লেখযোগ্য কথা যে—এই আদর্শে যে সকল গীতি রচিত হইয়াছে, তাহার সকলগুলির ভাব ও ভাষার সঙ্গে চণ্ডীদাসের পদাবলীর সাদৃশ্য আছে। সে সকল কথা এখানে লিখিতে যাওয়া ঠিক স্থানোচিত হইবে না। পূর্ববঙ্গ-গীতিকায় আমি এ সকল বিষয়ের কতকটা সবিস্তার উল্লেখ করিয়াছি।

যে সকল গল্প এই ভাবে সমাজ-সাম্যের অনুকূল, তাহা ত্রয়োদশ হইতে পঞ্চদশ শতাব্দীর মধ্যে রচিত হইয়াছিল বলিয়া মনে হয়। ভাব ও ভাষার দ্বারা এই সিদ্ধান্ত সমর্থিত হয়।

কিন্তু সহজিয়া ও তান্ত্রিক অনুষ্ঠানে যে সকল জটিল বিধান পাওয়া যায়, পল্লীর গান—সে সমস্ত হইতে নায়ক-নায়িকাদিগকে মুক্ত করিয়া লইয়াছে। কোন তত্ত্বকথার বাহানা নাই, কোন পারিভাষিক বা দোহার দুর্বোধ্য সূত্রের বালাই নাই—এই সকল গল্পের নায়ক-নায়িকা প্রকৃতির সহজ পথে বিকাশ পাইয়াছে—যে ভাবে ফুল ফুটিয়া উঠে, লতা মুঞ্জরিত হয় ও কোকিলের স্বরে বায়ুমণ্ডল মুখরিত হয়। এখানে ‘গুরু’র উপদেশের জন্য প্রতীক্ষা নাই, পর পর ভালবাসা কি কি সূত্র আশ্রয় করিয়া স্তরে স্তরে উন্নত কোন ধর্মের আদর্শে পৌছিবে তাহার বিবৃতি নাই। অথচ সহজিয়াদের সর্বস্ব-দেওয়া প্রেমের হাওয়া যে ইহাদের মধ্যে

বহিয়া নিষ্কলুষ প্রেমকে মূর্তিময়ী হ্রাদিনীশক্তিতে পরিণত করিয়াছে, তাহা অতি স্পষ্ট কথায় বোঝা যায়।

এই চিত্রের প্রধান চরিত্র কাঞ্চন যৌবনের সারধর্ম প্রেম বুঝিয়াছিল, অথচ সে এবং তাহার প্রণয়ী যে সামাজিক বিধানানুসারে পাণ্ডক্ত্যে নহে, তাহা কাঞ্চন যতটা বুঝিয়াছিল— তাহা তাহার পূর্বানুভূতির হ্রদে হ্রদে দেখিতে পাওয়া যায়। সে হৃদয়ের সঙ্গে দূরন্ত সংগ্রাম চালাইয়া দ্বিধাকম্পিত চরণে অগ্রসর হইয়াছে—এবং সহজে ধরা দেয় নাই। পরিণামের চিন্তা তাহার ভাবের দ্রুত গতিকে মত্ত করিয়াছিল—কিন্তু এরূপ ক্ষেত্রে হৃদয়ের সঙ্গে যুদ্ধ করিয়া কেহ জয়ী হইতে পারে না। কাঞ্চন যখন পালাইয়া আসিল, তখনও ভাবী বিপদের আশঙ্কা তাহার মনের ভিতর লুক্কায়িত ছিল। সুখের নির্মল পল্লী-জীবন তাহার হৃদয়ে একখানি স্বর্ণপটের মত আঁকা ছিল; আর সে দিগন্তে বিলীন শালীধানের ক্ষেত, তাহাদের গৃহ-তরুগণের শ্যামল শোভা ও তদবকাশে দৃষ্ট আকাশের নীলিমা ও প্রতিবাসী প্রিয়জনদের মুখ সে দেখিতে পাইবে না—এই দুঃখে হৃদয় বিদীর্ণ হইতেছিল। রাজকুমার তাহাকে অনেক প্রবোধ দিয়াছিলেন, কিন্তু তাহার প্রাণ রহিয়া রহিয়া কাঁদিয়া উঠিয়াছিল।

এত ভালবাসার যে ভীষণ প্রতিদান সে পাইল, তাহার সরল প্রাণ তজ্জন্য একেবারেই প্রস্তুত ছিল না। তিন মাসের পরিবর্তে সে এক বৎসর প্রতীক্ষা করিয়াছিল, তথাপি সে আশা ছাড়িতে পারে নাই, মোহিনী আশার আকর্ষণ এত বেশী! এক বৎসর পরেও সে নদীতীরে বসিয়া ভাবিয়াছিল, কুমার তাহার জন্য হীরামোতির ফুল আনিবেন, সে দরিদ্র অভাগিনী, সেই উপহারের কি মূল্য দিবে? সে তাহার দুটী চক্ষের জল দিয়া সেই হীরামোতির ফুল গ্রহণ করিবে।

তাহার এত আশা এত ভরসার পরে ত্রয়োদশ মাসের পরেও যখন কুমার আসিলেন না, তখন কাঁদিয়া কাটিয়া ঘরের বাতি সে ফুঁ দিয়া নিবাইল। আর প্রতীক্ষার অবকাশ নাই।

কুমার বা কুমারের চিন্তা ছাড়া তার আর সংসারে কোন আকর্ষণ ছিল না, কুমার সুখী হইয়াছেন, ইহা জানিয়া সে নিশ্চিন্ত মনে প্রাণত্যাগ করিতে প্রস্তুত হইল। এই মহাদুঃখ ও পরকৃত মহা অত্যাচারের মধ্যেও সে একবার কুমারের নিষ্ঠুরতার কথা,— রুশ্বিণীর বিশ্বাসঘাতকতার কথা একবারও উচ্চারণ করে নাই। শুধু কুমারের জন্য নহে, রুশ্বিণীর জন্যও সে শুভকামনা করিয়া ভালবাসার যজ্ঞে প্রাণ আহুতি দিয়াছে। নদীর কূলে পাতার বিছানা তৈরী করিয়া যে স্থানে রাজকুমারকে অভ্যর্থনা করিয়াছে, সেই চিহ্ন দেখিতে দেখিতে সজল চক্ষে সে সংসার হইতে বিদায় নিল; মৃত্যুকালে সে চরাচরের জীব-জন্তু সকলকে মিনতি করিয়া সাবধান করিয়া গেল—যেন তাহার মৃত্যুকথা কেহ প্রচার না করে। সে নীরবে প্রেমের জন্য চূড়ান্ত আত্মত্যাগ দেখাইতে জগতে আসিয়াছিল,—সে প্রেমের মধ্যে কোন অভিযোগ, অদৃষ্টের প্রতি দ্বিধার কিম্বা পরের প্রতি বিরূপ ভাব ছিল না; তাহার প্রেমভিনয় একান্তই নীরব ছিল, এবং নীরবে সে কাহাকেও মৃত্যুর জন্য দোষী না করিয়া বিদায় লইয়া চলিয়া গেল। সে এই মৃত্যুকথা গোপন করিতে সকলকে বলিয়া গেল কেন—তাহা একটী কথায় সে বলিয়া গেল। প্রকৃত ভালবাসায় সংশয়ের স্থান নাই, সে জানিত তাহার এত ভালবাসার ফল অবশ্যই

ফলিবে, কুমার কোন না কোন সময় অনুতপ্ত হইবেন, কিন্তু কাঞ্চন রাজকুমারের মনে এতটুকু দুঃখ হয় ইহা চায় না :—

‘কি জানি শুনিলে বঁধু পাইবে মনে ব্যথা।’

এই ছত্র অমূল্য। এত যে নিষ্ঠুর, তাহার প্রতিও কাঞ্চনের কতখানি দরদ! কতখানি বিশ্বাস!

এই স্বর্ণপ্রতিমাকে সমাজের দিক দিয়া এমন কি নিজের স্বগণের দিক দিয়া, কুল-শীল-মান-ধর্ম এ সকলের দিক দিয়া বিচার করিলে তাহা অবিচার হইবে। একটী মাত্র মানদণ্ডে তাহার বিচার হইতে পারে, তাহা শুধু অমিশ্র ও বিশুদ্ধ প্রেমের মাপকাঠি। সে দিক দিয়া সে একবারে নিখুঁত, একটী চন্ম আদর্শ। বাঙ্গলা দেশ, যেখানে চৈতন্য জন্মগ্রহণ করিয়াছিলেন—সেখানে যে প্রেমের সর্বোচ্চ আদর্শ খেলিয়াছে, তাহা অন্যত্র সুদূর্বল। কাঞ্চনের জোড়া অন্য কোন দেশের সাহিত্যে আছে কিনা, তাহা বলিতে পারি না।

একালে যাহারা যুদ্ধজয় করে, পরকে হত্যা করিবার নানা বৈজ্ঞানিক অভিসন্ধি উদ্ভাবন করে, যুদ্ধে আহতদিগের গুশ্রা করে, তাহাদেরই টি টি নাম। কাঞ্চনের মত আত্মত্যাগের চিত্র—এখন যবনিকার অন্তরালে। কিন্তু হয়ত দু্যলোকে ভুলোকে প্রচুর রক্তবর্ষণের পর—মানুষের রক্তপিপাসা যখন মিটিয়া যাইবে,—যখন পুনরায় দয়ামায়া ত্যাগ প্রভৃতি মহৎ গুণের জন্য আত্মা লালায়িত হইবে, তখন বঙ্গদেশের এই প্রেমের আদর্শগুলি দরে বিকাইবে, জগতের চিত্রশালায় শ্রেষ্ঠ নর-নারীদের পঙ্কজিতে আসন গ্রহণ করিবে। তখন একটী নিঃস্বার্থ অশ্রুর দাম গুণবেত্তার নিকট দশটী ‘ফটি পাউন্ডার’ অপেক্ষা অধিক আদরের জিনিস হইবে।

গল্পগুলি খুব সংক্ষিপ্ত। পল্লীকবির বাজে কথা জানে না, যেটুকু বলা দরকার, তাহার অতিরিক্ত কথা দ্বারা তাহারা গল্প পল্লবিত করে না। তমসা গাজির যে ছবি কবি দুই-একটী রেখায় আঁকিয়াছেন—তাহা কেমন জীবন্ত! সেকালের বাণিজ্য, মেয়েদের গহনা, খেলার জিনিস, এমন কি পল্লীবাসীরা মধুর চাক ভাঙ্গিয়া তাহা কি আনন্দে খাইত, তাহার বর্ণনা কি চমৎকার! যে দেশে নারিকেল জানা নাই, তাহারা সে গাছ দেখিয়া এবং তাহার মাথার উপর ফলে জলের সঞ্চয় দেখিয়া কিরূপ আনন্দিত হয়—যে দেশে বাথানে মহিষ চরিয়া বেড়ায় এবং পাহাড়ের গাত্র-নিঃসৃত ছড়া হইতে বড় বড় চোখ বিস্তার করিয়া হরিণ জল পান করে, যে দেশে ধান ভাঙ্গিয়া চাউল করিয়া উত্তর দেশ হইতে শত শত বৃহৎ ডিস্কি দক্ষিণ দেশের উপত্যকায় চলাফেরা করে—সেই সকল দেশের কথা—কবি চিত্রকরের মত দুই-একটী রেখার টানে কেমন সুন্দরভাবে আঁকিয়াছেন! তমসা গাজির বাড়ীতে কবি অতি কৌশলে কাঞ্চনের পিতার কথা প্রসঙ্গক্রমে উল্লেখ করিয়া সেই দৃশ্যটী করুণ রসে প্লাবিত করিয়া ফেলিয়াছেন। কাঞ্চনের প্রতি তাহার পিতার উপদেশগুলি হ্যামলেট নাটকের পলোনিয়াসের উক্তি মত, কতকগুলি সাংসারিক জীবনের অভিজ্ঞতাসূচক নীতি-কথা। কিন্তু কাঞ্চনের পিতার উপদেশগুলি বেশী সারগর্ভ, এবং তাহাতে পলোনিয়াসের বাক্যপল্লবতা নাই।

## চন্দ্রাবতী

জয়চন্দ্র ও চন্দ্রা : কৈশোরে

অদূরে ফুল্লেশ্বরী নদী বহিয়া যাইতেছে ; পাড়ুড়িয়া পল্লী নদীর ধারে একখানি ছবির মত দাঁড়াইয়া আছে। এই পল্লীতে অনেক ব্রাহ্মণের বাস, সেইখানে একটা পুকুরের চারধারে ফুলের বাগান, কত নাগেশ্বর, কুন্দ, জবা, মালতী ও চাঁপা ফুটিয়া আছে,—অতি প্রত্যাশে একটা মেয়ে ও একটা তরুণ যুবক সেই পুকুরপাড়ে ফুল তুলিতে আসে। একদিন সুন্দরী কুমারী বালককে জিজ্ঞাসা করিল, 'কে তুমি? তুমি তো আমাদের গাঁয়ের লোক নও, তুমি রোজ আসিয়া ডাল ভাজ ও সকল ফুল তুলিয়া লইয়া যাও।' জয়চন্দ্র বলিল 'আমি তোমার গাঁয়ের কেহ নহি, কিন্তু আমি দূরের লোক নহি। তোমার গ্রাম ও আমাদের গ্রাম—এই নদীর দুই পারে।'

দুইজনে আবার নীরবে ফুল তুলিতে লাগিল ; চন্দ্রার সাজি জবা ফুল, গান্ধা, মল্লিকা ও মালতীতে ভর্তি হইয়া যায় ; ক্রমশঃ তাহাদের আলাপ একটু ঘনিষ্ঠ হইল, যে-সকল ফুলগাছের ডাল উঁচু, চন্দ্রা হাতে পায় না, তাহা জয়চন্দ্র নোয়াইয়া ধরে এবং চন্দ্রা অনায়াসে ফুল পাড়িয়া লইয়া যায়।

'ডাল যে নোয়াইয়া ধরে জয়চন্দ্র সাথী।'

একদিন চন্দ্রা একটা ফুলের মালা জয়চন্দ্রের গলায় পরাইয়া দিল এবং সেই হইতে চন্দ্রা রোজই একটা করিয়া মালতীর মালা গাঁথিয়া জয়চন্দ্রকে উপহার দেয়। চন্দ্রাবতীর পিতা বংশীদার রোজ রোজ চন্দ্রার তোলা ফুলে শিব পূজা করেন।

একদিন চোখের জলে সিক্ত করিয়া জয়চন্দ্র চন্দ্রাকে পুষ্পপত্রে অতি সংক্ষেপে একখানি চিঠি লিখিল, তাহাতে তাহার মনের কথা তাহাকে জানাইল :—'আমি তোমার রূপে মুগ্ধ হইয়াছি, এইখানে ফুল তুলিতে আসি তোমার সঙ্গলাভের জন্য ; তুমি চলিয়া গেলে এই ফুলের বাগান আমার চোখে আঁধার হইয়া যায়।

'পুষ্পবন অন্ধকার তুমি চলে গেলে।'

'তোমার গাঁথা মালা হাতে লইয়া যে আমি সারাদিন কাঁদিয়া কাটাই, তাহা তুমি জান না। আমার মাতা পিতা নাই, আমার বাড়ীতে থাকি। যদি তোমার সদয় উত্তর পাই, তবেই আমি এ অঞ্চলে থাকিব, নতুবা চিরকালের জন্য তোমার নিকট বিদায় লইয়া দূরদেশে চলিয়া যাইব।'





পরদিন প্রাতে মেঘের উপর তরুণ সূর্যের ঝিকিমিকি খেলিতেছে। অরুণ ঠাকুরের গায়ে হলুদ-মাখানো রঙের মত আজ তাহাকে দেখাইতেছে। চন্দ্রার শয্যা হইতে উঠিতে একটু দেরী হইয়া গিয়াছে, সে তাড়াতাড়ি ফুলের বাগানে আসিয়া সর্বপ্রথম কতকগুলি জবা ও অপরাপর ফুল তুলিল, সেগুলি তাহার পিতার শিব পূজার জন্য; তারপর একটী মালতী ফুলের মালা গাঁথিয়া শেষ করিয়াছে, এমন সময় জয়চন্দ্র আসিয়া তাহার হাতে পুষ্পপত্রে লেখা চিঠিখানি দিল, জয়চন্দ্র বলিল 'চন্দ্রা একটু অপেক্ষা কর, আমার দুটী কথা বলিবার আছে।' কিন্তু বালিকা বলিল, 'আজ বেলা হইয়া গিয়াছে,—পিতার শিবপূজার দেরী হইয়া যাইবে, আজ আমি ঘরে যাই।' এই বলিয়া সে জয়চন্দ্রের লেখা চিঠিখানি নিজের আঁচলের কোণে বাঁধিয়া লইয়া চলিয়া গেল।

‘পুষ্পপত্র বাঁধি কন্যা আপন অঞ্চলে।  
দেবের মন্দির কন্যা ধোয় গঙ্গাজলে॥  
সম্মুখে রাখিল কন্যা দেবের আসন।  
ঘষিয়া লইল কন্যা সুগন্ধি চন্দন॥’

তারপর শিব পূজার ফুল পুষ্পপাত্রে রাখিয়া দিল। বংশীদাস পূজা করিতে আসিয়া আসনে বসিলেন। তাঁহার দেহ স্থির, অকম্পিত, মন একাগ্র। তাঁহার মনের প্রধান কামনা তিনি দেবতার নিকট নিবেদন করিলেন। একাগ্রচিত্তে শিবের কাছে তাঁহার অতীষ্ট বর প্রার্থনা করিলেন। প্রথম পুষ্পটী অর্পণ করার সময় প্রাণমনে জানাইলেন, ‘আমি নিঃসহায় সঙ্গতিশূন্য ব্রাহ্মণ, আমি কেমন করিয়া কন্যাটীর বিবাহ দিব?’

‘এত বড় হৈল কন্যা না মিলিল বর।  
কন্যার মঙ্গল কর অনাদি শঙ্কর॥  
বনফুলে মন-ফুলে পূজিব তোমায়।  
বর দিয়া পশুপতি ঘৃণাও কন্যাদায়॥  
সম্মুখে সুন্দরী কন্যা আমি যে কাঙ্গাল।  
সহায় সঙ্গতি নাই দরিদ্রের হাল॥’

প্রথম পুষ্প শিবের চরণে অর্পণ করিয়া বলিলেন, ‘দেব! আজই যেন ভাল বরের প্রস্তাব লইয়া ঘটক আমার বাড়ীতে আইসে।’

দ্বিতীয় পুষ্প অর্পণ করিয়া এই বর যাচ্ছা করিলেন, ‘যেন বর পুরন্দরের মত প্রতাপশালী হয়।’

তৃতীয় পুষ্প আরাধ্যের পদে অর্পণ করিয়া বলিলেন, ‘আমার বংশ উজ্জ্বল, বর যেন এই ভট্টাচার্য বংশের যৌগ্য হয়, তাহার কুলশীল যেন দীপ্তিমান হয়।’

তারপর সাষ্টাঙ্গে ভূতলে লুটাইয়া করযোড়ে এই প্রার্থনা করিলেন, ‘দেবাদিদেব—আমার কন্যার যেন ভাল বরে ভাল ঘরে বিবাহ হয়।’

পিতার পূজার আয়োজন করিয়া দিয়া চন্দ্রাবতী নিজের ঘরে আসিয়া জয়চন্দ্রের পত্রখানি খুলিল। পত্র পড়িয়া তাহার চক্ষু হইতে জল পড়িতে লাগিল। ‘ছোটকাল হইতে তোমার সঙ্গে একত্র খেলা করি, তোমায় দেখিতে ভালবাসি, বেশ সুখেই ত ছিলাম, তুমি এ ভাবে পত্র লিখিলে কেন? আমার যে কত লজ্জা হইতেছে, তাহা কি বলিব।’ সে অতি সাবধানে দুটী ছত্রে পত্রের উত্তর লিখিল :—

‘ঘরে মোর আছে বাপ আমি কিবা জানি।

আমি কেমনে দেই উত্তর অবলা রমণী॥

তাহার মনের কথা কিছুই বলা হইল না, শত কথা গোপন করিয়া ঐ দুটী মাত্র ছত্রে উত্তর দিল।

‘যত না মনের কথা রাখিল গোপনে।

পত্রখানি লিখে কন্যা অতি সাবধানে॥’

কিন্তু সে কথা পত্রে ফুটিল না। নিজ কক্ষে বসিয়া তাহার আরাধ্য দেবাদিদেব মহাদেবের নিকট সে করযোড়ে বলিল :—জয়চন্দ্রকে আমার স্বামী করিয়া দাও, আমার কোন দুঃখই দুঃখ বলিয়া মনে হইবে না, আমার জন্য সার্থক হইবে, জীবন ধন্য হইবে।’ চন্দ্রসূর্যকে সাক্ষী করিয়া বলিল, ‘হে রাত্রি ও দিনের ঠাকুর। তোমাদের অগোচর কিছুই নাই। জয়চন্দ্র ভিন্ন আমি কাহারও গলে মালা দিব না, আমায় আশীর্বাদ কর, যেন আমার মনের বাসনা পূর্ণ হয়।’

কিন্তু মনে মনে যাহাই প্রার্থনা করুক, জয়চন্দ্রের পত্রখানি পাওয়ার পর হইতে তাহার হৃদয়ে একটা দারুণ লজ্জার ভাব আসিল। সে আর ফুল তুলিতে পুকুরঘাটের উদ্যানে যাইতে পারিল না ; তাহার দ্বিধাকম্পিত পদদ্বয় ঘরের বাহির হইতে কুণ্ঠা বোধ করিতে লাগিল। সে লজ্জায় আর চক্ষু মেলিয়া সরল দৃষ্টিতে এদিক ওদিক চাহিতে পারে না—কি জানি পাছে জয়চন্দ্রকে দেখিয়া ফেলে। অতিশয় লজ্জা যেন তাহাকে ঘিরিয়া ধরিল।

তদবধি সে পুকুরঘাটে আর যায় না, বাড়ীর আঙ্গিনার পূর্ব দিকে যে সকল নাগেশ্বর ও চাঁপা ফোটে তাহাই দিয়া সে পিতার পূজার ব্যবস্থা করে, আর ঘরের পাছে একটা টকটকে লাল জবা ফুলের গাছ আছে, সেই গাছটার অঙ্গুর দানে তাহার তাম্রকুণ্ড পূর্ণ হয়।

কিন্তু যদিও একটা কুঁড়ির মত লজ্জাশীলা, তথাপি তাহার প্রেম গভীর ও আকৃতিপূর্ণ। সে মনে মনে বলে, ‘এই যে বাড়ীর মালতী ফুলের গাছটা, ইহারই ফুলে আমি রোজ রোজ মালা গাঁথিয়া তোমার উদ্দেশে তাহা বায়ুর স্রোতে ভাসাইয়া দিব। এই জবা ফুলগুলি ফুটিয়া লাল হইয়া আছে, বাবা যেমন এই ফুল দিয়া শিব পূজা করেন, আমি তেমনই জবা ফুলে তোমাকে পূজা করিব। আর কি সুন্দর ওই মল্লিকা ও কেয়া ফুল—ইহাদিগকে সাক্ষী করিয়া আমি প্রার্থনা করিতেছি, জন্মে জন্মে যেন জয়চন্দ্রকে আমি পতিরূপে পাই।’

আর জয়চন্দ্রের সঙ্গে দিনে একবারও দেখা হয় না। কিন্তু চন্দ্রার মানসপটে সে জয়চন্দ্রকে আঁকিয়া রাখিয়াছে, তাহা মুছিয়া ফেলিবার নহে, সুখে-দুঃখে, আশা-উৎকণ্ঠায় সে চোখের জলে সেই স্মৃতির তর্পণ করে।

## বিবাহের উদ্যোগ

ইহার মধ্যে বংশীদাসের বাড়ী একদিন এক ঘটক চন্দ্রাবতীর বিবাহের একটা প্রস্তাব লইয়া আসিল। সে বংশী ভট্টাচার্যকে বলিল, ‘আপনার কুল নির্মল, চন্দ্রের মত—এদেশে আপনার বংশের ন্যায় আর দ্বিতীয়টি নাই। আপনার কন্যা শুনিয়াছি, রূপে গুণে ধন্যা, বিদ্যাধরীর মত সে সুন্দরী। শুনিয়াছি তাহার বিবাহের যোগ্য বয়স হইয়াছে। আপনি আমাকে অনুমতি দিন, এই বিবাহের আমি ঘটকালি করি।’

বংশী বলিলেন, ‘অবশ্য কোন বর আপনার মনে আছে, বলুন না সে কে? তাহার পরিচয় দিন।’ ঘটক বলিল—‘আপনি ঠিকই অনুমান করিয়াছেন, আমি একটা প্রস্তাব লইয়াই আসিয়াছি। ফুলেশ্বরীর অপর পারে সুক্কা গ্রামের জয়চন্দ্র চক্রবর্তীর সঙ্গে চন্দ্রার সম্বন্ধের প্রস্তাব করিতেই আমি আসিয়াছি। তাহার কুল উচ্চ, আপনার বংশের সঙ্গে বেশ মিলিবে। আর আপনার কন্যা যেরূপ রূপবতী, জয়চন্দ্রও সেইরূপ রূপবান, দেখিতে সে কার্তিকের মত। তাহা ছাড়া সে অল্প বয়সেই শাস্ত্রবিৎ পণ্ডিত, “নানা শাস্ত্র জানে বর অতি সুপণ্ডিত।” এই বরের সঙ্গে বিবাহ দিলে কন্যাটি সুখে থাকিবে, “কন্যা বরয়তি রূপং”, রূপে জয়চন্দ্র তরুণ সূর্যের ন্যায়। অন্যান্য কোন বিষয়েই সে খাটো নহে। “শুভস্য শীঘ্রং”, আপনার মনোনীত হইলে বিবাহে বিলম্ব করিবেন না। দেখুন বসন্তঋতু দেখা দিয়াছে, আমার মুকুল মুঞ্জরিত হইয়াছে, মাঝে মাঝে নূতন পাতা দেখা দিয়াছে, এখনও পশ্চিম হাওয়ায় গায়ে কাঁটা দেয়,—শীতকালের রেশটুকু এখনও ফুরায় নাই। মধ্য নদীতে ভাঁটা পড়িয়াছে, জলে টান ধরিয়াছে। এই বসন্তের আগমনে চারিদিকে যেন বাসরশয্যা দেখা যাইতেছে, আপনি অনুমতি করিলে এই মাসেই একটা ভাল দিন স্থির করিতে পারা যায়।’

বংশীদাস কোষ্ঠী বিচার করিলেন, একবারে রাজযোটক, বর ও কনের এরূপ আশ্চর্য মিল সচরাচর বড় দেখা যায় না। যখন কোষ্ঠীর ফল শুভ, তখন বংশীদাসের আর কোন দ্বিধাই রহিল না—বিবাহের দিন পাক হইয়া গেল।

শুভ লগ্ন স্থির হইল। তখন বসন্তের হাওয়া প্রকৃতিকে আনন্দরসে ডুবাইয়া ধরিত্রীর বক্ষ পুলকে স্পন্দিত করিয়া ঘন ঘন বহিতেছে—আম গাছের মুকুল হইতে শ্যামবর্ণের কুঁড়ি বাহির হইয়াছে। চারদিকে অশ্বখ ও পল্লব বৃক্ষে নূতন পাতার সমারোহ। পান ও খিলি বিতরিত হইয়া বিবাহের উদ্যোগ চলিল।

প্রথম দেবতাদের পূজা—বাগানে, বনে যত লাল, নীল, সাদা ফুল—তাহারা সুবতি দিতে দিতে মেয়েদের হাতে পড়িয়া সাজি ভর্তি করিল। সর্বপ্রথম দেবাদিদেব শঙ্করের পূজা হইল, তার পর বনদুর্গা, একচূড়া ও শ্যামাপূজা হইল। ইহার পর অধিবাস ও আভ্যদয়িকের ঘটা চলিল। মেয়েরা নিজহাতে মাটি কাটিয়া ইষ্টক প্রস্তুত করিল, পাঁচটী এয়ো সেই ইটে তৈল সিন্দুর মাখাইল। আভ্যদয়িক শেষ হইলে, এয়োগণ বাড়ী বাড়ী ঘুরিয়া ‘সোহাগ’ মাগিতে লাগিল। কন্যার মাতা ও খুড়ি সর্বপ্রথম বরণডালা লইয়া পল্লীপথে যাইতে লাগিলেন, ঘন ঘন শঙ্খধ্বনি ও হলুধ্বনির রোল উঠিল, এয়োরা জলপূর্ণ ঘট লইয়া বাড়ী বাড়ী আশীর্বাদ চাহিয়া চলিল।

## বিবাহে বিভ্রাট

সেই সময়ের আর একটি ঘটনা। সুক্কা নদীর তীরে কে এক সুন্দরী জল আনিতে চলিয়াছে? তাহার বর্ণ ঠিক চাঁপা ফুলের মত, তাহার গতি খঞ্জনের ন্যায়, চোখের চাউনি যেন মর্মভেদ করিয়া চলিয়া যায়। একটি তরুণ যুবক হিজল গাছের মূলে বসিয়া চির-পিপাসিতের ন্যায় সেই রূপসুধা পান করিতেছে।

একদিন সেই বসন্তের হাওয়ার মর্মর শব্দে যখন নবপল্লব শোভিত, অশ্ব গাছ যেন শিহরিয়া উঠিয়াছে, তখন যুবক একখানি পত্র লিখিয়া হিজল গাছের মূলে রাখিল, এবং পাগলের মত হিজল গাছকে সম্বোধন করিয়া বলিল, ‘ঢেউ পাড়ে আসিয়া আছাড় খাইয়া পড়ে, কিন্তু ফিরিয়া যাইয়া আবার সেই পাড়ে মাথা কুটে ; আমি এখন চলিয়া যাইব, কিন্তু মর্মের বেদনা লইয়া, হে হিজল তরু, আবার তোমার কাছেই আসিব। এই সুন্দরী ললনা যখন এ পথ দিয়া যাইবে, তখন তোমার পত্র-কম্পনের শব্দে তাহাকে ইঙ্গিত করিও, তোমার ডালে বসিয়া যে সকল পাখী গান করে, তাহারা যেন ইশারা করে, পত্রখানি যেন সুন্দরীর দৃষ্টিগোচর হয় ;—তোমরা বুঝাইয়া বলিও, আমি তাহার জন্য আহার নিদ্রা ছাড়িয়াছি, আমার দুঃখের কথা তাহাকে বলিও।’

পরদিন পত্রের উত্তরের আশায় যুবক সেইখানে অতি প্রত্যাশে যাইয়া প্রতীক্ষা করিয়া রহিল :—

‘যেখানে ফুটেছে ফুল মালতী-মল্লিকা,  
ফুট্যা আছে টগর বেলা আর শেফালিকা,  
হাতেতে ফুলের সাজি কপালে তিলক ছটা  
ফুল তুলিতে যায় কুমার মনে বিস্ময়া কাঁটা।’

জয়চন্দ্রের প্রেমের এই দ্বিতীয় অধ্যায়—এদিকে বংশীদাসের বাড়ীতে তাহার বিবাহের বাজনা বাজিতেছে ও এয়োরা চন্দ্রাকে সাজাইয়া একখানি রূপের প্রতিমা করিয়া তুলিয়াছে।

ঢোল-ডগর বাজিতেছে। চতুর্দিকে হলুধনি, মেয়েরা মালা গাঁথিতেছে ও বিবাহের গান গাহিতেছে, সমস্ত গৃহময় আনন্দের কলরব। এমন সময় জনরব এক দুঃসংবাদ ভাসাইয়া আনিল। আনন্দের কলরবে মুখরিত গৃহ সহসা স্তব্ধ হইয়া পড়িল ; বিবাহের গানের পরিবর্তে, বুক-ফাটা কান্নার রোল পড়িয়া গেল; ‘কি হইয়াছে?’ ‘কি হইয়াছে?’ বলিয়া লোকজন ধাওয়া-ধাওয়ি করিতে লাগিল ; এ যেন বন্দরে আসিয়া মাল-বোঝাই নৌকার ভরাডুবি হইল।

দৈবের আঘাত এমনই সাংঘাতিক ও অচিন্তিতপূর্ব, জয়চন্দ্র হঠাৎ মুসলমান-কন্যার পাণিগ্রহণ করিয়া মুসলমান হইয়াছে। এ যেন আকাশচুম্বী মঠের অগ্রভাগে বজ্রপাত হইল। এত বড় বংশ, এত বড় পাণ্ডিত্য ও সামাজিক প্রতিষ্ঠা, তার উপর এমন দাগা কে দিল? ঠাকুর বংশীদাস মাথায় হাত দিয়া মাটিতে বসিয়া পড়িলেন :—

‘ধূলায় বসিল ঠাকুর শিরে দিয়া হাত ।  
বিনা মেঘে হৈল যেন শিরে বজ্রাঘাত॥’

সহচরীরা চন্দ্রাকে ঘিরিয়া বসিল, তাহারা কান্নাকাটি করিতে লাগিল ; কেহ দৈবের দোষ কীর্তন করিতে লাগিল, কেহ বা এমন সুলক্ষণা রূপসী কন্যার ভবিষ্যৎ ভাবিয়া কত দুঃখ করিল। তাহারা মাথায় হাত দিয়া কান্না জুড়িয়া দিল। কিন্তু চন্দ্রা শুদ্ধ—প্রস্তরমূর্তির ন্যায়। সে কিছুই বলিল না, যার জন্য ঘর-ভরা লোক বিলাপ ও আতর্নাদ করিতেছে সে নীরব।

‘না কাঁদে না হাসে চন্দ্রা নাহি কহে বাণী ।  
আছিল সুন্দরী কন্যা হইল পাষাণী॥  
মনেতে ঢাকিয়া রাখে মনের আগুনে ।  
জানিতে না দেয় কন্যা জ্বলি মরে মনে॥’

একদিন দুইদিন করিয়া চারদিন কাটিয়া গেল। চন্দ্রা খাইতে যাইয়া বসে কিন্তু একটি ভাতও খায় না—পাতের ভাত পাত্রে পড়িয়া থাকে। রাত্রে তাহার শরশয্যা, তখন নির্জনে উৎসের ন্যায় চোখের জল উথলিয়া ওঠে, বালিশ ভিজিয়া যায়। শৈশবের সেই ফুল তোলার কথা, ফুলেশ্বরী নদীতে সাঁতার কাটা ও জলখেলা—সেই শত কথা যেন বৃষ্টিকের মত দংশন করে। একটু ঘুম আসিলে সেই মূর্তি,—তাহার স্বপ্নদৃষ্ট মূর্তির মুখে সেই পাজরকাটা হাসি। বিনা ঘুমে রাতি কাটাইয়া শুষ্ক মুখে শয্যার একপ্রান্তে বসিয়া থাকে। সহচরীদের সঙ্গে আলাপ নাই, নিজের মনের দুঃখ নিজ মনে গোপন করিয়া চন্দ্রা জ্বলিয়া পুড়িয়া মরিতে লাগিল। কিন্তু বংশীদাস চন্দ্রার মনের দুঃখের কথা বুঝিলেন, যে সকল কথা সে সহচরীদের কাছে গোপন করিল, কন্যার মুখের কথায় ব্যক্ত না হইলেও পিতা তাহার সবই বুঝিলেন। এ ব্যাপারে কন্যার কি দোষ ? বরং তাহার প্রতি সকলেরই করুণা হইল ; বংশীদাস নিজে মহাপণ্ডিত ছিলেন। নিজে চন্দ্রাকে শাস্ত্র পড়াইয়াছিলেন। এরূপ রূপসী ও গুণবতী কন্যাকে বিবাহ করিতে অনেকেই প্রস্তুত হইল। বিবাহের প্রস্তাব নানাস্থান হইতে আসিতে লাগিল।

বংশীদাস সেই সকল প্রস্তাব বিচার করিতে লাগিলেন, কিন্তু চন্দ্রা বলিল :—

‘—পিতা মোর বাক্য ধর ।  
জন্মে না করিব বিয়া হৈব আইবর॥  
শিব পূজা করি আমি শিবপদে মতি ।  
দুঃখিনীর কথা রাখ, কর অনুমতি॥’

যে শিব জগতের হলাহল পান করিয়া নীলকণ্ঠ হইয়াছিলেন, যিনি চিরভিখারী ;—সুখের প্রতি বীতশুণ্হ, শ্মশানবাসী, সেই শিবকে পূজা করিয়া চন্দ্রা উর্ধ্বলোকে উঠিয়া দুঃখের অতীত হইবেন।

বংশীদাস মহাজ্ঞানী, ধার্মিক ও সংযমী ছিলেন, তিনি অন্য কোন পিতার ন্যায় কন্যাকে সংসারে আসক্ত হইতে উপদেশ দিলেন না। তিনি কন্যাকে আজীবন

কুমারীব্রত অবলম্বন করিয়া থাকিবার অনুমতি দিয়া বলিলেন, ‘শিবপূজা কর, আর লিখ রামায়ণে।’

পিতার আদেশ শিরোধার্য করিয়া সে শিব-আরাধনায় নিযুক্ত হইল। ফুলেশ্বরী নদীর তীরে চন্দ্রাবতীর শিবের মঠ বহুদিন বিদ্যমান ছিল,—তাহার করুণ রামায়ণ-গীতি এখনও নয়নজলে সিক্ত হইয়া ময়মনসিংহের মেয়েরা বিবাহোপলক্ষে গান করিয়া থাকে। সেই রামায়ণের কতকাংশ কলিকাতা বিশ্ববিদ্যালয় প্রকাশ করিয়াছেন।

ফুলেশ্বরী নদীর তীরে চন্দ্রাবতীর শিবমন্দির উথিত হইল। পিতার আদেশ শিরোধার্য করিয়া চন্দ্রা দিনরাত্রি শিব-আরাধনায় ব্যাপৃত থাকে। কেহ কিছু বলিলে উত্তর দেয় না। আজন্ম কুমারী থাকিয়া সে শিবপূজায় জীবন কাটাইয়া দিবে—এই তাহার সঙ্কল্প।

‘একনিষ্ঠ হইয়া পূজে দেব ত্রিপুরারি’

তাহার মুখে কোন অভিযোগ নাই, মুখের হাসি ফুরাইয়া গিয়াছে, সন্ধ্যাকালে মালতী ফুটিয়াছিল, রাত্রি শেষ না হইতেই হইতেই তাহা ঝরিয়া পড়িল।

চন্দ্রা যখন এইভাবে লোকাভিত রাজ্যের শান্তির সন্ধানে নিযুক্ত ছিল, এমন সময় জয়চন্দ্রের এক চিঠি আসিল। যে রমণীকে বিবাহ করিয়া জয়চন্দ্র স্বধর্ম ত্যাগ করিয়াছিল, চন্দ্রাকে পরিত্যাগ করিয়াছিল, সেই রমণী কৃতঘ্নতা করিল। জয়চন্দ্র চক্ষে সরিষার ফুল দেখিল, তাহার অনুতাপের অবধি রহিল না, চন্দ্রার কাছে যে পত্রখানি পাঠাইল, তাহার মর্ম এইরূপ :—

‘শুন রে প্রাণের চন্দ্রা তোমারে জানাই।  
মনের আগুনে দেহ পুড়িয়া হৈছে ছাই॥  
অমৃত ভরিয়া আমি খেয়েছি গরল।  
কণ্ঠেতে লাগিয়া রৈছে কাল হলাহল॥  
জানিয়া ফুলের মালা কাল সাপ গলে।  
মরণে ডাকিয়া আমি এনেছি অকালে॥  
তুলসী ছাড়িয়া আমি পূজিলাম সেওরা।  
আপনি মাথায় লইলাম দুঃখের পসরা॥’

তাহার পরে লিখিল :—‘আমার ক্ষমাভিক্ষার মুখ নাই। কিন্তু জন্নের শোধ একটী ইচ্ছা আছে—তোমার মুখখানি একবার দেখিয়া যাইব।

‘একবার দেখিব তোমায় জন্নের শোধ দেখা।  
একবার দেখিব তোমার নয়ন ভঙ্গী বাঁকা॥  
একবার শুনিব তোমার মধুরস বাণী।  
নয়ন জলে ভিজাইব রাস্তা পা দুখানি॥  
না ছুঁইব, না ধরিব দূরে থেকে দেখব।  
পুণ্য মুখ দেখি আমি অন্তর জুড়াব॥

শিশু কালের সঙ্গী তুমি যৌবন কালের মালা ।  
 তোমারে দেখিতে মন হৈয়াছে উতলা ।  
 জলে ডুবি, বিষ খাই, গলায় দেই দড়ি ।  
 তিলেক দাঁড়াইয়া তোমার চাঁদ মুখ হেরি ॥  
 ভাল নাহি বাস কন্যা এ পাপিষ্ঠ জনে ।  
 জন্মের মতন হইলাম বিদায় ধরিয়া চরণে ॥  
 একবার দেখিয়া তোমা ছাড়িব সংসার ।  
 কপালে লিখেছে বিধি মরণ আমার ॥’

আবার সমস্ত এলোমেলো হইয়া গেল, যে দেবাদিদেবের পদে আত্মনিবেদন করিয়া  
 দিয়াছিল—মন স্থির করিয়াছিল, সেই নিবাত নিষ্কল্প দীপশিখার মত অবিচলিত সংযম  
 ও ধৈর্য টুটিয়া গেল ।

‘পত্র পড়ি চন্দ্রাবতী চোখের জলে ভাসে ।’

শিশুকালের সমস্ত কথা আবার মনে হইতে লাগিল । একবার, দুইবার, তিনবার  
 চন্দ্রা চোখের জলে ভাসিয়া পত্রখানি পড়িল, তারপর কাঁদিতে কাঁদিতে পত্রখানি লইয়া  
 পিতার নিকট উপস্থিত হইয়া বলিল, ‘জয়চন্দ্র আমাকে মুহূর্তের জন্য দেখিতে  
 চাহিতেছে, তুমি তোমার দুঃখিনী কন্যার মনের বেদনা সকলই জান, এখন কি করিব?’

বংশীদাস তাঁহার ধর্মনিষ্ঠ কন্যার সাংসারিক-জীবনের সুখ কামনা করিয়া অন্য  
 স্থানে বিবাহ স্থির করিতে চাহিয়াছিলেন ; কিন্তু যখন সে নিজে সংযম ও ব্রহ্মচর্যের উচ্চ  
 আদর্শের কথা বলিল, তখন তিনি তাহাতে বাধা দেন নাই । বংশীদাসের মত সাধু  
 কখনও ধর্মের আদর্শের মূল্য দিতে কুণ্ঠিত হইতে পারেন না । কিন্তু এবার বিষম  
 সমস্যা । বংশী রমণী-হৃদয়ের দুর্বলতা ভালই জানিতেন, একবার এই ব্যাপারে  
 শিথিলতার প্রশ্রয় দিলে চন্দ্রার জপ-তপ মাটী হইবার আশঙ্কা কিছু ছিল ; অথচ বিধর্মী  
 জয়চন্দ্রের সঙ্গে ঘনিষ্ঠতা বা বিবাহের আর সম্ভাবনা নাই, সুতরাং চন্দ্রাকে যদি জয়চন্দ্রের  
 সহিত দেখা করিতে অনুমতি দেন, তবে সে দুই ডিম্বায় পা দিয়া অকূলে পড়িতে পারে ;  
 বোধহয় এইরূপ কোন সিদ্ধান্তে উপস্থিত হইয়া তিনি নির্মমের মত কন্যার দুঃখ বুঝিয়াও  
 বুঝিলেন না, কঠোরভাবে বলিলেন :—

‘তুমি যে কাজে প্রাণ মন অর্পণ করিয়াছ, তাহাই কর । যে ব্যক্তি তোমার জীবনের  
 সকল আশা নষ্ট করিয়া দিয়াছে, যে অন্য ধর্ম অবলম্বন করিয়া সাংসারিক সকল সুখ-  
 সুবিধার পথ রোধ করিয়া দিয়াছে—তাহার কথা মনে স্থান না দেওয়াই ভাল । গঙ্গাজল  
 অপবিত্র হইয়াছে, সদ্য বিকশিত পদ্মটি বাসি হইয়া গিয়াছে—সমস্তই দৈব্যের বিধান  
 বলিয়া জানিবে :—’

‘তুমি যা লৈয়াছ মাগো সেই কাজ কর ।

অন্য চিন্তা মনে স্থান নাহি দিও আর ॥’

পিতার উপদেশের মর্ম চন্দ্রা ভাল করিয়াই বুঝিল ; সে জয়চন্দ্রকে অল্প কথায় নিষেধ জানাইয়া উত্তর দিল। তারপর ফুল ও বেলপাতা লইয়া শিবমন্দিরে প্রবেশপূর্বক অর্গল বন্ধ করিয়া দিল। এখানে পত্নী-কবি যে ছবি আঁকিয়াছেন, তাহা কুমারসম্ভব-কাব্যের তৃতীয় অধ্যায়ের অমর আলেখ্যের মত।

যোগাসনে বসিয়া চন্দ্রা ইন্দ্রিয় নিগ্রহ করিল ; মনের দ্বার রোধ করিল, তাহার চোখের জল শুকাইয়া গেল। ধীরে ধীরে সংসারের সমস্ত ব্যাপার হইতে মন সরাইয়া লইয়া সে যে রাজ্যে প্রবেশ করিল, তাহা অবিচলিত শান্তির রাজ্য, তাহার অন্তরের সমস্ত তোলপাড় থামিয়া গেল। শৈশবের কথা মন হইতে মুছিয়া গেল, এমন কি জয়চন্দ্রকেও সে ভুলিয়া গেল :—

‘যোগাসনে বসে কন্যা নয়ন মুদিয়া ।  
একমনে করে পূজা ফুল বিস্ব দিয়া॥  
কিসের সংসার, কিসের বাস, কিসের পিতা মাতা ।  
পূজিতে ভুলিল কন্যা সংসারের কথা॥  
জয়চন্দ্রে ভুলি কন্যা পূজয়ে শঙ্করে ।  
একমনে ভাবে কন্যা হয় বিশ্বেশ্বরে॥’

পিতা বংশীদাসের উপযুক্ত কন্যা চন্দ্রাবতী এইভাবে আত্মহারা হইয়া শিবধ্যানের নিরত হইল। তখন চক্ষুর জ্যোতি, কর্ণের শ্রুতি, মনের স্মৃতি যেন লোপ পাইল, চন্দ্রা বাহিরের জ্ঞান সমস্ত হারাইল।

এমন এক সময়ে জয়চন্দ্র পাগলের মত ছুটিয়া ফুলেশ্বরী নদীর তীরে সেই শিব-মন্দিরের পাশে আসিয়া দরজায় ঘা মারিল। সেই দরজায় মাথা ঝুঁড়িয়া কোন উত্তর পাইল না। যোগাসনে আসীনা চন্দ্রা তাহার উন্মত্ত আহ্বান শুনিতে পায় নাই। কেহ সাড়া দিল না—কেহ দ্বার খুলিল না। জয়চন্দ্র চিৎকার করিয়া বলিল :—

‘দ্বার খোল চন্দ্রাবতী দেখা দাও আমারে ।  
পাগল হইয়া জয়চন্দ্র ডাকে উচ্চৈঃস্বরে॥  
না ছুঁইব না ধরিব দূরে থাক্যা খাড়া ।  
ইহজন্মের মত কন্যা দেও মোরে সাড়া॥  
দেব পূজার ফুল তুমি, তুমি গঙ্গার পানি ।  
আমি যদি ছুঁই কন্যা হৈবা পাতকিনী॥’

কিন্তু চন্দ্রা এই উচ্চৈঃস্বর শুনিতে পায় নাই।

‘যোগাসনে আছে কন্যা সমাধি শয়ানে ।  
বাহিরের কথা কিছু নাহি পশে কানে॥  
না খোলে মন্দিরের দ্বার নাহি কয় কথা ।  
মনেতে লাগিল যেন শক্তি-শেলের ব্যথা॥’



নিরাশ হইয়া জয়চন্দ্র উন্মত্তবৎ চারিদিকে দৃষ্টিক্ষেপ করিয়া দেখিতে পাইল, অদূরে সন্ধ্যা-মালতীর রক্তবর্ণ ফুল অজস্র ফুটিয়া আছে। সে তাহার কতকগুলি লইয়া আসিল এবং তাহা নিংড়াইয়া রস বাহির করিল, সেই রক্তাক্ষরে সে মন্দিরের কপাটি লিখিল :—

শৈশব কালের সঙ্গী তুমি যৌবন কালের সাথী।

অপরাধ ক্ষমা কর তুমি চন্দ্রাবতী॥

পাপিষ্ঠ জানিয়া মোরে না হৈলা সম্মত।

বিদায় মাগি চন্দ্রাবতী জনমের মত॥’

অনেকক্ষণ পরে চন্দ্রার সমাধি ভঙ্গ হইল। সে বাহির হইল, দরজায় জয়চন্দ্রের হাতের লেখার উপর তাহার দৃষ্টি পড়িল, তখন চোখের জল মুছিতে মুছিতে কলসী কাঁখে লইয়া নদী হইতে জল আনিতে গেল।

সহসা দেখিল, নদী-তরঙ্গ উজানের দিকে বহিতেছে, সেখানে জনমানব নাই :—

‘একেলা জলের ঘাটে সঙ্গে নাই কেহ।

জলের উপরে ভাসে জয়চন্দ্রের দেহ॥

দেখিতে সুন্দর কুমার চাঁদের সমান।

ঢেউএর উপরে ভাসে পৌর্ণমাসী চাঁদ॥

আঁখিতে পলক নাই। মুখে নাই বাণী।

পাড়েতে দাঁড়াইয়া দেখে উন্মত্তা কামিনী॥’

### মন্তব্য ও আলোচনা

এইখানে কবি নয়নচাঁদ চিত্রপটের উপর যবনিকাপাত করিয়াছেন। কিন্তু আমরা জানি, এই দুর্ঘটনার পর চন্দ্রা আর বেশীদিন জীবিত ছিল না। পিতার আদেশে রচিত রামায়ণখানি অসমাণ্ড রাখিয়া ফুলেশ্বরী নদীর তীরের সর্বশ্রেষ্ঠ ফুলটি অকালে ঝরিয়া পড়িয়াছিল।

শ্রীযুক্ত অবনীন্দ্রনাথ ঠাকুর প্রভৃতি কোন কোন সুধী সমালোচকের মতে ‘চন্দ্রাবতী’—পল্লীসংগীতগুলির মধ্যে শ্রেষ্ঠ আসনের যোগ্য।

এই গানটার একটা বৈশিষ্ট্য আছে। ইহাতে হিন্দুর আধ্যাত্মিকত্ব আছে। পল্লী-আখ্যায়িকাগুলির অপর কোনটিতে তাহা নাই,—তাহাদের সকলগুলিতে প্রেম ও অপরাপর প্রসঙ্গে নিছক বাস্তবতা দৃষ্ট হয়, সেই প্রেম খুব উচ্চ গ্রামে উঠিয়া স্থানে স্থানে আদর্শ-লোকে পৌছিয়াছে সত্য, কিন্তু হিন্দুর জপ, তপ, নাম-কীর্তন প্রভৃতির লেশ তাহাতে নাই। যোগের সমাধি এবং সংসারের উর্ধ্বে আত্মার যে উচ্চস্থান পরিকল্পিত হয়—পল্লীগ্রামের গীতিকাগুলির কোথাও তাহার আভাস নাই। বৌদ্ধধর্মে আত্মার অস্তিত্ব

ও ঈশ্বরের বিশ্বাস স্থান পায় নাই, কিন্তু তাহাতে কর্মফলের প্রতি খুব অতিরিক্ত মাত্রায় জোর দেওয়া আছে। গল্পগুলিতে বৌদ্ধ-প্রভাবের নিদর্শন অনেক আছে। এখানে তাহা আলোচনা করার প্রয়োজন নাই। চন্দ্রাবতীতে ব্রাহ্মণের আদর্শ রক্ষিত হইয়াছে, এই হিসাবে কুমারী চন্দ্রাবতী অপরাপর গল্পের নায়িকা হইতে একটু ভিন্ন প্রকারের। তাহার চরিত্রে আগাগোড়া ব্রাহ্মণ-কন্যার যোগ্য সংযমের দৃষ্টান্ত পাওয়া যায়—অথচ তাহা শুষ্ক কাষ্ঠের মত নীরস নহে। একদিকে বাস্তব জগতের হৃদয়োচ্ছ্বাস পূর্ণমাত্রায়—অপর দিকে তপস্যা-জনিত সংযম তাহার চরিত্রে মিশ্র-সৌন্দর্যের চিত্র দেখাইতেছে।

তাহার ভালবাসা খরতোয়া নদীর মত অতি বেগে চলিয়াছে; কিন্তু অপরাপর পল্লী-চিত্রে সেই ভালবাসা যেরূপ অবাধ এবং শেষ পর্যন্ত সেই ভালবাসাই পূর্ণমাত্রায় প্রভাব বিস্তার করিয়াছে, এই গল্পে তাহা নহে। চন্দ্রাবতীর ভালবাসার আবেগ প্রতি পদে বাধা মানিয়া চলিয়াছে, চঞ্চল হৃদয়ের আবেগ-উচ্ছ্বাস সর্বত্রই সংযম ও তপস্যার অধীন হইয়া চলিয়াছে।

ফুল তুলিবার আশ্রয়, জলে সাঁতার কাটা, জয়চন্দ্রের গলায় ফুলমালা পরাইয়া দেওয়া ইত্যাদি ব্যাপারে চন্দ্রাবতীর মুক্ত হৃদয়ের সরল স্বাভাবিক গতি পরিদৃষ্ট হয়; কিন্তু যে মুহূর্তে জয়চন্দ্র তাহাকে প্রেম নিবেদন করিয়া চিঠি লিখিল—সেই মুহূর্ত হইতে তাহার নিজ হৃদয়ের প্রতি প্রথম দৃষ্টি পড়িল, সে সাবধান হইয়া গেল। যদিও সে মনে প্রাণে জয়চন্দ্রের অনুরাগী ছিল, এবং মনের নিভৃত কোণে যে দেবতার দৃষ্টি, সেই দেবতাকে তাহার মনের আকাঙ্ক্ষা নিবেদন করিতে কুণ্ঠিত হইল না—তথাপি বার্ষিক সে সতর্ক হইয়া গেল। এই সতর্কতা, এই সংযম সে জোর করিয়া আনে নাই। বিতর্ক ব্রাহ্মণবংশের শোণিতে ইহার অন্তিত্ব বিদ্যমান। চন্দ্রাবতী যেদিন প্রথম প্রণয়-চিঠিখানি পাইল সেই দিন হইতেই ফুলেশ্বরী নদীর পারে ফুল কুড়াইতে যাওয়া ছাড়িয়া দিল। চিঠি পাইয়া সে একবার দুঃখ প্রকাশ করিয়া বলিয়াছিল,—‘এ কি করিলে, তোমার মুখখানি দেখার সুযোগ হইতে আমাকে বঞ্চিত করিলে?’ তদবধি সে নিজের আঙ্গিনায় যে সকল জবা, নাগেশ্বর, চাঁপা ও গান্ধা ফুটিত, তাহাই কুড়াইয়া পিতার পূজার আয়োজন করিতে লাগিল। জয়চন্দ্রের সঙ্গে দেখাশুনা সমস্তই বন্ধ হইয়া গেল। এই সংযম তাহার চরিত্রের বিশেষত্ব।

জয়চন্দ্রের পত্রের উত্তরে সে দুইটি ছত্র মাত্র লিখিল। তাহার হৃদয়ের প্রবল উচ্ছ্বাসের কোন কিছু তাহাতে ছিল না, অপূর্ব সংযম-সাবধানতায় সে পত্রখানি লিখিয়াছিল, ‘আমি কি জানি? আমার পিতা আছে, তিনিই কর্তা।’ এই সংক্ষিপ্ত উত্তরের ভিতর তাহার হৃদয়ের বেগবতী ভালবাসার একটী ঢেউ আসিয়া পড়ে নাই। তাহা সংযমশীলতার পরিচায়ক।

প্রথম লিপি পাইয়া সে তৎক্ষণাৎ কোন কৌতূহল প্রকাশ করে নাই, অপর কোন নায়িকা হৃদয়ের অদম্য আবেগে তখনই পত্র পড়িবার জন্য উৎসুক হইত। কিন্তু চন্দ্রা পত্রখানি আঁচলে বাঁধিয়া ফুলগুলি সংগ্রহ করিল, পিতার ঠাকুর-ঘরখানি মার্জনা করিল, পুষ্পপাত্রে আহৃত ফুলগুলি সাজাইয়া রাখিল, পিতার জন্য আসন পাতিল ও চন্দন ঘষিল। বংশীদাস পূজোপকরণের পার্শ্বে আসনে আসিয়া চোখ বুজিয়া ধ্যানে বসিলেন,

তখন চন্দ্রা নিজ কক্ষে যাইয়া চিঠিখানি পড়িতে বসিল। অথচ তাহার মনে যে কৌতূহল ও পিপাসা জাগিয়াছিল, তাহা অতি প্রবল। সর্বদাই চন্দ্রা রমণীজনোচিত, ব্রাহ্মণকন্যার শোণিতের বিস্কৃতাজনিত সংযমের পরাকাষ্ঠা দেখাইয়া আসিয়াছে—তাহা কষ্ট-কৃত নহে, স্বভাবই তাহাকে এই সংযত চরিত্রের ভূষণস্বরূপ গড়িয়া দিয়াছিলেন।

যেদিন ভয়ানক বিপদের সংবাদ আসিল,—কোথায় রাম রাজা হইবেন, তাঁহাকে বনবাসী হইতে হইল!—তখনকার চন্দ্রার চিত্র অতি অপূর্ব। চারিদিকে কান্নাকাটি—আর্তনাদ, কিন্তু যাহার মাথায় বাজ পড়িয়াছে—সে একেবারে নিশ্চল ও অবিচলিত অথচ তাহার প্রেমে—স্বাভাবিক দুঃখ-বোধ ও নিরাশার ভাবের এক বিন্দুও ব্যত্যয় হয় নাই, তাহার চিত্র তখন মৌন সন্ন্যাসিনীর চিত্র, উহার দৃষ্টান্ত সমাজে দেখা যায় না। ‘ধারয়ন্ মনসা দুঃখং ইন্দ্রিয়াণি নিগৃহ্য চ’—ইহা সেই যোগসাধনার প্রথম অবস্থা।

চন্দ্রা পিতার উপদেশের মর্মগ্রাহী ছিল। একবার যখন তাহার মন একটুকু হেলিয়া পড়িবার মতন হইয়াছিল তখন পিতার উপদেশে হৃদয়ের গতিমুখ সে ফিরাইয়াছিল, তাহাতে তাহার খুব কষ্ট হইয়াছিল, কিন্তু তপস্যার গুণে সে সেই অবস্থা অতিক্রম করিতে পারিয়াছিল। পিতা তাহাকে বিবাহ দিয়া পুনরায় তাহাকে সুখী করিতে চেষ্টা পাইয়াছিলেন, কিন্তু চন্দ্রা যখন নিজে ধর্মের পথ বাছিয়া লইল, তখন তাহার সাধু তেজস্বী পিতা তাহাকে একটাবারও বাধা দিলেন না। কিন্তু যখন তাহার কঠোর তপস্যার ভাব কথঞ্চিৎ শিথিল হইবার উপক্রম হইল, জয়চন্দ্রের চরম দুর্দশা ও অনুশোচনা-সূচক চিঠিতে যখন দুর্দম পদ্মা-স্রোতের ন্যায় তাহার হৃদয়ের সংযমের বাঁধ ভাঙ্গিবার উপক্রম করিল, তখন সাধু পিতা সেই দুর্বলতার প্রশয় দিলেন না, তিনি কতকটা কঠোরভাবে তাহাকে কর্তব্যের পথ দেখাইয়া দিলেন—চন্দ্রা সেই উপদেশ শিরোধার্য করিয়া লইল।

তারপর পল্লীগীতিকা-দুর্লভ সমাধির চিত্র। চন্দ্রার যোগসমাধির ছবিখানি—

অবৃষ্টি-সংরক্তমিবাসুবাহমপামিবাধারমনুমত্তরঙ্গম্।

অন্তশ্চরাগাং মরুতাং নিরোধান্নিপাতনিষ্কম্পমিব প্রদীপং॥

কিন্তু এই বাঙ্গালী যোগিনী-মূর্তি কালিদাসের নকল নহে, কোন শ্লোকের পুনরাবৃত্তি নহে, তাহা পল্লীর মৌলিক চিত্র। পল্লীতে বিশেষ করিয়া ব্রাহ্মণের গৃহে যে তপস্যা চিরকাল চলিতেছিল—ইহা তাহারই দৃষ্টান্ত। নিম্নশ্রেণীর মধ্যে সেই সমাধির ভাব তখনও অনাস্বাদিত, এজন্য গীতিকায় তাহার ছায়া পড়ে নাই। পল্লীগীতিকার মূলে বৌদ্ধ প্রভাব ক্রিয়া করিতেছিল।

এই গল্পের বিশেষ একটা দিক এই যে ইহাতে বাস্তব ও অবাস্তবের মিলন দৃষ্ট হয়। তপস্যা, সংযম প্রভৃতি অধ্যাত্ম জীবনের তত্ত্ব ইহার উপর প্রভাব বিস্তার করিয়াছে—তাহা সূত্রাকারে নহে, সহজ সরল সত্য পরিষ্কার কবিত্বের ভাষায় কথিত হইয়াছে—তাহাতে জ্ঞানী বা দার্শনিকের শুদ্ধতা বা জটিলতা নাই—গল্পের ছন্দে বা বর্ণনায় তাহা বেখাপ্পা হয় নাই। অথচ প্রেমের গভীরতায়, উপলব্ধির গাঢ়তায়, অবস্থার বৈশিষ্ট্যে, আত্মদানের মহিমায়—এই নায়িকা শ্রেষ্ঠ-কাব্য-বর্ণিত প্রেমিকাদের এক পঙ্ক্তিতে সমাসীন। যেমন উন্মত্ত উজ্জ্বলিত সেই প্রেমের প্রাবল্য, তেমনই কঠোর শক্ত সেই সংযমের বাঁধ—আত্মহারার

আত্মদান ও তপস্বীর সাধনা একত্র এই মহান দৃশ্যপটে দেখা যাইতেছে। পদ্মার ভাস্কর পাড়ে দাঁড়াইলে যে বিস্ময়কর দৃশ্য চক্ষে পড়ে—ইহা তাহাই। ঘনঘটা করিয়া উন্মত্ত তরঙ্গ অবাধ শক্তিতে ছুটিয়াছে, আকাশ বক্ষ প্রসারিত করিয়া সেই তরঙ্গকে বাধা দিতেছে। পৃথিবী ও স্বর্গ দিম্বলয়ে পরস্পরকে ছুঁইয়া আছে, যেন প্রেম বড় কি সংযম বড় এই সমস্যার সৃষ্টি করিবার জন্য।

চন্দ্রাবতী তাহার পিতা বংশীদাসের সঙ্গে একযোগে মনসাদেবীর মঙ্গলকাব্য রচনা করেন। তাঁহার মাতার নাম অঞ্জনা, ফুলেশ্বরী নদীর তীরে ইঁহারা খড়ের কুটীরে বাস করিতেন। ১৫৭৫ শকাব্দায় ‘মনসার ভাসান’ রচিত হয়, তন্মধ্যে কেনারামের পালাটী সম্পূর্ণ ইঁহার রচনা। কবিত্বে ও করুণ রসে সেই কাহিনীটির জোড়া পাওয়া দুর্ঘট। চন্দ্রাবতীর দ্বিতীয় কাব্য ‘মলুয়া’—পল্লীগীতিকার শিরোমণি ; পূর্বেই লিখিয়াছি, চন্দ্রাবতী পিতার আদেশে যে রামায়ণ রচনা করিয়াছিলেন, তাহা কলিকাতা বিশ্ববিদ্যালয় আংশিকভাবে প্রকাশ করিয়াছেন। আমরা প্রাচীন বাংলা সাহিত্যে যে সকল মহিলা-কবির রচনা পাইয়াছি, তাঁহাদের মধ্যে চন্দ্রাবতীর অবিসংবাদিত ভাবে সর্বোচ্চ আসন। ১৫৭৫ শকে অর্থাৎ ১৬৬৩ খ্রীষ্টাব্দে চন্দ্রা পিতার সহযোগে মনসামঙ্গল রচনা করিয়াছিলেন, তাহা বলা হইয়াছে। তখন তাঁহার বয়ঃক্রম ২৫ বৎসর ধরিয়া লইলে তিনি সপ্তদশ শতাব্দীর প্রথমভাগে জন্মগ্রহণ করিয়াছিলেন, বলা যাইতে পারে। চন্দ্রাবতীর জীবনের অনেক কথা তিনি নিজেই লিখিয়া গিয়াছেন, তন্মধ্যে জয়চন্দ্র-ঘটিত প্রেম-কাহিনীটা বাদ পড়িয়াছে, ইহা স্বাভাবিক লজ্জা ও সঙ্কম বশতঃই হইয়াছে। অপর সকল বৃত্তান্তের সঙ্গে নয়নচাঁদ কবি বর্ণিত আখ্যায়িকার খুব মিল আছে। ময়মনসিংহ পাতুয়ার গ্রামে বংশীদাসের বংশধরগণ এখনও বাস করিতেছেন। আমি অন্যত্র দেখাইয়াছি, মাইকেল মধুসূদন-কৃত মেঘনাদবধ-কাব্যের সীতা-সরমার কথোপকথনের অংশটী সম্ভবত কবি চন্দ্রাবতীর রামায়ণ হইতে গ্রহণ করিয়াছিলেন।

## রূপবতী

### নবাব-দরবারে

দক্ষিণ ময়মনসিংহের কোন পরগনায় জয়চন্দ্র নামে এক রাজা ছিলেন। তাঁহার লক্ষ লক্ষ টাকা আয় ছিল ; বিশাল পুরী, হাতী ঘোড়ার লেখাজোখা নাই। মন্ত্রী, উজীর, নাজির লোক-লক্ষরে পুরীখানি ভর্তি। ঢোল, কাড়া, নাকাড়া, বাঁশী রোজ প্রত্যুষে রসুনচৌকীর সুরে প্রাণ আকুল করে—হাওয়াখানা হইতে সেই গীতবাদ্যধ্বনিতে রাজার ঘুম ভাঙ্গে।

একদিন রাজা জয়চন্দ্র তাঁহার সভাসদদিগকে বলিলেন, ‘আমি রাজপদে প্রতিষ্ঠিত হওয়ার পরে একবারও মুর্শিদাবাদ যাই নাই, নবাব-দরবারে একবার যাওয়া উচিত। আমি তথায় যাইব, আয়োজন-পত্র ঠিকঠাক কর।’

গণকের ডাক পড়িল,—তিনি গণিয়া আট দিনের পরে শুভদিন স্থির করিলেন।

কানা চইতা ও উভতিয়া—এই দুই ভাই রাজবাটীর মাঝি। ইহারা ময়ূরপঙ্খী পানসী নৌকা সাজাইবার ভার পাইল। নৌকাখানির ঘোলটী দাঁড়—নানাবর্ণে রঞ্জিত বৃহৎ পাল উখিত হইল। দরবারে উপহার দিবার জন্য নানা দ্রব্য নৌকায় তোলা হইল ; অন্ন-নির্মিত নানারূপ কারুখচিত চিরুনি বিবিধ রং-বেরঙের পাখা, হাতীর দাঁতের অপূর্ব পাটী, গজমোতির মালা প্রভৃতি মূল্যবান দ্রব্য নবাবসাহেবকে ভেট দেওয়ার জন্য নৌকাতে সাজাইয়া রাখা হইল। সঙ্গীতবিদ্যাবিশারদ কয়েকজন গায়ক ও বাদ্যযন্ত্রে দক্ষ ব্যক্তি রাজার সঙ্গে চলিলেন। রাজা দশ হাজার টাকার একটী তোড়া নবাবকে নজর দেওয়ার জন্য লইয়া চলিলেন।

রাজার পানসী উজান পানি বহিয়া চলিল। যাওয়ার পূর্বে নাগরিকগণ সম্বর্ধনা করিয়া রাজাকে বিদায় দিল। রাজা ব্রাহ্মণগণকে যথোচিত দান দিলেন, এবং রাজ্যের নিকট বিদায় লইয়া কুমারী রূপবতীকে আশীর্বাদ করিয়া রাজধানী অভিমুখে রওনা হইলেন। ফুলেশ্বরী নদী বাহিয়া নৌকা নরসুন্দার মুখে পড়িল। সেই নদী ছাড়াইয়া ঘোড়া-উৎরা পার হইয়া ময়ূরপঙ্খী বিশাল মেঘনা নদীতে পড়িল। মেঘনার তরঙ্গ পাহাড়ের মত উঁচু, ঢেউয়ে ঢেউয়ে যখন আঘাত-প্রতিঘাত হয়, তখন তুমুল শব্দে আকাশ প্রকম্পিত হয়,—এই নদীও অতিক্রম করিয়া রাজা তিন মাস পরে মুর্শিদাবাদ সহরে উপস্থিত হইলেন।

সঙ্গের লোকেরা ভেটের নানা দ্রব্য হুজুরে হাজির করিল। পূব দেশের আভের অতি সূক্ষ্ম কারুকার্যখচিত চিরুনি ও বিজনী—মুর্শিদাবাদের লোকেরা চোখে দেখে নাই, নবাব ভাটীর দেশের কারিগরী দেখিয়া চমৎকৃত হইলেন। হাতীর দাঁতের শীতলপাটী, তাহার

সূক্ষ্ম শিল্প ও নানারূপ কারুকার্য দেখিয়া তিনি খুব খুসী হইলেন। দশহাজার টাকার তোড়াটী পাইয়া তিনি কর্মচারীদিগকে আদেশ করিলেন যে রাজা জয়চন্দ্রের জন্য উৎকৃষ্ট মুসাফেরখানার (অতিথিশালা) ব্যবস্থা করা হউক। একটী রাজপ্রাসাদের মত বড় বাড়ীতে সম্মানিত অতিথির বাসস্থান নিয়োজিত হইল। নবাবের সঙ্গে রাজার মৈত্রী ক্রমশঃ ঘনিষ্ঠ হইল ; তাঁহার সৌজন্য ও সমাদরে মোহিত হইয়া রাজা মুর্শিদাবাদেই রহিয়া গেলেন। বিদায় চাহিলে তাঁহাকে নবাব ছাড়িয়া দেন না।

### রাণীর পত্র

এইভাবে তিনটী বৎসর অতীত হইল। এদিকে দেশে রাণী অত্যন্ত চিন্তিত হইয়া পড়িলেন ; কুমারী রূপবতী তখন চৌদ্দ বৎসরে পদার্পণ করিয়াছেন ; রাণী রাজার অভাবে ও রূপবতীর ভাবনায় অত্যন্ত চিন্তিত হইলেন, রাত্রে তাঁহার ঘুম নাই, এমন সোণার বর্ণ তাহা বিবর্ণ হইল। অবশেষে আর না থাকিতে পারিয়া তিনি রাজার নিকট চিঠি লিখিয়া দূত পাঠাইলেন।

চিঠিতে রাজ্যের অবস্থা সবিস্তারে লিখিয়া রাজা কেন কোন আকর্ষণে দেশ ছাড়িয়া এতকাল প্রবাসে পড়িয়া আছেন, তজ্জন্য রাণী নানারূপ মিষ্ট অনুযোগ করিলেন ; ঘরে মেয়ে দিন দিন বাড়িয়া চলিয়াছে, লোকে কানাঘুসা করিতে ছাড়িবে কেন। সে তো রাজার একমাত্র সন্তান, কণ্ঠের হারের মত আদরের ছিল, কি করিয়া তিনি তাহার বিবাহের কথা ভুলিয়া আছেন? রাজাকে আর কালবিলম্ব না করিয়া বাড়ীতে আসিতে শত অনুরোধ জানাইয়া রাণী চিঠিখানি শেষ করিলেন।

### গণকদের গণনা

এদেকে রোজ রোজই কোন না কোন গণক রাণীর দরবারে আসিতেছে এবং রূপবতীর কোষ্ঠী বিচার আরম্ভ করিয়াছে।

উত্তরদেশের এক গণক অনেকগুলি খুসী পুঁথি লইয়া আসিল, বয়সের দরুন তাহার দেহ কুজ হইয়া পড়িয়াছে, মুণ্ডিত মস্তকের পিছন দিকটায় একটা মস্ত বড় টিকি ঘাড় নাড়ার সঙ্গে সঙ্গে যেন লাফাইতেছে। গণক হাত পা নাড়িয়া ভবিষ্যতের দ্বার যেন উদ্ঘাটন করিয়া ফেলিল! কন্যার ভাগ্যলিপি গণনা করিয়া সে বলিল :—

‘মেয়ে অপূর্ব সুন্দরী, স্বর্গের অম্বরারা ইহার কাছে দাঁড়াইতে পারে না, অতি সুলক্ষণা। এই কন্যার কোন তরুণ রাজকুমারের সঙ্গে বিবাহ হইবে, ইনি পাটরাণী হইবেন। যদি অন্যথা হয় তবে হুঁ—আমাকে তোমরা ধিক্ দিও।’

আর এক গণক আসিলেন তিনি হাঁপানি রোগের রোগী, হাঁফাইতে হাঁফাইতে গণক বলিলেন, ‘এই মেয়ের জোড়া ভরু, মাথার চুলের অগ্রভাগ বক্র, কপাল প্রশস্ত এবং দাঁতগুলি ঠিক মুক্তার মত। দক্ষিণদেশের এক ধনকুবের সদাগরপুত্রের সঙ্গে ইহার

বিবাহ হইবে। শত শত কিঙ্কর ইহার পা ধোয়ার জল লইয়া প্রভাতে শয়নমন্দিরেব কাছে অপেক্ষা করিবে।’

আর একজন প্রৌঢ় বয়স্ক গণক জ্রুকৃষ্ণিত করিয়া কন্যার পদাঙ্গুলিগুলি নিরীক্ষণ করিয়া বলিতে লাগিল, ‘এ কন্যার কখনই দক্ষিণদেশে বিবাহ হইবে না, ইনি উত্তরদেশের কোন রাজার পাটরাণী হইবেন ; পায়ের আঙ্গুলগুলি পদ্মের কোরকের মত, হাঁটিয়া যাওয়ার সময় ইহার সমস্ত পদতল ভূমি স্পর্শ করে, মাটির উপর কোন অংশ উঁচু হইয়া থাকে না—এই সকল লক্ষণ সুস্পষ্টভাবে প্রমাণ করিতেছে যে, প্রতাপশালী কোন রাজার ঘরে ইহার বিবাহ হইবে।’

আর এক গণক অতি দাঙ্কিক—তিনি বলিলেন, ‘আপনারা কেন এখানে গণকের হাট বসাইয়াছেন? জাহাজ একাই যথেষ্ট শক্তি রাখে, ডিসিনৌকাগুলি তাহার পিছনে রাখিয়া ফল কি? আমাকে ডাকিলে আর কাহাকেও ডাকার প্রয়োজন হয় না।’ গণক করকোষ্ঠী বিচার করিয়া বলিলেন, ‘অতি শীঘ্র ইহার কোন রাজার ঘরে বিবাহ নিশ্চিত, আপনারা আমার কথা লিখিয়া রাখুন। চক্ষুর খঞ্জন-গতি, মুখখানি পদ্মের বিলাস, গালে একটু লজ্জায় বা অভিমানে সিন্দুরের মত লোহিতাভা দৃষ্ট হয়। ইহার প্রতিটি অঙ্গ অতি সুলক্ষণ-যুক্ত। রাজার ঘরে ইহার বিবাহ হইবে এবং ইনি সাত ছেলের মা হইবেন।’

শেষ যে গণকটি আসিলেন, তিনি বলিলেন—‘কন্যার চক্ষুর তারা নিবিড় কাল বর্ণ, ইনি সুখী হইবেন। তবে ইহার সম্প্রতি একটা দোষ দেখা যাইতেছে, জ্যোতিষে ইহাকে “গরদোষ” বলে। গরদের একটা জোড়, থালাতে ঘি, দুধ, চাল, মর্তমান কলা প্রভৃতি সাজাইয়া দ্বাদশটা ব্রাহ্মণের প্রত্যেককে ভাল করিয়া ভোজন করানো হউক। তারপর কন্যাটিকে তীর্থজলে স্নান করাইয়া ব্রাহ্মণদের পদরজঃ মাখায় ধারণ করানো হউক। তাহা হইলে “গরদোষ” কাটিয়া যাইবে। আজ যদি এই রিষ্টি কাটিয়া যায়, কাল ইহার বিবাহ কে ঠেকাইবে?’

### রাজার গৃহে ফেরা ও উদাসীনতার ভাব

কন্যার বিবাহ সম্বন্ধে চেষ্টা করিবার জন্য রাজা জয়চন্দ্র স্বীয় রাজধানীতে ফিরিয়া আসিলেন। কিন্তু এবার তাঁহার সম্পূর্ণ ভাবান্তর দেখিয়া রাণী বিস্মিত হইলেন। রাজা সারারাত্রি বিছানায় উঠা-বসা করেন, এক মুহূর্ত ঘুমান না ; কি ভাবিয়া দীর্ঘ নিশ্বাস ফেলেন এবং নিতান্ত নিরাশ্রয়ের মত একদিকে চাহিয়া থাকেন, কোন কথা বলেন না। রাণী একদিন তাঁহাকে বলিলেন—‘তুমি এবার এমন হইয়া গিয়াছ কেন? এতদিনের পর বাড়ী আসিলে, আমার সঙ্গেও একটীবার কথা বলিতে ইচ্ছা হয় না? প্রাণের দুলালী কন্যা, সে তোমার চক্ষের বিষ হইয়াছে, তাহাকে তুমি ডাকিয়া একটী কথা জিজ্ঞাসা কর না। সোণার বাটাতে পান, চুয়া, কেওয়া খয়ের, সুগন্ধি সুপারী পড়িয়া থাকে, তুমি একটী পানও খাও না। সরু সুগন্ধি চালের ভাত সোপ্পর থালায় পড়িয়া থাকে, তুমি হাত দিয়া নাড়াচাড়া কর, একটী দানা তোমার পেটে যায় না। তোমার কি হইয়াছে? যদি তুমি আমার সঙ্গে এরূপ ব্যবহার কর, তবে আমার মৃত্যুই মঙ্গল। এতবড় মেয়ে—তুমি তাহার বিবাহের কথা বল না।’

রাজা দীর্ঘ নিশ্বাস ফেলিয়া বলিলেন, ‘রাণী, আমার প্রতি নিষ্ঠুর হইও না, আমি মরমে মরিয়া আছি। শত শত বিছা, হাঙ্গর, কুমীর যেন আমায় কাটিয়া ফেলিতেছে, আমি যন্ত্রণা সহ্য করিতে পারিতেছি না। কেহ যেন শেল দিয়া আমার বুক চিরিয়া ফেলিতেছে।’

‘কৃষ্ণে তুমি আমায় চিঠি লিখিয়াছিলে, আমি সেই চিঠি হাতে করিয়া দরবারে বিদায় চাহিতে গিয়াছিলাম। নবাব চিঠি পড়িয়া বলিলেন, “হাঁ হে রায়! তোমার তো বয়স্থা এক কন্যা আছে। ওনিয়াছি সে নাকি পরমা সুন্দরী, আমার সহিত তাহার বিবাহ দাও। তোমার সবদিক দিয়াই সুবিধা হইবে। আমার পূজনীয় আত্মীয় বলিয়া দরবারে তোমার প্রথম স্থান হইবে, তুমি বড় খেতাব পাইবে। দরবারে তুমি আমার ছালাম পাইবে, কত বড় সম্মান ভাবিয়া দেখ। তুমি শীঘ্র তোমার বাড়ী চলিয়া যাও, আমি এদিকে বিবাহের উদ্যোগ করিতে থাকি।” রাণী, জাতিনাশ-ধর্মনাশ হইলে আমার জীবনে কি কাজ! রাজত্ব ছাড়িয়া চল আমরা দুজনে জঙ্গলে পলাইয়া যাই।’

‘মুসলমানে কন্যা দিব নাহি সরে মন।

রাজত্ব হইল আমার কর্ম বিড়ম্বন॥

গলায় কলসী বাঁধি, জলে ডুব্যা মরি।

এ বিষ না ঝাড়তে পারে ওঝা ধনন্তরি॥’

রাজা আরও বলিলেন—‘আমি ঠিক বুঝিয়াছি, কন্যাকে না দিলে আমার জমিদারী থাকিবে না। জয়পুর-রাজ্য নবাব দরিয়ায় ভাসাইয়া দিবেন। পাঠানেরা আসিয়া আমাকে বাঁধিয়া লইয়া যাইবে এবং নবাবের হুকুমে আমার গর্দান কাটা যাইবে। নির্দষ্ট দিনের আর বেশী বাকী নাই, সেইদিনের পূর্বে রাজকুমারীকে নবাবের অন্তঃপুরে পাঠাইতে হইবে। তাহার পূর্বে ইহাকে আগুনে পুড়াইয়া মারিব অথবা বিষ খাওয়াইব, তাহাই ভাবিতেছি। কোন্ দেশে গেলে আমাদের জীবন রক্ষা হইবে?’

‘আয়োজন কর রাণী পাঠাও কন্যারে।

গলায় কলসী বাঁধি, আমি ডুবিব সায়েরে॥’

### রূপবতীর বিবাহ

এই বিপদে রাণী নিজে যা হোক করিয়া একটা উপায় উদ্ভাবন করিলেন। রাজবাড়ীতে অতি তরুণ, কার্তিকের মত সুন্দর একটা কর্মচারী ছিল, তাহার স্বভাব ছিল বিনয়নম্র এবং মুখে সদাই একটা হাসির মধুর রেখা যেন লাগিয়া থাকিত, তাহার কাজ ছিল অন্তঃপুরের ফরমাইস জোগানো এবং শিবপূজার ফুল কুড়ানো।

এই যুবককে রাণী ডাকাইয়া আনিলেন, সে চক্ষু মাটির দিকে নত করিয়া দাঁড়াইল। রাণী বলিলেন, ‘রাত দুপুরে তোমাকে দিয়া আমার কাজ আছে, তুমি হাজির থাকিও।’



রাণী সন্ধ্যার পর আহালাদি সারিয়া যখন তাঁহার কন্যা রূপবতী ঘুমাইয়া পড়িয়াছেন, তখন শীতল মন্দিরে রাজকুমারীর কক্ষে যাইয়া তাহার শিয়রে বসিলেন ; তাঁহার চোখের ফোঁটা ফোঁটা জল রূপবতীর গায়ে পড়িতে লাগিল, কুমারী জাগ্রত হইয়া উঠিয়া বসিলেন; মায়ের কান্না দেখিয়া তাঁহারও কান্না পাইল। তিনি বলিলেন, ‘এমন কি ঘটিয়াছে, যাহাতে তুমি এত দুঃখ পাইয়াছ? আমি কি কোন অপরাধ করিয়া তোমার মনে ব্যথা দিয়াছি?’ রাণী বলিলেন, ‘কোন অপরাধ তুমি কর নাই ; তোমার, আমার ও রাজার কপালের দোষ—আমার নগরে আগুন লাগিয়াছে, শীতলমন্দির পুড়িয়া ছাই হইবে। আমার আদরিণী কুমারী, আজ তোমার সঙ্গে আমার শেষ দেখা, বিদায় লইতে আসিয়াছি।’ অস্পষ্ট, অব্যক্ত, এক গুরুতর আশঙ্কায় রূপবতীর হৃদয় কাঁপিতে লাগিল ; কিছু না বুঝিয়া না শুনিয়া মাতা ও কন্যা গলা জড়াজড়ি করিয়া পরস্পরকে ধরিয়া কাঁদিতে লাগিলেন।

গভীর রাত্রে কোন হলুধনি হইল না, এয়েরা আসিয়া স্ত্রী-আচার করিল না, অন্তঃপুরিকারা ফুলের মালা গাঁথিতে বা চন্দন ঘষিতে বসিল না। মাতা পাড়াপড়শীদের কাছে সোহাগ মাগিতে গেলেন না, পুরনারীরা আত্মদয়িকের জন্য ইট কাটিতে গেল না। চোরাপানির জলে বর-কনের কৌতুকপূর্ণ খেলা হইল না ; পুরোহিত আসিয়া মঙ্গলাচরণপূর্বক বিবাহের ধর্মানুষ্ঠানে প্রবৃত্ত হইলেন না। মঙ্গলঘট নাই, বরণডালা নাই—বাদ্যভাণ্ড নাই। মদন মধ্যরাত্রে রাণীমাতার কাছে আসিয়া দাঁড়াইল। রাণী আশীর্বাদের একটি কথা বলিলেন না—তাঁহার দুই চক্ষু হইতে জল পড়িতে লাগিল। রূপবতী সজলচক্ষু মাটিতে নত করিয়া মৌন হইয়া দাঁড়াইয়া রহিলেন। মদনের বুক দুরুদুরু করিয়া কাঁপিয়া উঠিল, ব্যাপার কি সম্যক বুঝিতে না পারিয়া মদন রাণীর নির্দেশমত সেই কাঙ্ক্ষনপ্রতিমার কাছে আসিয়া দাঁড়াইল।

রাণী বলিলেন, ‘এই বংশের একমাত্র প্রদীপ—এই দুলালী কন্যাকে মদন, আমি তোমার হাতে সমর্পণ করিলাম ; আকাশের তারা সাক্ষী, জগৎ-ব্যাপক বাতাস সাক্ষী, আর দ্বিয়ামা রাত্রি এই কন্যাদানের সাক্ষী! মদন! এ আমার বড় আদরের কন্যা, তুমি ইহার মনে ব্যথা দিও না, এই হতভাগিনীর এত বড় রাজবাটী থাকিতে হেথায় একটু জায়গা হইল না, আমি ইহার গর্ভধারিণী, গর্ভে স্থান দিয়াছিলাম কিন্তু বাড়ীতে স্থান দিতে পারিলাম না। রাজা দণ্ডমুণ্ডের কর্তা এই বিশাল রাজত্বের মালিক, কিন্তু তিনি এই নিরপরাধ কন্যাকে আশ্রয় দিতে পারিলেন না। তুমি ইহার পাণিগ্রহণ কর, এই আঁধার দ্বিয়ামা রাত্রিকে সাক্ষী করিয়া আমি ইহাকে তোমার হস্তে সম্প্রদান করিলাম।’

রাণী কাঁদিতে লাগিলেন, রূপবর্তী কাঁদিতে লাগিল, মদনেরও চক্ষু ছাপিয়া অশ্রুর ধারা বহিতে লাগিল। মাথার দীঘল চুলের বেণী খসাইয়া কুমারী রূপবতী লাজনম্র চোখে বেশভূষা করিল, কোন দাসী বা পরিচারিকা তাহার প্রসাধনের সহায়তা করিল না।

‘না করিল পুরোহিত কুল আচরণ।

নিঝুম রাতে করে মায় কন্যা সমর্পণ॥

লইয়া কন্যার হাত মদনেরে দিল।

কেহ না জানিল মায় কন্যা সমর্পিল॥

কেহ না দিল তায় মঙ্গল জোকার ।

বিবাহের গীত হৈল—মর্মের হাহাকার॥’

মাতা চোখের জল আঁচলে মুছিয়া পুনরায় বলিলেন—

‘সুখে থাক, দুঃখে থাক, তুমি প্রাণপতি ।

তুমি বিনা অভাগীর নাহি অন্য গতি॥’

নিশিরাতের এই ঘটনা নগরীর লোকেরা কেহ জানিতে পারিল না । রাজা নিজেও জানিলেন না, রাজপুরীর মশা-মাছি পর্যন্ত এই বিবাহের কথা কেহ ঘৃণাক্ষরে জানিতে পারিল না ।

কানা চইতা সেই রাজবাড়ীর বিশ্বস্ত মাঝি ; তাহাকে দ্বিপ্রহর রাত্রে রাণী ডাকাইয়া আনিয়া বলিলেন—‘তোমার নৌকায় কাহারো যাইবেন, তুমি তাহা জানিতে চাহিও না । তোমাকে এই ধনরত্ন দিতেছি, ইহাই তোমার পুরস্কার । যেখানে পৌছিয়া প্রাভাতিক তারা দেখিতে পাইবে, তুমি ও তোমার মাঝিরা সেইখানে এই চড়নদারকে নামাইয়া দিবে, ইহারা কে কোথায় যাইবে জিজ্ঞাসা করিও না, বৃথা কৌতূহলবশতঃ ইহাদিগকে কোন প্রশ্ন করিও না ।’

নৌকানখানিতে মদন ও রূপবতী এইভাবে উঠিয়া অনির্দিষ্ট ভাগ্য-পথে রওনা হইয়া গেলেন ।

পাল উঠাইয়া সারা নিশি কানা চইতা ডিঙ্গিখানি বাহিয়া চলিল । অতি দ্রুত চৌদ্দ বাঁক অতিক্রম করিয়া একটা পাহাড়িয়া মাটিতে আসিয়া পড়িল । তখন রাত্রি ভোর হইয়া গিয়াছে । কানা চইতা সেইখানে আসিয়া নৌকা নঙ্গর করিয়া উদ্ভৈঃস্বরে বলিল, ‘চড়নদার, তোমরা রাণীমার হুকুমে এইখানে নামিবে, ইহা ছাড়িয়া আর এক বাঁকও যাইবার আমার হুকুম নাই ।’

### কাস্কালিয়া, জঙ্গলিয়া ও পুনাই

যখন পানসী দূরে চলিয়া গিয়াছে, তখন রূপবতী স্বগত বিলাপ করিয়া বলিতেছে—‘বাপের বাড়ীর নৌকা, বাড়ীতে ফিরিয়া গিয়া আমার পিতাকে আমাদের দুঃখের কথা জানাইও । আমার অভাগিনী মাতাকে বলিও, মা, তোমার নির্বাসিতা কন্যাকে জঙ্গলের বাঘে খাইয়া ফেলিয়াছে ।’

মদন রূপবতীকে শোকার্ত দেখিয়া বিনীতভাবে বলিল—‘তুমি কেঁদ না লক্ষ্মী—দৈবের অভিশাপে তুমি আমার হাতে পড়িয়াছ! তুমি তো যজ্ঞের ঘৃত, এই কুকুরের হাতে সমর্পিত হইয়াছ । আমি চণ্ডাল অপেক্ষাও নীচু, তুমি গঙ্গাজল হইতেও পবিত্র ; “না ধরিব, না ছুঁইব, তোমার চরণখানি ।”

‘যখন ক্ষুধা লাগিবে নফরকে বলিও সে তোমার জন্য বনের ফল আনিয়া দিবে,—এই পাহাড়িয়া দেশের নির্মল জল আনিয়া তোমার পিপাসা মিটাইবে ।



‘রাজার দুলালী কন্যা নাহি জান ক্রেশে ।

একলা হইয়া কেমনে তুমি থাকবে বনবাসে।’

‘আমি তো তোমার সঙ্গী নই, যে মনের কথা বলিয়া খানিকটা আরাম পাইবে।’

‘বনের দোসর সঙ্গী—আমি তো নফর ।

কথা শুন্যা কাঁদি কন্যা করিল উত্তর।’

কন্যা कहিলেন—‘জঙ্গলেই থাকি বা ঘন ঘোর অরণ্যেই থাকি, মা তোমার হাতে আমাকে অর্পণ করিয়াছেন—তুমিই আমার স্বামী ও একমাত্র গতি । তোমা ভিন্ন অন্য কাহাকেও আমি জানি না । ভাগ্যদোষ কেবল আমার নহে, তুমিও ভাগ্য-বিড়ম্বিত ।’

‘এতেক করিল বিধি কপালের দোষী ।

আমার লাগিয়া বঁধু তুমি বনবাসী।’

কাসালিয়া ও জঙ্গলিয়া দুই সহোদর—ইহারা জাতিতে জেলে । সেই পাহাড়িয়া নদীর তটে সারাদিন মাছ ধরিয়া বেড়ায় ; উভয়ের কোমরে মাছ রাখিবার চুপড়ী বাঁধা—এবং হাতে জাল । তাহাদের দু-ভাইয়ের কোন সন্তান নাই । শিশুর কলরবহীন বাড়ী তাহাদের অন্তরের মতই খাঁ খাঁ করিতেছে । দু-ভাইয়ের তিনটি স্ত্রী, একটীরও কোন ছেলেমেয়ে হয় নাই । তিন বধুর মধ্যে পুনাই বড়গিন্নি, এই মেয়েটি যেমনই গৃহকর্ম-নিপুণ তেমনই তেজস্বিনী ও বুদ্ধিমতী । দুই ভাই সেদিন জাল ফেলিয়া ফেলিয়া হয়রান হইয়াছে, একটা পুঁটি, খল্‌সে বা চিংড়ীও পায় নাই । কিন্তু তাহারা হঠাৎ দুইজন অপূর্ব রূপবান্ ও রূপবতী তরুণ-তরুণী দেখিয়া বিস্মিত হইয়া দাঁড়াইল ।

কাসালিয়া ইহাদিগকে বাড়ীতে লইয়া আসিয়া পুনাইকে ডাকিয়া বলিল, ‘আজ সারাদিনে কোন মাছ পাই নাই, কিন্তু আসিয়া দেখ কি আনিয়াছি ।’ রূপবতীকে দেখিয়া বিস্মিত পুনাই স্বামীকে বলিল, ‘এ যে দেখিতেছি, নদীর জল হইতে, লক্ষ্মীপ্রতিমা আনিয়াছ ।’

বহুদিন যে কামনা হৃদয়ে পুষিয়াছিল, সেই বাৎস্যল্যরস পূর্ণ করিতে দেবতা যেন এই দেবী-মূর্তি পাঠাইয়া দিয়াছেন । কত স্নেহে পুনাই রূপবতীকে তাহার বাড়ী ঘর সম্বন্ধে, নানা প্রশ্ন করিল, কি জন্য নদীর তটে নির্জনে কাঁদিতেছিল এবং সঙ্গের সুদর্শন পুরুষই বা কে ? ইত্যাদি জিজ্ঞাসা করিতে লাগিল ।

লজ্জিতা রূপবতীর গওদয় আরক্ত হইল, সে কথা খুব অল্পই বলিল, কিন্তু তাহার চোখের জলই যেন সমস্ত প্রশ্নের উত্তর দিল ।

পুনাই বলিল, প্রশ্ন করিলে যদি কষ্ট পাও, তবে উত্তর চাই না । রত্ন-বোঝাই নৌকা যদি দেবতার ইচ্ছায় ঘাটে লাগে—তবে কে আর তার কৈফিয়ৎ লইবার জন্য প্রতীক্ষা করে? আমার ঘরে পুত্র-কন্যা নাই—তোমরাই আজ হইতে এই ঘরের পুত্র-কন্যা হইলে ।’

### মদনের বিদায় গ্রহণ

সেই দিন প্রাতে উষার আলো পূব দিক হইতে সবে ঝিলিমিলি খেলিতেছে, স্বামী আসিয়া রূপবতীকে বলিলেন, ‘আজ ছয় বৎসর তোমাদের বাড়ীতে কাটাইলাম। একদিনও দেশে যাই নাই, আমার পিতা-মাতা কেমন আছেন, তাহা জানি না। তুমি অনুমতি দিলে আমি কয়েকটা দিনের জন্য দেশে যাইতে পারি।’

অনেক কান্নাকাটির পর রূপবতী স্বামীকে বিদায় দিলেন। স্বামী বলিয়া গেলেন, ‘৮/১০ দিনের মধ্যে নিশ্চয়ই আসিব।’

৮/১০ দিন চলিয়া গেল। জেলেবাড়ীর মরা কুলগাছের ডালটার উপর বসিয়া কোকিল ডাকিয়া ডাকিয়া হয়রান হইল, নদীর ওপার হইতে ডাহক পাখী সারারাত্রি চীৎকার করিয়া আকাশ ফাটাইয়া দিল,—কিন্তু কই কেউ তো সাড়া দিল না। রূপবতীর প্রাণ যে অহর্নিশ সেইরূপ চীৎকার করিয়া উঠে, মরা চাঁদ ধীরে ধীরে পূর্ণজীবিত হইতে লাগিল। রূপবতীর হাতের বকুল-মালা রোজই শুকাইয়া যায়, কাজল-বরণ ভ্রমরেরা তাহার কাছে ছোট ছোট ফুলের চারিদিকে ঘুরিয়া গুনগুন করে—রূপবতী যাহা দেখেন, যাহা শুনে, তাহাতেই মন উতলা হইয়া উঠে। দুটী পক্ষ চলিয়া যায়। এখনও তো মদন আসিল না, রূপবতীর আহারের রুচি চলিয়া গেল, রাত্রিতে এক মুহূর্তের জন্য চোখে ঘুম নাই—মনে সদাই মদনের জন্য হাহাকার হইতে লাগিল। তিনি কাহার কাছে তাঁহার দুঃখের কথা বলিবেন? পুনাই যত সোহাগ করে, তাহাতে মুখে বাহিরে একটা হাসির রেখা খেলিয়া যায়, কিন্তু চোখে অশ্রু টলমল করে।

### নিষ্ঠুর সংবাদ ও পুনাইর অভিযান

একদিন রূপবতী কি নিদারুণ সংবাদই না শুনিলেন, তাঁহার আছাড়বিছাড়ি ক্রন্দনে পুনাইর প্রাণ ফাটিয়া যাইতে লাগিল। দেশের রাজা ডঙ্কা দিয়াছেন, ‘রাজকুমারী পলায়ন করিয়াছে, মদন নামক তাঁহার এক কর্মচারী তাহাকে লইয়া পলাইয়া গিয়াছে। যে সেই মদন ও রাজকুমারী রূপবতীকে ধরিয়া দিতে পারিবে তাহাকে বিশেষ পুরস্কার দেওয়া হইবে। অপরাধী মদনকে কালীমন্দিরে বলি দেওয়া হইবে।’

যে এই সংবাদ দিল, সে বলিল ‘এই মদনই কাঙ্গালিয়া ও জঙ্গলিয়াদের বাড়ীতে ছিল, রাজার লোকজন তাহাকে ধরিয়া লইয়া গিয়াছে। রাজা তাহাকে মৃত্যুদণ্ড দিবেন, কুমারীর খোঁজেও লোকজন ঘুরিতেছে।’

এইভাবে সমস্ত কথাই প্রকাশ হইয়া পড়িল।

হতভাগিনী রাজকুমারী চাপা সুরে পুনাইকে কাঁদিয়া বলিল, ‘আমার ধর্মের মা, তুমি নিরাশ্রয় অবস্থায় আমাদিগকে আশ্রয় দিয়াছ, আবার যে অকূলে পড়িলাম, কে এ সময়ে আশ্রয় দিবে?’

‘মাগো, রাজার ঘরে জন্মিয়াছিলাম, কিন্তু দৈবদোষে সকলই হারাইয়াছি, আমার রাজবাড়ী, দাসদাসী সবই গিয়াছে, যাক তাতে দুঃখ নাই। কিছুই জানি না মাগো, দ্বিপ্রহর রাত্রে একদিন ঘুম ভাঙ্গাইয়া মাতা আমাকে এই স্বামীর হাতে সমর্পণ করিয়া নির্বাসিত করিয়া দিলেন, কি অপরাধ? জানি না। দৈবের বিধান মাথা পাতিয়া লইলাম, আমার স্বামীকে পাইয়া সকল দুঃখ ভুলিলাম। আমি মা, বাপ, বাড়ীঘর সকলই ভুলিলাম,—আমার কর্মের লেখা ছিল, আপন জন আমার পর হইয়া গেল।

‘কিন্তু একটা দুঃখে আমার প্রাণে বড় দাগা লাগিয়াছে, আমি একটা দিন বাসর-ঘরে তাঁহার হাতে নিজ হাতে বানাইয়া একটা পানের খিলি দিতে পারি নাই, আমি ঘিয়ের বাতি জ্বলাইয়া তাঁহার চন্দ্রমুখখানি মনের সাথে দেখিবার সময় পাই নাই, হাতীর দাঁতের শীতলপাটী পাতিয়া একদিন তাঁহার জন্য শয্যা প্রস্তুত করিতে পারি নাই, একদিনের জন্য সুখের গৃহস্থালী আমার অদৃষ্টে হয় নাই, একদিন বকুলফুলের মালা তাঁহার গলায় পরাইতে পারি নাই,—গাঁথিয়া রাখিয়াছি, কিন্তু সুবিধা পাই নাই ; লজ্জায় তাহা পরাইতে না পারিয়া পরদিন চোখের জলে ভিজা সেই মালা পুকুরে ভাসাইয়া দিয়াছি। চিকন শালীধানের ভাত রাঁধিয়া তাহাকে পরিবেষণ করিতে পারি নাই। কত দুখে যে আমার মনে দিন রাত শেল বিধিয়াছে, তাহা তোমাকে কি বলিব!’

‘জ্বলাইয়া ঘূতের বাতি একদিন না দেখিলাম গো

বঁধুর চাঁদমুখ।

দুই দিন না বঞ্চিলাম সুখের গৃহ বাস।

কর্মদোষে অভাগিনী হইল নিরাশ॥’

ধর্মমাতা পুনাই অনেকরূপ সাত্বনা দিল,—কিন্তু সে কোন কথাই শুনিল না ; বিলাপ করিয়া বলিল—‘মা, আমাকে আমার স্বামীর নিকট লইয়া চল। আমি তাহাকে ছাড়া বাঁচিয়া থাকিতে পারিব না,—আমি তাঁহার জীবন-মরণের সঙ্গী—আমার পিতা দুশমনের মত তাহাকে আমার নিকট হইতে কাড়িয়া লইতে পারিবেন না। আমাকে যদি তাঁহার নিকট লইয়া না যাও, তবে আমি বিষ খাইব, জলে ডুবিয়া মরিব, না হয় গলা কাটারি দিয়া কাটিব।’

‘বিষ খাইয়া মরিব আমি,

যদি না দেখাও গো স্বামী

গলেতে তুলিয়া দিব কাতি।

পুনাই বুঝাইয়া কয়।

এত বড় বিষম হয়।

বলি কহি পোহাইল রাতি॥’

পুনাই রূপবতীর কান্না ও দারুণ বিলাপ শুনিয়া সারারাত্রি অস্থির ভাবে কাটাইল। ‘আজ রাত্রি প্রভাত হউক, কাল একটা বিহিত করিব’—রূপবতীকে এই সাত্বনা দিল।

কিন্তু সে কি সান্ত্বনা শুনে? কোন কথা শুনে? রহিয়া রহিয়া তাহার আত্মকণ্ঠ ছিন্নতার বীণার মত বাজিয়া উঠিতে লাগিল, সারা রাত্রি সে বিলাপের অন্ত নাই।

পরদিন কাঙ্গালিয়া ও জঙ্গলিয়া একটা ডিস্কি লইয়া আসিল, পুনাই রাজকুমারীকে লইয়া ডিস্কিতে উঠিল।

দরবারগৃহ পূর্ণ, রাজা সভাসদদিগকে লইয়া বিচারকার্য করিতেছেন,

এমন সময়ে দুইটি পুরুষ ও দুইটি স্ত্রীলোক কোন বাধা না মানিয়া ঝড়ের মত সেই দরবারে প্রবেশ করিল। অগ্রবর্তিনী প্রৌঢ়া রমণীর একবারে উন্মত্ত বেশ, সে সভার কোণে ধর্মের দোহাই দিয়া দাঁড়াইল। তার পরে রাজার দোহাই দিয়া বলিল—তখন চোখের জল তাহার গণ্ড প্রাবিত করিতেছে এবং সে উত্তেজনায় তাহার হাত দুটি আন্দোলন করিতেছে।

সে বলিল, ‘মহারাজ আপনি কোন্ দোষে জামাইকে বন্দী করিয়াছেন, আমাকে বলুন।’

পাত্রমিত্রগণ বলিল, ‘কেই বা বন্দী এবং কেই বা জামাই?’

পুনাই অশ্রুর বেগ সামলাইয়া লইয়া বলিল, ‘সে পরিচয় আমি দিব না। কিন্তু মহারাজ! পাখীকে যত্নে পালন করিয়া কে কবে তাহাকে শর দিয়া বধ করে? বহু যত্নে ঘর তৈরী করিয়া কে কবে সেই ঘরে আগুন লাগাইয়া দেয়? বাগান করিয়া শখের গাছগুলি নিজ হাতের কাটারি দিয়া কে কবে কাটিয়াছে? পূজার ঘট লাখি মরিয়া কে কবে ভাঙ্গিয়াছে? ঘোর অন্ধকারে রাত্রে মহারানী স্বয়ং তাঁহার প্রিয়তমা কন্যাকে দান করিয়াছেন, ইহাদের কি দোষ?’

‘পাগলিনী হৈয়া কন্যা জলে ডুবতে চায়,

বাউরা কন্যাকে তোমার ঘরে রাখা দায়।’

‘মহারাজ, তোমার কন্যার কথা কি বলিব! স্বামীহারা সতীসাক্ষীর দশা চোখে দেখুন,—সে একবার গলায় দড়ি দিতে গিয়াছে, আরবার বিষ খাইয়া মরিতে চাহিয়াছে। সারারাত্রি তোমার পাগলিনী মেয়েকে যেভাবে রাখিয়াছি, তাহা আর কি বলিব—তাহাকে বাঁচাইতে পারিবে না। অবিলম্বে বন্দীশালায় যাইয়া জামাইকে মুক্তি দিন, আমি ইহার কষ্ট আর সহ্য করিতে পারিতেছি না।’ এই বলিয়া পুনাই মুর্ছিত হইয়া পড়িল। অসম্বৃতকেশপাশ, সেই মহিমাম্বিত জেলেরমণীকে দরদের একখানি জীবন্ত মূর্তির মত দেখিয়া লোকেরা তাহার পশ্চাতে রোক্তদ্যমানা নিশ্চল পাষণমূর্তির ন্যায় কুমারীকে দেখিতে পাইল।

রাজা সমস্তই জানিলেন। তিনি স্বয়ং কারাগারে যাইয়া নিজহস্তে বন্দীর বন্ধন মুক্ত করিয়া দিলেন। সেই সঙ্গে সমস্ত বন্দীই মুক্তি পাইল।

‘সকরুণ মন রাজা ভাসায়ে চক্ষের জলে।

পাত্রমিত্র জনে রাজা বুঝাইয়া বলে॥

রাজার আদেশে হৈল বিয়ার আয়োজন ।  
 বন্দীখানা হৈতে মুক্তি পাইল মদন॥  
 হাতী দিল ঘোড়া দিল আর জমি বাড়ী ।  
 জামাই কন্যারে লেখা দিল বাড়ীর জমিদারী॥  
 বাড়ীতে বাঁধিয়া দিল বারদুয়ারী ঘর ।  
 রূপবতী লইয়া জামাই যায় নিজ ঘর॥

### আলোচনা

রূপবতী পালাটী সত্যঘটনা-মূলক। আদত গানটীতে যে সকল নাম ছিল, তাহা সংগ্রাহক শ্রীযুক্ত চন্দ্রকুমার দেব অনুরোধে আমি পরিবর্তন করিয়া ফেলিয়া কাহিনীটী আইনের চোখে নিরাপদ করিয়াছি। পালাটীর দুইটী সংস্করণ আমি পাইয়াছিলাম, একটীর সঙ্গে অপরটীর মূলগত সামঞ্জস্য থাকিলেও কোন কোন বিষয়ে পার্থক্য ছিল।

একটী পালায় কথিত হইয়াছে, রাজা বাড়ী ফিরিয়া মুসলমানের হাতে কন্যা সমর্পণ করা অপেক্ষা বাড়ীঘর ও রাজত্ব ত্যাগ করিয়া বনবাসী হইবেন, এই স্থির করিয়াছিলেন। কিন্তু সমস্ত ত্যাগ করিয়া যাইবার পূর্বে এই সঙ্কল্প করিলেন যে, পরদিন প্রভাতে যাহার মুখ দেখিবেন, তাহারই হস্তে কন্যাটীকে সমর্পণ করিয়া যাইবেন। রাজা তাঁহার অভিপ্রায় রাণীকে জানাইলে রাণী তাঁহাদের বাড়ীর তরুণ অধস্তন কর্মচারী মদনকে গোপনে ডাকিয়া আনিয়া বলিলেন, ‘তুমি রাজার শয়নকক্ষের পার্শ্বে সারা রাত্রি থাকিয়া পাহারা দিবে। রাজা দরজা খুলিলে, হাজির হইয়া তাঁহার আদেশ প্রতীক্ষা করিবে।’

মদন অতি সুদর্শন, অল্পবয়স্ক, কর্মঠ ও বিশ্বাসী লোক ছিল। এই মহাবিপদ ঘাড়ে করিয়া স্বজাতীয় কোন বড়লোকের ছেলে বিবাহ করিতে রাজী হইত না। বিশেষ বিবাহ খুব গোপনে নির্বাহিত হইবে, যেন এ সংবাদ ঘুণাঙ্করেও মুর্শিদাবাদে না পৌছিতে পারে—রাজবাড়ীর এক সামান্য সরকারের নিশাকালে রাজকন্যাকে পত্নীস্বরূপ গ্রহণ ও রাজবাড়ী ত্যাগ এমন একটা কিছু ঘটনা নয়, যাহা লইয়া মুর্শিদাবাদ পর্যন্ত একটা হৈ চৈ হইতে পারে, কিম্বা সন্দেহের উৎপত্তি হইতে পারে। এইজন্য রাণী উপস্থিত বিপদের মধ্যে যথাসম্ভব সুবিধাজনক এই ব্যবস্থা করিতে সম্মত হইয়াছিলেন। রাজা অতি প্রত্যাশে উঠিয়া মদনের মুখ দেখিয়া একটুকু বিশ্বাসের ভাবে জিজ্ঞাসা করিলেন, ‘তুমি এত ভোরে আমার শয়নগৃহের কাছে কি করিতেছিলে?’ মদন নতমস্তকে উত্তর করিল, ‘আমি ৬ বৎসর যাবৎ মহারাজার বাড়ীতে কাজ করিতেছি এবং আমি অন্দর-বাড়ীতে সর্বদা যাতায়াত করিয়া থাকি, মহারাজার কোন প্রয়োজন হইতে পারে—এইজন্য আদেশ প্রতীক্ষায় আমি এখানে আছি।’

রাজা মনে মনে কতকটা খুসীই হইয়াছিলেন, কারণ পদ ও জাতি হিসাবে অযোগ্য হইলেও মদনের অনেক গুণ ছিল। সুতরাং নিতান্ত বিপদে পড়িয়া একরূপ লোকের হস্তে রূপবতীকে সমর্পণ করা বরং কতকটা ভাল, এইজন্য ভৃত্যের অসময়ে তথায় উপস্থিতির



প্রশ্ন লইয়া কালক্ষয় ও লোক-জানাজানির সুবিধা না দিয়া রাজা পরদিন রূপবতীর সঙ্গে মদনের বিবাহের ঘোষণা করিয়া দিলেন।

পালাটীর এই অংশ নিতান্তই অবিশ্বাস্য। বহু পূর্ব হইতে এরূপ অনেক রূপকথা এদেশে প্রচলিত আছে যে, মুশকিলে পড়িয়া রাজা প্রতিজ্ঞা করিয়া বসিয়াছেন, 'কাল সকালে উঠিয়া যাহার মুখ প্রথম দেখিব, তাহার সহিত আমার কন্যার বিবাহ দিব।' এই চির-প্রচলিত রূপকথার অংশ কাহিনীটিতে জুড়িয়া দেওয়া হইয়াছে বলিয়া আমার মনে হয়, এই জোড়া খুব বেমানুম রিপুকার্য হয় নাই। রাজা ঢাক-ঢোল বাজাইয়া মদনের সঙ্গে তাহার কন্যার বিবাহ দিলেন। জানাজানি হইল, সুতরাং মুর্শিদাবাদের রোষাগ্নি তাহাতে নির্বাপিত হইবার কথা নহে, বরং বিপদ তো সমস্তই রহিয়া গেল, কেবল কন্যাটিকে একটি অপাত্রে দান করা হইল।

তদপেক্ষা অপর পালাটীর কথিত অংশ বিচারসহ ও সঙ্গত বলিয়া মনে হয়। তাহা আমার এই গল্পে দেওয়া হইয়াছে। ময়মনসিংহ-নীতিকায় দুইটীর অংশই দেওয়া হইয়াছে।

এই গল্পের প্রদত্ত ঘটনা অনুসারে রাণী স্বয়ং রাজার নিকটও বিষয়টি গোপন রাখিয়া দ্বিপ্রহররাত্রে মদনের হাতে রূপবতীকে দিলেন, কানা চৈতাকে (নৌকার মাঝি) বলা হইল সে যেন তাহার নৌকার যাত্রী দুইজন সম্বন্ধে কোনরূপ কৌতূহল না দেখায়, এবং তাহারা কে এবং কোথায় যাইতেছে প্রভৃতি না জিজ্ঞাসা করিয়া নদীর চৌদ্দ বাঁক পরে যে স্থান পাইবে, তাহা লোকালয় হউক, বা বিজন বনই হউক—সে সম্বন্ধে বিচার না করিয়া অতি প্রত্যাঘে ইহাদিগকে সেই স্থানে নামাইয়া দিয়া ফিরিয়া আসে।

ইহাতে রাজবাড়ীর কেহ, নৌকার মাঝি, এমন কি রাজা পর্যন্ত এই গোপনীয় বিবাহ সম্বন্ধে কেহই কিছু জানিতে পারিলেন না। রাজা পরদিন জাগিয়া শুনিলেন, কন্যাটি রাজপুরী হইতে পলাইয়া গিয়াছে এবং মদনকেও পাওয়া যাইতেছে না। সকলের নিকটই বিষয়টি স্বাভাবিক বোধ হইল। মুসলমানের হাতে যাইয়া পড়ার অপেক্ষা এইরূপ পলায়ন করিয়া আত্মরক্ষা করা রাজকুমারীর পক্ষে অস্বাভাবিক নহে, সকলেই এই কথা ভাবিল। পরদিন যখন রাজার আদেশে টেঁড়া পিটাইয়া প্রচার করা হইল যে দুষ্ট ভৃত্য তাহার জাতি-কুলে কলঙ্ক দিয়া রাজকুমারীকে লইয়া পলাইয়াছে, তাহাকে ধরাইয়া দিলে রাজা পুরস্কার দিবেন এবং অপরাধী ভৃত্যকে কালীর নিকট বলি দিবেন, তখন এই রাজরোষ স্বতঃই হইয়াছিল, কারণ প্রকৃত ঘটনা রাজা কিছুই জানিতেন না এবং এ সংবাদ শুনিয়া মুর্শিদাবাদের নবাবও রাজার প্রতি বরং সহানুভূতিপ্রায়ণ হইয়াছিলেন।

রাণী কর্তৃক রাজকুমারীকে দানের কথা অবশ্য রাজা পরে শুনিয়াছিলেন। খড়ের আশুন যেমন দাউ দাউ করিয়া জুলিয়া উঠে এবং তাহা নিবিয়া যাইতেও গৌণ হয় না, নবাবদিগের লালসায় বাধা পড়িলে যেমন সহসা তাহারা ফ্রুদ্ধ হন কতকটা সময় অতীত হইলে সে ক্রোধ আর বেশী থাকে না। সুতরাং তারপরে মদনকে এজন্য আর কোন লাঞ্ছনা সহ্য করিতে হয় নাই।

এই গল্পটির আদ্যন্ত একটী কান্নার সুর আছে ; নবাবের আদেশ পাওয়ার পর হইতে রাজা ও রাণীর দুঃসহ মনোবেদনা ও দুষ্টিতার কথা বেশ আন্তরিকতা ও দরদ দিয়া রচিত হইয়াছে। গল্পটি আদ্যন্ত কৌতুহলোদ্দীপক।

চরিত্র হিসাবে রূপবতীর চিত্রটি কোন অসামান্য বৈশিষ্ট্য বা গুণপনার পরিচায়ক না হইলেও উহা একটী নিখুঁত ছবি। কোন কোন ছোট ফুল একরূপ দেখা যায়, যাহার সুরভি দূরের বাতাস পর্যন্ত পৌছায় না ; কিন্তু কাছে আনিলে বুঝা যায় ফুলটি সুঘ্রাণে ভরপুর। রূপবতী যে সকল অবস্থায় সঙ্কটের ভিতর দিয়া দ্রুত চলিয়াছেন, তাহার কোনটীতেই তাঁহার গুণপনার টের পাওয়া যায় নাই। হিন্দু পারবারের কুমারীরা অনেক সময়েই মাটির পুতুলের মত, তাহাদের মনোবৃত্তি সর্বৎসহা ; যে পর্যন্ত ভাঙ্গিয়া না যায়—সে পর্যন্ত সকল অবস্থার সঙ্গেই তাহা নিজকে মানাইয়া চলিতে পারে। তাহার গভীর মনোবেদনা বা চাঞ্চল্য সহজে বুঝা যায় না, গভীর কূপের মত তাহা নিম্নে অজস্র জল-সঞ্চয় ধারণ করিয়াও বাহিরের স্বল্পপরিসর উপরিভাগে সেই গভীরতার কোন লক্ষণই দেখায় না।

কিন্তু যেদিন স্বামীর বিপদের কথা রাজকুমারী শুনিল, সেদিন তাহার চিত্তের সমস্ত কারুণ্য ও ভালবাসা যেন উৎসারিত হইয়া উঠিল ; এই সুকুমারী নববধূটির মনে যে নীরবে কত রস-ধারা সঞ্চিৎ ছিল তাহার গোপন আশা ও আকাঙ্ক্ষার কথা সেদিন বাহির হইয়া পড়িল। তাহার বড় সাধ ছিল যে শীতলপাটী পাতিয়া স্বামীর সঙ্গ-সুখ লাভ করে, ঘিয়ের বাতি জ্বলাইয়া সারারাত্রি তাঁহার চন্দ্রমুখখানি দেখিয়া কাটায়,—প্রতি প্রভাতে শিবপূজার ফুলের মত বাগানের ফুল কুড়াইয়া স্বামীর জন্য মালা গাঁথে এবং নিজে উৎকৃষ্ট শালীধানের ভাত রাঁধিয়া উষ্ণ ঘোঁয়া থাকিতে থাকিতে তাহা পরিবেষণ করিয়া কাছে বসাইয়া খাওয়ায়—সে রাজবাড়ীর স্বর্ণপালঙ্ক, মণিমুক্তার অলঙ্কার, হাতীঘোড়া, যানবাহন, স্বর্ণ-রৌপ্যমণ্ডিত জলটুঙ্গী ঘর বা আরামগৃহ—এ সকল কিছুই আকাঙ্ক্ষা করে নাই, কিন্তু হিন্দু বধূদের নিভৃতহৃদয়ের যে সকল যাক্সা জানাইয়াছে, তাহা এদেশের রাজবাড়ীতে সম্রাজ্ঞী হইতে কুটীরবাসিনী সকল রমণীরই অতিপ্রার্থিত ; এই অধ্যায়ে রূপবতী বস্ত্রের বধূরূপে ধরা দিয়াছে।

দ্বিতীয় চরিত্র পুনাই,—তাহার হৃদয়ে রূপবতীর জন্য যে কি অসামান্য প্রীতি ছিল, তাহা রাজবাড়ীতে তাহার খেদোক্তিতে বুঝা যায়। দরবারে সশস্ত্র সৈন্য ও দেহরক্ষীদের বিতীষিকা এবং সভাসদগণের উগ্র প্রশ্ন-জিজ্ঞাসা কিছুতেই সে ভড়কাইয়া যায় নাই, বরং রাজার প্রতি ক্রোধ-প্রবণা মুখরা কলহকারিণীর মনের ক্ষোভ গ্রাম্য ভাষায়ই সে ব্যক্ত করিয়াছে। এই অকুণ্ঠিত বিক্ষোভ ও ক্রোধের ভাষা তাহার ধর্মকন্যার প্রতি আবেগময় স্নেহ হইতেই উৎসারিত হইয়াছিল। এই অসংযতবাক পাড়াগেয়ে মেয়েটির চরিত্রের সরলতা ও উচ্ছ্বাস আমাদিগের খুব ভাল লাগিয়াছে।

গল্পটি দুইশত বৎসর পূর্বে রচিত হইয়াছিল। রচক ইচ্ছা করিয়াই তাঁহার নামধাম গোপন রাখিয়াছেন।

## তিলক-বসন্ত

রাজ্য-বিলোপ ও কাঠু রিয়াদের আশ্রয়

একদা এক ত্রিপাদবিশিষ্ট (তেঠেজা) কর্ম-পুরুষ-দেবতা রাজা তিলক-বসন্তের উপর বিরূপ হওয়াতে রাজার ধনজন-ঐশ্বর্য কর্পূরের মত উবিয়া গেল।

তাঁহার হাতীঘোড়া যানবাহনের অবধি ছিল না; দ্বারে দ্বারে খাড়া পাহারা ছিল, কিন্তু নিশির স্বপ্নের মত সে সকল অন্তর্হিত হইল। রাজমন্দিরের চূড়া চন্দ্রসূর্যকে যেন স্পর্শ করিয়া হাসিতে থাকিত।

‘দুয়ারে দুয়ারে পাহারা, রাজমন্দিরের চূড়া,  
চাঁদ-সূর্যজ ঝুঁইয়া হাসে।’

সে সব কোথা গেল? কোথায় গেল, কুবেরের মত ধনভাণ্ডার?

‘সোণার মন্দিরে জ্বলে বাতি  
সোণার পশরা।\*  
ধীরে ধীরে সেই দীপ  
হল আধিয়ারা’।\*\*

রাজা রাজধানীত্যাগপূর্বক পলাইয়া বনে চলিলেন। রাণীকে কত করিয়া বলিলেন রাজপ্রাসাদে থাকতে। রাণী সম্মত হইলেন না,

‘জোড় মন্দিরে ঘর সোণার কপাট,  
আমি নাহি চাই রাজা সোণার পালং\*\*\* খাট ॥  
বনের কুটীরে গো রাজা অঞ্চল বিছাইব।  
মাটির মঞ্চতে\*\*\*\* শুইয়া সুখে নিদ্রা যাব ॥  
বৃক্ষতলা বাড়ীঘর পাতায় বাঁধিও।  
সেই ঘরে অভাগীরে পদে স্থান দিও ॥

\* পশরা = আলোর প্রবাহ।

\*\* আধিয়ারা = আধার

\*\*\* পালং = পালঙ্ক।

\*\*\*\* মঞ্চতে = মাচায়।



দুইজনে মিলি বনফল কুড়াইয়া খাইব ।  
পাতার কুটীরে দৌহে সুখে গৌয়াইব ॥  
বনের যত পশুপক্ষী তারা সদয় হবে ।  
আপনা বলিয়া তারা আমাদের লবে ॥\*\*\*\*\*

রাজা কিছুতেই রাণীকে এড়াইতে পারিলেন না । রাণীর নাম ‘সুলা’\*\*\*\*\*  
সুলারাণী রাজার সঙ্গে চলিতে চলিতে এক ঘন গহীন অরণ্যে প্রবেশ করিলেন ।  
সেখানে শত শত কাঠুরিয়া কাঠ কাটিতেছিল,

‘বনে থাকে কাঠুরিয়া,  
বুক ভরা দয়া মায়া ;  
গাছ কাটে বৃক্ষ কাটে,  
বিকায় নিয়া দূরের হাটে;  
শাল চন্দন তাল তমাল আর যত,  
বৃক্ষের নাম আর কইব কত ।  
কাট বিকাইয়া খায়,  
এক রাজার মূলুক থেকে  
আর রাজার মূলুকে যায় ।’

সুতরাং তারা একশ্রেণীর যাযাবর জাতি । তারা,

‘বনের ফল খায় ।  
পাতার কুড়ায়’\*\*\*\*\* শূয়ে সুখে নিদ্রা যায় ॥’

তাদের বর্ণনায় গ্রাম্য সৌন্দর্য ও সরলতা কবি সুন্দরভাবে আঁকিয়া দেখাইয়াছেন,

‘মুখ ভরা হাসি চাঁদের ধারা ।  
না জানে ছল—না জানে চাতুরী তারা ॥  
বনে গমন বনের পথে ।  
বাঘ ভালুক যায় সাথে সাথে ॥  
পথে পাইয়া কুড়ায় ফল, কুড়ায় ময়ূরের পাখা ।  
ধার্মিক রাজা—রাণীর সঙ্গে হৈল পথে দেখা ॥’

রাজা ও রাণীর সুগঠিত দেবমূর্তি দেখিয়া তাহারা চমৎকৃত হইয়া জিজ্ঞাসা করিল,  
‘কে তোমরা গো ; তোমরা তো নিশ্চয় কোন দেশের রাজা ও রাজকন্যা । এ  
ঘোর জঙ্গলে তোমরা কেন আসিয়াছ ?

\*\*\*\*\* আপনা বলিয়া...লবে = তাহারা আমাদের আশ্রয় আপনাদের জন বলিয়া গ্রহণ করিবে ।

\*\*\*\*\* সুলা = সম্ভবতঃ ‘সুলক্ষণা’ শব্দের অপভ্রংশ ।

\*\*\*\*\* কুড়ায় = কুটীরে ।

‘এখানে আথালের\* ধন পাথালে\*\* পড়ে।  
 বাঘ ভালুক বসতি করে ॥  
 দানা আছে ডাইনি আছে।  
 এই বনে কি আসতে আছে?  
 রূপে গুণে ধন্যা।  
 ওগো তুমি কোন্ রাজার কন্যা?  
 এমন দীঘল কেশ—পরনে পাটের শাড়ী।  
 তুমি কোন্ রাজার মেয়ে গো, তুমি কোন্ রাজার নারী?  
 সজ্জে তোমার কে? এ কি তোমার পতি?  
 পতি থাকিতে তোমার এতেক দুর্গতি!’

রাণী কাঁদিয়া নিজের পরিচয় দিলেন, ‘তোমারা যাহা বলিলে এককালে তাহা আমার সকলই ছিল, এখন কিছুই নাই, কর্ম-পুরুষ সকলই কাড়িয়া লইয়াছেন। আমার দুঃখ সহিতে সহিতে শরীর হইতে দুঃখ-বোধ লুপ্ত হইয়াছে—’

‘আমার দুঃখ নাই।  
 কাটিয়া ফেলিলে অজ্ঞে ব্যথা না সে পাই ॥’

\*

\*

‘কানা কড়া সজ্জে নাহি কি হবে উপায়।  
 তিন দিন উপোসী রাজা কাঁদিয়া বেড়ায় ॥  
 সোণার না হস্ত উড়ত যার শিরে।  
 গাছের পাতা দিয়া রৌদ্র বারণ করে ॥  
 অজ্ঞেতে বসন নাহি পরনে নাহি ধটি।\*\*\*  
 ভাবিয়া সোণার অজ্ঞ হইয়াছে মাটি ॥’

এই কাঠুরিয়াদের কি আশ্চর্য দরদ ও মমতা, তাহারা কেহ কোন বক্তৃতা করিল না; কেহ বন হইতে নিজ বকুলবাসের ঝুঁটিতে ফল পাড়িয়া লইয়া আসিল, কেহ দূর নদী হইতে পাতার পানপত্রে নির্মল জল লইয়া আসিল, কেহ গাছের ডাল ভাজিয়া ইহাদের মাথায় বাতাস করিতে লাগিল। কেহ বা মধুর চাক ভাজিয়া মধু আনিয়া রাণীকে খাইতে দিল, কেহ বা রাজা-রাণীর দুঃখের কথা শুনিয়া ‘হায় হায়’ করিয়া কাঁদিতে লাগিল। তাহাদের এতখানি দরদের পরিচয় পাইয়া :—

‘রাজা-রাণীর চক্ষের জল ঝরে।  
 এমন সোহাগ মায় না করে ॥’

কেবল ইহাই নহে, পরদিন হইতে তাহারা রাজা ও রাণীর জন্য ঘর বাঁধিতে লাগিয়া গেল।

\* আথালের = যত্নের। \*\* পাথালে = বনজঙ্গলে

\*\*\* ধটি = ধুতি।

কেহ গাছে উঠিয়া কুড়ুলের কোপে বড় বড় গাছের ডাল কাটিতে লাগিল। পূব-দুয়ারী ঘর বাঁধিল, মধ্যে মধ্যে শক্ত শালের খুঁটি। রাজবাড়ী হইবে,—ঘর উঠিল পাঁচতলা। চারিদিকে কলরব, কেহ জিজ্ঞাসা করিতেছে, কেহ উত্তর দিতেছে,—সকলে মিলিয়া দিন রাত্র কাজ করিয়া তাহারা অল্প-সময়ের মধ্যে বাড়ী-নির্মাণ শেষ করিল।

শাল গাছের পাতা সাত পঙক্তি করিয়া রাজা-রাণীর শয্যা তৈরী হইল :—

‘সাত পরতে শাল বৃক্ষের পাতার বিছানি\*’

সেই ঘরে থাকবেন রাজা আর রাণী॥

কাঠুরিয়াগীদের সঙ্গে রাণী বনে যাইয়া ময়ূরের পাখা কুড়াইয়া আনেন। বৃন্দ কাঠুরিয়াগীরা রাণীমাকে ঘিরিয়া বসিয়া থাকে—সেই লোকেরা যেন তাঁর কত কালের গোলাম!

এদিকে কুড়ুল কাঁধে করিয়া রাজা কাঠুরিয়াদের পেছনে কাঠ সংগ্রহ করিতে নিবিড় বনে যান ; বনের যে অংশ চন্দনের গন্ধে আমোদিত, রাজার সেইদিকে আনাগোনা বেশী।

অনেক সময় রাজা কাঠুরিয়াদের সঙ্গে বনে রাত্রিবাস করেন।

এইভাবে রাজা তিলক-বসন্ত কাঠুরিয়াবেশে সেই জঙ্গলে ৪০ দিন কাটাইলেন।

চন্দনকাঠ বিক্রয় করিয়া সেদিন রাজা এক কাহন কড়ি লাভ করিয়াছেন।

তিনি হাসি মুখে রাণীকে বলিলেন ‘আজ কাঠুরিয়াদের নিমন্ত্রণ করিয়া খাওয়ানো যাক্, তুমি তো রাঁধিতে পরিবে?’ রাণী বড়ই আনন্দিত হইয়া রান্নাঘরে রাঁধিতে গেলেন। একখানি গামছা কাঁধে ফেলিয়া রাজা কাঠুরিয়াদের নিমন্ত্রণ করিয়া আসিলেন এবং বাজারে যইয়া দ্রব্যাদি কিনিয়া আনিলেন। তারপর রাণীকে বলিলেন, ‘এই বনে অনেক চন্দন গাছ আছে, এবার কাঠ কাটিয়া আমরা অনেক সোণা পাইব।’

রাণী অনুপূর্ণার মত রাঁধিতে বসিলেন, শাল পাতা দিয়া অনেকগুলি ডুঙ্গা\*\* প্রস্তুত করিয়া ৩৬টা ব্যঞ্জন ভিন্ণ ভিন্ণ পাত্রে রাখিলেন। তারপরে পায়স ও পিষ্টক অনেক রকমের তৈরী হইল। ডুঙ্গাগুলি ভর্তি হইয়া গেল। উৎকৃষ্ট ‘চিকনিয়া’ চালের ভাত তালপাতের থালায় রক্ষিত হইল, তাহাদের সুবাসে সমস্ত বন আমোদিত হইল এবং উষ্ণ অনু-ব্যঞ্জন হইতে মনোরম স্বাণ উথিত হইতে লাগিল এবং সুগন্ধ ধোঁয়ায় ক্ষুধার উদ্বেক করিতে লাগিল। রাণী রাঁধিয়া বাড়িয়া নিজে তৃপ্তি বোধ করিলেন এবং কাঠুরিয়াগীদিগকে বলিলেন, ‘চল, আমরা এইবার নদীতে স্নান করিয়া আসি।’ এক একটা মেটে কলসী লইয়া কতক কতক কাঠুরিয়াগী রাণীর সঙ্গে চলিল।

\* বিছানি = বিছানা শয্যা

\*\* ডুঙ্গা = পাত্র।

## জাহাজ উদ্ধার ও রাণীকে লইয়া পলায়ন

কোন ক্ষুধার্ত ব্রাহ্মণের অভিশাপে এক বণিকের চৌদ্দখানি মাল-বোঝাই জাহাজ সেই নদীর চরে আটকাইয়া গিয়াছিল ; অতিথি ক্ষুধার পীড়নে হাত পাতিয়া কিছু সাহায্য চাহিয়াছিল, কিন্তু মাঝিরা মনের স্ফূর্তিতে সারি গাহিয়া যাইতেছিল, তাহারা অতিথির কাতর নিবেদন গ্রাহ্য করে নাই।

ডিজিগুলি চরায় আটকাইয়া যাইবার পর যাত্রীদের হুঁস হইল। তখন বণিক অনেক আর্তনাদ ও কান্নাকাটি করার ফলে দৈববাণী হইল, কোন সতী নারী তোমার জাহাজ ছুঁইয়া দিলে—আবার তাহারা জলে ভাসিবে।’

সেই নদীর তীরে সতী নারীর খোঁজে যখন সাধু ব্যাকুল ভাবে সন্ধান করিতেছিলেন, তখন একদল কাঠুরিয়াণীর মধ্যে অলোকসামান্য রূপসী রাণী সেই ঘাটে আসিয়া পড়িলেন।

তাহার চাঁদের মত মুখখানি এবং মূর্তিমতী পতিপরায়ণতার জ্বলন্ত তেজ দেখিয়া মাঝিমাল্লা ও বণিক সকলেই চমৎকৃত হইল। ‘কোন রাজমহিষী এই বনে রাজার সঙ্গে আসিয়া পথ হারাইয়া কাঠুরিয়াণী সাজিয়াছেন’, সকলে এই বলাবলি করিতে লাগিল।

বণিক গলায় কাপড় বাঁধিয়া যাইয়া সুলারানীকে ভূমিষ্ঠ হইয়া প্রণামপূর্বক কঁাদিতে কঁাদিতে তাদের অবস্থা জানাইল। রাণী স্বভাবতঃই করুণাময়ী, দুঃখ কষ্টে পড়িয়া এবং দরিদ্র কাঠুরিয়াদের মধ্যে থাকিয়া সেই স্বভাবতঃ স্নেহপ্রবণ প্রকৃতি আরও দয়াশীল হইয়াছে। তিনি বণিকের দুঃখে বিগলিত হইয়া প্রত্যেকটী জাহাজকে কর দ্বারা স্পর্শ করিলেন।

‘সদাগরের ডিজি রাণী পরশ করিল।

চৌদ্দখানি ডিজা অমনই ভাসিয়া উঠিল।’

কাঠুরিয়াণীরা অবাক, মাঝিমাল্লারা অবাক, বণিক রাণীর পায়ে পড়িয়া তাহার হৃদয়ের কৃতজ্ঞতা জানাইল। কিন্তু মাঝিরা তাহাকে বলিল, ‘প্রভু, দরিয়ার বিপদ আপনার অবিদিত নাই, আবার এই সকল মাল-বোঝাই ডিজি যাইয়া কোন্ চরায় ঠেকে তাহার ঠিকানা নাই, এই দেবীকে আমরা কিছুতেই ছাড়িয়া যাইব না।’ সদাগরের অনিচ্ছাসত্ত্বেও মাঝিমাল্লারা জোর করিয়া রাণীকে ডিজগায় তুলিয়া লইল।

রাণী বিপদে পড়িয়া কর্ম-পুরুষের নিকট প্রার্থনা করিলেন—‘এই পুরুষগুলি আমার অঙ্গ স্পর্শ করিয়াছে, হে দেবতা তুমি কুড়কুঠ দিয়া আমার রূপ ধ্বংস কর, আর যেন কেহ আমারে না ছোঁয়।’

যখন মাঝিরা ডিজা বাহিয়া চলিয়া গেল, তখন কাঠুরিয়াণীদের দিকে চাহিয়া রাণীর কি মর্মাস্তিক কান্না! ‘আমার পাগল রাজাকে তোমরা চারিটা খাওয়াইও। বড় সাধের ভাত-বেন্নন পড়িয়া রহিল, কাঠুরিয়ারা শ্রান্ত ও ক্ষুধার্ত হইয়া আসিয়া কি খাইবে, কে পরিবেষণ করিবে? রাজা হয়ত ক্ষুধাতৃষ্ণা ভুলিবেন, খাইতে চাহিবেন না,—তোমরা আমার প্রাণপতিকে বাঁচাইয়া রাখিও। তোমাদের মনের স্নেহ আমি



জানি, আমি রাজ্যহারা হইয়া পাতার বিছানায় রাজ্যসুখ পাইয়াছিলাম, আজ বিধাতা তাহা কাড়িয়া লইলেন, এই চৌদ্দ জাহাজ কোন্ দূর বন্দরের দিকে যাইতেছে, তাহা জানি না। আমি আর আমার স্বামীর মুখখানি দেখিব না, তোমরা আমার বড় প্রিয়জন, অন্তরঙ্গ—তোমাদের মুখ আর দেখিব না, তোমরা আমাকে দুঃখের সমুদ্রে ফেলিয়া চলিলে।’ বিলাপের সুর ঢেউয়ের উপরে বহু দূর পথে ভাসিয়া আসিতে লাগিল, দেখিতে দেখিতে রাণী আর সহচরীদিগকে দেখিতে পাইলেন না, তখন সদাগরের দিকে দৃষ্টি পড়িল ; তিনি জোড় হস্তে কর্ম-পুরুষের উদ্দেশে বলিলেন, ‘এই সাধু রাক্ষস ; কি দোষে ভাগ্যহীন, রাজ্যহীন অভাগীর সর্বশ্রেষ্ঠ সুখ হইতে বঞ্চিত করিল? আমার পাগল স্বামীর সজা হইতে আমাকে কাড়িয়া লইল? হে দেবধর্ম—তুমি আবার চরায় এই চৌদ্দ জাহাজ ঠেকাইয়া দাও।’ কর্ম-পুরুষ তাঁহার কথা শুনিলেন, তাঁহার প্রার্থনায় তাঁহাকে কুষ্ঠরোগ দিলেন। তাঁহার রূপের বনে আগুন লাগিল, তাঁহার হাত পা খসিয়া পড়িতে লাগিল এবং সমুদ্রের মধ্যে সহসা এক চরা পড়িয়া চৌদ্দ জাহাজ প্রলয় শব্দে তাহাতে আসিয়া ধাক্কা খাইল এবং শরাহত ঐরাবতের মত কাত হইয়া একদিকে শূইয়া পড়িল।

মাঝিমাঝারা ইহার পূর্বেই এই রমণীর দৈব-শক্তির পরিচয় পাইয়াছিল, এবার হতবুদ্ধি হইয়া বলিল—‘এক মুহূর্তও আর ইহাকে ডিজাতে রাখার প্রয়োজন নাই, নতুবা বিপদের অন্ত থাকিবে না। এখনই ইহাকে নামাইয়া দেওয়া উচিত।’ তাহাদের আর রাণীকে স্পর্শ করিতে হইল না, রাণী স্বয়ং বহু কষ্টে সেই অজ্ঞাত প্রদেশের সিকতা-ভূমিতে নামিয়া পড়িলেন।

রাজার কাঠুরিয়াদের কুটীর ত্যাগ ও নূতন রাজার

মূলুকে প্রবেশ : রাজকন্যাকে বিবাহ

রাজা তিলক বড় আনন্দে বন হইতে বাড়ী ফিরিয়াছেন ; আজ অনেক চন্দন কাঠ পাওয়া গিয়াছে, ‘রাণী দেখ আসিয়া, আজ বড় লাভের কাঠ কাটা হইয়াছে। দূর নগরে এই কাঠ সোনায় বিক্রী হইবে। আহা কাঠুরিয়াদের বড় ক্ষুধা পাইয়াছে, রান্নার আর বিলম্ব কত, তুমি ভাত বাড়িয়া রাখ, আমরা স্নান করিয়া আসি।’ এই বলিয়া রাজা রান্না ঘরের কাছে দাঁড়াইয়া রাণীকে ডাকিতে লাগিলেন। কে উত্তর দিবে? পাগলের মত রাজা এদিক ওদিক খুঁজিতে লাগিলেন। কাঠুরিয়াগীরা তাঁহাকে সমস্ত কথা বলিল, তাহাদের চক্ষু অশ্রুপ্রাবিত, তাহারা একটা কথা বলিতে যাইয়া আর বলিতে পারে না, ‘হায়’ ‘হায়’ করিয়া কাঁদিতে থাকে।

রাজা পাগলের মত হইয়া গেলেন, তিনি বিলাপ করিয়া বলিলেন ;—‘আমি রাজ্যহারা হইয়াও এই বনে রাজ্যসুখ পাইয়াছিলাম, আমার পাতার বিছানা আজ খালি হইল, আমার বাড়ী ভাতে কে ছাই দিয়া গেল? এই পাতার কুটীর, আমার বড় আদরের, কিন্তু এখন আর ইহাতে প্রয়োজন নাই’ :—

‘যাহার সুখের লাগি কাটিতাম কাঠ।

যে জন আছিল আমার সুখের রাজ্য—পাট।

‘আর না থাকিব আমি এই গহিন বনে।  
বিদায় দেও কাঠুরিয়া যাব অন্য স্থানে॥’

এই কথা শুনিয়া কাঠুরিয়াদের বসতি-স্থানে কান্নার রোল পড়িয়া গেল। তাহারা রাজাকে অনেক বুঝাইয়া-শুঝাইয়া সান্ত্বনা করিতে চেষ্টা পাইল, রাজার শোকে আর রাণীকে হারাইয়া তাহাদের মন জ্বলিয়া পুড়িয়া থাক হইয়া যাইতেছিল। তাহারা বলিল, রাত্রি প্রভাত হইলে তাহারা নানা দিকে দল বাঁধিয়া রাণীর খোঁজে বাহির হইবে, এবং যেরূপে পারে তাঁহাকে খুঁজিয়া আনিবে। রাজার সে সকল কথা কানে গেল কিনা বুঝা গেল না।

তাঁহার সে পর্ণকুটার-রাজবাড়ী—একটু দূরে ছিল, তিনি শেষরাত্রে সেই পাতার গৃহে আগুন লাগাইয়া দিলেন, এবং নিজে একদিকে চলিয়া গেলেন, কাঠুরিয়ারা আর তাঁহাকে দেখিতে পাইল না।

তাহারা প্রাতে উঠিয়া ‘হায়! হায়! পাগল রাজা গেল কোথাকারে?’ বলিয়া কাঁদিতে লাগিল।

আর এক রাজার মূলুক। মস্তবড় রাজা, তাঁহার বাড়ীর হাজার দুয়ারে হাজার কোটওয়াল খাড়া; হাতী-ঘোড়া, দাস-দাসী, সৈন্য-সামন্তের অন্ত নাই। সাত ছেলে ও এক কন্যা। কন্যা পরমা সুন্দরী, চারিদিকের রাজপুত্রেরা তাহাকে বিবাহ করিতে চায়, কিন্তু রাজার কাহাকেও পছন্দ হয় না।

একদিন রাণী সোণার গাভুতে রাজার ঘরের শীতল জল আনিতে কন্যাকে বলিলেন, দাসী-পরিচারিকাদিগকে না বলিয়া কন্যাকেই জল আনিতে রাজার ঘরে পাঠাইলেন। ঘুমের ঘোরে একটি চোখের কোণে রাজা তাহাকে দেখিলেন না, নিজ কন্যাকে রাণী বলিয়া ভ্রম করিয়া তাহাকে পরিহাস করিলেন। কুমারী লজ্জায় পালাইয়া গেলেন। রাজা তখন নিজের ভ্রম বুঝিতে পারিয়া বড়ই লজ্জিত ও অনুতপ্ত হইলেন। তিনি স্থির করিলেন, ‘মেয়ে এত বড় হইয়াছে তাহা জানিতাম না। আর বিলম্ব করিব না, কাল প্রাতে উঠিয়া যাহার মুখ প্রথম দেখিব, তাহার হাতেই কন্যাকে সমর্পণ করিব।’

রাজার ফুলবাগানের মালীর অসুখ, কে যেন তরুণ যুবক তাহার হইয়া ফুল-বাগানে কাজ করিতেছে,—দেখিতে দেবতার মত সুন্দরন, শরীরে দেবতাদের মত জ্যোতি—এ কি কোন দেবতার অংশ? লোকে কেউ বুঝিতে পারে না, রাজবাড়ীতে এ নূতন মালী কে?

সে দিন

‘সকাল বেলা বাগানে ফুল ফোটে।  
আসমানেতে সূর্য ওঠে॥’

রাজা অভ্যাস অনুসারে প্রত্যুষে উঠিয়া বাগানে গিয়াছেন, প্রথমই সেই নূতন মালীর সঙ্গে তাঁর দেখা হইল।

‘রাজার দুই চোখ বাহিয়া পড়ে দরিয়ার পানি।  
এত বেছে\* তারপরে কন্যা হৈল মালীর ঘরনী।’\*\*

যাহা সম্ভব করিয়াছেন, তাহা ভাজিতে পারেন না। দৈবনির্বশেষ সেই মালীর সঙ্গেই রাজকুমারীর বিবাহ হইয়া গেল। রাজা বলিলেন—‘আমার বড় আদরের বড় সোহাগের এই পবনকুমারী,—যাহা অদৃষ্টে ছিল, হইয়াছে। কুমারী যেন ভাত-কাপড়ের কষ্ট না পায়।

বিবাহের কোন অনুষ্ঠান হইল না,—কিন্তু কন্যাসমর্পণ হইয়া গেল।

‘না বাজিল ঢোল, না বাজিল ডগড়া, না জ্বলিল বাতি।  
অভাগা মালী হৈল রাজকন্যার পতি।’

রাজা হুকুম দিলেন—‘বাহির-ভাঙারের ধান-চাল, মালীর গোলা ভর্তি করিয়া দেওয়া হউক।’

‘রাজার ক্রন্দনে পাষাণ গলে।  
রাণীর ক্রন্দনে দরিয়া ভাসে।’

মালী অনেক দুঃখ করিয়া রাজকুমারীকে বলেন—

‘কোন সে নিষ্ঠুর বিধি আমায় আনিল নগরে।  
চাঁদের সমান রাজ-কন্যা দুঃখ দিলাম তারে॥  
যে অঞ্জে ফুলের ঘা সহে না কুমারী  
নবীর দেহেতে তোমার শার কামুড়ি!  
তোমার বাপের বাড়ীতে কন্যা বিলিমিলি মশারী।  
খেঁড়ো চাটির বিছানায় রহিয়াছ পড়ি॥’

রাজকন্যা ঐচলে চক্ষু মুছিয়া বলেন—

‘আমার লাগিয়া পতি নাহি কর দুখ।  
তুমি যার আছ পতি তার সব সুখ॥  
দুই হস্ত তোমার পতি আমার স্বর্ণমালা।  
তোমার সোহাগের ডাক আমার কর্ণদোলা।’\*\*\*

\* এত বেছে = এত বিচার করিয়া অবশেষে। \*\* ঘরনী = গৃহিণী।

\*\*\* দোলা = দুল।

এই সকল অতি প্রাচীন পালা-গানের অংশ হইতে টের পাওয়া যায় যে কোমল অনুভূতি ও কল্প রসাত্মক রচনায় বাঙ্গালী নরনারী বহুপূর্বেই অগ্রসর হইয়াছিলেন। এদেশের মেয়েরা

তোমার পায়ের ধূলা অজ্ঞা-আভরণ  
 তুমি আমার হীরামণি তুমি সে কাঞ্চন ॥  
 নয়নের জলে পতি তোমার পা ধোয়াই।  
 সেই পা মুছাইয়া কেশে বড় তৃপ্তি পাই॥  
 সেই ত ধোয়া পানি কেশে শাচি তেল।  
 মা বাপের পুরীর সুখ নাহি চায় দেল\*  
 তোমার চরণ পতি আমার উত্তম বিছান।  
 ধরম করম\*\* তুমি জাতি কুলমান॥’

রাজকুমারী এইরূপ কথায় মালীর মনের জ্বালা দূর করেন। তাঁহার বৃহৎ ধানের গোলার সমস্ত ধান পবনকুমারী প্রার্থী দরিদ্রদিগকে বিলাইয়া দেন এবং এমন মধুর বাক্যে তাহাদিগকে আপ্যায়ন করেন যে তাহারা আর রাজবাড়ীতে যায় না, ‘মালীরাজা’র বাড়ীতেই ভিক্ষা করিতে যায়।

#### রাজকুমারদের বড় বহু

রাজার সাত পুত্র বসিয়া যুক্তি করে। বাগানের মালী, সে হইল কিনা ‘মালীরাজা’! বড় মানুষ হইয়াছেন, আমাদের চৌদ্দপুরুষের ভাণ্ডার দু-হাতে লুটাইয়া দিয়া প্রজাদের মধ্যে নাম কিনিতেছেন, এত বড় আস্পর্ধা! বুড়া রাজা না থাকিলে আজ ওকে দেখাইয়া দিতাম!’ ভাড়ারীদিগকে ডাকাইয়া আনিয়া রাজপুত্রেরা হুকুম দিলেন, ভাণ্ডার হইতে এক কণা জিনিসও যেন মালীর বাড়ীতে না যায়। ভাণ্ডারে তিনটি তালা পড়িল, তাহার এক তালার চাবি রাজকুমারদের হাতে।

সমস্ত কথা মহিষী শুনিলেন, মেয়ের জন্য তাঁহার প্রাণ দরদে ভরিয়া গেল। তিনি নিজ দাস-দাসীকে বলিলেন, ‘সংসারের জন্য যে সকল জিনিস রোজ রোজ আসে, তাহার খুদকণা যা থাকে, তাহা লুকাইয়া আমার কন্যাকে দিও।’

কথায় কথায় যে সকল ভাব প্রকাশ করিতেন, সেই ভাষার জাতীয় ভাণ্ডার হইতে বৈষ্ণব, শূদ্র, বাউল, পালাগানরচক প্রভৃতি সর্বশ্রেণীর বাজালী ভাব-সম্পদ আহরণ করিয়াছেন। ঊনবিংশ শতাব্দীর কবি কৃষ্ণকমলের ‘ভরত-মিলন’ হইতে নিম্নলিখিত অংশ উদ্ধৃত করিয়া দেখাইতেছি যে এই রচনা পূর্বানুবৃষ্টি মাত্র :

‘ভাই শত্রুঘ্ন, কররে ধারণ এই আমার গজমোতি হার,  
 আমার হিয়ার আভরণ শ্রীরাম চরণ, এ হার হারে কি কাজ আর।  
 আমার কর্ণের কুন্ডল খুলে নেরে,  
 আমার শিরে জটা বেঁধে দেরে।  
 আমার কর্ণের ভূষণ—নাম-সজ্জীর্জন,  
 আমার মণির মুকুট খুলে নেরে  
 শিরে জটা বেঁধে দেরে  
 প্রভুর শীতল পদ পরশিয়ে আছে পথের ধূলা শীতল হয়ে,  
 আমার অজ্ঞা মেখে দেরে।’

\* দেল = হৃদয়।

\*\* ধরম করম = ধর্ম কর্ম।

‘লুকাইয়া তারা নিত্য দেয় খুদ কণা  
এক কোণা ভরে পেটের—আর এক থাকে উনা।’\*

রাজকন্যার দুঃখ নাই—মুখে তার হাসি।

দরিদ্র প্রজারা এ সকল ব্যাপারের কিছুই জানে না। তারা রোজ যেমন আইসে,  
আজও তেমনি আসিয়াছে :—

‘তখনও তো সতী কন্যা কোন কাম করে।  
অজ্ঞোর যত গয়নাগাটি বিলায় সবাকারে॥  
কর্ণের না কর্ণ—দূল, হার যে গলায়।  
একে একে করে কন্যা ভিক্ষুক বিদায়॥’

একদিন মহা অনর্থ উপস্থিত হইল।

কর্ম-পুরুষ আবার এক বৃন্দ ব্রাহ্মণের বেশে উপস্থিত হইয়াছেন, অভিশাপের  
বার বছর প্রায় যায়।

ব্রাহ্মণ শিক্ষা চাহিল, সোণা-রূপা নয়, ধান-চাল নয়, পায়স-পিষ্টক নয়,  
বাড়ী-ঘর নয়।

তবে কি? রাজকুমারী বলিলেন, ‘এই পা ধুইবার জল দিতেছি, পা ধুইয়া বিশ্রাম  
করুন, আমাদের ত বাবা কিছুই নাই। শেষ খুদকণা পর্যন্ত গরীব প্রজাদের বিলাইয়া  
দিয়াছি। আমার স্বামী আসুন, তিনি কোন দিন অতিথি অভ্যাগতদিগকে নিরাশ করেন  
না। অবশ্য একটা ব্যবস্থা করিবেন, আপনি একটু অপেক্ষা করুন।’

ব্রাহ্মণ বলিলেন, ‘আমি সমস্ত পৃথিবী শিক্ষা করিয়া বেড়াইতেছি, কিন্তু আমার  
প্রার্থনা কেহ পূর্ণ করিতে পারেন নাই—

‘কেউ দেয় ধন রত্ন, কেউ দেয় কড়ি।  
কেহ বা তাড়িয়ে দেয় গালি মন্দ পাড়ি॥  
আমার মনের শিক্ষা কোথাও না পাই।  
কত রাজার মূলক ঘুরি কত দেশে যাই॥’

‘ঐ যে রাজবাড়ী, ওইখানে শিক্ষা মাগিতে গেলাম, তাঁহারা এই মালীরাজার  
বাড়ী দেখাইয়া বলিলেন ওখানে যাও মালীরাজা বড় দাতা।’

‘হেন কালে মালীরাজা ঝাড়ু কাঁধে লইয়া।  
আপন কুঁড়েতে দেখ দাখিল হৈল আসিয়া॥’

\* উনা = অপূর্ণ, একদিকের পেট পূর্ণ হয়, অপর দিকের ক্ষুধা থাকিয়া যায়।

ব্রাহ্মণ বলিলেন, আমি অশ্ব, আর কিছুই চাই না :—

‘কুড়ি তঙ্কা নাহি চাই কিম্বা অন্য ধন।  
ভিক্ষুক সে দান চায় অশ্বের নয়ন॥’

ব্রাহ্মণ বলিলেন, ‘বার বৎসর গেল— এই অশ্বের রাত্রি প্রভাত হইল না, যে  
আঁধার—সেই আঁধার। তুমি আমাকে চক্ষু দাও।’ রাজা পাগলের মত চতুর্দিকে  
চাহিলেন, তারপরে বলিলেন :—

‘মালীরাজা কহে, শুন বলি যে তোমাতে।  
মানুষে প্রাণীর চক্ষু নাহি দিতে পারে॥’

‘তথাপি যদি ঠাকুরের দয়া থাকে তবে চক্ষু পাইবে।’  
এই বলিয়া—

‘কাটারী লইয়া চক্ষু উপাড়িয়া ফেলিল।  
সেই চক্ষু লইয়া ভিক্ষুক ব্রাহ্মণ অদৃশ্য হইল॥  
ভিক্ষা পাইয়া ব্রাহ্মণ হইল বিদায়।  
বড় দুঃখে রাজ-কন্যা করে হায় হায়॥  
শীতল ভৃঙ্গারের জলে রক্তধার মুছে।  
এত দুঃখ অভাগীর কপালেতে আছে॥  
মালীরাজা কহে কন্যা হাসি মুখে রহ।  
কর্ম-পুরুষ দিলেন দুঃখ হাসি মুখে সহ॥’

সাশ্রুনেত্রী রাজকুমারীকে পুনরায় মালীরাজা বলিলেন :—

‘দান কৈরা যেবা পাইল অন্তরেতে দুখ।  
তার দান বিফল হৈল—বিধাতা বিমুখ॥  
শুন গো রাজার ঝি না কর ক্রন্দন।  
সুখ যদি চাও কর দুঃখের ভজন॥  
সুখ যদি পাইতে চাও দুঃখ আপন কর।  
সাধনের পথে চল তবে পাইবা বর॥’

এখন অশ্ব পতি কোন কাজ আর করিতে পারেন না। রাজকুমারীর সকল কাজই  
নিজের করিতে হয়।

সাত রাজবধু কুমারীর কষ্ট দেখিয়া হাসে। কিন্তু কোন্ চিত্রটি বড় ও  
সুন্দর?—একদিকে বধূরা পরিহাস করিতেছে,—

অপর দিকে,—

কত দুঃখ পাইল কন্যা হিয়া বিম্বেশ শেল।  
পরনের কাপড় নাই, শিরে নাই সে তেল॥  
এক হাতে তুল্যা লয়—আবর্জনার বুড়ি।  
আর এক হাতে মুছে কন্যা দু-নয়নের বারি॥’

রাণী আছেন, কিন্তু তাঁর কিছু করিবার সাধ্য নাই।

‘ভাঙারেতে আছে ধন—সাত ভাইয়ের তরে।  
কানাকড়ি কুমারীকে দিতে নাহি পারে॥  
মায়ের কাঁদন দেখি বৃক্ষের পাতা ঝরে।  
মায় সে জানে ঝিয়ের বেদন আর কে জানতে পারে॥’

রাজপুরীতে কন্যা ঝাঁট দেয়—এটা তাহার মালী—স্বামীর কাজ—মালীরাজা অশ্ব,  
সূতরাং একাজ তাকেই করিতে হয়। বধূরা মুখ টিপিয়া হাসে।

একদিন রাজবাড়ীতে ঢোল-ডগরা, কাড়া-নাকাড়া বাজিয়া উঠিল; অশ্ব মালী  
রাজকুমারীকে জিজ্ঞাসা করিলেন, ‘এ সকল বাদ্য-ভাঙ কেন?’ পবনকুমারী  
বলিলেন—‘সাত ভাই শিকারে যাইবেন, তাহারই উদ্যোগ চলিয়াছে।’ অশ্ব স্বামী  
বলিলেন, ‘আমারও শিকারে যাইতে ইচ্ছা হইতেছে। বহুদিন হরিণের মাংস খাই  
নাই, তুমি মহারাজের কাছ থেকে একটা ধনুক ও শব্দভেদী বাণ আমার জন্য লইয়া  
আইস।’

রাজকুমারী বলিলেন, ‘তুমি কি পাগল হইয়াছ? তুমি অশ্ব, অশক্ত,—কি করিয়া  
তুমি বনে-জঙ্গলে যাইবে? বাঘ ও হরিণ তুমি চিনিবে কি করিয়া? হরিণের মাংস  
খাইতে চাহিতেছ’—

‘সাত ভাই আনিবে যত হরিণ মারিয়া,  
কিছু মাংস দিব আনি চাহিয়া মাগিয়া।’

তাঁহার পা ধরিয়া কুমারী কাঁদিতে লাগিলেন—জঙ্গলে যাইতে কিছুতেই সম্মতি  
দিলেন না :—

‘বুঝাইলে প্রবোধ নাহি মানে অশ্ব রায়।  
ভাবিয়া চিন্তিয়া কন্যা বাপের আগে যায়॥  
শুন শুন বাপ অগো কহি যে তোমারে।  
অশ্ব না জামাই তব যাইবে শিকারে॥  
অশ্ব জামাই তোমার কইয়া দিলা মোরে।  
শব্দভেদী বাণ আর ধনু দেও তারে॥’

‘কন্যারে দেখিয়া রাজা কাঁদিতে লাগিল ।  
 এত সোহাগের কন্যার এত দুঃখ ছিল॥  
 রাজা দিলেন শব্দভেদী ধনু আর ছিলা\*  
 এরে লৈয়া অশ্বরাজ্য পশ্বে বাহিরিলা ॥  
 আগে আগে চলে বাদ্য মহারোল করি ।  
 বাদ্য শূনে চলে রাজা বনপথ ধরি ॥’

সুলারাণীকে পুনঃপ্রাপ্তি, অশ্বরাজ্য চক্ষু লাভ

সাতদিন রাজপুত্রেরা বনে বনে শিকারের জন্য ঘুরিলেন, কিন্তু এমনই দৈব, একটা শিকারও মিলিল না। রাজপুত্রেরা পরিশ্রান্ত হইয়া পড়িলেন; এত ধূমধাম করিয়া শিকারে আসিয়াছেন, একটা হরিণও লইয়া যাইতে পারিলেন না। শূন্য হস্তে বাড়ী ফিরিবেন কিরূপে? কি লজ্জা!

এদিকে অশ্ব রাজা হাতড়াইতে হাতড়াইতে বনে চলিয়াছেন। পাতার উপর খস খস শব্দ শোনেন, হরিণ কি বাঘ বৃষ্টিতে পারেন না। শব্দভেদী বাণ ছোঁড়েন; তীক্ষ্ণ বাণে পাথর পর্যন্ত কাটিয়া যায়, বৃক্ষের কাণ্ড কর্তিত হয়, কিন্তু কই শিকার কিছুই মেলে না। হঠাৎ রাজার পা একটা কিছু উপর ঠেকিল। একি মানুষ না কোন জানোয়ার?

যে মুহূর্তে রাজার পা গায়ে ঠেকিল, সেই মুহূর্তে সুলারাণীর কুড়-কুষ্ঠ দূর হইল,—তপ্ত সোণার বর্ণ উজ্জ্বল হইয়া উঠিল, যেমন ছিল, তেমনই। এদিকে সেই মুহূর্তেই রাজা চোখের দৃষ্টি ফিরিয়া পাইলেন—তাহাদের দুঃখের দিন অবসান হইয়াছে; আজি অভিশাপের দ্বাদশ বর্ষ উত্তীর্ণ হইয়া গিয়াছে। রাজা তাহার প্রাণের প্রাণ সুলারাণীকে পাইয়া যেন হাতে স্বর্গ পাইলেন। রাণী কাঁদিয়া সেই সদাগরকৃত লাঞ্ছনা, তাহার কুষ্ঠরোগ গ্রহণ প্রভৃতি বহু দিনের দুঃখের কথা বলিলেন, সেই স্বর্ণপ্রতিমাকে আলিঙ্গন-বন্দন করিয়া তাহার চোখের জল মুছাইতে মুছাইতে রাজা তাহার নিজের দুঃখের কথা ভুলিয়া গেলেন।

রাজা বলিলেন :—

‘শুন শুন সুলারাণী না কাঁদিও আর ।  
 তোমার পাইলাম যদি রাজ্যে কিবা কাজ ॥  
 বনেতে থাকিব মোরা বনের ফল খাইয়া  
 কোন্ জনে পায় নিধি এমনই হারাইয়া ॥  
 কোথায় জানি কাঠুরিয়া মা বাপ কেমন জানি আছে ।  
 একবার মনে হয় যাই তাদের কাছে ॥’

চক্ষুস্থান রাজা সাতটা হরিণ শিকার করিলেন। তারপর এক বৃহৎ দাবুক গাছের মূলে তাঁহারা হর-পার্বতীর মত বসিলেন।

\* ছিলা = গুণ, ধনুকের সঙ্গে যে চামড়ার দড়ি থাকে।



## উপসংহার

সাত ভাই তথায় উপস্থিত হইয়া দেখিল, সেই বন আলোকিত করিয়া এক দেব ও দেবী। তাহারা বলিল, ‘আপনারা কে? আমরা একটা হরিণ পাই নাই—আপনারা এতগুলি হরিণ পাইলেন কোথায়?’

রাজা তিলক—বসন্ত বলিলেন, ‘তোমরা আমাকে চিনিতে পারিতেছ না? ভাল করিয়া নজর করিয়া দেখ।’ তখন তাহারা তাঁহাকে নিরীক্ষণ করিয়া দেখিয়া চিনিল এ যে তাহাদের মালীরাজা। এরূপ তন্ত-কাঞ্চনের বর্ণই বা কোথায় পাইল, এমন রাজকুমারের মত সুগঠিত, সুদর্শন মূর্তিই বা কোথায় পাইল?

মালীরাজা তাহাদিগকে সেই সাতটা হরিণ দিলেন।

কিন্তু সাত ভাই ষড়যন্ত্র করিতে লাগিল। ‘এই ব্যক্তিকে হয়ত কোন বনদেবতা কৃপা করিয়াছেন। বাড়ী ফিরিয়া মালী নিশ্চয়ই আমাদেরকে হত্যা করিয়া আমাদের পিতৃরাজ্য দখল করিবে; আমরা উহার উপর যে সকল অত্যাচার করিয়াছি তাহা তো মনে আছে, সুতরাং উহাকে মারিয়া ফেলিয়া হরিণগুলি লইয়া বাড়ী ফিরিয়া যাওয়া যাক।’

তখন সাতটি ধনুক হইতে অবিরত বাণ—বৃষ্টি হইতে লাগিল। রাজা তিলক—বসন্ত মহাবীর, তিনি অনায়াসে শব্দভেদী বাণ দ্বারা তাহাদিগকে একেবারে আচ্ছন্ন করিয়া ফেলিলেন। তারপর সম্পূর্ণরূপে পরাভূত করিয়া তাহাদিগকে বাঁধিয়া ফেলিলেন, এবং নিজের আঙ্গুলের শ্রীআংটি খুলিয়া তাহা উদ্ভূত করিয়া শ্যালকদের প্রত্যেকের কপাল দাগিয়া দিলেন। বন্ধন খুলিয়া দিয়া তিনি সেই সাতটা হরিণ তাহাদিগকে দিয়া শ্রীআংটি খুলিয়া ফেলিলেন, —বলিলেন, ‘এই শ্রীআংটি তোমরা তোমাদের ভগিনীকে দিবে—ইহাতে আমার পরিচয় লিখিত আছে।’

লাঙ্ঘিত ও অপমানিত ভ্রাতারা রাজধানীতে যাইয়া প্রচার করিলেন, মালী—রাজাকে জঙ্গলের বাঘে খাইয়া ফেলিয়াছে। ভগিনী পবনকুমারীকে বলিলেন, ‘আমাদের পিতা তোমার দূশমন হইয়া এমন সোণার প্রতিমাকে মালীর হাতে দিয়াছিলেন, তোমার কপালে যা লেখা ছিল, তাহাই হইয়াছে, আমরা কি করিব? বাঘের মুখ হইতে আমরা শ্রীআংটি কাড়িয়া রাখিয়াছি; মৃত্যুকালে মালী এটি তোমাকে দিতে বলিয়া গিয়াছে—ইহাতে নাকি তাহার পরিচয় লেখা আছে। এই দুঃখের জন্য পিতাই দোষী’—

‘এমন সোণার পদ্ম মধুতে ভরিয়া।

বর না জুটিল এক দৃষ্টি গোবরিয়া॥\*’

রাজকুমারী কতকটা শোকার্তা হইয়াও ভ্রাতাদের সকল কথা বিশ্বাস করিলেন না।

মধুভরা এমন কোমল স্বর্ণ—পদ্ম নির্মিত হইয়াছিল, কিন্তু ইহার বর নাকি একটা গোবরা পোকা হইল।

তিনি শ্রীআংটি'র বিবরণ জানিতে পারিয়া তিলক-বসন্তের রাজধানী খুঁজিতে অনন্যমনা হইয়া বনের পথে ছুটিলেন।

প্রথমতঃ তিনি কোন্ পথে যাইবেন, তাহা স্থির করিতে না পারিয়া নীরবে বসিয়া রহিলেন, যেমন ছুটিয়া যাইবার পূর্বে কাল-বৈশাখী ঝড় খানিকটা স্তম্ভিত হইয়া থাকে, 'ছুটিবার কালে যেমন কাল-বৈশাখী বা' ; তার পর বন জঙ্গল বাদাড় লোকালয় কিছুই গ্রাহ্য করিলেন না, উন্মত্ত বেগে এক পল্লী হইতে অন্য পল্লী অতিক্রম করিয়া চলিলেন।

এই যে রাজা তিলক-বসন্তের রাজধানী! তিনি আবার আসিয়া স্বরাজ্যে সুপ্রতিষ্ঠিত হইয়াছেন। পবনকুমারী রাজবাড়ীর ধোপার বাড়ীতে যাইয়া তাহাদিগের শরণ লইলেন, তাহারা সেই অপব্রূপ রূপলাবণ্যসম্পন্ন কন্যাকে আশ্রয় দিল। রাজ-রাণীর কাপড়গুলি পবনকুমারী স্বয়ং কাচেন। একদিন সেই ধৌত কাপড়ের তাঁজে তিনি শ্রীআংটি'র রাখিয়া দিলেন। সুলারানী সেই আংটি'র রাজ্যকে দেখাইলেন। রাজা অনুসন্ধান করিয়া জানিলেন, তাঁহার ধোপার বাড়ীতে 'রূপে লক্ষ্মী—গুণে সরস্বতী' একটা মেয়ে আসিয়াছে। রাজ্যের কাপড় সেই কাচে ও কাপড়ের তাঁজে শ্রীআংটি সেই রাখিয়াছে।

রাজা নানা মণিমাণিক্যখচিত চৌদোলা ধোপার বাড়ীতে পাঠাইলেন। মুক্ত চৌদোলায় প্রজারা দেখিতে পাইল, ইনি দ্বিতীয় সুলারানীরই মত এক রূপের প্রতিমা। রাজা অগ্ৰসর হইয়া তাঁহার কাছে যাওয়া মাত্র পবনকুমারী পতির পদে লুটাইয়া পড়িলেন। রাজা তাঁহাকে আদরে হাত ধরিয়া উঠাইয়া সুলারানীকে বলিলেন, 'ইহাকে গ্রহণ কর, ইনি জীবনে তোমা অপেক্ষা কম দুঃখ পান নাই।'

‘এই কথা শুনিয়া সুলা দিল আলিঙ্গন।

বইনে বইনে হল এই সপত্নী মিলন॥

সোনার হারেতে যেন মাণিক্য বসাইল।

দুই চাঁদে রাজপুরী উজ্জ্বল হইল॥’

যথাসময় পবনকুমারীর পিতা সমস্ত সংবাদ অবগত হইলেন। তিনি স্বীয় রাজ্য দুই ভাগে বিভক্ত করিয়া অর্ধেকাংশ রাজা বসন্তকে যৌতুক দিলেন।

### আলোচনা

এই গানটি সম্বন্ধে আমি পূর্ববঙ্গ-গীতিকার ভূমিকায় (৪র্থ খণ্ডে দ্বিতীয় সংখ্যায়) যাহা লিখিয়াছিলাম, এখন সে সম্বন্ধে কতকটা মতের পরিবর্তন হইয়াছে।

আমার মনে হয়—সংগৃহীত পালাগুলির মধ্যে যেগুলি প্রাচীনতম, এই গল্পটি তাহাদের মধ্যে অন্যতম। অবশ্য এই গল্পের মধ্যেও পরবর্তী কালেরও সংযোজন কিছু প্রবেশ করিয়াছে, কিন্তু প্রাচীনতম অংশগুলি অতি স্পষ্টই বুঝিতে পারা যায়।

প্রথম কথা, ভাষা ও পদ্যরচনার রীতি। এই যে স্বল্পাক্ষরা ছন্দ-রীতি (যাহার অক্ষরের সংখ্যার কোন ঠিক নাই, অথচ পড়িবার সময় স্বরবর্ণ ও লঘু-গুরু মাত্রার উচ্চারণের দ্বারা—বেশ মানাইয়া যায়), পড়িতে কোন কষ্ট হয় না,—তাহা এদেশের পদ্যরচনার অতি প্রাচীন রীতি।

‘বনে থাকে কাঠুরিয়া  
বুক ভরা দয়া মায়া।’

এই দুটি ছত্রের প্রত্যেকটি আট অক্ষর, কিন্তু সর্বদা এই নিয়ম নাই—

‘কাঠ বিকায় খায়,  
এক রাজার মূলুক হতে অপর রাজার মূলুকে যায় ॥’

সাধারণ নিয়ম—দ্রুত ছন্দ। অল্প কয়েকটি অক্ষরেই শেষ ; কিন্তু কোন কোন স্থানে পঙক্তিগুলি অযথা বিলম্বিত হইয়া দীর্ঘ হইয়াছে, অথচ সুরলীলাচ্ছলে টানিয়া আনিয়া শেষে সেই বিলম্বিত পঙক্তি ঠিক সময়ে গানের মতই সমে আসিয়া পৌছে। তাল ভঙ্গ হয় না ;—এই পদগুলিও সেইরূপ, কোন ছত্র ছোট—কোন ছত্র দীর্ঘ, কিন্তু তাহারা প্রায় সর্বদাই তাল রক্ষা করিয়া চলে।

ইহাই আমাদের প্রাচীনতম পদ্যরচনার রীতি—খনা ও ডাকের বচনে এইরূপ রচনা অজস্র।

‘যদি বর্ষে আগনে,  
রাজা নামেন মাগনে।  
যদি নামে পোষে,  
কড়ি হয় ভুষে।  
যদি নামে মাঘের শেষ,  
ধন্য রাজার পুণ্য দেশ।  
যদি নামে ফাল্গুনে,  
চিনা কাওন হয় দ্বিগুণে।’

ডাক ও খনার বচনে প্রায় সর্বত্র এই রীতি অনুসৃত হইয়াছে। ছেলে-ভুলানো ছড়া ও ঘুম-পাড়ানিয়া গানও কতকটা এই রীতিতে রচিত; —মেয়েলী ব্রতকথা ও ছড়ায় এইরূপ স্বল্পাক্ষরা রচনার অজস্র নিদর্শন পাওয়া যায়।

যথা,—

‘বৃষ্টি পড়ে টাপুর টুপুর  
নদীএ এল বান,  
শিব ঠাকুরের বিয়ে হবে,  
তিনটি কন্যা আন।

এক কন্যা রাঁধেন বাড়েন  
 এক কন্যা খান,  
 এক কন্যা রাগ করে  
 বাপের বাড়ী যান।’  
 ‘আজ খুঁকির বিয়ে হবে  
 সঙ্গে যাবে কে?  
 ঘরে আছে কুনো বেড়াল  
 কোমর বেঁধেছে ॥  
 আম-কাঁটালের বাগ দিব  
 ছায়ায় ছায়ায় যেতে।  
 ঘরের কাহার দেব  
 পালকী বহাতে ॥’

পূর্বেই বলিয়াছি, মেয়েদের প্রতি কথায় এরূপ ছন্দের ছড়াছড়ি। এই তাবের দূত  
 ছন্দের কিছু কিছু পরিচয় বাজালা কুলজী-পুস্তকেও দৃষ্ট হয়।

একখানি তিনশ বছরের প্রাচীন সংস্কৃত পুঁথিতে সুপ্রাচীন বাজালায় এই  
 কয়েকটি ছত্র পাইয়াছি :—

‘দ্যুহি বিনায়ক ত্রিপুর চাউ।  
 মিয়াল পম্ব থোবে কাউ ॥  
 গৈ লইয়া কুলের বাস।  
 রাঢ়ে বঙ্গে সাত আট ॥’

তিলক-বসন্তের গল্পটির অনেকাংশ এই ছন্দে রচিত, ইহা বঙ্গীয় পদ্যের আদি  
 অবস্থা।

দ্বিতীয়তঃ এই গল্পের তাবের সঙ্গে সাধারণতঃ বাজালা কবিতার প্রতিপাদ্য  
 তাবের সামঞ্জস্য নাই। প্রায়ই কোন ঠাকুর দেবতার নাম নাই। এই গানটির সর্বশ্রেষ্ঠ  
 দেবতা ‘করম-পুরুষ’, তাঁহার তিনটি পা, এজন্য তাঁহাকে ‘তেঠেজা দেবতা’ বলা  
 হইয়াছে।

বৌদ্ধগণ ঈশ্বরে বিশ্বাসী নহেন ; তাঁহারা কর্মকেই প্রধান্য দিয়া থাকেন।  
 মানুষের ভাগ্য-নিয়ন্ত্রণে ঈশ্বর কি আর কোন কল্পিত দেবতার হাত নাই। ‘যে রূপ বীজ  
 বপন কর, সেইরূপ ফল ফলিবে।’ অর্থাৎ তুমি যেমন কর্ম করিবে, তেমনই ফল  
 পাইবে, তাহা কিছুতেই উলটাইবে না। এই অলঙ্ঘ্য কর্মতত্ত্বের ফলই মানুষকে জন্মে  
 জন্মে ভোগ করিতে হয় ; প্রত্যেক ঘটনাই মানুষের কর্মের অধীন। এই জন্য  
 কর্মপুরুষই মানুষের ভাগ্যের নিয়ন্তা। মানুষের গুণের মধ্যে ত্যাগ, স্বার্থবর্জন,  
 আতিথ্য, পরার্থপরতা প্রভৃতিই বৌদ্ধযুগের প্রধান ধর্ম। এই সকল গুণের ব্যত্যয়  
 হইলে তাহার ফল অবশ্যম্ভাবী। যদি কেহ অতিথিকে রিক্ত হস্তে ফিরাইয়া দেয়,  
 আত্মের সেবা না করে, তবে তাহার শাস্তি কেহ খণ্ডন করিতে পারিবে না ; গল্পের

সর্বত্র কর্মপুরুষের রাজত্ব। আতিথ্যের নিয়ম লঙ্ঘন করাতে রাজাকে বার বৎসরের জন্য নির্বাসন শাস্তি ভোগ করিতে হইয়াছিল। এখানেও সেই ‘তেঠেজা দেবতা’ শাস্তি ঘোষণা করিলেন। সুলারাবীর রূপ যখন তাঁহার ভয়ের কারণ ইহল, তখন তিনি কর্মপুরুষের নিকটই কুষ্ঠরোগ প্রার্থনা করিয়া সেই বর পাইলেন। দ্বাদশ বৎসরান্তে সেই কর্মপুরুষই তাঁহার শাস্তির শেষ ঘোষণা করিয়া পুরস্কার দান করিলেন। সর্বত্র কর্মেরই জয়-জয়কার, এবং তদধিষ্ঠিত দেবতা কর্মপুরুষের আবির্ভাব ও তিরোভাব।

আমরা মালঞ্চমালার গল্পে ‘ধাতা-কাতা-বিধাতা’র উল্লেখ পাইয়াছি ; ইহারা কে, তাহার কোন নিশ্চয় পরিচয় নাই, কিন্তু ইহারা যে সেই ‘তেঠেজা দেবতা’রই স্বগণ, তাহা স্পষ্টই বোঝা যায় ; এই গল্পেও সেই ধাতা-কাতা-বিধাতার উল্লেখ আছে।

এই সকল গল্প কেহ অবশ্য ইতিহাসের পর্যায়ে ফেলিবেন না। ইহারা নিছক গল্প, এবং সেই হিসাবেই ইহাদের মূল্য। তথাপি কাল্পনিক উপাখ্যানগুলিও সমযোচিত ভাব ও পরিবেষ্টনীর মধ্যেই পরিকল্পিত হয়। যে সময়ে ইহারা রচিত হইয়াছিল তখন নর-নারীদের দেহ সবল ও মন নৈতিক শক্তিসম্পন্ন ছিল। তাঁহারা বাতাসে হেলিয়া পড়িতেন না, দুঃখে কষ্টে ভাজিয়া পড়িতেন না, সৎকার্য ও আত্মদানের কোন ব্যাপারেই তাঁহারা কুষ্ঠা বোধ করিতেন না। এই সকল গানের সকল স্থানেই পুরুষকারের জ্বলন্ত দৃষ্টান্ত আছে। গল্পের রাজা একটা সামান্য ভিক্ষুকের প্রার্থনায় নিজের চক্ষু উপড়াইয়া ফেলিতেছেন। আত্মরক্ষার জন্য নারী কুষ্ঠরোগকে বরণ করিতেছেন, স্রীয় প্রতিশ্রুতির গৌরব রক্ষা করিয়া রাজা নিজের কন্যাকে একটা মালীর হাতে অর্পণ করিতেছেন ; এ সমস্ত এক হিসাবে গাঁজাখুরী গল্প বলা যাইতে পারে। কিন্তু দিগদর্শন যন্ত্রের আর একটা দিক্ উলটাইয়া ধরিলে বুঝিতে পারা যাইবে যে এই গল্পগুলির ভিতরকার একটা বড় কথা আছে, তাহা লক্ষ্য করা পাঠকের উচিত। এই ধরনের যতগুলি গল্প আছে, তাহার অনেকগুলিরই প্রধান ভিত্তি আদর্শবাদ। শিশুর কৌতূহল নিবারণোপযোগী ব’হিরের সাজ-সজ্জা, শিশু ভিন্ন অন্য কেহ যাহা বিশ্বাস করিতে পারে না, এমন সকল অলৌকিক ত্যাগমূলক ঘটনা, কিন্তু তাহারা একটা দিকে নিশ্চিত ভাবে ইজিত করিতেছে। ‘দাতা কর্ণ’ গল্পে পিতা-মাতা করাত ধরিয়া নিজেদের একমাত্র পুত্রের শির-কর্তন করিতেছেন, সেই মাংসে ব্রাহ্মণ-অতিথিকে ভূত করিবার জন্য। বাজালা দেশের কাঞ্চনমালা, মালঞ্চমালা প্রভৃতি এইরূপ শত শত গল্পে ত্যাগের মহিমা প্রচারিত হইয়াছে, তাহা অত্যাশ্চর্য, অবিশ্বাস্য ও অলৌকিক। বৌদ্ধজাতকেও ত্যাগের সেইরূপ উদাহরণ অনেকস্থলে পাওয়া যায়। সে যুগ ছিল বৌদ্ধদিগের ত্যাগের শিলমোহর মারা। মানুষ যাহা হিত মনে করিয়াছে, যে করিয়া হউক তাহা করিবেই। আদর্শকে এত বড় করিয়া আঁকিয়াছে যে তাহার উপহাসাস্পদ বাড়াবাড়ির উপরও সে গুরুত্ব দিয়াছে, অকুণ্ঠিত ভাবে তাহা অনুসরণ করিয়াছে ; এই রচনাগুলি মানুষকে দেবতার পঙ্ক্তিতে লইয়া যাইবার আশ্রয় চেষ্টায় কল্পিত।

মানুষের সঙ্গে মানুষের প্রভেদ তখনও এত বেশী হয় নাই যে তাহাতে ভদ্র, ধনী ও ইতর শ্রেণীর সঙ্গে ঘনিষ্ঠ ভাবের মিলন অসম্ভব হইতে পারে। রাজা সিংহাসন ছাড়িয়া কুড়ুল কাঁধে করিয়া বনে কাঠ কাটিতে চলিতেছেন ; সেই কাঠুরিয়াদের

মধ্যে কাঠুরিয়ার জীবন বহন করিতেছেন, রাণীর সহচরীরাও সেই শ্রেণীর। কিন্তু এই পদমর্যাদার প্রভেদ মানুষকে মানুষের পর করিয়া দেয় নাই। সৎস্কার, অভ্যাস এবং গর্ব মানুষকে একটা পৃথক শ্রেণীর জীবে পরিণত করিতে পারে নাই—যেখানে, যে অবস্থার ফেরে ইহারা পড়িয়াছেন—মানুষ মানুষই আছেন—তঁাহারা কৃত্রিম রেখা টানিয়া একেবারে লৌহ-কঠোর গন্ডিবন্ধ হইয়া যান নাই।

কাঠুরিয়াদের সরল জীবন ও তাহাদের মনের ভাবের যে পরিচয় আছে, তাহা অল্প কথায় কি সুন্দর ভাবে প্রকাশ পাইয়াছে! রাজা ও রাণীর প্রতি তাহাদের কত দরদ, তাহাদের প্রত্যেকেই রাজা ও রাণীর তুষ্টি সাধনার্থ কোন না কোন কিছু করিতেছে,—রাজাকে হারাইয়া তাহারা ‘আমাদের পাগল রাজা গেল কোথাকারে’ বলিয়া যে চীৎকার করিয়া কাঁদিয়াছিল,—তাহা মর্মভেদী। এই সরল কাঠুরিয়া জীবনের যে চিত্র কবি দিয়াছেন, তাহা বড়ই সুন্দর ও মর্যাস্তিক হইয়াছে।

এই রাজার বনবাস, অশ্বত্থ বরণ, রাণীর দুঃসাধ্য ব্যাধি গ্রহণ, এবং নানা অবস্থান্তরের আজগুবি ব্যাপারের মধ্যে স্বর্ণপদ্মের মত রাজা-রাণীর যে দুইটি চরিত্র ফুটিয়া উঠিয়াছে, তাহা মেঘাবৃত আকাশে তড়িৎ-রেখার ন্যায় আমাদের চক্ষু ঝলসিয়া দেয়। এই গল্প যে যুগের, সে যুগে এদেশের মানুষের সাহসের অন্ত ছিল না, কষ্ট-সহিষ্ণুতার অবধি ছিল না, মহত্ত্বের ও বীর্যবত্তার শেষ ছিল না। এগুলি ঠিক রান্স-খোঙ্কোসের গল্পের মতন নহে,—ইহাদের শৌর্য-বীর্য ও চরিত্র-বল কাল্পনিক সাজ-সজ্জায় উপস্থিত করা হইয়াছে সত্য, কিন্তু তাহাদের ভিত্তিমূলে জাতীয় চরিত্রের মহৎ কতকগুলি গুণের উপাদান আছে, যাহা সর্বকালীন সত্যের উপর প্রতিষ্ঠিত।

এই গানটীতে যে প্রেমের সুরটী পাওয়া যায় তাহা চণ্ডীদাস-পূর্ব সহজিয়াদের সুর। মনে হয়, যে খনি হইতে বৈষ্ণবদের আদি কবি তঁাহার ভাবরত্ন আহরণ করিয়াছিলেন, এই পালাগানের কবিও সেই খনির সম্বন্ধান পাইয়াছিলেন। চণ্ডীদাসের প্রেমে যে আধ্যাত্মিকতা আছে, পালাগানে তাহা নাই। পালাগানের প্রেম খুব উচ্ছ্বাসের—কিন্তু তাহা বাস্তব জগতের, তাহাতে কুল-শীল-মান হইতে মানব-আত্মাকে টানিয়া উর্ধ্বতম লোকে লইয়া যায় না ; কিন্তু ইহজগতের সারবস্তু প্রেমকে বাস্তবতার আলোকেই চিনাইয়া দেয়। উভয় শ্রেণীর কবি যে একই জাতীয় ভাঙার লুট করিয়াছেন, তাহার প্রমাণ অতি স্পষ্ট। চণ্ডীদাস লিখিয়াছেন, ‘সুখ দুঃখ দুটি ভাই, সুখের লাগিয়া যে করিবে আশ—দুঃখ যাবে তার ঠাই।’ এই গল্পের কবি লিখিয়াছেন—

‘মালী রাজা কয় কন্যা না কর ক্রন্দন ।  
সুখ যদি চাও কর দুঃখের ভজন ॥  
সুখ যদি পাইতে চাও, দুঃখ আপন কর ।  
সাধনের পথে চল, তবে পাইবে বর ॥’\*

এই দুয়েরই এক সুর।

\* পাইবে বব = দেবতার কৃপা-বর পাইবে।

রাজকুমারী স্বামীকে বলিতেছেন, ‘নাই বা রইল আমার গলায় সাত-নরী হার, তোমার দুখানি হাতই আমার গলার হারের স্থান পূরণ করিবে। তোমার কথাই আমার কর্ণের অলঙ্কার হইবে, আমি কর্ণভূষণ চাই না।’

‘তোমার সোহাগের ডাক আমার কর্ণ-দুল।

তোমার পায়ের ধূলা অঙ্ক-আভরণ।’

ইহার সঙ্গে বৈষ্ণব কবির ‘প্রভুর শীতল চরণ পরশিয়ে, আছে পথের ধূলি শীতল হয়ে—আমার অঙ্কে মেখে দেবে’ প্রভৃতি পূর্বোক্ত পদের মিল লক্ষ্য করুন।

গল্পের কবির পদ :—

‘সোতের সেওলা যেমন সোতে করে ভর।

তোমাতে হারাই পাছে এই মোর ডর ॥’

চণ্ডীদাসের ‘সোতের সেওলা যেমন তাসিয়া বেড়াই।’

বাজালা দেশের আম্রকুঞ্জে, নীপকুঞ্জে, গ্রাম্য নদীর উপকূলে, কোকিল-করম্বিত কুঞ্জকুটীরে—লাজশীলা কুলবধূরা যে সকল প্রেমালাপ করে, সর্বস্ব-দেওয়া ভালবাসার কথা মৃদুস্বরে বলে, তাহা ভ্রমরগুঞ্জনের মতই মিষ্ট ; শত শত বৎসর যাবৎ কত কষ্ট সহিয়া—কত তপস্যা ও সাধনা করিয়া তাহার বাজালা ভাষার অভিধানকে কোমল শব্দ-সমৃদ্ধিতে পূর্ণ করিয়াছে, তাহা পল্লীর বাতাসকে কোমল করিয়া রাখিয়াছে, যুথী-জাতি-মল্লিকার ন্যায় তাহাদের সেই ভাষা আত্মদানের সুরভি-মাখা। বৈষ্ণব কবির এবে গ্রাম্য গীতিকারেরা উভয়েই সে ভাঙারের সম্প্রদায় পাইয়াছিলেন,—পান নাই সংস্কৃতের পণ্ডিতেরা। তাঁহারা অমরকোষ লইয়া টানাটানি করিয়াছেন, ঘরের আসবাবপত্র দেখেন নাই, বাড়ীর অমৃত-নির্ব্বারের খোঁজ লন নাই।

চণ্ডীদাসের সময়—ভাব ও ভাষা বৌদ্ধাধিকার হইতে নির্মুক্ত হইয়া—বৈষ্ণবের অধ্যাত্মলোকে প্রবেশ করিয়াছিল, কিন্তু এইসব পল্লীগাথায় বৌদ্ধাধিকারের বিলুপ্ত সমৃদ্ধির ধ্বংসাবশেষ টের পাওয়া যায় ; চণ্ডীদাসের লেখায় বৌদ্ধ ত্যাগ ও কবুগার ভাব অপেক্ষা সহজিয়াদের তাত্ত্বিকতা ও বৈষ্ণব ভাবপ্রবণতা বেশী। সূত্রাৎ আমার মনে হয়, তিলকবসন্ত-গীতিকা বৈষ্ণব-প্রভাবের আরও পূর্ববর্তী যুগের নিদর্শন।

এই গল্পটি কতকটা কাশীদাসের মহাভারতের, শ্রীবৎস ও চিন্তার উপাখ্যানের মত। আমার পূর্বে ধারণা ছিল যে পল্লীকবি কাশীদাস হইতে তাঁহার গল্পের বিষয়বস্তু আহরণ করিয়াছেন। শ্রীবৎস-চিন্তার আখ্যায়িকা কাশীদাস কোন পুরাণ হইতে সংগ্রহ করিয়াছেন, স্বর্গীয় রামগতি ন্যায়রত্ন মহাশয় তাহা ঝুঁজিতে যাইয়া সংস্কৃত পুঁথিলাগুলি আলোড়ন করিয়াছিলেন, কিন্তু কোন সম্প্রদায় পান নাই। মোট কথা, এই গল্প সংস্কৃত কোন পুরাণের ধার ধারে না। কেতকী ও মল্লিকা ফুলের মত এই শ্রীবৎস ও চিন্তার গল্প এদেশের পল্লীমুগ্ধিকা-জাত। ইহা প্রথম হইতে শেষ পর্যন্ত বজোর মাটির গন্ধ বহন করে। কাশীদাস এই পল্লীসম্পদের অংশবিশেষ আহরণ করিয়াছেন, পল্লীকবি তাঁহার নিকট ঋণী নহেন, বরং উল্টা ; তিনিই পল্লীবৃন্দগণের

মুখে এই গল্প শুনিয়ে স্বীয় মহাভারতে সন্নিবিষ্ট করিয়াছেন। পাঠক এই দুই কবির কথিত আখ্যান বিশ্লেষণ করিয়া দেখিলে বুঝিতে পারিবেন, পল্লীগাথাটি অনেকাংশে প্রাচীনতর। কাশীদাস কর্ম-পুরুষের স্থলে লক্ষ্মী ও শনির প্রতিদ্বন্দ্বিতা আমদানী করিয়াছেন, কুষ্ঠরোগ বরণ করিয়া লইবার জন্য সুলারাগী কর্ম-পুরুষের নিকট বর প্রার্থনা করিয়াছেন—সূর্যদেবের শরণ লন নাই। লেখার ভাব ও ভাষা স্পষ্টই প্রাচীনতর ও পূর্বতন সামাজিক অবস্থা-সূচক। শ্রীবৎস ও চিত্তার গল্পে হিন্দু দেবতাদের প্রাধান্য ও তিলক-বসন্তের গল্পে পূর্ববর্তী বৌদ্ধযুগের প্রভাব দৃষ্ট হয়। এইভাবেই ‘সখীসোনা’ গল্পটি পল্লীকবির হাত হইতে গ্রহণ করিয়া বর্ধমানবাসী কবি ফকিররাম কবিভূষণ নবকলেবর দিয়া ষোড়শ শতাব্দীতে প্রকাশ করিয়াছিলেন। যুগে যুগে পল্লীগাথার উপর পরবর্তী কবিরা এইভাবে হস্তক্ষেপ করিয়াছেন ; যখন যে যুগে ইহারা রূপান্তরিত হইয়াছে, তাহার কতকটা প্রভাব অবশ্য ইহাদের মধ্যে বর্তিয়াছে।



## মলুয়া

### বন্যা ও দুর্ভিক্ষ

মৈমনসিংহে, সুতা নদীর ধারে আড়ালিয়া গ্রামের নিকটবর্তী বক্সাই নামক পল্লীতে চাঁদবিনোদ নামক একটি সুশ্রী তরুণ যুবক বাস করিত। তাহার একমাত্র ভগিনীর বিবাহ হইয়া গিয়াছিল, এবং পিতৃবিয়োগের পর অবস্থার বিপর্যয়ে সামান্য কৃষির উপর নির্ভর করিয়া মাতা ও পুত্র জীবিকা নির্বাহ করিত।

সেবার আশ্বিনের ঋতুতে পল্লীগুলি ডুবিয়া গিয়াছিল, ক্ষেত্রের শস্য সমস্তই নষ্ট হইয়াছিল। চাঁদবিনোদ ছিল একজন ভাল কুড়াশিকারী, তাহা ছাড়া বাড়ী নির্মাণ প্রভৃতি স্থপতিবিদ্যায় সে সুদক্ষ ছিল। ক্ষেতে বসিয়া শস্য-বপন, জলসেচন ও আগাছা তুলিয়া ক্ষেত নিড়াইতে সে ভালবাসিত না ; তাহার ঘুম ভাজিতেই অনেক বেলা হইয়া যাইত, এই জন্য মাতা তাহাকে গঞ্জনা করিতেন—সে কখন ক্ষেতে যাইবে?

সে বৎসর দুর্ভিক্ষ ও অজন্মায় লোকের বড় কষ্ট হইল ; কেহ কেহ ঘরবাড়ী বিক্রয় করিল, চালের দাম এক টাকায় তিন মণ হইল ; পল্লীতে পল্লীতে হাহাকার পড়িল। দুর্গোৎসবের সময় লোকে তাহাদের ছেলে বাঁধা দিয়া উদরান্নের সংস্থান করিল।

চাঁদবিনোদের মা কোজাগর লক্ষ্মীপূজার দিন প্রাতে ঘুম হইতে উঠিয়া দেখিলেন, পূজার জন্য ঘরে একমুষ্টি চালও নাই ; তখন ক্ষেতে যাইয়া কিছু ধান সংগ্রহ করিতে পারেন কিনা, চাঁদবিনোদকে সেই চেষ্টা করিয়া দেখিতে বলিলেন।

অনেকক্ষণে তাহার ঘুম ভাঙিল,

‘পাঁচখানি বেতের ডুগল\* হাতেতে করিয়া।

মাঠের পানে যায় বিনোদ বারমাসী গাইয়া ॥’

সংসারের প্রতি উদাসীন মায়ের দুলাল এই পুত্র শিস দিতে দিতে এবং বারমাসী গান গাহিতে গাহিতে ক্ষেতের দিকে চলিল।

কিন্তু আশ্বিনের বন্যায় কিছুই নাই—ক্ষেত জলে ভাসিয়া গিয়াছে, একটি ধানের ছড়াও জলের উপর মাথা জাগাইয়া নাই। বিষণ্ণ চিত্তে চাঁদবিনোদ বাড়ীতে ফিরিয়া মাতাকে তাহাদের কৃষির অবস্থা জানাইল। মাতা মাথায় হাত দিয়া বসিয়া পড়িলেন।

আগন মাসের ফসল মাটি হইল, তবে ত 'সারা বছরের লাগ্যা গেছে ঘরের ভাত'। এই বলিয়া মাতা বিলাপ করিতে লাগিলেন।

এই বিপদে বিনোদ কি করিবে? হালের গরু বেচিয়া খাইল, পাঁচখানি ক্ষেত মহাজনের নিকট বাঁধা পড়িল; এখন আর হাল নাই, ক্ষেত নাই, গরু নাই। আর সর্ষে বা কড়াই বুনিবার উপায় নাই। কার্তিক, অগ্রহায়ণ, পৌষ, মাঘ, ফাল্গুন, চৈত্র—এইভাবে ঘরের শেষ সম্বল বিক্রয় করিয়া বৃন্দা মাতা ও তাহার যুবক পুত্র জীবনযাত্রা চালাইল; বৈশাখ-জ্যৈষ্ঠে আবার আকাশে মেঘ গর্জন করিয়া উঠিল। মেঘের ডাক শুনিয়া ময়ূরেরা পেখম ধরিয়া নাচিতে লাগিল ও কুড়াপাখীগুলি সেই অরণ্যপ্রদেশের দিকদিগন্ত কাঁপাইয়া সাড়া দিয়া উঠিল। কুড়ার ডাক শুনিয়া চাঁদবিনোদের রক্ত উত্তেজিত হইয়া উঠিল। কুড়াশিকার তাহার চিরকালের নেশা। চাঁদবিনোদ আকাশ মেঘাচ্ছন্ন দেখিয়া নিজের কুড়াটির পিঞ্জরটি হাতে করিয়া শিকারের জন্য ছুটিল।

### কুড়াশিকারে যাত্রা

ঘরে ক্ষুদের কণাও নাই, বিদায়কালে মা তাঁহার আদরের পুত্রকে কি খাইতে দিবেন? মায়ের চোখের জল দেখিতে দেখিতে চাঁদবিনোদ বাড়ী ছাড়িয়া চলিল—

‘জ্যৈষ্ঠ মাসের রবির জ্বালা পবনের নাই বা।\*  
পুত্রকে শিকারে দিয়া পাগল হৈল মা ॥’

চাঁদবিনোদ শিকারে চলিয়াছে। তাহার নিজের ক্ষেতের ধান জলে ভাসিয়া গিয়াছে। কিন্তু আড়ালিয়া গ্রাম ছাড়িয়া সর্বত্র বসুম্ভরা হাসিয়া উঠিয়াছেন, প্রকৃতি তথায় শস্যশ্যামলা।

শালিধান পাকিয়াছে,—ধানের গাছের অগ্রভাগ রাজা তাহা শস্যের ভাৱে নোয়াইয়া পড়িয়াছে, প্রকৃতির এই বিরাট আয়োজনে দেখিতে দেখিতে চাঁদবিনোদ অদূরে তাহার ভগিনীর বাড়ীর দিকে চলিল।

‘আগ-রাজা শালিধান্য পাক্যা ভুঞ্জে পড়ে।  
পথে আছে বইনের বাড়ী যাইব মনে করে।’

বহুদিন পরে ভাই-ভগিনীর মিলন হইল। কত যত্নে ভগিনী চাঁদবিনোদের জন্য একটা গামছায় চিড়ার পুঁটলি বাঁধিয়া দিল। বাড়ীর গাছের সোনার বর্ণ মর্তমান কলা পাকিয়াছিল, একছড়া কলা নামাইয়া চাঁদবিনোদকে দিল। সর্বশেষ পান-খয়ের-সুপুরি ও চুন সাজাইয়া চাঁদবিনোদকে দিয়া—কত আদরে ভাইয়ের চন্দ্রবদনখানি দেখিতে লাগিল।

\* বা—হিল্লোল;

কুড়াশিকারে চলিয়াছে চাঁদবিনোদ ; আষাঢ়ের মেঘ রহিয়া রহিয়া ডাকিতেছে, সজো সজো কুড়া চীৎকার করিয়া উঠিতেছে।

‘কুড়ার ডাকেতে শুনি বর্ষার নমুনা’। যতই নিবিড় বনে প্রবেশ করিতে লাগিল, ততই অস্তগমনোদ্যত সূর্যের তেজ কমিয়া আসিল এবং মেঘের গুরু গুরু ডাক, কেঁয়াফুলের গন্ধ, কুড়া ও মেঘের ধ্বনির সজো মিশিয়া পল্লীগ্রামের বর্ষাকে জীবন্ত করিয়া দেখাইল।

### মলুয়ার সজো পঞ্চম দেখা

সম্মুখে আড়ালিয়ার মাঠ, তাহা পার হইয়া চাঁদবিনোদ দেখিল শেওলাপূর্ণ একটা ছোট-পুকুর ; ফাঁকে ফাঁকে তাহার নির্মল জল কাকের চক্ষের মত কালো দেখাইতেছে ; পুকুরের চারিদিকে মাদার বন, এবং কলাগাছ ;

‘গায়ের পাছে আঁধার পুকুর ঝাড় জঙ্কালে ঘেরা।

চার দিকে কলার গাছ মান্দার গাছের বেড়া ॥

ঘাটেতে কদম গাছে ফুল ফুট্যা আছে।

জলের শোভা দেখে বিনোদ পুষ্করিণীর পাড়ে ॥’

একদিকে বাঁধাঘাট,—ঘাটের ধারে একটি কদম গাছে অজস্র ফুল ফুটিয়াছে ; পরিশ্রান্ত চাঁদবিনোদ সেই পুকুরপাড়ে যাইয়া বিশ্রাম করিতে বসিল। জ্যৈষ্ঠমাসের রাত,—অতি ছোট, রাতে ঘুমাইয়া তৃপ্তি হয় নাই,—চাঁদবিনোদের চোখ বুজিয়া আসিল। ক্রমে নিজের অজ্ঞাতসারে সে শরীরটা পুকুরের ঘাটে প্রসারিত করিয়া দিল এবং অল্পক্ষণের মধ্যেই গভীর নিদ্রা তাহার চক্ষু ভারাক্রান্ত করিল।

কুমারী মলুয়া সেই সন্ধ্যায় জল আনিতে আসিয়া দেখিল, অপূর্ব রূপবান এক যুবক শানবাঁধা ঘাটে অঘোরে ঘুমাইতেছে। এই মেন্দি গাছগুলির নীচে প্রায়ই সন্ধ্যাকালে সাপ দেখা যায়। কুমারী থমকিয়া দাঁড়াইয়া ভাবিল, আর দিন মা কিম্বা ভ্রাতৃবধূরা সজো আসেন, আজ আমি একলা—সহায়হীন একা। ভিন্দদেশী এই যুবকের ঘুম কি করিয়া ভাঙি ? নতুবা, ইনি এই বিপজ্জনক পুকুর পাড়ে আধারে ঘুমাইয়া থাকিলে সজ্ঞাতে পড়িতে পারেন। যদি বেশী রাতে ঘুম ভাঙে, তবেই বা উনি কোথায় যাইবেন ? এ পাড়াগাঁয়ের রাস্তা ইনি জানেন না, বুদ্ধিবাদলার মধ্যে কোথায় যাইবেন ? ইহার ঘুম কি করিয়া ভাঙাই ? লজ্জাবতী তরুণী নিদ্রিত যুবকের জন্য গভীর আশঙ্কা বোধ করিতে লাগিল।

অবশেষে কুমারী কলসী লইয়া জল ভরিতে গেল, কলসীর জল ফেলিয়া পুনরায় জল ভরিল—জল ভরিবার শব্দে চাঁদবিনোদের কুড়া ডাকিয়া উঠিল। কুড়ার ডাক, সুন্দরীর জল ভরিবার শব্দ এবং গুরু গুরু মেঘ-গর্জনে চাঁদবিনোদের ঘুম ভাঙিয়া গেল। সে চাহিয়া দেখিল এক পরমা সুন্দরী অশ্রুসিক্ত ন্যায় নিটোল-গঠন নারী ঘাটের একপাশে দাঁড়াইয়া তাহারকৈ অপাঙ্গদৃষ্টিতে দেখিতেছে।

কিন্তু সেই সন্ধ্যায় লজ্জায় উভয়ে কোন আলাপ করিতে পারিল না। কিন্তু উভয়ের হৃদয়ে তোনপাড় আরম্ভ হইয়া গিয়াছে।



‘ভিন-দেশী পুরুষ দেখি চাঁদের মতন,  
লাজ-রক্ত হৈল কন্যার প্রথম যৌবন।’

প্রথম যৌবনের এই ব্যথা বুকে করিয়া কলসী কাঁখে লইয়া মলুয়া স্ত্রী গৃহের দিকে রওনা হইল এবং চাঁদবিনোদও ধীর পাদক্ষেপে তাহার ভগিনীর বাড়ীর দিকে যাইতে লাগিল।

### পূর্বরাগ

চাঁদবিনোদ পথে যাইতে যাইতে ‘শুকনা কাননে যেন মলুয়ার ফুলে’র মত সেই রূপসী কন্যার কথা চিন্তা করিতে লাগিল : ‘এই কন্যা কি বিবাহিতা, না কুমারী ? যদি বিবাহিতা হইয়া থাকে—তবে আর এই পল্লীতে আসিব না, কোন ঘোর বনে চলিয়া যাইব। কুড়া! তুমি আমার মাকে জানাইও “চাঁদবিনোদ আর ঘরে ফিরিবে না”। ‘কি সুন্দর মূর্তি, জলের পদ্ম যেন ডাঙায় আসিয়া ফুটিয়াছিল, সাঁঝের দীপ যেন কেহ পুকুরঘাটে অপরাহ্নে জ্বলাইয়াছিল! আমি মুখখানি ভাল করিয়া দেখিতে পাই নাই, সে উত্তরদিকে মুখ ফিরাইয়াছিল ; ঘাট হইতে তাই সেই নিখুঁত মুখখানির সবটা দেখিতে পাইলাম না।’ চাঁদবিনোদের চিন্তাধারা এইরূপ !

এদিকে মলুয়াও বাড়ী আসিয়া সারারাত্রি ঘুমাইতে পারে নাই। এই বাদলা রাত্রিতে অশ্রুকারে পথহারা পথিক কোথায় গেল ?

‘কালি রাত্রি পোহাইল কার বাড়ীতে থাকি।  
কোথায় জানি রাখল তার সজোর কুড়াপাখী ॥  
আসমানে থাকিয়া দেওয়া ডাকছ তুমি কারে।  
ঐ না আষাঢ়ের পানি বইছে শত ধারে ॥  
গাঙ্গা ভাসে, নদী ভাসে, শূন্যে না ধরে পানি।  
এমন রাতে কোথায় গেল কিছুই না জানি ॥’

পরদিন মলুয়া ভাল করিয়া খাইল না, সারাদিন একটা জানালার পাশে বসিয়া সেই আঁধা-পুকুরের পাড়ে দৃশ্যমান কদমগাছের উপরকার ডালের ফুলগুলি দেখিয়া কাটাইল। ভ্রাতৃবধূরা নারীচরিত্রে অভিজ্ঞা। তারা মলুয়ার এই পরিবর্তন লক্ষ্য করিল। তাহারা কানাকানি করিয়া কি বলিতে লাগিল ; শেষে মলুয়াকে বলিল, ‘চল আমরা একত্রে পুকুর ঘাটে যাইয়া স্নান করিয়া আসি, সেখানে তোমার মনের কথা শুনিব। আমরা সঙ্গে গন্ধতৈল ও চিবুনি লইয়া যাইব, রাত্রের এলোমেলো চুল আবের কাকুই দিয়া আঁচড়াইয়া দিব।’

‘তোরে লইয়া ননদিনী যাব আমরা জলে।  
মন্দের কথা কইব গিয়া আমরা সকলে ॥’

মলুয়া বলিল, ‘কাল একা পুকুর ঘাটে গিয়াছিলাম, এতে কি দোষ হয়েছে? তোরা কি সব কানাকানি করিতেছিস?’ তারা বলিল, ‘তুই একদিনে যেন আর এক বাংলার পুরনারী—১১

রকমের হইয়া গিয়াছিল, ‘আজ যে দেখি ফোটা ফুল কাল দেখেছি কলি!’ আতৃবধূরা মলুয়ার মানসিক পরিবর্তন সহজেই বুঝিতে পারিয়াছিল। মলুয়া শিরঃপীড়ার ছুতা দিয়া তাহাদের সঙ্গে গেল না।

কিন্তু দিবা-অবসানে তাহার মন আর ঘরে থাকিতে চাহিল না।

‘দুপুর বেলা গেল কন্যার ভাবিয়া চিন্তিয়া।  
বিকাল বেলা গেল কন্যার বিছানায় শুইয়া ॥  
সন্ধ্যায় কলসী কাঁখে জলের ঘাটে যায়।  
পাঁচ ভাইএর বউকে কন্যা কিছু না জানায় ॥  
মেঘ আড়া আষাঢ়ের রোদ গায়ে বড় জ্বালা।\*  
স্নান করিতে জলের ঘাটে যায় সে একলা ॥’

ইহার পূর্বেই বিনোদ আঁধা-পুকুরের ঘাটে কদমগাছের নীচে আসিয়া ঘূমের ভান করিয়া পড়িয়া আছে। মলুয়ার পিতলের কলসীতে জল ভরিবার শব্দে সে যেন জাগিয়া উঠিল। পূর্বের দিন সে লজ্জায় কোন কথা বলিতে না পারায় তাহার অনুতাপ হইয়াছিল। আজ আর সুযোগ হারাইবে না, এই স্থির করিয়া আসিয়াছিল, সে মলুয়ার কাছে নিজের পরিচয় দিল, মলুয়ারও মুখ ফুটিল, সে বলিল—

‘কুড়া লইয়া তুমি কেন ঘোর বনে।  
কেমনে কাটাও নিশি এই মত কাননে ॥  
বনে আছে বাঘ ভালুক তোমার ভয় নাই।  
এমন ক’রে কেমনে তুমি ফির ঠাই ঠাই ॥  
আঁধুয়া পুকুর পাড়ে কাল নাগিনীর বাসা।  
একবার দংশিলে যাবে পরাণের আশা ॥’

#### অতিথি

তারপরে মলুয়া বলিল, ‘তুমি আজ রাত্রে আমাদের বাড়ীতে আসিয়া অতিথি হও। এই পথ দিয়া তুমি যেও না, ইহা আমাদের খিড়কির পথ। ঐ যে সামনে গ্রামের পথ দেখা যাইতেছে, ঐ পথে বহুলোক যাতায়াত করে, তুমি সেই পথ ধরিয়া গেলেই নিকটেই বাহিরের বড় ঘরটা দেখিতে পাইবে, তাহার বারটা দরজা—

‘সামনে আছে পুষ্করিণী শানে বাঁধা ঘাট।  
পূবমুখী বাড়ীখানি আয়নার কপাট ॥  
আগে পাছে বাগ-বাগিচা আছে সারি সারি।  
পাড়াপড়শী লোকে বলে গাঁ-মোড়লের বাড়ী ॥’

মেঘের অন্তরালে তাঁর রোদ গায়ে আসিয়া পড়াতে মলুয়া জ্বালা বোধ করিল।

সন্ধ্যাকালে তিনুদেশীয় অতিথি আসিয়াছে। হীরাধর মোড়লের বাড়ীর পাঁচ বউ রান্নাঘরে যাইয়া খুব ঘটান করিয়া রাঁধিতে বসিয়াছে। তারা ‘পরম রাঁধুনী’—হেলে-কৈবর্তের ঘরে এরূপ রন্ধননিপুণা বউ বড় দেখা যায় না। তারা মানকচু ভাজা, চালতার অম্বল, কই মাছের চচ্চড়ি, ও অপরাপর নানাপ্রকার মাছের ব্যঞ্জন কালোজিরার সম্ভার দিয়া ভাল করিয়া রাঁধিয়াছে। একে একে তারা ছত্রিশ ব্যঞ্জন রাঁধিয়া ফেলিল।

‘পাঁচ ভাইয়ের সঙ্গে বিনোদ পিড়াতে বস্যা খায়।  
 এমন ভোজন বিনোদ জন্মে না সে খায় ॥  
 শুকতা খাইল, বেগুন খাইল, আর ভাজা বড়া।  
 পুলিপিঠা খাইল বিনোদ, দুধের সিয়ায় ভরা ॥  
 পাতপিঠা, বরাপিঠা, চিতই চন্দ্রপুলি।  
 মালপোয়া খাইল কত রসে ঢলি ঢলি ॥  
 আচাইয়া চাঁদবিনোদ উঠিল তখন।  
 বারদুয়ারী ঘরে গিয়া করিল শয়ন ॥  
 বাটা-ভরা সাচি পান লং এলাচি দিয়া।  
 পাঁচ ভাইয়ের বউ দিছে পান সাজাইয়া ॥  
 শূইতে দিছে শীতলপাটি উত্তম বিছানা।  
 বাতাস করিতে দিছে আবেল পাঞ্জাখানা ॥’

কিন্তু মলুয়া শুধু মাঝে মাঝে উকি মারিয়া মনের সাধ মিটাইয়াছে—এই রজ্জামণ্ডে সে নিজে উপস্থিত হয় নাই।

গৃহে ফিরিয়া আসা বিবাহের চেষ্টা

মলুয়ার সঙ্গে চাঁদবিনোদের আর দেখা নাই। পরদিন চাঁদবিনোদ প্রভাতে হীরাধর ও তাহার পাঁচ ছেলেকে প্রণাম করিয়া নিজের গ্রামের দিকে রওনা হইল।

বাড়ীর পথে প্রথমেই ভগিনীর বাড়ী। চাঁদবিনোদ চেষ্টা করিয়াও বোনের কাছে লজ্জায় মনের কথা বলিতে পারিল না। কিন্তু পাড়াপড়শী সমবয়স্ক ছেলেরা তাহার মনের কথা জানিতে পারিয়াছিল, ভগিনীও আভাসে বুঝিয়াছিল,—কয়েক দিনের পরে চাঁদবিনোদের মাও সে কথা জানিতে পারিলেন এবং বিবাহের প্রস্তাব করিয়া হীরাধরের বাটীতে ঘটকী পাঠাইলেন।

মেয়ের বিবাহের বয়স হইয়াছে। হীরাধরও নিশ্চিত নাই। তিনি দিনরাত মেয়ের জন্য একটি ভাল বর কোথায় পাইবেন, সেই চিন্তা করেন।

‘শাওন মাসে বিয়া দিতে দেশের মানা আছে।  
 এই মাসে বিয়া দিয়া বেউলা রাঢ়ী হৈছে ॥  
 ভাদ্র মাসে শাস্ত্রমতে দেবকার্যে মানা।  
 এই মাসে বিয়া না হৈল, কেবল আনাগোনা ॥’

আশ্বিনমাসে দুর্গাপূজার হিড়িক,—কার্তিক মাস আশায় আশায় কাটিল। অগ্রহায়ণ মাসে সমস্ত ক্ষেতের ধান পাকিয়া রাজ্যা হইল ; একটি রাজ্যা বরের জন্য পিতার প্রাণ আকুল হইল। মাঘ মাসে ঘটকগণ ফর্দ লইয়া উপস্থিত হইল। চাঁপানগরের প্রস্তাবটি প্রথম বিবেচিত হইল। ছেলেটি কার্তিকের মত সুন্দর,—তাহাদের অগাধ সম্পত্তি, কিন্তু বংশে তাঁহারা প্রথম শ্রেণীর কুলীন নহেন। দীঘলহাটির প্রস্তাবিত বরও বংশের দোষে অগ্রাহ্য করা হইল। সুসজ্জা হইতে যে প্রস্তাব আসিল, তাহারাও খুব আঢ্য বংশ—টাকার অন্ত নাই। অনেক নৌকা ঘাটে বাঁধা, তাহাতে ব্যাপার—বাণিজ্য চলে, তাহা ছাড়া নৌকাদোড়ে প্রতিদ্বন্দ্বিতার জন্য অনেক ডিঙা শাওন মাসে প্রস্তুত থাকে। চারটি বৃহদাকৃতি ষাঁড়—লড়াই করিতে অভ্যস্ত। সেই ষাঁড়ের লড়াই দেখিতে খুব জনতা হয়—কিন্তু বংশের কাহারও কোনকালে কুষ্ঠরোগ হইয়াছিল—এজন্য সে প্রস্তাব পরিত্যক্ত হইল।

এই সময়ে ঘটক চাঁদবিনোদের মাতার প্রস্তাব লইয়া উপস্থিত হইল। তাঁহারা বরকে দেখিয়াছেন, চেহারা ভারি সুন্দর। কুলমর্যাদায় চাঁদবিনোদের সমকক্ষ ঘর সেই আড়ালিয়া অঞ্চলে নাই। ঘর—বর দুইই উজ্জ্বল। কিন্তু ইহারা বড় দরিদ্র—লক্ষ্মীপূজার জন্য একমুষ্টি চালও ইহাদের সঞ্চয় নাই।

সুতরাং হীরাধরের ইচ্ছা সত্ত্বেও এই ঘরে কন্যার বিবাহে তিনি সম্মতি দিতে পারিলেন না। যে কন্যা কত আদরে লালিত পালিত, তাহাকে কি করিয়া এই নিরন্ন ঘরে বিবাহ দিবেন? অগ্নিপাটের শাড়ী পরিয়াও যাহার মন উঠে না, সে কি করিয়া জোলের হাতের মোটা ও ছিন্ন পাছড়া পরিবে?

ঘটক যাইয়া সকল কথা জানাইল। পুত্রের ইচ্ছা পূর্ণ করিতে দৈব বাদী হইয়াছেন দেখিয়া মাতা ক্ষুণ্ণ হইলেন।

#### ৫ বাস-যাত্রা

চাঁদবিনোদও সমস্ত শুনিয়াছিল ; সে পরদিন মাতাকে বলিল, ‘পুরুষ হইয়া এরূপ ভাবে ঘরে বসিয়া দারিদ্র্য সহ্য করা উচিত নয়, আমি কুড়া শিকার করিতে আজই দূরে যাইব।’ কিছু বাসি পাশ্চাত্য ছিল,—কাঁচালজ্জা ও নুন দিয়া মাতা তাহাই পুত্রকে খাইতে দিলেন। চাঁদবিনোদ তাঁহাকে প্রণাম করিয়া বিদায় লইল :—

‘বিদেশেতে যায় যাদু যন্দুর দেখা যায়।

পিছন থেকে চেয়ে দেখে অভাগিনী মায় ॥

বাঁশের ঝাঁড় বন—জজ্ঞাল পুত্রের পৃষ্ঠে পড়ে।

আঁখির পানি মুছা মায় ফিরে আইল ঘরে ॥’

একবছর পরে বিনোদ বাড়ী ফিরিয়া আসিল। কুড়াশিকারে বিশেষ দক্ষতা দেখাইয়া বিনোদ প্রচুর অর্থ ও প্রতিষ্ঠা লাভ করিয়া ফিরিয়া আসিয়াছে।

‘কুড়াশিকার কইরা বিনোদ পাইল জমিন বাড়ী।

ইনাম বক্শিস পাইল কত কইতে নাহি পারি ॥



রাজ্যের রাজা দেওয়ান সাহেব সদয় হইল তারে।  
কুড়ি আড়া জমিন দেওয়ান লেখা দিল তারে ॥’

চাঁদবিনোদ নিজে একজন প্রধান শিল্পী, সে তাহার বাড়ীতে একখানি আটচালা ঘর নিজহাতে নির্মাণ করিল। তাহার বাড়ী সুত্যা নদী হইতে বেশী দূরে অবস্থিত ছিল না। ঘরখানির ১২টি দরজা, সুদিখেতের নানা কারুকর্মে তাহা দেখিতে সুদৃশ্য করা হইল। বেড়াগুলি শীতলপাটী দিয়া মোড়ানো হইল, তাহাতে কত শিল্পকার্য, দূর পল্লী হইতে লোকেরা ঘরখানি দেখিতে আসিত। উলুছনের চালের কোনায় কোনায় নানারূপ ফুল ও লতাপাতার শিল্প ; ঘরখানি চাঁদের আলোর মত ঝলমল করিতে লগিল, ময়ূরপুচ্ছ দিয়া ইহার সাজসজ্জা রচিত হইল এবং বাড়ীর দক্ষিণদিকে চমৎকার এক দীঘি খনিত হইল ; সেই বাড়ীখানি যেন কোন রূপসী রমণীর ন্যায় সেই পুকুরের আয়নায় নিজ মুখ দেখিয়া আনন্দসাগরে ভাসিতে লাগিল।

#### চাঁদ বিনোদের বিবাহ

অর্থ প্রতিষ্ঠা ও খ্যাতিতে এখন চাঁদবিনোদ সেই অঞ্চলে তাহাদের সমাজে বিশিষ্ট স্থান অধিকার করিল।

এই সমস্ত সংবাদ শুনিয়া হীরাধর এখন মলুয়াকে চাঁদবিনোদের হস্তে দিতে আগ্রহ প্রকাশ করিয়া প্রস্তাব পাঠাইল।

মহাসমারোহে বিবাহ হইয়া গেল। বিবাহের রাত্রেই বিনোদ তাহার স্ত্রীর নূতন অপরূপ রূপলাবণ্য পুনরায় আবিষ্কার করিয়া একেবারে মুগ্ধ হইয়া গেল। শুভরাত্রে বাসরঘরে, একটি দীপ ঘূতের সলতায় মৃদু মৃদু জ্বলিতেছিল,

‘ঘরেতে জ্বলিছে বাতি, সাজের যেন তারা।  
শয়ানমন্দিরে মলুয়া সামনে, হল খাড়া ॥  
কিবা মুখ, কিবা ডুবু, সুন্দর ভজিমা।  
আঁধার ঘরেতে যেন জ্বলে কাঁচা সোনা ॥’

প্রথম রাত্রির এই আনন্দে বিভোর হইয়া বিনোদ নানারূপ হাস্যপরিহাস করিতে লাগিল,

‘শিরে না দীঘল কেশ পড়ে কন্যার পায়।  
সেই কেশ লইয়া বিনোদ মেঘুয়া\* খেলায় ॥’

এইরূপ রজনীর উচ্ছ্বসিত উৎসবে তাল রাখিয়া চলা একটু কষ্টকর। মৃদুস্বরে মলুয়া বলিল :

‘পাঁচ ভাইয়ের বউ তারা নিদ্রা নাহি গেছে।  
খেড়ার ফাঁক দিয়া সবে তোমায় দেখিছে ॥

\* মেঘুয়া = চুল লইয়া এক প্রকারের খেলা।

ভূষণের রুনুখুনি শব্দ শুনি কানে ।  
পরিহাস করবে তারা কালিকা বিহানে ॥’

### কাজির দৃষ্টি

মলুয়া শ্বশুরবাড়ী আসিয়াছে। সে একটা পুকুরঘাটে কলসী লইয়া জল আনিতে যাইতেছিল। পথে সেই দেশের কাজি ঘোড়ার উপর হইতে তাহাকে দেখিতে পাইল। কাজি অতি দুচরিত্র ছিল—মলুয়াকে দেখিয়া তাহার চোখে পলক পড়িল না,

‘ঘোড়ায় সোয়ারে কাজি চাহিয়া রহিল।’

মলুয়াকে পাইবার জন্য তাহার মন অত্যন্ত উতলা হইয়া উঠিল। নেতাই নাম্নী এক কুটনী সেই অঞ্চলে ছিল। কাজি ভাবিতে ভাবিতে যাইয়া সেই কুটনীর বাড়ীতে উপস্থিত হইল। কুটনীকে সে অনেক লোভ দেখাইল এবং তাহাকে দূতী করিয়া মলুয়ার নিকট অশিষ্ট প্রস্তাব পাঠাইল :

‘নিকা যদি করে মোরে ভালমত চাইয়া ।  
আমার যত ঘরের নারী রইবে বাদি হৈয়া ॥  
সোণা দিয়া বেইড়া দিব সর্বাঙ্গা শরীর ।  
সাতখুন মাপ তার বিচারে কাজির ॥  
সোণার পালঙ্ক দিব সুন্দর বিছান ।  
গলায় গাঁথিয়া দিব মোহরের থান ॥  
দিব যে কাঁথের কলসি সোণাতে বাঁধিয়া ।  
নাকের বেশর দিব হীরার গড়িয়া ॥’

নেতা-কুটনী আত্মীয়তার ভান করিয়া চাঁদবিনোদের বাড়ীতে যাতায়াত করিতে লাগিল। তাহার মাতাকে বলিল, ‘তোমার পুত্রবধূ নাকি অঙ্গরার মত সুন্দরী, তাহাকে আনিয়া দেখাও।’ এই ভাবে ঘনিষ্ঠ অন্তরঙ্গতা করিতে লাগিল। একদিন শাশুড়ী বাড়ীতে ছিল না ; মলুয়া একাকী ঘাটে জল আনিতে গিয়াছে—সেখানে সুবিধা পাইয়া কুটনী মলুয়াকে কাজির প্রস্তাব জানাইল। মলুয়া বারুদে আগুন পড়িলে ঘেরূপ হয়, সেইরূপ জ্বলিয়া উঠিল।

‘কাজিরে কহিও কথা না শুনিব আমি ।  
রাজার দোসর সেই আমার সোয়ামী ॥  
আমার সোয়ামী যেমন পর্বতের চূড়া ।  
আমার সোয়ামী যেমন রণদৌড়ের ঘোড়া ॥  
আমার সোয়ামী যেমন আসমানের চাঁদ ।  
না হয় দুশমন কাজি পদনখের সমান ॥



জাতে মুসলমান কাজি, তার ঘরের নারী।  
মনের আপশোষ মিটাক তারা সাত নিকা করি ॥’

### কাজির ক্রোধ ও বিনোদের বিপদ

অপমানিত হইয়া কুটনী কাজির কাছে যাইয়া সকল কথা বলিল। কাজি অগ্নি-স্ফুলিঙ্গের মত জ্বলিয়া উঠিল।

সে দেশে ‘নজর-মরিচা’ নামক একরূপ কর ছিল,—বিবাহের পর নবাবকে এই কর দিতে হইত। পাত্রীর সৌন্দর্য অনুসারে এই বিবাহের কর নির্দিষ্ট হইত। কাজি সেই দিনই চাঁদবিনোদের উপর ‘নজর-মরিচা’ পরওয়ানা জারি করিল। তাহাকে সাতদিনের মধ্যে ‘নজর-মরিচা’ স্বরূপ ৫০০ টাকা দিতে হইবে, নতুবা তাহার ঘর-বাড়ী নিলাম করিয়া টাকা আদায় করা হইবে।

চাঁদবিনোদ মাথায় হাত দিয়া বসিয়া পড়িল, এত টাকা সে কোথা হইতে দিবে? সাতদিন বিনোদ ভাবিতে ভাবিতে কাটাইল, যেখানে ভাবনা ছাড়া উপায় নাই সেখানে না ভাবিয়া সে আর কি করিবে? সাতদিন পরে কাজির পাইক পেয়াদা আসিল, ঝাঙাগাড়ি করিয়া তাহারা বিনোদের মালমাস্তা ক্রোক করিল। আটচালা-চৌচালা ঘরগুলি বিক্রি হইয়া গেল, এত সাধের যে ‘রজিলা’ ঘরখানি নিজ হাতে তৈরী করিয়াছিল, যাহার শিল্প দেখিতে দূর পল্লী হইতে লোকজন আসিয়া প্রশংসা করিয়া যাইত, তাহা ছাড়িয়া দিতে বিনোদের অসহ্য কষ্ট হইল, কিন্তু কি করিবে? এত বড় বাড়ীতে মাত্র একখানি ঘর অবশিষ্ট রহিল।

ক্রমে এই ক্ষুদ্র পরিবারের দুর্গতি চরম সীমায় উপস্থিত হইল। বিনোদ হালের বলদগুলি বিক্রয় করিল এবং দুধওয়ালা গাইগুলিও ছাড়িয়া দিতে বাধ্য হইল।

মলুয়ার দুঃখের শেষ নাই। স্বামী ও শাশুড়ীকে কি খাওয়াইবে, সারাদিন এই চিন্তা করিয়া সে কাহিল হইয়া পড়িল। এমন দিনে বিনোদ তাহাকে কিছুদিনের জন্য বাপের বাড়ীতে পাঠাইতে ইচ্ছা প্রকাশ করিল :—“তুমি পাঁচ ভাইয়ের এক বোন, তোমার বাপের বাড়ীতে কোন অভাব নাই, তোমার গায়ে ফুলের আঘাত কোনদিন পড়ে নাই। সর্বদা ভাল শাড়ী ও অলঙ্কার পরিয়াছ, তুমি এখানে এত দুঃখ সহিয়া কিরূপে থাকিবে? তোমার পিতামাতা ও ভাইয়েরা আছেন—তঁারা কত আদরে তোমাকে সেখানে রাখিবেন।’

মলুয়া গদগদ কণ্ঠে বলিল :—

‘ঘরে থাকি বনে থাকি গাছের তলায়।

তুমি বিনা মলুয়ার নাহিক উপায় ॥

রাজার হালে থাকি যদি আমার বাপের বাড়ী।

মলুয়া নহে তো সেই সুখের আশারি\* ॥

শাক-ভাত খাই যদি গাছতলায় থাকি।

দিনের শেষে তোমার মুখ দেখিলেই সুখী ॥’

\* আশারি = প্রত্যাশী।

মলুয়া কিছুতেই বাপের বাড়ী গেল না, সে বলিল, ‘আমার মায়ের পাঁচ ছেলে আছে! কিন্তু আমার শাশুড়ীর দেখিবার শূনিবার কে আছে? তাঁহাকে একাকী ফেলিয়া আমি কিরূপে যাইব? তিনি বৃন্দ ও অশক্ত হইয়াছেন। কে তাঁহাকে রাঁধিয়া বাড়িয়া দিবে? এই গৃহই আমার কান্দী, ইহাই আমার বৃন্দাবন, আমি বাড়ী ছাড়িয়া কোথাও যাইব না।’

নিদারুণ অভাবে মলুয়ার সর্বাঙ্গের অলঙ্কার বিক্রয় করিয়া ফেলিতে হইল :

‘নাকের নথ বেচি মলুয়া আষাঢ় মাস খাইল।  
 গলার যে মতির হার তাও বেচ্যা খাইল ॥  
 শাওন মাসেতে মলুয়া পায়ের খাড়া বেচে।  
 এত দুঃখ মলুয়ার কপালেতে আছে ॥  
 হাতের বাজু বাঁধা দিয়া ভাদ্রমাস খায়।  
 পাটের শাড়ী বেচ্যা মলুয়ার আশ্বিনমাস যায় ॥  
 কাণের ফুল বেচ্যা মলুয়া কার্তিক গৌয়াইল।  
 অঞ্জোর যত সোণা-দানা সকলই বাঁধা দিল ॥  
 শতগ্রন্থি অঞ্জোর বাস হাতের কঙ্কণ বাকি।  
 আর নাহি চলে দিন মুষ্টি চালের লাগি ॥  
 ছেঁড়া কাপড়ে মলুয়ার অঙ্গ নাহি ঢাকে।  
 একদিন গেল মলুয়ার দুরন্ত উপোসে ॥  
 ঘরে নাই লক্ষ্মীর দানা এক মুঠা ক্ষুদ।  
 দিন রাইত বাড়তে আছে মহাজনের সুদ ॥’

আপনি শাক সিদ্ধ করিয়া খায়—তবু শাশুড়ী ও স্বামীর মুখে দুটি ভাত দেয় :

‘আপনি উপোসী থেকে—পরে নাহি কয়।  
 সোয়ামী শাশুড়ীর দুঃখ আর কত সয় ॥’

এখন বাড়ী বাড়ী ভিক্ষা করা বাকী। যখন অবস্থা এইরূপ দাঁড়াইল, তখন বিনোদ স্ত্রী ও মাকে কিছু না বলিয়া একরাত্রে গৃহত্যাগ করিল।

বিনোদ চলিয়া গেলে কাজি আবার কুটনীকে পাঠাইল। তন্তকাঞ্চন বর্ণ এখন আর সোনার অলঙ্কারে ঝলমল করে না।

‘সর্বাঙ্গা হয়েছে যেন ধুতরার ফুল।’

কুটনী নানা ছন্দে নানা বস্ত্রে প্রলোভন দেখাইল—

‘ধান ভানা সুতা কাটা না শোভে তোমায়।  
 এমন অঙ্গে ছেঁড়া কাপড় শোভা নাহি পায় ॥

সোণায় মুড়িয়া দিব অজ্ঞা যে তোমার ।  
কাজিরে করিয়া সাদী ঘরে যাও তার ॥’

কাটাঘায়ে নূনের ছিটার মত কুটনীর কথা মলুয়ার অসহ্য হইল। তাহার তেজস্বিতার এক কণাও কমে নাই, বরং যত দুঃখ পাইতেছে, ততই কাজির এই অপমান তাহাকে বেশী পীড়ন করিতেছে—

‘বৈঁচে থাকুন স্বামী আমার চিরজীবী হৈয়া ।  
থানের মোহর ভাঙ্গি কাজির, পায়ের লাথি দিয়া ॥’

তারপরে মলুয়া কুটনীকে তাহার পাঁচ ভাইয়ের কথা বলিল, তাহারা পৃথিবীতে কাহাকেও ভয় করে না, ‘কাজির কথা আমি জানাইব,—তখন তাহারা এই দুঃকে বুঝিয়া লইবে।’

মলুয়ার দূরবস্থার কথা আড়ালিয়া গ্রামে তাহার মাতা শুনিলেন। তিনি আহরনিদ্রা ছাড়িলেন, তিনদিন, তিনরাত তিনি না খাইয়া না ঘুমাইয়া কাঁদিয়া—কাটিয়া কাটাইলেন। পাঁচ ভাই মলুয়াকে আনিতে গেল। কিন্তু মলুয়া আসিল না, তাহার শাশুড়ীকে ফেলিয়া কি করিয়া সে নিজে সুখভোগ করিতে বাপের বাড়ী যাইবে? তাহারা সারাদিন তাহাদের আদরের ভগিনীটিকে বুঝাইল। কিন্তু মলুয়া নিজ কপালে হাত দিয়া দেখাইল—‘আমার এই অদৃষ্টের দুঃখ কে নিবারণ করিবে? বাপমা তো ভাল ঘরে ভাল বরে বিবাহ দিয়াছিলেন। দৈবদোষে তোমাদের এত আদরের ভগিনী কষ্ট পাইতেছে। এই কষ্ট দূর করা আর তোমাদের সাধ্য নাই। সোয়ামী ঘরে নাই, শাশুড়ী প্রাণ থাকিতে নিজের ভিটা ছাড়িয়া অন্যত্র যাইবেন না, আমি এখানে তাঁহাকে লইয়া পড়িয়া থাকিয়া যদি মরি, তবুও তাহা সৌভাগ্য মনে করিব। আমি এখান হইতে যাইব না, মাকে বলিও তোমাদের পাঁচ ভাইয়ের মুখ দেখিয়া তিনি কতক সান্ত্বনা পাইবেন, আমার শাশুড়ীর কে আছে?’

চোখের জল মুছিতে মুছিতে পাঁচ ভাই বাড়ী ফিরিয়া গেল।

‘সূতা কাটে ধান ভানে শাশুড়ীরে লৈয়া ।  
এই মতে দিন কাটে দুঃখ যে পাইয়া ॥’

ক্রমে ফাল্গুনমাস গেল, চৈত্রমাসে আমের মুকুলের গন্ধে বাতাস পূর্ণ হইল, কাকগুলি কষায় আম্রমঞ্জরী ঠোঁটে ভাঙ্গিয়া কলরব করিতে লাগিল। বিনোদ কোন দেশে গেছে, মলুয়া শত চিন্তা করিয়াও তাহার কিনারা পায় না।

‘আইল আষাঢ় মাস মেঘের বয় ধারা ।  
সোয়ামীর চাঁদ মুখ না যায় পাসরা ॥  
মেঘ ডাকে গুরু গুরু দেওয়ায় ডাকে রৈয়া ।  
সোয়ামীর কথা ভাবে খালি ঘরে শূইয়া ॥’

শ্রাবণমাসে পল্লীগ্রামে মনসাদেবীর উৎসব, সর্বত্র মনসামঙ্গল গান। সেই দেশব্যাপী উৎসবের সময় বিনোদ দেশছাড়া।

তারপরে আশ্বিনমাসে দেবীপূজা। বধু ও শাশুড়ী কত দুঃখে দিন কাটান। কার্তিকমাসে দৈব সদয় হইল, বিনোদ ঘরে ফিরিয়া আসিল। সে এবারও কুড়াশিকার করিয়া অনেক টাকা আনিয়াছে। বাজেয়াপ্ত ভূমি খালাস করিয়া লইল, পুনরায় চৌচালা ও রজ্জিন আটচালা ঘর উঠিল। বহুদিন পরে বিনোদের মুখে মা ডাক শুনিয়া—মায়ের প্রাণ জুড়াইল।

‘মা বলিয়া কে ডাকল আজ দুঃখিনী মায়েরে।’ মিলনের আনন্দে এই পরিবার এতদিন পরে আবার ভাগ্যকে ধন্যবাদ দিল।

‘মেওয়া মিছরি সকল মিঠা, মিঠা গজাজল।

তার থেকে মিঠা দেখ শীতল ডাবের জল ॥

তার থেকে মিঠা দেখ দুঃখের পরে সুখ।

তার থেকে মিঠা যখন ভরে খালি বুক ॥

তার থেকে মিঠা যদি পায় হারানো ধন।

সকল থেকে অধিক মিঠা বিরহে মিলন ॥’

কাজিসাহেব আর একটা চক্রান্ত করিলেন। সে দেশে এক প্রবলপরাক্রমশালী জমিদার ছিলেন—তাহার চরিত্র দুষ্ক ছিল,—এই তরুণ জমিদার চর পাঠাইয়া পরের সুন্দরী স্ত্রী খুঁজিতেন। কাজির লোকেরা তাঁহাকে খবর দিল যে, সুত্যা নদীর পাড়ে এক পল্লীতে চাঁদবিনোদের এক পরমাসুন্দরী স্ত্রী আছে। এই সংবাদ পাওয়ামাত্র তিনি ষড়যন্ত্র করিয়া একটা মিথ্যা মামলায় ফেলিয়া বিনোদকে হত্যাপরোধে ধরাইয়া দিলেন। বিচারকের আদেশ অনুসারে বিনোদকে নিলক্ষার মাঠে জীয়াস্ত পুতিয়া ফেলিবার ব্যবস্থা হইল। এদিকে জমিদারের নিযুক্ত দস্যুর দল মলুয়াকে জোর করিয়া বাড়ী হইতে জমিদারের গৃহে লইয়া গেল।

মলুয়া বিপদে পড়িয়া তাহার পোষা কুড়ার মুখে চিঠি দিয়া পিত্রালয়ে ভাইদের কাছে পাঠাইয়াছিল। সশস্ত্র পাঁচ ভাই নিলক্ষার মাঠে যাইয়া দেখিল, বিনোদকে পুতিয়া ফেলিবার জন্য মাটি খোঁড়া হইতেছে। এই অবস্থায় তাহারা সেই সকল উৎপীড়কদিগকে মারিয়া ধরিয়া বিনোদকে ছাড়াইয়া লইয়া আসিল, কিন্তু তখন তাহারা দেখিল মলুয়াকে জমিদারের লোকজন দস্যু সাজিয়া ধরিয়া লইয়া গিয়াছে। বিনোদের মা মাটিতে অজ্ঞান হইয়া পড়িয়া আছেন। বিনোদ তাহার কুড়াটিকে লইয়া বনবাসী হইল।

এদিকে জমিদার মলুয়াকে অনেক প্রলোভন দেখাইলেন। সে বলিল, ‘আমি একটি সঙ্কল্প করিয়া ব্রত গ্রহণ করিয়াছি। তিনমাস পরে সেই ব্রতের উদযাপন হইবে। আপনি এই তিনমাস সবুর করিয়া থাকুন। এই সময় যেন কোন পুরুষের মুখ আমাকে দেখিতে না হয়। এই তিনমাস খাটের উপর শুইব না, মেখেতে আঁচল পাতিয়া শয়ন করিব। কাহারও স্পৃষ্ট অনুজ্ঞা খাইব না। এই তিনমাস আমার গৃহে আপনি আসিবেন না, তারপর ব্রত সমাধা করিয়া আমি আপনার ইচ্ছা পূর্ণ করিব। যদি ইহার অন্যথা করা হয়—তবে জানিবেন আমি বিষ খাইয়া মরিব।’

জমিদার এই তিনমাস প্রতীক্ষা করিলেন। তিনমাস তো বসিয়া রহিল না, তাহার একদিন অন্ত হইল।

তখন জমিদার—

‘মুখেতে সুগন্ধি পান অতি ধীরে ধীরে ।  
সোণালী রুমাল হাতে পশিলা অন্দরে ॥’

মলুয়া বলিল, ‘আপনি জানেন, আমার স্বামী একজন ভাল কুড়াশিকারী, আমি তাঁহার সঙ্গে সঙ্গে থাকিয়া কুড়াশিকার শিখিয়াছি। আমার ইচ্ছা ব্রত শেষ করিয়া আমি আপনার সঙ্গে কুড়াশিকার করিতে যাই, দেখিবেন, আমি একদিনে কতগুলি কুড়া ধরিয়া আনিতে পারি।’

জমিদার এই প্রস্তাবে অত্যন্ত আনন্দিত হইলেন, বড় একটা ভাওয়ালিয়া নৌকা সুসজ্জিত করা হইল। সমস্ত আয়োজনপত্র লইয়া মলুয়া ও জমিদার সেই ভাওয়ালিয়ায় উঠিলেন। বার দিন পরে জমিদার মলুয়াকে স্পর্শ করিবেন, এই সর্ত।

এদিকে মলুয়া কুড়ার মুখে চিঠি পাঠাইয়া তাহার পাঁচ ভাইকে তাহার বিপদের কথা সমস্ত জানাইয়াছে :

‘পঞ্চ ভাইয়ে পত্র পাইয়া পানশী নৌকা করে ।  
ছল করিয়া তারা কুড়াশিকার ধরে ॥  
বিস্তার ধলাই বিল পদ্মফুলে ভরা ।  
কুড়াশিকার করিতে জমিদার যায় দুপুরবেলা ॥  
সঙ্গেতে মলুয়া কন্যা পরমা সুন্দরী ।  
পানশী লৈয়া পাঁচ ভাই লইলেক ঘেরি ॥  
লাঠির বাড়ীতে ছিল যত দাঁড়ি মাঝি ।  
উবুৎ হইয়া জলে পড়ে, করে চৈচামিচি ॥  
পঞ্চ ভাইয়ের পানশী খানি দেখিতে সুন্দর ।  
লক্ষ্য দিয়া উঠে কন্যা তাহার উপর ॥  
অষ্ট দাঁড়ে মারে টান জ্ঞাতি বন্ধু জনে ।  
পঞ্জী-উড়া কৈরা পানশী ভাইজা পদ্মবনে ॥  
সোয়ামী সহিত মলুয়া যায় বাপের বাড়ী ।  
শ্রীরাম উদ্ভার করে যেন আপনার নারী ॥’

মলুয়ার নূতন বিপদ

কিন্তু মলুয়াকে সংসারের যত দুঃখ যেন একত্রে পাইয়া বসিয়াছিল। সে দুঃখের হাত এড়াইবে কিরূপে?

মলুয়া বাড়ীতে আসিলে আত্মীয়েরা কানাঘুসা করিতে লাগিল। তিনমাস একটা চরিত্রহীন জমিদারের বাড়ীতে সে কাটাইয়াছে, সেখানে ছত্রিশ জাতের মেলামেশা ; আচারবিচার জাতিবিচার এই জমিদারের নাই। বৃদ্ধা আমলাদিগকে তাড়াইয়া দিয়া কতকগুলি ব্যভিচারী কর্মচারী দ্বারা সে বেষ্টিত থাকে ; সেখানে মলুয়া যে ধর্ম বজায়



রাখিয়াছে তাহার প্রমাণ কি? খাওয়াদাওয়ার শৃঙ্খলা যে সে পালন করিতে পারিয়াছে, তাহারই বা ঠিকানা কি? বিনোদের মাতুল হেলে-কৈবর্তদের মধ্যে প্রধান কুলীন। তিনি বলিলেন, ‘ভাগিনেয়-বধূকে ঘরে নেওয়া যাইতে পারে না—কিছুতেই না, তবে বিনোদ প্রায়শ্চিত্ত করিলে তাহার দোষ খণ্ডিতে পারে, আমরা তাকে লইয়া খাওয়াদাওয়া করিতে পারি।’ বিনোদের পিসাও একজন কুলীন, তিনি মাতুলের কথায় সায় দিলেন।

মলুয়ার পাঁচ ভাই সেইখানে ছিল, তাহারা অতিশয় ক্রুদ্ধ হইয়া ভগিনীকে পিতৃগৃহে লইয়া যাইবার জন্য পীড়াপীড়ি করিতে লাগিল। আঁচলে চক্ষু মুছিতে মুছিতে মলুয়া বলিল, ‘আমি বাহিরের পরিচারিকা হইয়া এই বাড়ীর বাহিরের কাজ করিব। আমি এ বাড়ী ছাড়িয়া থাকিতে পারিব না’—

‘গোবর-ছড়া দিব আমি সকাল সন্ধ্যাবেলা।  
বাহিরের কাজ সব করিব একেলা ॥’

অনেক চেষ্টা করিয়াও ভাইয়েরা তাহার মন ফিরাইতে পারিল না।

‘প্রায়শ্চিত্ত করিয়া বিনোদ ত্যজে ঘরের নারী।  
আধারে লুকায়ে কাঁদে মলুয়াসুন্দরী ॥’

সমাজপরিত্যক্তা মলুয়া—ঘর ছাড়িয়া বাহিরে স্থান লইল। স্বামীর চাঁদমুখখানি একবার দেখাই তাহার জীবনের প্রধান কাম্য হইল এবং তাহাতেই সে তৃপ্ত হইল। কিন্তু এখানেই তাহার দুঃখের মাত্রা পূর্ণ হইল না।

সে কাঁদিয়া কাঁদিয়া দিন কাটায়; একহাতে কাঁটা দিয়া আজিনা সাফ করে, অপর হাতে চোখের জল মোছে। তাহার শাশুড়ী নিতান্ত অশক্ত, তিনি চোখে দেখেন না.—সারাদিন বিনোদ ক্ষেতে খাটিয়া আসে—কে ভাত রাঁধিয়া দিবে? চোখে না দেখিয়া শাশুড়ী যাহা রাঁধেন, তাহা মুখে তোলা যায় না। হায় রে, স্বামীকে যে দুটি ভাত রাঁধিয়া দিবে, নারীজন্মের এই সৌভাগ্য হইতেও মলুয়া বঞ্চিত। যে আসে তাহাকেই সে বিনোদের আর একটা বিবাহের জন্য চেষ্টা করিতে বলে। তাহার সোয়ামী ও শাশুড়ী না খাইয়া মারা পড়িতে বসিয়াছেন। এ বিষয়ে বিনোদের মামা ও পিসা খুব তৎপরতা দেখাইলেন। বিনোদের আর একটি বিবাহ অচিরে সুসম্পাদিত হইয়া গেল। এই নববধূটিকে মলুয়া ভগিনীর ন্যায় ভালবাসিতে লাগিল।

‘বাহিরের কাজ করে মনের হরিষে।  
সতীনেরে রাখে মলুয়া মনের সন্তোষে ॥’

সর্গাষাট, ষাণ্মাষ

একদিন প্রাতে উঠিয়া বিনোদ মায়ের কাছে ভাত চাহিল। ‘মা, আমি অতি শীঘ্র কুড়া শিকার করিতে যাইব, আমায় চারটি ভাত দাও।’ কিন্তু চাল কাঁড়া ছিল না—দেৱী

সহে না। মা পান্তাভাত বাড়িয়া আনিয়া ছেলেকে দিলেন, তাহাই তাড়াতাড়ি খাইয়া একহাতে কুড়া ও অপর হাতে পিঞ্জর লইয়া বিনোদ অতি দ্রুত বাড়ী হইতে রওনা হইয়া গেল। পথে ভগিনীর বাড়ী, সে কিছুকালের জন্য ভগিনীর কাছে যাইয়া বসিল। মলুয়ার কথা লইয়া আলাপ হইল, অভাগিনী মলুয়ার জন্য ভগিনী কাঁদিতে লাগিল, বিনোদ তাহার ভগিনীর অশ্রু সঞ্চে নীরবে নিজ অশ্রু মিশাইয়া মলুয়ার কষ্টের কথা বলিয়া বিলাপ করিতে লাগিল। সূর্যের তেজ বাড়ন্ত, আর অপেক্ষা করা যায় না। বিনোদ সেই গ্রাম ছাড়িয়া নিবিড় জঙ্গলে প্রবেশ করিল, চারিদিকে বড় বড় গাছ, বিরাট পুরুষের ন্যায় বন রক্ষা করিতেছে। নিম্নে প্রশস্ত দূর্বাদল ধরিত্রীকে শ্যামল শোভায় মণ্ডিত করিয়া রাখিয়াছে। কুড়াকে ছাড়িয়া দিয়া বিনা ঝোপের আড়াল হইতে বিনোদ নূতন কুড়ার আগমন প্রতীক্ষা করিয়া রহিল। এদিকে গুরু গুরু মেঘগর্জনের সঙ্গে কুড়ার উল্লাস বাড়িল,—তাহাদের মধ্যে কয়েকটি আসিয়া পোষা কুড়াটির সঙ্গে আলাপ জমাইতে চেষ্টা করিল। বিনা ঝোপের নিম্নে বিষধর সর্প ছিল, এই সময়ে অকস্মাৎ বিনোদের কনিষ্ঠ পদাঙ্গুলি দংশন করিয়া বিদ্যুদ্বেগে লুকাইয়া পড়িল।

সেই নিবিড় বনপ্রদেশে আসন্ন মৃত্যু আশঙ্কা করিয়া বিনোদের চক্ষের জল পড়িতে লাগিল। মায়ের জন্য প্রাণ কাঁদিয়া উঠিল এবং ‘জন্মের মত না দেখিলাম সুন্দর মলুয়ায়’ বলিয়া অস্থির হইয়া সেই পরিত্যক্ত রমণীর জন্য তাহার বৃকের ভিতরকার ব্যথা যেন মৃত্যুকালে আরও বেশী হইল।

একজন পথিক যাইতেছিল, বিনোদ হাঁফাইতে হাঁফাইতে তাহার এই অবস্থা তাহার মাকে জানাইতে বলিয়া চক্ষু বুজিল।

সন্ধ্যাকালে মা এই সংবাদ শুনিয়া পাগলিনীর মত এলোচুলে ছুটিয়া আসিলেন, হাহাকার করিতে করিতে মলুয়ার পাঁচ ভাই আসিল, তখন বিনোদের চোখের তারা ঘোলা হইয়া গিয়াছে। নিশ্বাস বন্ধ, বক্ষের স্পন্দনের কোন লক্ষণ নাই, নাড়ী ধরিয়া তাহারা মনে করিল, সব শেষ হইয়া গিয়াছে। এই বিচলিত শোকার্ত পরিবারের মধ্যে একমাত্র মলুয়াই নিশ্চল; সে একখানি প্রতিমার মত স্থির হইয়া রহিল। তাহার পরে দাদাদিগকে বলিল ‘এখানে বিলাপ করিয়া কোন ফল নাই, তোমরা চল, ইহাকে লইয়া ওঝার বাড়ীতে যাই, দেখি প্রাণের কোন আশা আছে কিনা?’ যেন ঘুম হইতে উঠিয়া বিলাপকারীরা বিনোদকে লইয়া একজন প্রসিদ্ধ চিকিৎসকের বাড়ীতে গেল। মড়া কোলে লইয়া মলুয়া বেহুলার ন্যায় স্বামীর পুনর্জীবন কামনা করিয়া গারুড়ী ওঝার বাড়ীতে উপস্থিত হইল। মলুয়ার ভ্রাতারা নৌকাখানি প্রাণপণে বাহিয়া লইয়া আসিয়া সাতদিনের পথ তিনদিনে চলিয়া গেল। গারুড়ী রোগীকে দেখিয়া বলিল ‘এ রোগী এখনও মরে নাই। আমি ইহাকে বাঁচাইব।’

‘নাক মুখ দেইখা ওঝা মাথায় থাবা দিল।

বৃকেতে আনিয়া বিষ কোমরে নামাইল ॥

কোমরে আনিয়া বিষ হাঁটুতে নামাইল।

বিষ জ্বালা গেল, বিনোদ আঁখি মেইলা চাইল ॥’

মলুয়ার নৃতন পরীক্ষা

সুত্যা নদীর তীরে ধন্য ধন্য রব উঠিল। সতী কন্যা, সাবিত্রীর মত, বেহুলার মত, স্বামীকে স্বর্গ হইতে ফিরাইয়া আনিয়াছে। হেলে-কৈবর্তের ঘর এই কন্যার আবির্ভাবে পবিত্র হইয়াছে। ইহাকে কে বাহিরের দাসী করিয়া বাড়ীতে রাখিয়াছে?

‘মরা পতি জীয়াইয়া আনে যেই নারী।  
তাহারে সমাজে লইতে কেন কর দেবী ॥’

কিন্তু দেশের লোকে বলিলে কি হইবে, দেশে বলিলে কি হইবে?’

‘বিনোদের মামা বলে, হালুয়ার সর্দার।  
যে ঘরে তুলিয়া লবে জাতি যাইবে তার ॥  
বিনোদের পিসা কয় ভাবিয়া চিন্তিয়া।  
ঘরেতে কেমনে লব, জাতি ধর্ম ছাড়িয়া ॥’

এদিকে সে অঞ্চলের সমস্ত লোক বলিতে লাগিল :

‘পান ফুল দিয়া কন্যায় তুল্যা লও ঘরে।  
সতী কন্যা হৈয়া কেন দাসীর কাজ করে ॥’

বিপুল তর্ক-বিতর্ক উঠিল। বিনোদের কুৎসা গাহিয়া আত্মীয়স্বজন আন্দোলন করিতে লাগিল। মলুয়ার কলঙ্ক লইয়া বিনোদের পরিবার সমাজে আরও নিন্দিত হইল।

অজ্ঞান

সেইদিন বড় ঝড় উঠিয়াছে। সুত্যা নদীর ঢেউগুলি আকাশে উঠিয়া যেন বাতাসের সঙ্গে লড়াই করিতেছে, নদীর সিকতাভূমিতে ঝুঁড়েঘরগুলি বাতাসে থর থর কাঁপিতেছে। গৃহস্থেরা ঘরের দরজা জোর করিয়া বন্ধ করিয়া রাখিয়াছে, রাস্তায় লোকজন নাই।

কে ঐ সুন্দরী একাকী নদীর ঘাটে চলিয়াছে? সুন্দরীর সুকোমল অঙ্গ সর্বভূষণযোগ্য, কিন্তু তাহা ভূষণহীন। যে দেহ নীলাম্বরী বা অগ্নিপাটের শাড়ী পরিলে মানায়, জোয়ার খুঁড়া পরিয়া এরূপ ভীষণ ঝড়ের সময় সে একা কোথায় যাইতেছে, তাহার ঝড়বৃষ্টি জ্ঞান নাই, চোখের জল বৃষ্টির জলের সঙ্গে মিশিয়া যাইতেছে। সুন্দরী ভাবিতেছে—‘এত করিয়াও সোয়ামীর মুখখানি বিধাতা দেখিতে দিলেন না। আমিই তাঁহার কলঙ্কের কারণ; যতদিন আমি বাঁচিব, ততদিন তাঁহার নিস্তার নাই। আমার দোষে সকলে তাঁহাকে দুঃখবে? এ ছার জীবন তাঁহার সামাজিক নিন্দা ও কলঙ্কের কারণ।’

সুন্দরী ঘাটে আসিয়া ভাঙ্গা মন-পবন কাঠের ডিঙাখানি খুলিয়া লইল, তাহাতে উঠামাত্র নৌকাখানি ঝড়ের বেগে তৃণের মত মাঝদরিয়ায় আসিয়া পড়িল। কখনও কখনও ঝড়ের অবকাশে আকাশে অস্তোনুখ রৌদ্রের রেখা ফুটিয়া উঠে, সেই স্বর্ণকিরণচ্ছটায় নিমজ্জমান দেবীপ্রতিমার মত মলুয়ার কপালের সিন্দুর ও রূপসী মূর্তি ক্ষণতরে উজ্জ্বল দেখাইতে লাগিল।

নৌকায় জল উঠিতেছে ; মলুয়া ভাবিল, ‘জল আরও উঠুক, আমি অতলে ডুবিব, আমার মুখ আর কেউ দেখিতে পাইবে না, স্বামীর নিন্দা আমার জীবনের সঙ্গে অসবান হউক ; আমি স্বামীর কলঙ্ক আর সহিতে পারিতেছি না।’

বিনোদের ভগিনী সেই বৃষ্টিতে ভিজিতে ভিজিতে যেন ঝড়ের বেগে উড়িতে উড়িতে পাড়ে আসিয়া দাঁড়াইল। এদিকে মাঝগাঙ্গে জল বেগে ভাঙ্গা নৌকার বাতা বহিয়া উঠিতেছে। বিনোদের ভগিনী চীৎকার করিয়া বলিতেছে—‘বধূ, একি করিতেছ, তুমি ফিরিয়া এস, আমি তোমাকে আমার বাড়ীতে লইয়া যাইব,—তুমি যাইও না।’ মলুয়া বলিল—‘ননদিনী ফিরিয়া যাও, তোমার মুখ দেখিয়া আমার বুক ফাটিয়া যাইতেছে!’

‘উঠুক উঠুক উঠুক পানি ডুবুক ভাঙ্গা নাও।  
জন্মের মত মলুয়ারে একবার দেখি যাও ॥’

শাশুড়ী আলুথালুবাসে অসম্ভূত কেশে পাগলের মত ছুটিয়া আসিয়া বলিলেন, ‘বউ—ঘরে ফিরিয়া এস, তুমি আমার ঘরের লক্ষ্মী—আমার ভাঙ্গা ঘরের চাঁদের আলো, আমার সাঁঝের বাতি, তোমায় না দেখিলে আমি একদিন এ বাড়ীতে তিষ্ঠিতে পারিব না!’

মলুয়া বলিল—

‘উঠুক উঠুক উঠুক পানি ডুবুক ভাঙ্গা না।  
বিদায় দাও মা—জননী ধরি তোমার পা॥’

অর্ধেক নৌকা জলমগ্ন হইল, পাড়ে দাঁড়াইয়া শাশুড়ী কাঁদিতে লাগিলেন। পাঁচ ভাই আসিয়া কত সাধিলেন। সেই ঝড়বৃষ্টির মধ্যে সেখানে ভিড় জমিয়া গেল। মলুয়া করজোড়ে তাঁহাদিগকে প্রণাম করিতে করিতে ক্রমে ডুবিয়া যাইতে লাগিল এবং বিনয়ের সহিত শত অনুরোধের উত্তরে ঘাড় নাড়িতে লাগিল :—

‘উঠুক উঠুক উঠুক জল ডুবুক ভাঙ্গা নাও।  
মলুয়ারে ফেলে তোমরা আপন ঘরে যাও ॥’

বিনোদ সেই দুর্যোগের মধ্যে পাগলের মত ছুটিয়া আসিল, সে চিৎকার করিয়া বলিল—‘আমার মল্ল কোথায়?’

‘দুয়া আইস্যা চাঁদবিনোদ নদীর পাড়ে খাড়া।  
এমন কইরা জলে ডুবে আমার নয়নতারা ॥’

চাঁদ-স্বরূজ ডুবুক আমার সংসারে কাজ নাই।  
জ্ঞাতি বন্ধুজনে আমি আর তো নাহি চাই ॥  
তুমি যদি ডুব মল্লু আমায় সঙ্গে নেও।  
একটিবার মুখ চাইয়া প্রাণের বেদন কও ॥  
ঘরে তুইল্যা লইব তোমায় সমাজে কাজ নাই।  
জলে না ডুবিও কন্যা, ধর্মের দোহাই ॥’

স্বামীকে শেষ মুহূর্তে পাইয়া আজ মলুয়ার মুখ ফুটিল। সে কহিল—‘অনেক দিন গত হইয়াছে, আর বাকী জীবনের জন্য সুখ চাই না। আর সংসারে থাকিয়া তোমাকে কষ্ট দিব না’—

‘আমি নারী থাকতে তোমার কলঙ্ক না যাবে।  
জ্ঞাতি বন্ধুজনে তোমায় সদাই ঘাঁটিবে ॥  
কলঙ্কী জীবন আমি ভাসাব সায়েরে।  
এখান হইতে সোয়ামী মোর চলে যাও ঘরে ॥  
ঘরে আছে সুন্দরী নারী তার মুখ চাইয়া।  
সুখে কর গৃহবাস তাহারে লইয়া ॥  
উঠুক উঠুক উঠুক পানি ডুবুক ভাঙা নাও।  
অভাগীরে রাইখা তুমি আপন ঘরে যাও ॥’

আর জ্ঞাতি বন্ধু! সামাজিক গুরুগণ সেই সূত্যা নদীর পাড়ে ভীড় জমাইয়া দাঁড়াইয়া মলুয়ার মৃত্যুদৃশ্য দেখিতেছিলেন; মলুয়া তাঁহাদিগকে ডাকিয়া বলিল—‘এত দোষের দোষী আমি—আমিও চিরদিনের জন্য আসি নাই—আমি চলিলাম—আমার স্বামীর কোন অপরাধ নাই, আপনারা তাঁহাকে ক্ষমা করিবেন। আমার কপালে দুঃখ ছিল, আপনারা কি করিবেন? আমি চলিয়া গেলে আর খোঁটা দেওয়ার কিছু থাকিবে না। আপনারা আমার স্বামীকে কষ্ট দিবেন না’—

‘কোন দোষের দোষী নয় আমার সোয়ামী।’

মলুয়া সতীনকে বলিল—

‘সুখে কর গৃহবাস স্বামীকে লইয়া।  
আজি হতে না দেখিবে মলুয়ার মুখ।  
আমার দুঃখ পাশরিবে দেইখ্যা স্বামীর মুখ ॥’

এই সময় পূর্বদিক হইতে মেঘ গর্জন করিয়া উঠিল। মলুয়া কোথায় চলিল?

‘এই সাগরের পার নাই, ঘাটে নাই খেওয়া।  
পূর্বেতে গর্জিল দেওয়া ছুটল বিষম বা।  
কই বা গেল সুন্দর কন্যা, মন-পবনের না ॥’

## আলোচনা

মলুয়া চন্দ্রাবতীর রচনা। চন্দ্রাবতীর জীবনকথা পূর্বেই লিখিত হইয়াছে। ইনি সুপ্রসিদ্ধ মনসামঞ্জল-লেখক বংশী ভট্টাচার্যের কন্যা ; নেত্রকোনা সবুড়িভিসনে পাড়য়ার গ্রামে ইহাদের বাড়ী ছিল। ১৫৭৫ খ্রীষ্টাব্দে চন্দ্রাবতী পিতার মনসামঞ্জল কাব্যের অনেকাংশ লিখিয়াছিলেন, সেই সকল রচনার মধ্যে কেনারামের পালাটি অতি করুণ ও কবিত্বময়। একখানি মলুয়া-কব্যের পুঁথিতে চন্দ্রাবতীর ভণিতায়ুক্ত বন্দনার পদ পাওয়া গিয়াছে। তরুণ বয়সে জয়চন্দ্র ভট্টাচার্য নামক এক সুদর্শন তরুণ যুবককে ইনি ভালবাসিয়াছিলেন এবং উভয়ের বিবাহের প্রস্তাব পাকা হইয়া গিয়াছিল। কিন্তু জয়চন্দ্রের বিশ্বাসঘাতকতায় এই বিবাহ হইতে পারে নাই। চন্দ্রাবতী পিতার অনুরোধ সত্ত্বেও আর বিবাহ করিতে স্বীকৃত হইলেন না, আজীবন কুমারী রহিয়া গেলেন। জয়চন্দ্র শেষে অন্তত্ম হইয়া ফুলেশ্বরী নদীতে প্রাণ ত্যাগ করেন। চন্দ্রাবতী তাঁহার এই দশা দেখিয়া প্রাণে যে আঘাত পান, তাহা সহ্য করিতে পারেন নাই। অচিরে তিনিও পরলোকগমন করিয়াছিলেন।

জয়চন্দ্র কর্তৃক প্রত্যাখ্যাত হওয়ার পরে চন্দ্রাবতী পিতার আদেশে রামায়ণের বঙ্গানুবাদ রচনা করিতে প্রবৃত্ত হন। পিতা তাঁহাকে ফুলেশ্বরী নদীর পাড়ে একটি শিবমন্দির গঠন করিয়া দেন। কুমারীব্রত গ্রহণ করিয়া তিনি দিনরাতের অনেক সময়ই সেইখানে শিবারাধনায় কাটাইতেন। চন্দ্রাবতীর চরিতকথা নয়ানচাঁদ ঘোষ নামক এক কবি অনুমান ২৫০ শত বৎসর পূর্বে রচনা করেন।

এই কবি সত্যের সীমা লঙ্ঘন না করিয়াও চরিতখানি কবিত্বমণ্ডিত করিয়াছেন। আমরা তাহার বিস্তারিত কাহিনী অনাত্র দিয়াছি। চন্দ্রাবতী রচিত অপরাপর কাব্যেও তিনি স্বয়ং আত্মকাহিনী বর্ণনা করিয়াছেন, কিন্তু জয়চন্দ্রের ব্যাপার সম্বন্ধে নিজে কিছু বলেন নাই। তাঁহার রামায়ণখানি বাজালা সাহিত্যের একটি বিশেষ সম্পদ। এখনও ময়মনসিংহ অঞ্চলের মেয়েরা কোন বিবাহোপলক্ষে সেই রামায়ণ গান করিয়া থাকেন। সম্ভবত মাইকেল মধুসূদন চন্দ্রাবতীর রামায়ণ হইতে তাঁহার সীতা-সরমার কথোপকথনের অংশটি গ্রহণ করিয়াছেন। এই রামায়ণ কলিকাতা বিশ্ববিদ্যালয় হইতে অসমাপ্ত অবস্থায় প্রকাশিত হইয়াছে। রামায়ণের ভূমিকায় চন্দ্রাবতী লিখিয়াছেন :

‘ধারাস্রোতে ফুলেশ্বরী নদী বহি যায় ।  
বসতি যাদবানন্দ করেন তথায় ॥  
ভট্টাচার্য বংশে জন্ম অঞ্জনা ঘরণী ।  
বাঁশের পান্নায় তালপাতার ছাউনী ॥  
ঘট বসাইয়া সদা পূজে মনসায় ।  
কোপ করি সেই হেতু লক্ষ্মী ছাড়ি যায় ॥  
দ্বিজ বংশী বড় হৈল মনসার বরে ।  
ভাসান গাহিয়া যিনি বিখ্যাত সৎসারে ॥  
ঘরে নাই ধান তার চালে নাই ছানি ॥  
আকর ভেদিয়া পড়ে উচ্ছিন্নার পানি ॥

ভাসান গাহিয়া পিতা বেড়ান নগরে ।  
 চাল কড়ি যাহা পান আনি দেন ঘরে ॥  
 বাড়াতে দারিদ্র্যজ্বালা কষ্টের কাহিনী ।  
 তার ঘরে জন্ম নিলা চন্দ্রা অভাগিনী ॥  
 সদাই মনসাপদ পূজি ভক্তিতরে ।  
 চাল কড়ি কিছু পাই মনসার বরে ॥  
 সুলোচনা মাতা বন্দি দ্বিজ বংশী পিতা ।  
 যার কাছে শুনিয়াছি পুরাণের কথা ॥  
 মনসাদেবীরে বন্দি জুড়ি দুই কর ।  
 যাহার প্রসাদে হয় সর্ব দুঃখ দূর ॥  
 মায়ের চরণে মোর কোটি নমস্কার ।  
 যাহার কারণে দেখি জগৎ সংসার ॥  
 শিব-শিবা বন্দি গাই ফুলেশ্বরী নদী ।  
 যার জলে তৃষ্ণা দূর করি নিরবধি ॥  
 বিধি মতে প্রণাম করি সকলের পায় ।  
 পিতার আদেশে চন্দ্রা রামায়ণ গায় ॥’

এই আত্মবিবরণের সঙ্গে নয়ানচাঁদ ঘোষের বর্ণিত কাহিনীর সমস্ত কথারই ঐক্য আছে, চন্দ্রাবতী যে জয়চন্দ্রকে ভালবাসিয়া চিরকুমারী ব্রত অবলম্বন করিয়াছিলেন, সে কথার তিনি উল্লেখ করেন নাই। কিন্তু তিনি যে ভাগ্যহীনা এবং পিতার গলগ্রহ স্বরূপ ছিলেন তাহার ইজ্জিত তিনি দিয়াছেন। পিতার আদেশে যে সাংসারিক বিষয় হইতে মন ফিরাইয়া লইয়া রামায়ণ রচনায় প্রবৃত্ত হইয়াছিলেন, তাহারও তিনি উল্লেখ করিয়াছেন।

মলুয়া—কাব্য পড়িয়া মনে হয়, চন্দ্রাবতীর আদর্শ ছিল বাণীকির সীতা। চন্দ্রাবতী সংস্কৃতে সুপণ্ডিত ছিলেন, কিন্তু তিনি বাণীকির কাব্যের শব্দগত অনুবাদ করেন নাই। মলুয়া—কাব্যের অনেক স্থলেই সীতাকে মনে পড়িবে। মলুয়া কাজির অশিষ্ট প্রস্তাবের যেরূপ তেজগর্ভ উত্তর দিয়াছিলেন, তাহা সীতার প্রত্যুত্তরের মত, অথচ তিনি বাণীকিকে নকল করেন নাই। সীতা—চরিত্রটি তিনি প্রাণের সমস্ত করুণ বেদনা ও দরদ দিয়া বুঝিয়াছিলেন, মলুয়া সীতার প্রতিবিম্ব নহে, দ্বিতীয় সীতা—সেইরূপই মৌলিক ও স্বাভাবিক—কিন্তু তাহা নকল নহে। সমস্ত বাঙ্গালী হিন্দু যাহার চরিত্রগৌরব শত শত বৎসর যাবৎ হৃদয়ে আয়ত্ত করিয়াছিল, সেই সংস্কারপুষ্ট ধারণা হইতে এই দ্বিতীয় সীতার আবির্ভাব। ইহাতে বাণীকির সীতার পবিত্রতা ও তেজ আছে, এবং বাঙ্গালীর আবহাওয়ার কোমলতা ও সুকুমারত্ব আছে।

হিন্দুনারীর তেজ—বীর রমণীর যোগ্য। যে মলুয়া—কাজিকে গর্বিত ভাবে অসমসাহসিকতার সহিত স্পর্ধিতভাষায় অগ্রাহ্য করিয়াছিল—সে মলুয়া সামাজিক অত্যাচারে একবারে নিস্তেজ, নিস্তরঙ্গ হইয়া গিয়াছিল; যাহার ক্ষুরধার বৃশ্চিতে শত ষড়যন্ত্র বিফল হইয়াছিল, সে যখন সামাজিক অনুশাসনে পরিত্যক্ত হইল, তখন একটি কথা বলিতে সাহসী হইল না। রামায়ণের সীতা সামাজিক নিগ্রহে পরীক্ষা

দিয়া সতীত্ব প্রমাণ করিতে চাহিলেন না, ঘৃণায় পাতালপুরীতে আশ্রয় লইলেন। কিন্তু মলুয়া সমাজের নিতান্ত অন্যায় অনুশাসন মানিয়া লইলেন, একটিবার প্রতিবাদ করিলেন না—না করিবার কারণ, যে প্রতিবাদ স্বামীর করা কর্তব্য ছিল, তাহা তিনি করেন নাই—বরং দ্বিতীয়বার দারপরিগ্রহ করিয়া সামাজিক শাসনের অনুমোদন করিয়াছিলেন। এই অপমান ও দুঃখে মলুয়ার সমস্ত প্রতিবাদ কণ্ঠে আসিয়া ফিরিয়া গেল। তিনি কি বলিবেন, যিনি বলিবার তিনি স্ত্রীর সমস্ত অপমান গলাধঃকরণ করিলেন। মলুয়ার সমস্ত তেজস্বিতা ও দৰ্প ভাঙ্গিয়া চুরিয়া গেল।

তিনি জানিতেন, দুঃখ সহিবার জন্যই তাঁহার জন্ম হইয়াছিল, সুতরাং তিনি দুঃখকে ভয় করেন নাই। শেষে জলে ডুবিয়া মরিলেন, এই কাজ তিনি কষ্টে অসহিষ্ণু হইয়া করেন নাই। স্বামীর প্রতি অনুরাগই তাঁহার সমস্ত কার্যের অনুপ্রাণনা দিয়াছিল। নিজের সমস্ত অলঙ্কারপত্র বেচিয়া খাইয়াও তিনি স্বামীর ভিটা ঝাঁকড়াইয়া ছিলেন। তারপরে যখন সমাজ কর্তৃক লাঞ্চিত হন, তখনও স্বামীর গৃহে কিছু ধরিতে হুইতে না পারিয়া শুধু তাঁহার মুখখানি দেখিবার লোভে সেই ভিটায় বাহিরের পরিচারিকা হইয়াছিলেন,—ইহার মধ্যে কতবার পিতৃগৃহে তাঁহাকে লইয়া যাইবার জন্য ভ্রাতারা আসিল, কিন্তু তিনি তাহাদের সমস্ত স্নিগ্ধ আমন্ত্রণ অগ্রাহ্য করিয়া চূড়ান্ত কষ্টকে বরণ করিয়া লইলেন। স্বামীপ্রাণতার এই দৃষ্টান্ত সাহিত্যে বিরল। বিনোদ দ্বিতীয় দারপরিগ্রহের পর তিনি সতীনকে যে আদর দেখাইয়াছিলেন তাহা নিতান্ত অকৃত্রিম। যখন তাহার নিকট চিরবিদায় লইলেন, তখন তাহাকে বলিলেন, ‘তুমি আমার জন্য দুঃখ করিও না, আমাকে মনে পড়িয়া দুঃখ হইলে স্বামীর মুখ দেখিয়া ভুলিও।’ তিনি অকপটে সতীনকে ভালবাসিয়াছিলেন এবং নিজে সরলভাবে বিশ্বাস করিয়াছিলেন, সতীনও তাঁহাকে ভালবাসে। তাঁহার অকপট ভালবাসা এই বিশ্বাসের সৃষ্টি করিয়াছিল এবং তিনি বুঝিয়াছিলেন সতীন তাঁহাকে সত্যই ভালবাসে এবং তাঁহার মৃত্যুতে ব্যথিত হইবে।

সেই শেষদিনকার চরম দুর্দিনে যখন আকাশে মেঘ ও ঝঞ্ঝা, নিম্নে সুত্যা নদীর উত্তাল তরঙ্গ, তখন ভাঙ্গা মন-পবনের ডিঙ্গায় এই অপব্রূপ রমণী ধীরে ধীরে জলে ডুবিতেছেন। ষাহারা দেবী-বিসর্জনের দৃশ্য দেখিয়াছেন, অস্তচূড়ালম্বী শেষ রৌদ্রের রেখায় ঝলমল প্রতিমার মাথার ডুবন্ত মুকুট দেখিয়াছেন, তিনি এই মলুয়ার শেষদৃশ্যের কারুণ্য এবং ভীষণ মৃত্যুর এই সুন্দর পরিণাম উপলব্ধি করিতে পারিবেন। চন্দ্রাবতী নিজে চিরদুঃখিনী ছিলেন, তিনি নিজের দুঃখ দিয়া এই দুঃখিনী মলুয়াকে গড়িয়াছিলেন, তাই মলুয়া চরিত্র এত জীবন্ত হইয়াছে।

এই গল্পটিতে যে ‘নজর-মরিচা’র কথা আছে, ইউরোপেও সেইরূপ প্রথা বিদ্যমান ছিল। মধ্যযুগে প্রাদেশিক শাসনকর্তারাও তাঁহাদের অধীনস্থ প্রজাদের নিকট হইতে বিবাহ উপলক্ষে এইরূপ কর আদায় করিতেন। শুল্করূপে কন্যার উপর অধিকার শাসনকর্তার থাকিত, অভিভাবকগণ ট্যাক্স দিয়া কন্যাটির মুক্তির ব্যবস্থা করিতেন। এই ট্যাক্সের নাম ছিল ‘Droit de Seigneur’ (Frazer-এর *Folklore in the Old Testament* দেখুন)। তান্ত্রিক বঙ্কীয় গুরুরা (সহজিয়া) নিম্নশ্রেণীর মধ্যে ‘গুরুপ্রসাদী’ নাম দিয়া এই জঘন্য অধিকারের দাবী করিতেন।



## আঁধা-বঁধু

রাজহাটের অম্ব যুবক

ভোরের আকাশে খয়ের রঙের মেঘ, মাঝে মাঝে তার সিন্দূরের ছড়া।

অম্ব যুবক বাঁশীটি হাতে নদীর পাড়ে দাঁড়াইয়া আছে। সম্মুখের প্রান্তরে ডালিম ফুলের লাল কলি ফুটিয়া আছে।

যুবক দাঁড়াইয়া বাঁশী বাজাইতেছে—সেই সুরে নদীর পাড় ভাঙিয়া পড়িতেছে, টেউগুলি চলিতে চলিতে যেন কানাকানি করিয়া কথা বলিতেছে।

অম্ব কেবলই বাঁশী বাজাইতেছে—সেই সুরে ভাটিয়াল নদী উজান বহিতেছে।

অম্ব নিজের বাঁশীর সুরে নিজে মত্ত, সে ভাবিতেছে :

‘ভোর বিয়ানে ডালিম কলি ফুট্যা ডাল ভরা।

কেমন জানি আসমান জমিন কেমন যেন তারা ॥

কেমন জানি সোণার দেশ সোণার মানুষ আছে।

কাঞ্চন পুরুষ কেন ভিক্ষা লইতে আইছে ॥’

এমন সুন্দর পুরুষ, রূপের তরঙ্গ যেন শরীর বহিয়া অবনীতে লুটাইতেছে।

‘দেখিতে সুন্দর রূপ রে শ্যাম শুকপাখী।

কোন্ পামর বিধাতা রে করিল অম্ব দুটি আঁখি ॥’

বাঁশী শুনিয়া মুগ্ধ, রূপ দেখিয়া বিস্মিত নগরের লোকেরা তাহার সম্মুখে কত কি বলাবলি করিতেছে!

এই অম্ব বাঁশীবাদকের কথা রাজকুমারীর কাণে গেল।

রাজকুমারী বিস্মিত হইয়া অম্ব ভিখারীকে দেখিতে লাগিলেন, উজ্জ্বল চন্দ্রিকার মত তার রূপ। কি মিষ্ট সে বাঁশীর সুর—ইচ্ছা হয়, সর্বস্ব দিয়া নিজেকে তাহার পদে বিকাইয়া দিতে।

কুমারী বলিলেন :

‘সোণার কপাট রূপার খিল গো বাপের ভান্ডার।

বাপের আগে কয়ে লো সেই খুলে দেও দুয়ার ॥’

কিন্তু অন্ধ বলিল :

‘ধূলা মাণিক একই কথা, দূতী লো তাতে কিবা আছে।  
আগে জান কিবা দিলে অন্ধের দুঃখ ঘোচে ॥’

রাজকুমারীর চোখ হইতে ঝরঝর করিয়া জল পড়িতে লাগিল, তিনি বলিলেন,—

‘শুন শুন ওলো সই কই যে তোমারে।  
আমার দুইটি নয়ন তুল্যা দিয়া আস তারে ॥  
রসিক জন কয় দিলে কি হবে নয়ন।  
অন্ধের দুঃখ ঘুচে কন্যা যদি দিতে পার মন ॥’

রাজা ঘুম থেকে উঠিয়া সেই বংশীধ্বনি শুনিলেন, যে সুরে চরাচর মুগ্ধ—সেই  
সুর শুনিয়া রাজা পাগল হইলেন।

সংবাদদাতাকে বলিলেন—

‘খবরিয়া, জানিয়া আইস আগে।  
কোন বা জনে বাজায় বাঁশী নবীন অনুরাগে ॥’

খবরিয়া সংবাদ আনিল—‘এমন সুন্দর তরুণ মূর্তি—কার্তিকের মত, কিন্তু অন্ধ,  
ভিক্ষা করিয়া খায়।’

রাজা তাহাকে ডাকাইয়া আনিলেন, বলিলেন, ‘তুমি কে? তোমার পিতামাতা  
কে? তুমি ভিক্ষা করিয়া খাও কেন?’

অন্ধ বলিল, ‘আমি এমন দুর্ভাগ্য, জন্মিয়া মা বাপের মুখ দেখি নাই।’

‘বিধাতায় কি দোষ দিব? কপালের দোষ আমার।  
দিবা রজনী আমার কাছে সমান অন্ধকার ॥’

করুণায় আর্দ্রকণ্ঠে রাজা বলিলেন, ‘আজ হইতে আমি তোমার মা-বাপ হইলাম।  
ভিক্ষার ঝুলি ছাড়িয়া তুমি আমার পুরীতে আইস।’

‘ভরা ভাঙারের ধন দুয়ার থাকবে খোলা।  
গলায় পরিবে তুমি মাণিক্যের মালা ॥  
অজ্ঞাতে পরিবা তুমি রাজার ভূষণ।  
সর্বাজ্ঞে গাঁথিয়া দিব রত্নাদি কাঞ্চন ॥’

‘আমার দুইটি কথা তোমাকে পালন করিতে হইবে। অতি উষাকালে যখন  
রাজবাড়ীর টিয়া, বউ-কথা-কণ্ড এবং পাপিয়া জাগে নাই—যখন চৌকিদারও শেষ-  
রাত্রির হাঁক দেয় নাই, তখন তুমি বাঁশী বাজাইয়া আমার ঘুম ভাঙাইবে।’

‘ঘুম থেকে উঠে যেন বাঁশীর গান শুনি।  
মধুভরা এমন বাঁশী জনমে না জানি ॥’

‘আর একটি কথা,—রাজকুমারীকে তোমার ঐ মধুভরা বাঁশী বাজাইতে শিখাইতে হইবে।’

‘শুন শুন সুন্দর পাণ্থ্য কহি যে তোমারে।  
আজ হইতে কর বাস এই না রাজপুরে ॥  
ভিক্ষার ঝুলি ছাড় তুমি ঘরে বসি খাও।  
আজ হৈতে হলাম আমি তোমার বাপমা ॥  
মন্দিরে থাকিবে তুমি উত্তম বিছানে।  
ঘুম থেকে জাগিব আমি তোমার বাঁশী শূনে ॥  
এক কন্যা আছে আমার পরাণের পরাণ।  
তাহারে শিখাবে তুমি ওই না বাঁশীর গান ॥  
এই দুই কাজ তোমার আর কিছু না চাই।  
সকল সুখ পাবে হেথা—কেবল চক্ষু দুটি নাই ॥’

অশ্ব কুমারীকে বলিতেছে—‘আমার কথা বারংবার কেন জিজ্ঞাসা করিতেছ? নদীর গর্জন শুনি, কিন্তু তাহা দেখি না, আঁধারে তাহা আমার সম্মুখে বহিয়া যাইতেছে। আলো কিরূপ, কোন্ আকাশের পথে ফোটে তা জানি না। ফুলের গন্ধে আমোদিত হই ; কি নিস্তম্ভ বায়ুতে ফুলের কলি কেমন করিয়া ফোটে, তাহা জানি না।’

‘শব্দে শুনি তরুলতা না দেখি নয়নে।  
বিধাতা করিল অশ্ব এই দুঃখী জনে ॥  
মানুষ যেন কেমন কন্যা, হাসি মুখের কথা।  
শব্দে শুনি দেখি নাই, মনে রইল ব্যথা ॥  
তরু লতা পুষ্প আমার সামনে আছে খাড়া।  
মাথার উপরে ফুটিয়াছে চাঁদ সূর্যজ তারা ॥  
সবার উপর আছ তুমি অন্তরে সে পাই।  
ধেয়ানেতে আছ কন্যা অন্তরেতে পাই ॥’

রাজকুমারী তাহার দুঃখে বিগলিত হইয়া বলিলেন—‘তোমার কোন্ দেশে জন্ম, তোমার পিতামাতা কে?’

‘যে দেশে জন্ম তোমার সে দেশের লোকে।  
কি নাম রাখিল তোমার, কি বলিয়া ডাকে ॥’

অশ্ব বলিল, ‘আমার নাম নাই, পাগল বলিয়া সবাই ডাকে। বাঁশীর সুরের মত কোন্ বন, কোন্ স্থান হইতে আমি ভাসিয়া আসিয়াছি তাহা জানি না—কেহ আমায়



আদর করিয়া ডাকে, তাদের কাছে থাকিতে বলে, কেহ বা দূর দূর করিয়া তাড়াইয়া দেয়। কেহ ভালবাসে, কেহ গালি দেয় ; আমি চোখের জলে ভাসিয়া সকলের দুয়ারে দাঁড়াই। কাহাকেও দোষ দেই না।’

‘পাগল আমার ডাকনাম পাগল আমার বাঁশী।  
অজানা পথে গাই গাই গান হইয়া উদাসী ॥’

রাজকুমারী অশ্রুসিক্ত চোখে অশ্রুধর দুঃখে বিগলিত হইয়া বলিলেন—

‘বাঁশী বাজাও আঁধা-বঁধু শিখাও আমায় গান।  
আজ হৈতে পিয়া বঁধু পরাণের পরাণ ॥  
আজি হৈতে তোমায় বঁধু ছাড়িয়া না দিব।  
নয়নের কাজল করি নয়ানে রাখিব ॥  
সে কাজল দেখিয়া যদি লোকে করে দোষী।  
হিয়ায় লুকায়ে বঁধু শুনব তোমার বাঁশী ॥  
হিয়ায় লুকানো বঁধু লোকে যদি জানে।  
পরাণ-কোটরা ভরি রাখিব যতনে ॥  
বসন করি অঞ্জে পরব, মালা করি গলে।  
সিন্দুরে মিশায়ে তোমা মাখিব কপালে ॥  
চন্দনে মিশায়ে তোমায় করব দেহ শীতল।  
সুখে দুঃখে করব তোমায় দু-নয়নের কাজল ॥  
দুই অঙ্গা ঘুচাইয়া এক অঙ্গ হইব ॥  
বলুক বলুক লোকে মন্দ তাহা না শুনিব ॥’

‘তুমি অশ্রু, কিন্তু জগৎ তোমার কাছে অশ্রুধর থাকিবে না’—

‘আমার নয়নে বঁধু দেখিবে সংসার।  
এমন হলে ঘুচবে তোমার দুই আঁখির আঁধার ॥  
তোমার বুক লইয়া আমি শুনব তোমার বাঁশী।  
মরণে জনমে বঁধু হইলাম দাসী ॥’

অশ্রু এই কথা শুনিয়া চমকিয়া উঠিল, বলিল, ‘এ সকল কথা তুমি কি বলিতেছ? তুমি রাজকন্যা, রাজ্যেশ্বরের সঞ্জে তোমার বিবাহ হইবে, তুমি পাটেশ্বরী হইবে। শত দাসী তোমার পদসেবা করিবে—তোমার সুখের পথে আমি কাঁটা হইয়া উপস্থিত হইয়াছি, আজই আমি এই গৃহ ছাড়িয়া যাইব। আমি অশ্রু, আমার জন্য বনে কাঁটার শয্যা, আমার আহার বন্য কষায় ফল, এই দুর্ভাগ্যের জন্য তুমি জীবনটা নষ্ট করিবে, দুর্জনের চিন্তা মনে স্থান দিও না, যদি আমার কথা না শুন :—

‘বিদায় দেও রাজকন্যা আপন দেশে যাই।  
রাজপুরীর সুখে আমার কোন কাজ নাই ॥’

রাজকুমারী বলিলেন—‘মা আমাকে বাঁশী শিখিতে মানা করিয়া দিয়াছেন। কিন্তু এই মানায় আমার মনের আকর্ষণ দ্বিগুণ বাড়িয়াছে।’

‘কিসের রাজত্ব—সুখ তাতে কিবা হবে।  
 মনের ফরমাইস বল কেবা জোগাইবে ॥  
 বঁধুরে আরে বঁধু—যে দিন শুনছি তোমার বাঁশী।  
 কুল গেছে মান গেছে হয়েছে তোমার দাসী ॥  
 তোমায় ছাড়িয়া না দিব।  
 নয়নের কাজল কৈরা বস্তু নয়নে পয়ব ॥  
 তোমারে ছাড়িয়া বঁধু সুখ নাহি চাই।  
 যোগিনী সাজিয়া চল কাননেতে যাই ॥  
 চন্দন মাখিয়া কেশে বানাইব জটা।  
 সংসারের সুখে বস্তু দিয়ে যাব কাঁটা ॥  
 বাপ রইল মা রইল সকল ছাড়িয়া যাই।  
 বনেতে বসতি করি বনের ফল খাই ॥  
 বনের না পুষ্প তুলি গাঁথিব হে মালা।  
 ফুলের মধু আনি তোমায় খাওয়াব তিন বেলা ॥  
 পাতার শয়্যায় বঁধু পাতি দিব বুক।  
 না জানি ইহাতে বঁধু পাইবে কিনা সুখ ॥  
 এতেক ছাড়িয়া বঁধু যদি চলি যাও তুমি।  
 আগেতে বধিয়া যাও অবলার পরাণি ॥’

অল্প এই কথা শুনিয়া কি করিয়া এই বিপদ হইতে উদ্ধার পাইবে, হতবুদ্ধি হইয়া তাহাই চিন্তা করিতে লাগিল এবং বলিল—‘তুমি কাঁটার পথে আসিয়াছ, এ পথ বড় দুর্গম, এ পথ মরীচিকা—সুখের আশা দিয়া ভীষণ কষ্টের দিকে লইয়া যায়—তুমি এই সকল দুঃখের পথ ছাড়, নিজেকে বিপদে ফেলিও না। এ পথ দূরূহ, এ পথ নানা বিঘ্ন ও দুঃখসঙ্কুল’—

‘শব্দে শূনি চণ্ডীদাস পীরিতি করিল।  
 ঝুঁটের আগুনে যেন দহিয়া মরিল ॥  
 নীলমণি পীরিতি করি রাজা হৈল ত্যাগী।  
 যারা যারা পীরিতি করে কেবল দুঃখের ভাগী ॥’

#### রাজকুমারীর বিবাহ

বাঁশী আর বাজে না। কন্যা বড় হইয়াছে, রাজা তাহাকে সেই সাধের বাগানে যাইতে মানা করিয়া দিয়াছেন। ফাল্গুন মাসে বাগান ভরিয়া ফুলের কলি হইল। চৈত্র মাসে কলিগুলি ফুটিয়া সুবাস ছড়াইল। বৈশাখ আসিল, বৃক্ষ হইতে পুরাতন পাতা ঝরিয়া পড়িতে লাগিল, অতি দারুণ গ্রীষ্মে কোকিলের কণ্ঠের স্বর থামিয়া গেল। বাঁশী

আর বাজে না। নতুন বৎসর আসিয়াছে। সাগরমন্ডনের পর যে বিষ উঠিয়াছিল, রাজকুমারীর মন সেইরূপ বিষে ভরিয়া গেল। বৈশাখের ফোটা ফুলের গন্ধে বাগান ভরপুর, ভ্রমরেরা গুঞ্জন করিতে করিতে বাগানের দিকে ছুটিতেছে। রাজকুমারী সেই ভ্রমরের মত লুপ্ত চিত্তে বাগানের দিকে চাহিয়া থাকেন, কিন্তু রাজার মানা, বাহিরে যাইতে পারেন না।

তারপর একদিন ঘটক আসিল। ঢোল, দগড় বাজিতে লাগিল, নটেরা নাচিতে লাগিল। সেই বাদ্যের উচ্চ কলরবের মধ্যে—নাচগানের প্রমোদ-উৎসবের মধ্যে রাজকুমারীকে বিবাহ করিয়া এক প্রিয়দর্শন রাজকুমার ভিন্ন দেশে ভিন্ন রাজপুরীতে লইয়া গেলেন।

খেলার ঘর ভাঙিয়া পড়িল, এত সাধের গাঁথা মালা বাসি হইল। রাজকুমারীর মুখের সেই পাগল-করা হাসি, যাহার চম্পক-উজ্জ্বল রূপে সকলকে মুগ্ধ করিত, সেই হাসির দিন ফুরাইল। দিনে দিনে চাঁচর সুন্দর কেশ পাটের আঁশের মত হইল, কে আর বেণী বাঁধে, কে আর গন্ধতৈল ও ধূপের ধোঁয়ায় তাহা সুবাসিত করে? নৃত্যগীত বাদ্যধ্বনির মধ্যে নিস্তব্ধ একখানি পাষণপ্রতিমাকে যেন স্বর্ণ-চৌদোলায় করিয়া বিসর্জনের জন্য লইয়া গেল।

#### অশ্বের গৃহত্যাগ

রাজকুমারী চলিয়া গিয়াছেন, অশ্বের বাঁশীর সুর থামিয়া গিয়াছে ; পাগল বাঁশীর গান আর শোনা যায় না—ভাটিয়াল নদী আর উজান বহে না, রাজবাড়ীর পিঞ্জরের পাখীরা শেষরাত্রে আর প্রভাতের পূর্বে কলবর করিয়া উঠে না, গান শুনিয়া আর লোকের মিষ্ট আবেশে ঘুম ভাঙে না।

অশ্ব যুবক রাজাকে যাইয়া বলিল, ‘মহা!রাজ! আমাকে বিদায় দিন, আমি অন্যত্র যাইব।’

রাজা বলিলেন, ‘সে কি কথা! তোমার কোন অভাব-অভিযোগ থাকে আমাকে বল, আমি এখনই তাহা পূরণ করিব।’

‘আমি ভাবিয়াছি, পরমাসুন্দরী এক কন্যার সঙ্গে তোমার বিবাহ দিব। আমাদের পদ্মদীঘির মাঝখানটায় একটা জলটুক্কী ঘর নির্মাণ করিয়া দিব, সেখানে বহু দাসদাসী তোমার সেবা করিবে।’

‘এক দুঃখ অশ্ব নয়ান দিতে না পারিব।’

‘রাণী তোমাকে কত ভালবাসেন, আমি তোমাকে পিতৃতুল্য স্নেহ করি, তুমি কিসের দুঃখে এই রাজ্য ছাড়িয়া যাইতে ইচ্ছা করিয়াছ!’

অশ্ব বলিল, ‘মহারাজ! আমি আপনার ও রাণীমার স্নেহের কথা বলিতে পারি না। আমার চক্ষু নাই, এই অবস্থায় সকল দুঃখের মধ্যে আমার প্রধান দুঃখ এই যে আমি আমার পিতৃমাতৃতুল্য স্নেহশীল ও পরম উপকারী আপনাদের দুইজনের মুখ দেখিতে পাইলাম না। আমার বাঁশী আমার শত্রু, কোন স্থানে বেশী দিন থাকিতে

দেয় না, এ আমার অদৃষ্টের দোষ, কি করিব! যখন বাঁশী ফুকরিয়া কি এক অজানা বেদনায় কাঁদিয়া উঠে, তখন সেই সুর জোর করিয়া আমায় ঘরের বাহির করে।

‘বাঁশী আমার জীবন-মরণ, বাঁশী আমার প্রাণ।  
 মরণ-জীবন, ধরম-করম এ না বাঁশীর গান॥  
 আমি কি করিব আর তুমি কি করিবে।  
 কপালেতে সুখ নাই কিসে তাহা দিবে॥  
 চন্দন নহে ত রাজা বাটিয়া দিবে ভালে।  
 অঞ্জের বসন নয় ত রাজা জড়িয়া দিবে শালে॥  
 যার কপালে সুখ নাই রাজা কোথা সুখ পায়।  
 মূল ঘরে যার পালা নাই, রাজা কি করে ঠিকায়\*\* ॥  
 রাজা বিদায় দেও মোরে।’

#### অপর রাজ্যে

আবার বিজন অন্তহীন পথে সে রাজ্য হইতে দূর দূরান্তরে অন্বেষের বাঁশী বাজিয়া উঠিল। সেই বাঁশী শুনিয়া মানুষ পশুপক্ষী পাগল হইল—

‘বনে কাঁদে পশুপাখী সে বাঁশী শুনিয়া।  
 কোন্ অভাগীর ভাবের পাগল দিয়াছে ছাড়িয়া ॥  
 পরাণ-ডোরে পাগলে কেহ না রাখে বাঁধিয়া।  
 কেউ বলে বাঁশীরে আমায় সঙ্গে লৈয়া যা।’

কর্মব্যস্ত, কর্মক্রান্ত জগৎ যেন সেই বাঁশীর সুরে কোন নূতন জগতের আভাস পাইল—সে রাজ্যে ব্যস্ততা নই, সময়ের নির্দেশ নাই, কোলাহল নাই, কর্ম নাই, সেখানে অবসরের শেষ নাই, শ্রোতার ঔৎসুক্যের বিরাম নাই—না জানি, বাঁশীর সেই দেশ কোথায়! যাহারা সেই সুর শুনিল, তাহারা ইহজগতের সমস্ত চিন্তা, শোক দুঃখ, সুখ-আশা-ভরসা এবং সমস্ত কার্যতৎপরতা ভুলিয়া গিয়া সেই অজানা দেশের মায়ায় পড়িয়া গেল।

‘বাজিতে বাজিতে বাঁশী রাজ্য ছাড়াইল।  
 দূরের রাজ্যের দেশে কাঁদিয়া উঠিল॥’

এক ভিন্ন দেশের রাজ্যের মূলুক : বাঁশীর স্বর শুনিয়া সে নগরের লোকের ঘুম ভাঙিয়া গেল, গাছের পাতায় ফুলের কলি ঘুমাইয়া ছিল, বাঁশী তাহাদের ঘুম

\* পালা নাই=থাম নাই, পূর্ববঙ্গে বাঁশের খুটিকে পালা বলে।

\*\* ঠিকা= বড়ের বেগ রোধ করিবার জন্য কুটারেব বাহির হইতে আলগা ‘বাঁশের ঠেকা’ পেওয়া হয়, ঠেকাইয়া রাখার জন্য ইহাকে ‘ঠিকা’ বা ‘ঠেকা’ বলে।



ভাজ্জাইয়া দিল, ফুলের বৃকে ভ্রমর ঘুমাইতেছিল, বাঁশীর সুর সেই ভ্রমরের ঘুম ভাঙিয়া ফেলিল।

রাজকুমারী একটি ফুলের হারের মত রাজার বৃকে শুলিয়াছিলেন, তিনি সেই সুর শুনিয়া কি যেন হারানো স্বপ্নের ধন কুড়াইয়া পাইলেন। নগরের প্রান্তে নদীর পাড় ও পর্বত একটা নিস্তব্ধ মূর্তির মত ঘুমে নিঝুম হইয়াছিল—এবার তাহাদেরও ঘুম ভাঙিবার মত একটা আবেশ দেখা দিল। কেবল নদীটা জাগ্রত ছিল—সারাদিন সারারাত্রি তাহার ঘুম নাই, আর ঘুম নাই বিরহিণীদের, ইহারা গুমরিয়া গুমরিয়া কাঁদিতেছেন, কে তাহাদের কান্না শোনে?

এই দেশে অতি প্রত্যুষে বাঁশী বাজিয়া উঠিল। কোকিল আধো-ঘুমে সাড়া দিয়া উঠিল, ফুলের কলির বৃকে ভ্রমর, ঘুমে ঢুলু ঢুলু আঁখি সেই বাঁশীর সুরে জাগিয়া কি খুজিতে লাগিল, এ কি বনের বাঁশী, না মনের বাঁশী?

বিদেশী পথিকের বাঁশী কি সুরে বাজিয়া উঠিল, সেই সুরের সজো আকাশের গায়ে কে যেন কামনাসিন্দুর মাখিয়া দিল।

### অতুত পতিশুতি

রাজকুমারী কি ভাবিতেছেন? দুই গড় বাহিয়া অশ্রু ঝরিতেছে—তিনি মনে মনে বলিতেছেন, ‘ওর সুর চিনেছি, সেই সুর যাহা নদীর স্রোতের মত টানিয়া আমাকে আমাদের সেই যুথী-জাতি-বেলা-কুলের বাগানে লইয়া যাইত। এ সুর পৃথিবীতে আর কেহ জানে না, এ বাঁশী আর কাহারও নয়। বাঁশী আমাকে আবার ডাকিতেছে সেই ডাকে আমার প্রাণ ফাটিয়া যাইতেছে ; এ ছোটকালের শোনা বাঁশী, আমার সর্বকাল ব্যাপিয়া ইহার প্রভাব রহিয়া গিয়াছে। সেই ফুলবনে বসিয়া সে বাঁশী বাজাইত, আমার সমস্ত হৃদয় সেই সুরে আবিষ্ট হইত, সে আবেশ এখনও তেমনিই আছে।

‘বনের বাঁশী নয় তো ইহা মনের বাঁশী হয়।

ছোট কালের যত কথা জাগিয়া তোলায় ॥’

‘এই বাঁশী শুনিয়া বাগানে ফুলের কলি ফুটিত।

‘এই বাঁশী শুনিয়া ফুটত কুসুমের কলি।

বঁধু মোরে শিখাইত মিঠা মিঠা বুলি॥

বাঁশী আমার জীবনযৌবন বাঁশী আমার প্রাণ।

বাঁশীর রবে মন-যমুনা বহিত উজান॥

‘আমার সে জন্ম গিয়াছে, এখানে নূতন জন্ম হইয়াছে।

‘এক জনম গেছে মোর আর এক জনম হয়।

জন্মে জন্মে তোমার দাসী হইয়াছি নিশ্চয়॥

ভুলি নাই ভুলি নাই বন্ধু তোমার চাঁদমুখ ।  
 বনে গিয়া দেখাইব চিরিয়া এ বুক॥  
 ভুলি নাই ভুলি নাই বন্ধু তোমার বাঁশীর ধ্বনি ।  
 পরতে পরতে বৃকে আঁকা আছ তুমি॥  
 কি করিব রাজভোগে সুখ সুবিস্তরে ।  
 বনের পাখী ভইরা রাখছে সোণার পিঞ্জরে॥’

‘আমি উড়ি উড়ি করিয়া এতদিন ছিলাম, বিষ খাইয়া মরি নাই, মরিলে তো তোমার মুখ আর দেখিতে পাইব না—এইজন্য বাঁচিয়া আছি।’

রাজকুমারী নীরবে কাঁদিতেছিলেন। তরুণ রাজা ভাবিলেন রাণী ঘুমাইয়া আছেন, তিনি ডাকিয়া বলিলেন, ‘ওঠ—বাঁশী শোন, কে এমন মন—ভোলানো বাঁশী বাজাইতেছে, উঠিয়া দেখ। তোমার চোখের ঘুম না ভাঙিয়া থাকিলে আমার অঙ্গে ভর দিয়া ওঠ। ঐ দেখ ফুলের কলি ফুটিতেছে, তোমার গলার ফুলের মালা বাসি হইয়া গিয়াছে, ফেলিয়া দাও।’

রাজা এক পরিচারিকাকে বলিলেন, ‘জানিয়া আইস, বাঁশী যে বাজাইতেছে সে কি চায়?’

খানিক পরে দূতী ফিরিয়া আসিয়া বলিল, ‘কার্তিকের মত এক সুপ্রিয় পুরুষ বাঁশী বাজাইতেছে, এমন বাঁশীর গান কখনও শুনি নাই ; সে অশ্লষ, কিন্তু ভাবের আবেগে বাঁশী বাজাইয়া পথে চলিতেছে। নগরের লোক উন্মত্ত হইয়া তাহার পিছু পিছু ছুটিতেছে, পাখীগুলি কলরব করিয়া তাহার গানের সঙ্গে সুর মিশাইতেছে, পশুরা গানে আকৃষ্ট হইয়া বন ছাড়িয়া আসিতেছে, কি আশ্চর্য, বাঁশীর সুরে নদীনালা উজান বহিতেছে। মনে হয় বাঁশী থামিলে চন্দ্রসূর্য আকাশ হইতে খসিয়া পড়িবে।’

রাজা তাহার রাণীকে বৃকের কাছে টানিয়া আনিয়া বলিলেন, ‘কেমন ঘুমে তোমাকে ধরিয়াছে, ঐ পথে সুন্দর ভিক্ষুক বাঁশী বাজাইয়া চলিতেছে, একবারটা ওকে দেখ, এবং আমি উহাকে কি দিব, বলিয়া দাও।’

তখন রাজকন্যার চোখে মুখে অশ্রু প্রাবন, তিনি মুখ ফিরাইয়া তাহা গোপন করিয়া বলিলেন—সে কথা অতি ধীরে গদগদকণ্ঠে উচ্চারিত হইল—‘তুমি রাজা, ভিখারীকে কি দিবে না দিবে তাহা আমায় জিজ্ঞাসা করিতেছ কেন, তুমি রাজ্যের রাজা, দাসীর কাছে কেন জিজ্ঞাসা করিতেছ। তোমার যাহা ইচ্ছা তাহাই দাও।’

রাজা বলিলেন, ‘আমি সংকল্প করিলাম, তুমি যাহা বলিবে তাহাই দিব।’

রাজকন্যা স্নান মুখে বলিলেন, ‘একি কোন কাজের কথা! আমি যদি বলি, তুমি উহাকে তোমার রাজত্বটা দাও, তুমি তাহাই দিবে?’

রাজা বলিলেন, ‘হাঁ, তাহাই দিব। প্রতিজ্ঞা করিলাম, তুমি যাহা বলিবে উহাকে তাহাই দিব।’

স্নান মুখে ঈষৎ হাসি টানিয়া রাজকন্যা বলিলেন, ‘কি পাগলের মত কথা বলিতেছ! আমি যদি বলি, তোমার সমস্ত ধনভাণ্ডার, নাগরিয়া লোকদিগের ধনসম্পত্তি, ও তোমার রাজৈশ্বর্য—সমস্ত ঐ অশ্লষ ভিখারীকে দাও, তবে তাহাই দিবে?’

রাজা বলিলেন, ‘হাঁ, তাহাই দিব, তুমি যাহা বলিবে তাহাই দিব।’  
—‘তবে তিন সত্য কর, শেষে কথা ফিরাইতে পারিবে না!’

‘সত্য কর ওহে রাজা সত্য কর তুমি।  
রাজা কহে তিন সত্য করিলাম আমি॥

তখন ধীরে ধীরে রাজকন্যা পালঙ্কের উপর উঠিয়া বসিলেন, তাঁহার অশ্রুসিক্ত মুখখানি স্বীয় অগ্নিপাটের শাড়ীর আঁচলে মুছিয়া ধীরে অবিচলিত কণ্ঠে বলিলেন—

‘নয়ন মুছিয়া কন্যা কহে, যদি নহে আন।  
ধর্মসাক্ষী ওহে রাজা আমায় কর দান,  
রাজা, আমায় কর দান॥’

#### উভয়ের মিলন ও শেষ

বনপ্রদেশে নদী উজান বহিয়া চলিয়াছে, তীরে চাঁপা ফুল ফুটিয়া আছে—সেই নদীর পাড় দিয়া বাঁশী রহিয়া রহিয়া বাজিয়া চলিয়াছে—সেই সুরে গৃহস্থ-বধূরা তাহাদের কাজে মন দিতে পারিতেছে না। উন্মুনা হইয়া নদীর দিকে চাহিয়া দাঁড়াইয়া আছে।

এদিকে কে এক রমণী নৃপুরশিঞ্জে বনের পথ গুঞ্জরিত করিয়া চলিয়াছে, তাহার মাথার সোণার ভ্রমরকে বাতাসে উল্টাইয়া ফেলিতেছে।

‘বেণীভাজ্ঞা কেশ তার চরণে লুটায়।’

বেণী খুলিয়া গিয়াছে, দীঘল চুল খোঁপা-মুক্ত হইয়া বিলম্বিত ভজ্ঞীতে পায়ের কাছে আছাড় খাইয়া লুটাইতেছে।

তাহার পায়ের নৃপুর বুনু বুনু ধ্বনি করিয়া পিপাসিতা মনে বহুদিনের স্মৃতি জাগাইয়া তুলিতেছে।

অন্ধ থমকিয়া দাঁড়াইল। সে বলিল, ‘ঐ নৃপুরের শব্দ আমার চিরদিনের শোনা। স্বপ্নে এই ধ্বনি শুনিয়া কত রাত্রির ঘুম ভাঙিয়া গিয়াছে। এ তো সেই নৃপুর, যাহা আমি পুষ্পবনে শুনিতাম এবং পাগল হইয়া বাঁশী বাজাইতাম। তখন স্বপ্নের মত কোন আনন্দলোকের কথা শুনাইয়া এই নৃপুর বাজিতে থাকিত। তুমি কি সেই রাজকন্যা, আমার তো ভুল হইবার কথা নহে, এ সুর যে আমার হৃদয়ে হৃদয়ে গাঁথা।’

কন্যা বলিলেন, ‘বঁধু, তোমার ভুল হয় নাই আমি সেই। তোমার বাঁশীর সুর আমাকে পাগল করিয়াছে, আমি কুলমান, রাজাধন ত্যাগ করিয়া আসিয়াছি।

‘ঘর ছাড়লাম বাড়ী ছাড়লাম জাতি-কুল-মান।  
আর বার বাজাও বাঁশী শুনি তোমার গান।’

অশ্ব চমকিয়া মুখের বাঁশী হাতে লইল, বলিল, অল্পবৃদ্ধি রাজকন্যা, এ কি করিয়াছ? এখনও ভোরের কোকিল ডাকে নাই, নগরের লোকে জাগে নাই—রাজবাড়ীতে ফিরিয়া যাও, সোণার থালায় ভাত খাইবে, এই সোণার অদৃষ্ট ভাঙ্গিয়া ফেলিও না। তোমার নীলাম্বরী মেঘডম্বরু শাড়ী বাড়ীতে বুলানো রহিয়াছে, বাকল কি এই অঙ্গে সাজে? আমার কড়ার সম্বল নাই, আমার সাথে কোথায় যাইবে? তোমার বাপমা কি বলিবেন? ঘরে ফিরিয়া যাও, এমন করিয়া নিজের সুখসৌভাগ্য কে কবে নষ্ট করিয়াছে?

রাজকন্যা বলিলেন—যেদিন আমি ঐ বাঁশী শুনিয়াছি, সেইদিন হইতে রাজ্য-ধনের আশা চলিয়া গিয়াছে, আমার কাছে এ সকলের কোন মূল্য নাই।

‘তুমি আছ, বাঁশী আছে, আর কিছু নাহি চাই।

তোমার সঙ্গে থাকি বঁধু যত সুখ পাই॥

বনেতে বনের ফল সুখেতে ভুঞ্জিব।

গাছের বাকল অঙ্গে টানিয়া পরিব।

রজনীতে বৃক্ষতলে তোমায় বুক লৈয়া।

ঘুমাইব বঁধু আমি ঐ বাঁশী শুনিয়া॥

জাগিয়া শুনিব বঁধু ঐ না তোমার বাঁশী।

কিসের রাজ্য কিসের সুখ, হয়েছি উদাসী॥

আঁধা-বঁধু আবার বলিল, ‘তুমি অবোধ, তুমি নিজেকে ভাঁড়াইতেছ মাত্র। যাহা সুখ মনে করিয়াছ, তাহা কয়েক দিন পরেই বিভীষিকা হইয়া দাঁড়াইবে। সোণার পালঙ্কে যাহার শূইয়া অভ্যাস, সে কেমন করিয়া কুশকণ্টকের শয্যায় ঘুমাইতে পারিবে? সোণার থালায় যার খাওয়া অভ্যাস, বনের তিক্ত ফল কেমন করিয়া তাহার গলায় যাইবে। কটু তিক্ত বনের ফল খাইয়া শেষে কাঁদিয়া মরিবে। তোমার সোনার ঘর, দোহাই তোমার, নিজ হাতে আগুন লইয়া তাহা পোড়াইয়া ফেলিও না! এখনও সময় আছে, তুমি নিজের ঘরে ফিরিয়া যাও।’

রাজকন্যা বলিলেন, ‘কি করিব? তোমার বাঁশী আমায় ঘরে থাকিতে দেয় না, উহা আমাকে টানিয়া আনিয়া ঘরের বাহির করে।

‘সত্য কথা প্রাণবঁধু কহি যে তোমাতে।

তোমার দারুণ বাঁশী আমায় থাকতে না দেয় ঘরে॥

অশ্ব একবার চূপ করিয়া দাঁড়াইল। তাহার পদ্বের কলির মত দুইটি মুদ্রিত চক্ষু হইতে ঝর ঝর করিয়া জল পড়িতে লাগিল। তাহার পর বাঁশীটা ছুঁড়িয়া নদীর জলে ফেলিয়া দিল।

‘শুন অল্পবৃদ্ধি কন্যা কহি যে তোমাতে

বিসর্জন দিলাম বাঁশী তুমি যাও ঘরে॥

আর না বাজিবে বাঁশী—কাঁদিবে না হিয়া।

ঐ দেখ যায় বাঁশী জলেতে ভাসিয়া॥

কন্যা বলিলেন—

‘বাঁশী নাই তুমি তো আছ আমার হৃদের রতন।  
আমারে না লও সাথে লইয়া যাও মন॥  
বঁধু যত সে বুঝায়।  
আমার মনেরে বুঝান হৈল বড় দায়॥  
সদয় যদি না হও রে বঁধু নিদয় যদি হও।  
ত্যাজিব এ ছার প্রাণ দাঁড়াইয়া রও॥

অশ্ব বলিল, “অশ্ববৃন্দী রাজকন্যা, তুমি গৃহে ফিরিয়া যাও। যদি না যাও, তুমি দাঁড়াইয়া দেখ, আমি এই ছার প্রাণ আর রাখিব না, বাঁশী গিয়াছে যে পথে, সেই পথে আমিও যাইব।’

‘এইখানে দাঁড়ায়া দেখ নদীতে কত পানি।  
নিজ চোখে দেখি নিভাও জ্বলন্ত আগুনি॥  
এতেক বলিয়া অশ্ব ঝাঁপি জলে পড়ে।  
কন্যা বলে পরাণবশু লৈয়া যাও মোবে॥’

নদীতে জোয়ারের জল, শাপলা ফুল ভাসিয়া যাইতেছিল, তাহাদের সঙ্গে দুইজন ভাসিতে ভাসিতে সমুদ্রের দিকে চলিল।

তাহারা উভয়ে সমুদ্রের তলে স্থান পাইল, যেখানে মুক্তা হয়, যেখানে প্রবাল জন্মে—সেই সমুদ্রে—যাহার নাম রত্নাকর।

‘ভাসিতে ভাসতে দৌঁহে গেল সমুদ্রার।  
কাল গরল বাঁশী না বাজিবে আর॥

### আলোচনা

এই গানটির ফরাসী ভাষার অনুবাদ খুব সমাদর লাভ করিয়াছে। গানটি পার্বত্য হাজাং জাতির মধ্যে প্রচলিত ছিল। তাহাদের অনেকে নিম্ন-উপত্যকার হিন্দুসমাজের সঙ্গে মিশিয়া গিয়াছেন এবং গানটির আদত ভাষা কতকটা রূপান্তরিত করিয়া বাজালা ভাষায় পরিণত করিয়া লইয়াছেন। সঙ্গ্রাহক চন্দ্রকুমার দে এই মন্তব্য ও তথ্য প্রকাশ করিয়াছেন।

গানটি যেভাবে আমরা পাইতেছি, তাহাতে মনে হয়, ইহা চণ্ডীদাসের কিছু পরবর্তী কিন্তু খুব পরবর্তী নহে, তাহার প্রমাণ ভাষায়। ইহার মধ্যে যে সকল কথা ও কবিতার অংশ দৃষ্ট হয় তাহা চতুর্দশ শতাব্দীর শেষভাগে বাজালা সাহিত্যে প্রচলিত ছিল। ‘যেই বৃক্ষের তলায় যাইব ছায়া পাইবার দায়। সেই বৃক্ষ না আগুনে বর্ষে অন্তর

পুইড়া যায় ॥’ এই পদটি প্রায় এই ভাবেই চণ্ডীদাসের একটি পদে পাইয়াছি। তাহা তিনশত বৎসর পূর্বের লিখিত পদাবলীর একটি পাণ্ডুলিপিতে। ‘আজি হৈতে তোমায় বশু ছাড়িয়া না দিব, নয়নের কাজল করে নয়ানে থুইব।’ ইত্যাদি পদও সেই চতুর্দশ-পঞ্চদশ শতাব্দীর সম্ভবস্থলের পরিচিত সূর। ‘যোগিনী সাজিয়া’ চল কাননেতে যাই। চন্দন মাখিয়া কেশে বানাইব জুটা॥’ ইত্যাদি পদ চণ্ডীদাসের, ‘আমি যোগিনী সাজিব’ প্রভৃতি পদের প্রতিধ্বনির মত শুনায়।

এইরূপ অনেক শব্দ ও পদের অংশ আছে—তাহা চৈতন্য-পূর্ব সাহিত্যের আগমনী গানের মত মনে হয়। যে সর্বস্ব-দেওয়া প্রেম এই গল্পের মূল মন্ত্র, তাহা আসন্ন চৈতন্যদেবের পদের মঞ্জীরশব্দের ন্যায় কাণে বাজে। প্রেম চাহিলে যে কষ্টকে বরণ করিতে হয় তাহা বারংবার বলা হইয়াছে। সুখ খুঁজিলে যে দুঃখকে বরণ করা অপরিহার্য তাহা এই কবি চণ্ডীদাসের মতই জোর করিয়া বলিয়াছেন। তথাপি মনে হয়, চণ্ডীদাসের গানে যে আধ্যাত্মিকতা আছে—স্বর্গের সন্ধান আছে—ঐশা-বৈষ্ণব কবি তাহা দিতে পারেন নাই—চণ্ডীদাস প্রেমকেই বড় করিয়া দেখাইয়াছেন, এই কবি ত্যাগকে বড় করিয়া দেখাইয়াছেন। চণ্ডীদাস বুঝিয়াছিলেন, দুঃখের আধার কাটিয়া গেলে প্রেমসিদ্ধির সৌরলোক দেখা দিবে। ঐশা-বৈষ্ণব কবি দেখাইয়াছেন ত্যাগের কষ্টই মানুষের লক্ষ্য—তাহার পরে কিছু নাই : বৈষ্ণব কবি বলিয়াছেন, ‘আধার পেরিলে আলো’ আধার রাজ্য পার হইলে আলো পাইবে, কিন্তু ঐশা-বৈষ্ণব কবি কোন আলোর সন্ধান দেন নাই ; চণ্ডীদাস বলিয়াছেন—

‘ব্রহ্মাণ্ড বাপিয়া আছয়ে যে জন, কেহ না দেখয় তারে  
প্রেমের আরতি যে জন জানয়ে, সেই সে চিনিতে পারে॥

এইটুকু ঐশা-বৈষ্ণবে নাই। এই জন্য বৈষ্ণব কবিদের সমস্ত উপাদানে সমৃদ্ধ হইয়া—বৈষ্ণব সুরের মোহিনী এমন ললিত সুন্দর কবিতায় লিখিয়াও পল্লীগীতিকার কবি বৈষ্ণব মহাজনের পঙ্ক্তিতে স্থান পান নাই।

কিন্তু প্রেমের যে ত্যাগমূলক মহিমা তিনি কীর্তন করিয়াছেন, তাহা অধ্যাত্মবাদীর চোখে পূর্ণ চিত্র বলিয়া গৃহীত না হইলেও উহা বাস্তববাদীদের চরম আদর্শে পৌছিয়াছে ; যাহারা মনে করেন—বৈষ্ণব পদ প্রহেলিকাময়, উহা সাম্প্রদায়িক, জটিল তথ্যের মধ্যে আত্মপ্রকাশ করিয়াছে, তাহারা ঐশা-বৈষ্ণব সরল পার্থিব পথ সুগম ও সহজ পন্থা বলিয়া আদর করিবেন—এই পথ স্বর্গে পৌছবার ভরসা দেয় না; প্রেমের আনন্দও এখানে উন্নত ত্যাগের মহিমায় দুঃখকে বরণ করিয়া লইয়াছে। দুঃখের পরে সুখ—একথা ইহারা বলে নাই। এই গানে সাধনা আছে, সিদ্ধি নাই। এখানে পথ অব্যাহত—অবাধ, কিন্তু শুধুই পথ—পথের পরপারে কিছু নাই। ঐশা-বৈষ্ণব বলিতেছে ‘রাজকুমারী! প্রেম করিয়া কেহ সুখী হয় নাই—এপথে কেবলই দুঃখ।’ উভয়ে যখন নদীর জলে প্রাণ বিসর্জন দিলেন, তখন জীবনান্তে দুঃখের অন্ত হইল ; কিন্তু সমুদ্রের সেই অনির্দিষ্ট পথে তাহারা অকূলে জীবন হারাইলেন, চণ্ডীদাসের মত বলিতে পারিলেন না, এই পথের শেষে পান্থ বাহিনীকে পাইবেন—‘আমার বাহির দুয়ারে কপাট লেগেছে, ভিতর দুয়ার খোলা’। সেই ভিতরের খোলা দ্বার দিয়া যে

অলৌকিক আলোর রশ্মি দেখা যায়—যেখানে ‘সতী কি অসতী, তোমাতে বিদিত, ভালমন্দ নাহি জানি, তোমার চরণপঙ্খই আমার কাম—সেখানে পৌঁছিলেই আমার পরম শান্তি।’ আঁধা-বঁধুর সেই কাম্য স্থান নাই। ভালবাসাই এখানে সব, সে ভালবাসা সর্বস্ব-দেওয়া, তাহা দুর্দমনীয়, তাহার বেগ এত প্রবল যে রাজ্য-ধন-কুলশীল তাহার কাছে নগন্য। অবশ্য বৈষ্ণব কবির সুরও একই রূপ। কিন্তু বৈষ্ণব কবি প্রেমাঙ্গদকে সর্বস্ব নিবেদন করিয়া পূর্ণানন্দের পরিকল্পনা করিয়াছে, পালাগানের কবি ত্যাগ করিয়াছে—সর্বস্ব ত্যাগ করিয়াছে, কিন্তু আনন্দলোকে পৌঁছে নাই।

কাজলরেখা, কাঞ্চনমালা, শ্যামরায়, আঁধা-বঁধু, মহিষাল বঁধু প্রভৃতি কতকগুলি পল্লীকবিতায় বৈষ্ণবকবিতার কতকগুলি গ্রাম পাওয়া যায়, তাহা সিঁধির পাদপীঠে যাইয়া পৌঁছে নাই, তপস্যার চূড়ান্ত দেখাইয়াছে। এইজন্য বৈষ্ণবগণ আসিয়া বক্তাসাহিত্যে এক অভিনব সামগ্রী দেখাইলেন—যাহাতে পল্লীগীতিকার মাদল ও করতাল নীরব হইল, এবং দেশময় কীর্তনের খোল বাজিয়া উঠিল। চৈতন্য-ভগবান লীলারস দিয়া এই প্রেম জীবন্ত করিয়া দেখাইলেন। রাজপ্রাসাদ ও পর্গকুটির প্রেমের তপস্যা করিয়া বৃহত্তর স্থান খুঁজিতেছিল, সেই অচিন্তিতপূর্ব ভাগবত রসের রসিক মহাপ্রভু বাজালীজাতিকে সেই তপোল্ল প্রেমের অব্যাহত আনন্দলোকে লইয়া আসিলেন।





## শীলাদেবী

দরবারের মুণ্ডা ভিক্ষুক

বামুন রাজা দরবারে বসিয়াছেন, এমন সময় এক জংলী মুণ্ডা আসিয়া সেলাম করিয়া দাঁড়াইল। সে বলিল, ‘আমার কোন পরিচয় নাই, আমার পিতা কে, কোন্ মায়ের পেটে আমি জন্মিয়াছিলাম তাহা জানি না। শুনিয়াছি কোন এক ব্যক্তি আমাকে কয়েকটা কড়া মূল্য-স্বরূপ লইয়া এক গৃহস্থের নিকট বিক্রয় করিয়াছিল, মহারাজ, তখন আমি তরুণ যুবক ; সেই প্রভু আমার উপরে যে কত অত্যাচার করিতেন, তাহা আর কি বলিব। সহিতে না পারিয়া আমি জঙ্গলে পলাইয়া গিয়াছিলাম। দশ বৎসর বনে বনে ঘুরিয়াছি, ক্ষুধায় খাদ্য পাই নাই, তৃষ্ণায় জল পাই নাই, গাছের তলে একটু শুইবার স্থান পাই নাই। কত বৃষ্টির জল আমার মাথার উপর দিয়া গিয়াছে, গ্রীষ্মকালের প্রখর রৌদ্রে আমার মাথা দগ্ধ হইয়াছে, আমি জংলী লোক, এত কষ্ট সহিয়া এখন আর দেহে কষ্টবোধ নাই।

‘মহারাজ! আপনি রাজ্যের মালিক, আমি দীন দুঃখী ভিখারী, আপনার একটু দয়া হইলে এই নিরাশ্রয়ের সমস্ত কষ্ট দূর হয়—আপনি কৃপা করিয়া শ্রীচরণে স্থান দিন।’

মাথায় জল তৈল না পড়াতে চুলগুলি কটা পিঙ্গলা হইয়াছে, চোখের দৃষ্টিতে পরম দৈন্য প্রকাশ পাইতেছে, তাহাকে দেখিয়া বামুন রাজার দয়া হইল। তিনি বলিলেন, ‘বেশ, তুমি থাক—আমি তোমাকে চাষ আবাদ করিতে জমি দিব, বাড়ী দিব, তুমি আর খাওয়ার থাকার কষ্ট পাইবে না।’

মুণ্ডা বলিল—‘আমি জায়গা জমি চাই না, এই রাজবাড়ীর একটুখানি জায়গায় পড়িয়া থাকিব। কোন চোর দস্যু এই বাড়ীতে ঢুকিতে পারিবে না, আমি সারারাত্রি পাহারা দিব।

মহারাজ। আমার এই দুইখানি হাত লোহার শাবলের মত, শাবলের ঘাঘণ্ড এই হাতের হাড় ভাঙিবে না।’ হেঁড়া মলিন বহির্বাসটা খুলিয়া মুণ্ডা তাহার বিশাল বক্ষ দেখাইল, ‘আমার বুক পাষাণের প্রাচীর, ইহার চাপে পড়িলে বনের বাঘের শ্বাস রোধ হইয়া যায়। যখন মস্ত হাতী জঙ্গলে ছুটিয়া যায়, তখন আমি শূঁড় ধরিয়া তাহাকে থামাইয়া দেই। আমি রাজবাড়ী পাহারা দিব, একশ লোক যাহা না পারিবে, আমি একলা তাহা করিব।’

রাজা সেই জংলী মুণ্ডার উন্মুক্ত দেহ দেখিয়া বিস্মিত এবং ভীত হইলেন, এরূপ শরীর তাহার শত সহস্র সৈনিক ও পালোয়ানদের মধ্যে কাহারও নাই। তাহাকে দেখিয়া তিনি ভাবিলেন, এই লোকটা অস্বহীন হইয়াও সশস্ত্র, বন্দুকের গুলি ইহার

চামড়া ভেদ করিতে পারিবে না—এ তো মানুষের চামড়া নহে, এ যে গভারের চর্ম। রাজবাড়ীতে এই অতিকায় অসুরকে রাখিতে তাঁহার মন একটু কুণ্ঠিত হইল। তিনি বলিলেন ‘বেশ, আমার কালাদীঘির পাড়ে যে বাড়ী আছে তুমি সেইখানে যাইয়া থাক, আমার বার শত কোটাল আছে, তোমাকে তাহাদের মধ্যে সর্বশ্রেষ্ঠ পদ প্রদান করিলাম। তুমি রাজবাড়ী হইতে রোজ চাল-দাইলের সিধা পাইবে, আনন্দে রসুই করিয়া খাইও এবং বালাখানা বাড়ীতে দীঘির হাওয়া খাইয়া সুখে শয়ন করিও।’

‘বার শত কোটাল আমার করছে খবরদারী।  
তা সবার উপরে তুমি করবে ঠাকুরালী॥’

মুণ্ডা এই আদেশে অত্যন্ত খুসী হইয়া গেল।

‘এই কথা শুনিয়া মুণ্ডা হরিষ অন্তরে।  
হাজার সেলাম জানায় রাজার দরবারে॥’

### রাজকুমারীর যৌবন

রাজার একটা মাত্র কন্যা, তাহার বয়স ১০/১১, রাজাদের ঘরেও অমন সুন্দরী সহজে দেখা যায় না। যখন বসিয়া থাকে, তখন তাহার লম্বিত কেশপাশ মৃন্তিকা স্পর্শ করে। সে হাসিলে যেন কত পদ্ম কত চাঁপা হাসিতে থাকে, দাঁতগুলি কি সুন্দর, যেন ডালিমের দানা। পাঁচটা সহচরীর সঙ্গে সে খেলিয়া বেড়ায়।

ক্রমে কিশোরীর যৌবনাগম হইল। এই সময়টা নারীদেহে কেমন করিয়া আসে তাহা সে নিজেই টের পায় না, অকস্মাৎ অনভ্যস্ত লজ্জায় তাহার মুক্ত অঙ্গ শিহরিয়া উঠে, ভ্রমরগুঞ্জে প্রাণ উতলা হয়, কোকিলের ডাকে কি জানি কোন্ দেশের কথা মনে হয়।

একদিন রাজকুমারী শীলা সখীদের বলিল, ‘আমার গা যদি কোন সময় কাপড়ে ঢাকা না থাকে, তবে আমারে বলিয়া দিও, আমি শাড়ী টানিয়া তাহা ঘিরিয়া রাখিব। যদি চুল বাঁধা না থাকে, তবে বলিয়া দিও, এলো চুলে থাকিতে আমার লজ্জা হয়।’

সখীরা বলে, ‘এ—সকল কথা, এভাবে কথ্য, তুমি আগে তো বল নাই, তোমার কি হইয়াছে? এই অকস্মাৎ লজ্জা, এই সম্ভ্রমের ভাব তোমার কেন হইল?’

শীলা হাসিয়া বলিল, ‘তা তো আমি জানি না, তবে যিনি আমাকে করিয়াছেন, তিনি আমার চারিদিকটা যেন আবার ভাঙিয়া চুরিয়া নতুন গড়িতেছেন। পুরাতন সকল জিনিসের উপর দরদ চলিয়া যাইতেছে, মন কেন যে উতলা হইয়া থাকে তাহা জানি না। খেলার ঘরে আর যাইতে ইচ্ছা হয় না, মনে হয় মাটির পুতুল, মাটির রান্নাবাড়ীর পাত্র, ডেগ কড়াই এ—সকল লইয়া কি ছেলেমি করিতেছি! চিরদিন যাহা করিয়া আসিতেছি তাহা এখন কবিত্তে লজ্জা হয়।’



নিরালায় সখীরা বলিল, তোমার মনের মধুকর আসিতেছে, এ-সকল তাহারই সূচনা। আমাদের দেওয়া শাড়ী আর তোমার পছন্দ হইবে না, সে নূতন শাড়ী আনিয়া দিবে, আমাদের হাতের বেণী বাঁধা আর ভাল লাগিবে না, সে সোণার চিব্বুনি দিয়া তোমার চুল ঝাঁচড়াইয়া নিজ হাতে নূতন ছন্দে খোঁপা বাঁধিয়া দিবে। হয়ত কাণের এই মোতির দুল খুলিয়া সে তাহার নিজ হাতের তৈরী বনফুলের দুল কাণে পরাইয়া দিবে, এই কাজল মুছিয়া নূতন কাজল চোখে আঁকিয়া দিবে। তোমার তখন সংসার ভাল লাগিবে, আমাদের আর দরকার হইবে না।’

কুমারী শীলা, বালিকার মত খিল খিল করিয়া হাসিয়া বলিল, ‘কি সকল কথা বলিতেছিস, আমি তাহার এক বর্ণও বুঝিলাম না। যেন কোন বই পড়িয়া শুনাইতেছিস, আমি তাহার অর্থ একটুও বুঝিলাম না।’

সখীরা বলিল, বুঝিবে, সকলই বুঝিবে। আমাদিগকে তাহা বুঝাইতে হইবে না, নিজেই সব বুঝিবে, কিছুকাল সবুর কর। রাজা চারদিকে ঘটক পাঠাইয়াছেন, তোমার মন-মধুকর শীঘ্র আসিয়া মনের সকল প্রশ্নের উত্তর দিবে।’

### মুন্ডার অভূত ঐর্ষ্যনা

একদিন দুইদিন করিয়া সময় পায়ে পায়ে হাঁটে। দেখিতে দেখিতে পাঁচ ছয় বৎসর কাটিয়া গেল। একদিন দরবারে আসিয়া মুন্ডা বলিল, ‘মহারাজ, আমাকে বিদায় দিন, আমি ত্রিপুরা শহরে যাইব। আমি এই পাঁচ-ছয় বৎসর আপনার রাজধানীতে প্রাণপণে খাটিয়াছি, আমার প্রাপ্য চুকাইয়া দিন।’

রাজা বলিলেন, ‘চল তোমাকে লইয়া আমার ধনাগারে যাই, তোমার সঙ্গে কোন বেতনের চুক্তি হয় নাই। কিন্তু তোমার তাহাতে কোন ক্ষতির কারণ হইবে না। তুমি যা চাও, তাহাই দিব, তোমার কোন ক্ষোভের কারণ না হয়—তজ্জন্য আমি দায়ী আছি।’

মুন্ডা বলিল, ‘আমি বেতন চাই না। আমি যাহা চাই, স্থির ভাবে তাহা শুনুন, অস্থির হইবেন না। আমি যে ধন চাই, তাহার কাছে অন্য ধন তুচ্ছ। মহারাজ, আপনার এক কুমারী কন্যা আছে, এই কয়েক বৎসর তাহারই আশায় এত খাটুনি খাটিয়াছি, আপনি সেই কন্যাটিকে আমার দিন্—আমার আর কোন দাবীদাওয়া নাই’—

‘একথা শুনিয়া রাজা জ্বলন্ত আগুনি যে হৈল।

যতেক কোটালে মুন্ডারে বাঁধিতে বলিল॥

কেউ বা মারে কিল চাপড় দুহাতিয়া বাড়ী।

কেউ বা কহে দুষমনেরে আগুন দিয়া পুড়ি॥

দেউড়ীখানা ঘরে সবে লহে ত টানিয়া।

কেউ বলে রাজকন্যায় আয় দিব বিয়া॥

জহাদ আইল ধাইয়া শির লইবারে।

ভয় না পাইল মুন্ডা ডর নাহি করে॥

রাত্রি নিশাকালে মুন্ডা শিকল ভাঙিয়া।  
গেল তো জংলী মুন্ডা জঙ্গলে পলাইয়া॥’

### মুন্ডার ষড়যন্ত্র

ক্রমে তিনটি বছর চলিয়া গেল, মুন্ডার আর কোন খোঁজ নাই। তিন বৎসর পর এক রাত্রে নিবিড় জঙ্গলের মধ্যে তাহাকে রাত্রিকালে দেখা গেল। শত শত জংলীরা বসিয়া রসুই করিয়া আহারের আয়োজন করিতেছে। মুন্ডা তাহাদিগকে বলিতেছে—‘এমন করিয়া তোরা কতদিন ক্ষুধার জ্বালায় ঘুরিয়া মরিবি? আমি একটা পরামর্শ দিতেছি, তোরা যদি তাহা করিস, তবে একদিনের চেষ্ঠায় সৎবৎসরের খাদ্য তোদের জুটিয়া যাইবে। চল যাই, আমরা বামুন-রাজার বাড়ী লুঠ করিয়া আসি।

‘ধনদৌলতের রাজার নাই সীমা পরিসীমা।  
একদিনের চেষ্ঠায় মিলবে বচ্ছরের দানা॥’

একে তো জংলী লোকেরা ক্ষুধার জ্বালায় অসমসাহসিকতার কাজ করিতে স্বভাবতই প্রস্তুত, ধনের লোভে তাহারা পাগল হইয়া উঠিল। সেই রাত্রেই তারা বামুন-রাজার বাড়ীর দিকে রওনা হইল।

তাহারা কাটারী, কাঁচি, অস্ত্রশস্ত্র বোচকায় বাঁধিয়া লইল—

‘বাছিয়া লইল তারা তীর ধনুকখানি।  
লুকাইয়া লইল পাছে হয় জানাজানি॥’

পথে সকলকে বলিল তাহারা মজুরের কাজ করিতে চলিয়াছে। কেহ যদি তাহাদিগকে কোন কাজ করিতে বলে উত্তরে—

‘মুন্ডা বলে এই দেশে কাম করা দায়।  
এই দেশের মানুষ যত বেগার খাটায়॥  
কাম করাইয়া দেখ পয়সা নাহি মিলে।  
এই দেশ ছাড়িয়া যাইব বামুন-রাজার দেশে॥’

বামুন-রাজার রাজধানীতে মজুরেরা এদিক সেদিক কাজ করিয়া বেড়ায়, মুন্ডা সেদিকে যায় না—সে দূরে লুকাইয়া থাকে। একদিন দুপ্রহর রাত্রে তাহারা সকলে তীর ধনুক লইয়া রাজবাড়ী আক্রমণ করিল। প্রহরীরা নিদ্রাভঙ্গের পর শশব্যস্ত হইয়া অস্ত্রশস্ত্র, হাতিয়ার আনিতে যাইতেছিল, কিন্তু পথে জংলীদের বাণ খাইয়া মৃতপ্রায় হইয়া পড়িয়া রহিল। মুন্ডা রাজবাড়ীর অশ্বিসন্ধি পথ সকলই জানিত, সে সুবিধা বুঝিয়া পুরীতে আগুন লাগাইয়া দিল। আগুন নিবাইবার জন্য প্রহরীরা তাড়াতাড়ি সেইদিকে ছুটিল, ইহার মধ্যে মুন্ডা ও তাহার জংলীদল রাজার ধনভাণ্ডারে ঢুকিয়া

ধনরত্ন লুটিতে আরম্ভ করিল। তারপরে ঘোর চীৎকার করিতে করিতে তাহারা রাজ-অন্তঃপুরীতে প্রবেশ করিল। কিন্তু তাহারা যাইয়া দেখিল, রাজা, রাণী, শীলা ও অন্তঃপুরিকারা খিড়কীর পথ দিয়া রাজপুরী ছাড়িয়া চলিয়া গিয়াছেন।

ব্রাহ্মণ-রাজার পলায়ন ও দেশাধিপের গৃহে অতিথ্য

অতি দীনবেশে ব্রাহ্মণ-রাজা সপরিবারে পরগনার রাজার বাড়ীতে আসিয়া দাঁড়াইলেন, এবং সাশ্রুনেত্রে তাঁহার কাছে নিজের দুর্গতি বর্ণনা করিলেন, ‘মুন্ডা এবং তাহার জল্গীদল আমার বাড়ী ও রাজধানী দখল করিয়াছে, আমার দাঁড়াইবার স্থান নাই।’

পরগনার অধিপতি তাঁহাকে সাদরে গ্রহণ করিয়া তাঁহার একটা বাড়ী বামুন-রাজাকে ছাড়িয়া দিলেন এবং মুন্ডাকে শাস্তি দেওয়ার ব্যবস্থা করিবেন, এই আশ্বাস দিয়া সম্মানিত অতিথিকে প্রতীক্ষা করিতে অনুরোধ করিলেন।

ছয়মাসকাল বামুন-রাজা অতিথি হইয়া পরগনাধিপের রাজধানীতে বাস করিলেন।

কুমারী শীলাদেবী অতি প্রত্যাষে উঠিয়া রাজবাগানে ফুল তুলিতে যান। সে দেশের রাজার পুত্র তরুণ বয়স্ক ও অতি সুদর্শন। রাজা তিনি শীলাকে ফুল তুলিতে দেখেন—অনেক লজ্জা সংবরণ করিয়া তিনি একদিন কুমারীকে তাঁহার মনের ইচ্ছা জ্ঞাপন করিলেন, ‘যদি তুমি দয়া করিয়া আমার ঘরে একবার পায়ের ধূলি দাও, তবে তোমাকে কয়েকটি কথা বলিব’—

‘না ধরিব না ছুঁইব এই যাই গো कहিয়া  
কেবল দেখিব রূপ দূরেতে দাঁড়াইয়া॥

তুমি নিত্য নিত্য ফুল তোলা, কার পূজার জন্য এই ফুল? তুমি অবিবাহিতা কুমারী—তুমি কি বর প্রার্থনা করিয়া পূজা কর? তুমি যদি সম্মতিসূচক ইঙ্গিত দাও, তবে রাজার আদেশ লইয়া আমি তোমাকে বিবাহ করিতে চাই।’

শীলা সজল চক্ষে বলিলেন—রাজকুমার তোমার ঐশ্বৰ্যের অন্ত নাই। আমরা দরিদ্র, দীনদুঃখী।

‘সোণার রাজত্ব তোমার—লক্ষ্মী বাঁধা ঘরে!  
কি লাগি করিবে বিয়া ভিক্ষুক কন্যারে॥’

রাজকুমার বলিলেন,

‘লোকে বলে পুরুষ জাতি কঠিন অন্তরা।  
আমি বলি নারীর মন পাষণ দিয়া গড়া॥’

শীলাদেবী বলিলেন,—‘আমার এত বড় আশা করিবার সাহস নাই।’

‘চিন্তে ক্ষমা দিয়া কুমার শুন মন দিয়া।  
মা বাপে সুন্দরী কন্যা করাইবে বিয়া॥’

কুমার বলিলেন, ‘যার মন যাহা চায়, তাহা না পাইলে, আর হাজার জিনিস পাইলেও সে নিরস্ত হয় না।

‘ধনদৌলত রাজস্ব তোমার দুই পায়ের ধূলি।  
তোমার দুয়ারে খাড়া আছি হস্তে ভিক্ষার ঝুলি॥’

যদি তুমি আমাকে বঞ্চিত কর, তবে আমি সব ছাড়িয়া বনে চলিয়া যাইব।’  
চোখের জল আঁচলে মুছিয়া শীলাদেবী বলিলেন, ‘এই ছয় মাস আমার পিতা যে কষ্টে আছেন, তাহা আর কি বলিব?’

‘চোখে নাই রে ঘুম এই ছয় মাস যায়।  
কাঁদিয়া আমার বাপ রজনী পোহায়॥’

‘তারপর তোমার সঙ্গে মিলনের এক গুরুতর বাধা আছে।

‘বাপে তো কৈরাছে পণ, কুমার, রাজ্য হারাইয়া।  
যেজন আনিতে পারে মুন্ডারে বাঁধিয়া॥  
তাহার কাছেতে বাপে কন্যা দিবে বিয়া।  
হাড়ি, চন্ডাল নাই সে বিচার দুষমনের লাগিয়া॥’

পরদিন শীলা শুনিলেন সেই মুন্ডাকে বাম্ভিয়া আনিবার জন্য কুমার পিতার অনুমতি পাইয়াছেন। সঙ্গে শতশত লস্কর ও ফৌজ চলিয়াছে—মার মার করিয়া তাহারা বামুন-রাজার রাজধানীর দিকে ছুটিয়াছে, তীরন্দাজ, ঘোড়সোয়ারী পালে পালে চলিয়াছে। সৈন্যের দাপটে যেন আকাশ ও জমিন কাঁপিয়া উঠিতেছে ; অশ্বখুরোখিত ধূলি আকাশ আচ্ছন্ন করিয়া উর্ধ্বে উঠিয়াছে।

রাজকুমারের বিদায়দৃশ্য অতি করুণ, নিজের পিতাকে প্রণামান্তে, বামুন-রাজার পায়ে পড়িয়া কুমার আশীর্বাদ প্রার্থনা করিলেন ; হতভাগ্য রাজার দুইটা চক্ষুতে অশ্রু টলমল করিতে লাগিল। শীলার কাছে প্রকাশ্যভাবে বিদায় লইবার সুযোগ কুমার পাইলেন না।

‘দূর হৈতে বিদায় মাগে দুটি আঁখি ঝরে।’

শীলা ভাবিলেন, ‘কেন বা আমি কুমারকে বাবার কঠিন পণের কথা বলিতে গেলাম!’

‘নিজের কাণাকড়ি মোর ঘোর সায়রের জলে।  
তাহারে তুলিতে হায় তুমি যাবে চলে॥’

বড়ই দারুণ মুণ্ডা কি জানি কি হয়।  
রণে তো পাঠাইয়া তোমা না হই নির্ভয়া॥

রাজকুমার শীলার মুখ দেখিয়া তাহার মনোভাব বুঝিলেন—মনের খবর মন দিয়া বুঝাইলেন, প্রকাশ্য বলিলেন, ‘মুণ্ডাকে আমি হাতে গলায় বাঁধিয়া আনিব।’

কুমারের গমনের পর সারারাত্রি শীলা কাঁদিলেন, কুমারকে তিনি সেই ভীষণ গুণ্ডা—মুণ্ডার সঙ্গে যুদ্ধ করিতে পাঠাইয়াছেন, সুস্থ শরীরে ফিরিয়া আসিবেন তো?

‘বঁধু যদি হৈত আমার কনকচম্পা ফুল।  
সোণায় বাঁধিয়া তারে কাণে করতাম দুল॥  
বঁধু যদি হৈত আমার পরনের নীলাম্বরী।  
সর্বাত্মা ঘুরিয়া পরিতাম নাহি দিতাম ছাড়ি॥  
বঁধু যদি হৈত আমার মাথার দীঘল চুল।  
ভাল কইরা বাঁধতাম খোঁপা দিয়া চম্পা ফুল॥

এইরূপে সেই নবীনা রমণী রোজ রাত্রে কত কি চিন্তা করেন, কোন সময় তাঁহার গুণ্ড বাহিয়া অশ্রু পড়ে। কোন সময় কুমার জয়ী হইয়া ফিরিবেন, এই আশায় পথের দিকে চাহিয়া থাকেন।

মুণ্ডা জংলী হাতীর মত দেখিতে ; সে একটা ভীষণ পালায়ান। রাজকুমারের তীর খাইয়া সে চারিদিকে অশ্বকার দেখিল। কেবল শরীরের জোরে হয় না,—কুমারের শিক্ষিত হস্তের তীক্ষ্ণ বাণ, তাহার নিক্ষেপের কায়দা—তীরন্দাজদের অবিরত আক্রমণ, মধুচক্রে টিল ছুঁড়িলে যে রূপ চারিদিকে দংশনের জ্বালা হয় মুণ্ডা সেইভাবে কাতর হইয়া পলাইবার পথ পাইল না। তাহার জংলী দল আগেই পলাইয়া গিয়াছিল, কতক্ষণ সহ্য করিয়া মুণ্ডা আর পারিল না—কোন গোপনীয় জংলী পথ দিয়া সে নিবিড় ঘন পত্রশাখা—আচ্ছাদিত বনস্পতিদের মধ্যে অদৃশ্য হইয়া গেল। কুমারের জয়ডঙ্কা বাজিয়া উঠিল, বহু ক্রোশ দূর হইতে সেই ডঙ্কার শব্দ শোনা যাইতে লাগিল। রণজয়ী কুমার গৃহে ফিরিতেছেন—সেই শব্দ আকাশে উথিত হইয়া দেবতাদিগকে তাঁহার জয়বার্তা শুনাইয়া দিল—দিক্-দিগন্তে এই জয়নিবাদ ঘোষিত হইল।

অঞ্চল শয্যা ছাড়িয়া বিরহিণী শীলাদেবী ভগবানকে কৃতজ্ঞতা জানাইলেন।

### বিবাহের উদ্দেশ্য

বিবাহের বাদ্য বাজিয়া উঠিল। সখীরা চাঁপা ও বকুল ফুলের সাজি লইয়া বসিয়া কত ছন্দে মালা গাঁথিতে লাগিল। ডালে ডালে পাখীরা যেন আনন্দে মুহূর্মুহু বিবাহের গীতি গাইয়া উঠিল। বামুন—রাজার পুরীতে মেয়েরা হুলুধ্বনি করিতে লাগিল। শীলাদেবীকে বার তীরের জল দিয়া স্নান করা না হইল। চাঁদমুখখানি মুছিয়া নির্মল মুকুরের মত



করা হইল, এবং সেই মুখের শোভার প্রশংসা করিয়া এক সখী অতি ধীরে একটি সিন্দুরের ফোঁটা কপালে আঁকিয়া দিল। কোন সখী মেন্দীর রস দিয়া রাজ্ঞা চরণে কত চিত্র আঁকিয়া ফেলিল। শীলা হাতে বাজুবন্ধ ও সোণার তার পরিলেন ; মেঘ-ডম্বর শাড়ীতে তাঁহার উজ্জ্বল গৌরবর্ণ খুব মানাইল। কাণে কর্ণফুল ও চোখে কাজল পরিয়া যখন মঞ্জীর-চরণা আজ্ঞিনায় দাঁড়াইলেন তখন তাঁহার দেবীমূর্তি দেখিয়া জননীর চোখ দুটি আনন্দে সজল হইল।

নানা দেশ হইতে বাজনদারের দল আসিয়া যার যার কৃতিত্ব দেখাইতে ব্যস্ত হইয়া পড়িয়াছে। একদল বংশীবাদক বহুদূর উত্তরদেশ হইতে পথ পর্যটনের শ্রম দূর করার জন্য বিনি ধানের খই ও মুড়কি খাইতে খাইতে আসিয়াছিল। পূর্বদেশের বাজনদারেরা জয়ঢাক কাঁধে করিয়া আসিয়াছিল, সেই ঢাকের গায় করতাল বাঁধা ছিল, জয়ডঙ্কার সঙ্গে খন্থন করিয়া করতালি আপনি বাজিয়া উঠিত।

পশ্চিম হইতে একটি বাদ্যকর বহু লস্কর সঙ্গে করিয়া বিবাহের আজ্ঞিনায় উপস্থিত—তাহাকে কেহ চিনিলা না। কিন্তু তাহার বাদ্যের শব্দে এবং অদ্ভুত অঙ্গভঙ্গীতে তাহার কাছে ভিড় জমা হইয়া গেল।

তাহারা বামুন-রাজাকে প্রণাম করিয়া বলিল, ‘আমরা বহুদূর হইতে আসিয়াছি, আজ রাত্রে এমন বাজনা শুনাইয়া দিব যাহা আপনারা জন্যে ভুলিবেন না।’

### মুন্ডার অতর্কিত আক্রমণ

রাত্রি একটু গভীর হইল, বিবাহের লগ্ন আসন্ন। সেই পশ্চিমদেশের বাদ্যকর নিজ দল হইতে একটু অগ্রসর হইয়া চোখের পলকে বাদ্যকরের বেশ বদলাইয়া তীর ছুঁড়িল। সেই বিষাক্ত শর রাজকুমারের মর্ম ভেদ করিয়া চলিয়া গেল। মুন্ডা এইভাবে তাহার নিজের কাজ সারিয়া সেই ছদ্মবেশী জঙ্গীদের লইয়া উর্ধ্বশ্বাসে পলাইয়া গেল। কুমার শরাহত হইয়া মাটিতে লুটাইয়া পড়িয়াছেন, তখন মুন্ডাকে আর কে পায়?

অল্প সময়ের মধ্যেই সকলে বুঝিতে পারিল শর বিষাক্ত, রাজকুমারের জীবনের আশা নাই, তখন সেই তুলুধ্বনি ক্রন্দন ধ্বনিতে পরিণত হইল। জয়ঢাক জয়ের বার্তা ঘোষণা থামাইয়া বুক-ফাটা কান্নার সুর বাজাইয়া ফাটিয়া থামিয়া গেল।

কুমার তখনও জীবিত ছিলেন ; তিনি আসন্ন মৃত্যু বুঝিয়া ত্বরিত পদে বিবাহের স্বর্ণাঙ্কিত চেলীর ধুতি ফেলিয়া রণসাজ পরিয়া নিজ ঘোড়ার উপর চড়িলেন সেই মুন্ডার খোঁজে। কিন্তু মুহূর্তের মধ্যে আবার ঘোড়া হইতে মাটিতে পড়িয়া গেলেন।

মরিবার সময় বলিয়া গেলেন—

‘বিকালের গাঁথা মালা হয় নাই বাসি।  
মাংথার ফুলের মুকুট সদ্য ফুল রাশি॥  
আর না বাজাইও বাদ্য বিয়ার বাজনিয়া।  
কপাল পুড়িল আমার খড়ের আগুন দিয়া॥’

কন্যার বিলাপে আকাশ বাতাস কাঁপিয়া উঠিল। তিনি সহমরণের জন্য প্রস্তুত হইলেন, বামুন-রাজা তাঁহাকে ঠেকাইয়া রাখিতে গিয়াছিলেন, কিন্তু কন্যার মুখ দেখিয়া তিনি কোন কথা বলিতে সাহস করিলেন না। কঙ্কণের আঘাতে তাঁহার কপাল রক্তাক্ত, তাঁহার মুখে রক্তের লেশ নাই। জীবিত মানুষের মুখ কি কখনও এমন হয়! রাজ্যময় হায় হায় শব্দ, সে কান্নার কলরবে লোকে যত ছোট ছোট সুখদুঃখ ভুলিয়া গেল। যেন বন্যার প্রাবনে সমস্ত ঘরবাড়ী ভাসিয়া গিয়াছে, নগরের সৌধরাজি ও অট্টালিকা জলের তলে ডুবিয়া গিয়াছে।

বামুন-রাজা সর্বসংসা ধরণীর মত এই নিদারুণ শেল বুকে করিয়া একটা ক্ষিপ্ৰগতি ঘোড়ায় চড়িয়া ত্রিপুরার রাজ-দরবারে গেলেন। সেখানে তিনি কোন কথা বলিলেন না, কোন কথা বলিতে পারিলেন না, কিন্তু শত শত অশ্রুদূত যাইয়া ত্রিপুরেশ্বরকে এই দুঃসংবাদ পূর্বেই শুনাইয়াছিল। বামুন-রাজা ত্রিপুরেশ্বরের সিংহাসনের নীচে গড়াইয়া পড়িয়া গেলেন, রাজা তাঁহাকে হাত ধরিয়া উঠাইয়া বলিলেন, ‘সান্ত্বনা দেওয়ার কিছু নাই—তবে আমি প্রতিশোধ লইব।’ তীরন্দাজ, গোলন্দাজ, সৈন্য যার যার হাতিয়ার ঘোড়ার পিঠে বাঁধিয়া বামুন-রাজার দেশে ছুটিল।

### মুন্ডার দণ্ড

মুন্ডা এবার প্রমাদ গণিল। এত সৈন্য, এত অস্ত্রশস্ত্র দেখিয়া সে একেবারে হতবুদ্ধি হইয়া গেল। যেন সে বেড়া আগুনে পড়িয়াছে—পলাইবার পথ নাই—

‘একে ত জংলী দল লড়াই নাহি জানে।  
ডাকাইতি দাগাবাজি করেছে জীবনে॥  
দড়ি বেড় দিয়া সবে মুন্ডারে ধরিয়া।  
ত্রিপুরার শহরে সবে দাখিল করল গিয়া॥  
রাজার হুকুমে মুন্ডারে ময়দানে আনিল।  
তিন তোপ মারিয়া শেষে শূন্যে উড়াইল॥’

কত চোর-দস্যু-বর্বর মুন্ডার মতই এরূপ স্পর্ধা করিয়া নিজের বল না বুঝিয়া জগতে প্রাণ দিয়াছে। মুন্ডার মৃত্যুতে পৃথিবীর একটা বড় আপদ খণ্ডিল। দুঃখ হয়—দুর্গা সুকুমার জীবনের জন্য, যাহারা বসন্ত ঋতুর সমস্ত সম্পদ লইয়া জগতে আনন্দের স্বপ্নরাজ্য সৃষ্টি করিতে উদ্যত হইয়াছিল, যাহাদের নিষ্কাশ হৃদয়ে প্রেমের হোমানল জ্বলিতেছিল, তাহাদের এই অতিদুঃখকর বিয়োগান্ত জীবনরহস্য মানুষ সমাধান করিতে পারে না, নরবুন্ধির অগম্য স্বভাবের এই বিপর্যয়ে ভগবানের নির্মম বিধানের উপর দ্বিধার ভাব আসে।

আর দুঃখ হয় বৃন্দ ব্রাহ্মণ-রাজার জন্য। যিনি দয়ায় বিগলিত হইয়া মুন্ডকে স্থান দিয়াছিলেন, কিন্তু সেই দয়ার জন্য তাঁহার কতই না বিপদ উপস্থিত হইল! সংসারে করুণার ক্ষেত্র যদি এরূপ কণ্টকসঙ্কুল হয়, তবে কে আর করুণা দেখাইবে, পরের দুঃখে কাতর হইয়া তাহার প্রতি সহানুভূতি দেখাইবে কে?

আলোচনা

শীলাদেবীর আর একটা গান পাওয়া গিয়াছিল। বহুদিন পূর্বে ময়মনসিংহের আরতি নামক পত্রিকায় বাবু গোপালচন্দ্র বিশ্বাস সেই গানটির সারাংশ সংকলন করিয়া প্রকাশিত করিয়াছিলেন, কিন্তু সে পালাটি হারাইয়া গিয়াছে। তাহার সর্ধক্ষিত যে বিবরণ আরতি পত্রিকায় প্রকাশিত হইয়াছিল, তাহা হইতে জানা যায়, এই গানটি সেই আরতিতে প্রকাশিত গানের প্রায় সর্বাংশে একরূপ, শুধু শেষের দিকে একটু পার্থক্য আছে। সেই গানটিতে বর্ণিত হইয়াছে, বামুন-রাজা মুন্ডার হস্তে লাঙ্ঘিত হইয়া কোন প্রতাপশালী মুসলমান বাদশাহের শরণাপন্ন হন—সেই মুসলমানের কনিষ্ঠ পুত্র শীলার রূপে মুগ্ধ হওয়াতে বামুন-রাজা কন্যাকে লইয়া ত্রিপুররাজের আশ্রয় লাভ করেন। ত্রিপুরেশ্বরের এক পুত্রও শীলার অনুরক্ত হন। উভয়ে উভয়ের অনুরাগী দেখিয়া বামুন-রাজা শীলাকে রাজকুমারের হস্তে সমর্পণ করিতে স্বীকৃত হন। রাজপুত্র শীলার পাণিগ্রহণের পর বহু সৈন্য লইয়া মুন্ডাকে আক্রমণ করেন, পুরুষের বেশে শীলা অশ্বারোহণপূর্বক স্বামীর সহিত ত্রিপুর-সৈন্য পরিচালনা করেন ; মুন্ডা এই বিশাল বাহিনীর হস্ত হইতে নিষ্কৃতির সম্ভাবনা না দেখিয়াও তাহার সর্ধা ও সাহস হারায় নাই। সে কোন এক স্থানে গোমতী নদীর বাঁধ ভাঙিয়া দেয়, তখন ঘোরতর বন্যার জল উন্মত্তবেগে আসিয়া ত্রিপুর-সৈন্য এবং যুবরাজ ও শীলাদেবীকে প্রাণিত করে। সৈন্যসহ দম্পতির এইভাবে সলিলসমাধি হয়।

অতঃপর ত্রিপুরেশ্বর নবগঠিত আর একদল সৈন্য লইয়া মুন্ডা ও তাহার বর্বর দলকে আক্রমণ করেন। জালের দড়ি দিয়া তাহাদিগকে ঘিরিয়া ধরিয়া আবদ্ধ করা হয়, এবং শেষে তোপের মুখে তাহাদিগকে উড়াইয়া দেওয়া হয়। যে স্থানে মুন্ডা এইভাবে নিহত হইয়াছিল, তাহা এখনও ত্রিপুরা জেলায় বিদ্যমান। সে স্থানটির নাম ‘কাঁকড়ার চর’, এই স্থানে শীলাদেবী সম্বন্ধে বহু আখ্যায়িকা ও গল্প এখনও পর্যন্ত প্রচলিত আছে।

সূত্রাং দুইটা গান অনেক দূর পর্যন্ত প্রায় একরূপ। বামুন-রাজার দরবারে মুন্ডার আগমন ও চাকুরী গ্রহণ। রাজকুমারীর জন্য তাহার সর্ধিত প্রার্থনা ও রাজপুরী লুণ্ঠন! শীলাদেবীকে লইয়া রাজার পলায়ন—এ সমস্ত কথা দুইটা গানেই প্রায় একরূপ। শেষ অধ্যায়ে ত্রিপুরেশ্বরের সৈন্য দ্বারা মুন্ডার নিধন, সে কথাও একরূপ।

কিন্তু বর্তমান পালাগানটিকে বামুন-রাজা প্রথমতঃ যাহার শরণ লইয়াছিলেন তিনি পরগনার মালিক বলিয়া বর্ণিত হইয়াছেন, তিনি কোন্ জাতি তাহা বলা হয় নাই। খুব সম্ভব মুসলমান সম্প্রদায় এড়াইবার জন্য এই গানটির রচয়িতা নবাবের আতিথ্যের কথা বাদ দিয়া গিয়াছেন। দেখা যায়, ত্রয়োদশ শতাব্দীতে পূর্ববঙ্গে, বিশেষ করিয়া ময়মনসিংহ, ভাওয়াল ও সাভার প্রভৃতি অঞ্চলে গাজিদের প্রভাব খুব বেশী হইয়াছিল। এই গানটি যে অনেকাংশে ঐতিহাসিক ঘটনামূলক, তাহার সন্দেহ নাই। মূলতঃ এক রকম, কিন্তু কোন কোন ঘটনায় ক্ষুদ্র ক্ষুদ্র পার্থক্য সত্ত্বেও ঘটনাবলির প্রবাদ এক বিস্তৃত জনপদ-ব্যাপক—সূত্রাং মূলে যে সত্য ঘটনা ভিত্তি করিয়া সেই প্রবাদ ও গল্প রচিত হইয়াছিল, এই সিদ্ধান্ত করার পক্ষে বাধা নাই। রাজমালায় গোমতী নদীর

বাঁধ খুলিয়া দিয়া শত্রু সৈন্য নষ্ট করার কথা কোন কোন স্থানে উল্লিখিত আছে, মুসলমান সেনাপতি মবারক খাঁর সৈন্যগণকে ত্রিপুরেশ্বরের সেনাপতি রায়চান এইরূপে গোমতীর বাঁধ খুলিয়া দিয়া নষ্ট করিয়াছিলেন।

মুন্ডাকে জালের দড়ি দিয়া আবদ্ধ করা এবং তোপের মুখে উড়াইয়া দেওয়ার কথা উভয় গানেই পাওয়া যায়। শীলাদেবী ও তাঁহার স্বামীর মৃত্যুর আভাস উভয় গানেই আছে।

কিন্তু এই ঐতিহাসিক কাহিনীটি আর-এক দিক দিয়া একটু ঘোরাল হইয়া উঠিয়াছে। বগুড়া জেলায় এক শীলা দেবীর সম্বন্ধে অনেক প্রবাদ ও কাহিনী প্রচলিত আছে, সেগুলি আমরা জানিবার সুবিধা পাই নাই। সুপণ্ডিত ডঃ এনামুল হক জানাইয়াছেন যে মধ্য এশিয়ার বল্খ দেশের রাজা ফকির হইয়া মুসলমানধর্ম প্রচারার্থ বগুড়ায় আসিয়া বাস করেন, তাঁহার নাম ‘সুলতান বল্খী’, ইনি একাদশ-দ্বাদশ শতাব্দীর লোক। ইসলাম প্রচারার্থ তিনি বগুড়া জেলার মহাস্থান নামক নগরের রাজা পরশুরাম ও তাঁহার যুদ্ধবিদ্যায় কৃতী কন্যা শীলাদেবীর সঙ্গে ঘোরতর যুদ্ধ করিয়াছিলেন। সময়ের কতকটা ব্যবধান হইলেও সে ব্যবধান খুব বেশী বলিয়া মনে হয় না—এই দুই ঘটনা কোন স্থানে তাল পাকাইয়া কল্পনার লীলাস্বলীতে পরিণত হইয়াছে কিনা কে বলিবে? পল্লীগীতিকার এইরূপ জটিল গ্রন্থি মোচন করা সহজ নহে। ত্রিপুরার ইতিহাসে দৃষ্ট হয় যে, তথাকার প্রাচীন রাজারা ব্রাহ্মণাদি উচ্চবর্ণের বাজালীদের সঙ্গে আত্মীয়তা স্থাপনের জন্য সর্বদা ব্যগ্র ছিলেন।

মুন্ডার চিত্র পল্লীকবির হস্তে বেশ ফুটিয়া উঠিয়াছে—তাহার মূর্তি লৌহ-কঠোর, স্পর্ধা আকাশ-স্পর্শ ও সাহস দুর্জয়; ষড়যন্ত্র করিয়া দল গঠন করা ও অসমসাহসিকতার সহিত উপায় উদ্ভাবনার শক্তিও তাহার অসাধারণ। কোন পরাজয়েই সে দমিবার লোক নহে। একটা বর্বর নিম্নশ্রেণীর সর্দার হইয়াও সে প্রকাশ্য দরবারে রাজকন্যার পাণিপ্রার্থী, তাহার প্রতিহিংসা-প্রবৃত্তি অগ্নিহোত্রীর অগ্নির ন্যায় অনির্বাক। একটা ছাড়িয়া উপায়ান্তর অবলম্বন করিয়া তাহার হিংসা চরিতার্থ করিতে সে জীবনপথে প্রতিনিয়ত প্রস্তুত হইয়াছে। এই বিভীষিকাময় চরিত্র তাহার ভীষণতা ও ক্রুরতা দ্বারা আমাদের যেমন বিস্ময় উৎপাদন করে, তেমনই তাহার অসাধারণত্ব দ্বারা আমাদের চিন্ত কতকটা আকর্ষণ করে।

প্রেমের যে-সকল ভাব ও ঘটনা ইহাতে লিপিবদ্ধ হইয়াছে, তাহা কতকটা পল্লীগীতিকার মামুলী কাহিনী। পল্লীগীতিকায় ধারাবাহিকভাবে বারমাসী-বর্ণনা খুব অল্পই পাওয়া যায়। কিন্তু ঋতু-বিশেষের প্রসঙ্গে কয়েকটি মাসের প্রাকৃতিক পরিবর্তনের কবিত্বপূর্ণ উল্লেখ প্রায় সকলগুলি পালাতেই দেখা যায়; এই পল্লীগীতিকাটিতে তাহা বাদ পড়ে নাই।

চন্দ্রকুমার দে মহাশয় ১৯২৭ খ্রীষ্টাব্দে একজন বৈষ্ণব ও জনৈক মুসলমান ফকিরের নিকট হইতে পালাটি সংগ্রহ করিয়াছিলেন।

## মহুয়া

হোমরা বেদে

উত্তর হিমরান পর্বত, যুগযুগব্যাপী হিম তথায় জমিয়া আছে, সেখানে মনুষ্যবসতি নাই। জীবজন্তুর সাক্ষাৎ পাওয়া যায় না, নিম্নে উপত্যকাভাগে কতকগুলি যাযাবর বেদে বাস করে, তাহারা নানারূপ খেলা দেখাইয়া পয়সা রোজগার করে। কিন্তু তাহাদের প্রধান আয়ের ব্যবসা—বুঠতরাজ ও ডাকাতি। সুবিধা পাইলেই তাহারা খেলাধুলা ছাড়িয়া ভীষণ দস্যুর বেশ ধারণ করে।

ধনুনের পারে কাঞ্চনপুর একটা ক্ষুদ্র পল্লী। বেদেরা একটা সেখানে হানা দিয়াছিল। বেদের সর্দারের নাম হোমরা। সেই ক্ষুদ্র পল্লীর একটা ক্ষুদ্র পাড়া হইতে হোমরা ছয়মাসের এক ব্রাহ্মণের অপোগন্ড মেয়ে চুরি করিয়া লইয়া আসিল, সেই শিশুটির অপব্রূপ লাভ্য দেখিয়া সে তাহাকে হরণ করিয়াছিল, বেদে তাহার নাম দিয়াছিল মহুয়া।

ক্রমে সেই কন্যা বড় হইয়া বেদেরের খেলা শিখিল। সে যখন দড়ি বাহিয়া বাঁশের উপর উঠিত, তখন তাহাকে দ্বিতীয় একটা সূর্যের মত দেখাইত। তাহার রূপ ও খেলার কসরৎ দেখিবার জন্য ভিড় জমিয়া যাইত।

একদা হোমরা বেদে তার ভাই মাণিককে বলিল, ‘অনেক দিন যাবৎ এই উপত্যকায় বসিয়া আছি, এই বিরল-বসতি জনপদে কোন আয়ের সম্ভাবনা নাই, চল—নিম্নভূমিতে চলিয়া যাই, খেলা দেখাইয়া উপার্জনের চেষ্টা করা যাক্। দুইজনে পরামর্শ করিয়া শুব্রবার তাহারা যাত্রার দিন স্থির করিল।

হোমরার দলে অনেক খেলোয়াড় ছিল। সর্বাগ্রে দলপতি হোমরা ‘গজপতি গতি’ মন্মথর পাদক্ষেপে চলিল, তাহার পিছনে অনুগত স্নেহের ভাই মানকা। তারপর বহু লোক—বালক, বৃদ্ধ, যুবক সকলেই খেলোয়াড়। তাহারা যেন একটা ক্ষুদ্র জগৎ সৃষ্টি করিয়া চলিল। তোতা, ময়না, টিয়া, স্বর্ণচঞ্চু দয়েল—কত পাখী, কোনটা হাতের উপর, কোন পাখী পিঞ্জরাবদ্ধ, তাহাদের সকলেই গুণী, কেউ ঠিক মানুষের মত কথা কয়, কেউ শিশু দিয়া পাগল করে, কেউ মেয়েদের সঙ্গে মেয়েদের মত নাচে, কেউ ছাড়িয়া দিলে বায়ুমণ্ডলে চক্রাকারে ঘুরিয়া পুনরায় শান্ত ছেলেটির মত নিজ পিঞ্জরে ঢোকে, তাদের বর্ণে সোনার আভা, কেহ অয়স্কান্ত মণির ন্যায় কৃষ্ণ ও উজ্জ্বল, কাহারও পাখায় যেন মরকত, কেউ যেন সবুজে গড়া। পাখী ছাড়া কত ঘোড়া। তাহাদের শিক্ষাদীক্ষা অদ্ভুত ; গাধা, শিয়াল, এবং সজারু, সঙ্গে সঙ্গে এক পাল শিকারী কুকুর, আর সঙ্গে সঙ্গে দড়ি, কাছি, বাঁশ, তাম্বু, ধনু, কাটি ও শর। তাহারা যেন নিজেরাই একটা ছোট পল্লী লইয়া চলিয়াছে। তাহাদের প্রধান দ্রব্য,

মস্তসিন্ধু চাঁড়ালের হাড়। সেই হাড় ছোঁয়াইলে মরা মানুষ বাঁচিয়া উঠে, কাটা মুণ্ডু কথা বলে।

### পূর্বরাগ

সেই দলের স্বর্ণপ্রতিমা মহুয়ার রূপ পথিকের প্রধান লক্ষ্য, বালক-যুবকের বিস্ময়ের বস্তু। সে যেন আসমান হইতে মাটিতে পড়িয়াছে, তাহার পিছনে তাহার কাঁধে হাত দিয়া চলিয়াছে সমবয়স্কা রূপসী সখী পালঙ্ক।

হাসিয়া, খেলিয়া কৌতুক করিতে করিতে তাহারা সেই উপত্যকাভূমি পরিক্রম করিয়া কয়েক দিন পরে যে গ্রামে আসিয়া পৌছিল তাহার নাম বামুনডাঙ্গা।

বামুনডাঙ্গা পল্লীতে এক বামুন যুবরাজ ছিলেন, নাম নদের চাঁদ। তিনি তনুগ বয়স্ক ও অতি সুদর্শন। তিনি প্রাতে সভা করিয়া বসিয়া আছেন, দূত আসিয়া বলিল, ‘একদল বেদে এসেছে, তারা আশ্চর্য আশ্চর্য তামাশা দেখাতে পারে। তাদের সঙ্গে একটা মেয়ে আছে, তার মত সুন্দরী আমরা জন্মে দেখি নাই।’ যুবরাজ ভিতর-বাড়ীতে যাইয়া মাকে জিজ্ঞাসা করিলেন। মাতা বলিলেন, ‘তারা খেলা দেখাতে কত চায়?’ নদের চাঁদ বলিলেন, ‘একশত টাকা তাহারা চায়।’ জননীর অনুমতি হইল, বাহির-খণ্ডে তাহাদের খেলা দেখানো হউক।

রাজবাড়ীতে খেলা দেখানো হইবে, পল্লীর সমস্ত লোক ভাজিয়া পড়িল।

হোমরা বেদে ঢোলে কাটি মারিল, পাড়ার স্ত্রী-পুরুষ যেখানে যে ছিল সকলে ছুটিয়া আসিল, চারদিকে ডাকাডাকি হাঁকাহাঁকি, নদের চাঁদ সভা হইতে বারংবার উঠিয়া দৃষ্টিপাত করিতে লাগিলেন। মহুয়া যখন আসরে আসিল তখন নদের চাঁদ বসিয়া ছিলেন, অতিশয় কৌতুকে উঠিয়া দাঁড়াইলেন, তাঁহার দুই চক্ষু নিশ্চল। বন্য মার্জারীর মত ক্ষিপ্ৰপদে কলসী মাথায় মহুয়া দড়ি বাহিয়া বাঁশের ডগায় উঠিয়া নাচিতে লাগিল, সেই অদ্ভুত নৃত্য দেখিয়া কাহারও চোখে পলক পড়িল না। কিন্তু নদের চাঁদ অতিশয় দৃষ্টিভ্রায় বলিলেন, ‘এত উচু জায়গায় উঠেছে, আমার ভয় হয়, পাছে পড়িয়া মরে।’ খেলা দেখার কৌতুক মিটিয়াছে, একান্ত আত্মীয়ের বেদনাতুর অন্তঃকরণ লইয়া তিনি মহুয়াকে দেখিতে লাগিলেন।

মহুয়া বাঁশের উপর নাচিয়া গাহিয়া পদাঙ্গুষ্ঠে মাত্র দড়ি স্পর্শ করিয়া যেন আকাশের পরীর মত উড়িতে লাগিল।

নদের চাঁদের চোখের নিমেষ নাই—মানে হয় যেন তাঁর জ্ঞান নাই, লজ্জা নাই। যখন মহুয়া নামিয়া আসিয়া গ্রীবা হেলাইয়া হাত জোড় করিয়া বকশিস চাহিল, তখন যুবরাজ মুহূর্তকাল কি দিবেন, ভাবিতে লাগিলেন—ইহাকে অদেয় কি আছে! পরমুহূর্তে নিজের গায়ের হাজার টাকার শালখানি মহুয়াকে দিয়া তাহার কমলনিন্দিত মুখখানির দিকে চাহিয়া রহিলেন : এ কুমারী অপ্সরা, না গম্ভীৰ্বকন্যা ইহার অঙ্গাঙ্গীভব নিখুঁত, কণ্ঠস্বর কোকিলের পঞ্চম রাগ। মহুয়া ভাবিতেছিল, ‘পুরস্কার লইয়া কি হইবে, হে ঠাকুর ইহার মনের এক কোণে যেন আমি স্থান পাই।’

নদের চাঁদ হুকুম দিলেন বামুনডাঙ্গার দক্ষিণে যে উলাকাঁদার ফলের বাগ আছে তথায় শীঘ্র একখানা বাড়ী তৈরী করিয়া হোমরা বেদেকে দেওয়া হউক—বাড়ীর পার্শ্বে নির্মলসলিলা দীঘি, চারদিকে শাকসব্জীর বাগ।

পছন্দসই যে ঘর কয়েকখানি তৈরী হইল, তাহাতে আয়নার কপাট দেওয়া হইল। নূতন জমিতে শাকসজ্জী খুব ফলিল। হোমরা মহুয়াকে ঘুরাইয়া ঘুরাইয়া বাগের শোভা দেখাইতে লাগিল, ‘ঐ দেখ বেগনের চারা পুঁতিয়াছি, এই বেগুন বেচিয়া তোমার গলার হার কিনিয়া দিব।’ পাহাড়িয়া পাখী, নিম্নভূমির আবহাওয়া মহুয়ার সহ্য হইল না, সে জ্বরে কাঁপিতে লাগিল এবং কাঁদিতে শুরু করিয়া দিল। ধর্মপিতা তাহাকে আদর করিয়া বলিল, ‘নূতন বাগানে শিম লাগাইয়াছি, ঐ দেখ মানকচু কেমন বাড়িয়া উঠিয়াছে—এই সজ্জী বিক্রী করিয়া তোমার হাতের বাজু গড়াইয়া দিব—

‘নূতন বাগানে আমি লাগাইব কলা।

সে কলা বেচিয়া দিব তোমার গলার মালা॥

‘চারিদিকে শাদা বেল ফুল ফুটিয়াছে, রক্তকরবীর কি সুন্দর বর্ণ, টিয়া ও কপোত শিকার করিয়া আনিয়াছি। মহুয়া তুমি পালঙ্ক সহিকে লইয়া রান্না কর গিয়া, কালো জিরা দিয়া ঝাঁধিও, মাংস সুস্বাদু হইবে।’

তবু পাহাড়িয়া পাখী, তাহার পাহাড়ের দেশ ভুলিতে পারিল না, উত্তর দিকে চাহিয়া তাহার চোখে অবিরত জল পড়িতে লাগিল।

### পঞ্চম অধ্যায়

একদিন সম্প্রায়া বেলা, তখনও গৃহস্থের ঘরে সাঁজের বাতি জ্বলে নাই। মহুয়া এক গৃহস্থের বাড়ীতে তামাশা দেখাইয়া ফিরিতেছে ; সজ্জীরা আগে চলিয়া গিয়াছে। নদের চাঁদ বলিলেন, ‘তুমি একটু ধীরে চল, আমি তোমার সঙ্গে দুই-একটা কথা বলিব। কাল সম্প্রায়া সূর্যাস্তের পর জ্যোৎস্না উঠিবে। তোমার যদি অবসর হয়, তবে তখন একবার নদীর ঘাটে যাইবে। কলসী জলে ভরা হইলে যদি তুলিতে কষ্ট হয়, তবে আমি তুলিয়া দিব।’

মাথা নীচু করিয়া মহুয়া চলিয়া গেল, কিন্তু কি ভাবিয়া পরদিন সম্প্রায়াকালে কলসী কাঁখে লইয়া সে নদীর ঘাটে আসিল।

নদের চাঁদও সেই সময় নদীর ঘাটে উপস্থিত হইলেন এবং মৃদুস্বরে মহুয়াকে বলিলেন, ‘তুমি নিবিষ্ট হইয়া জল ভরিতেছ, কাল তোমাকে যে কথা বলিয়াছিলাম তা তোমার মনে আছে কি?’

মহুয়া বলিল, ‘বিদেশী যুবক! আপনি কি বলিয়াছিলেন তা আমার মনে নাই।’

নদের চাঁদ—‘কি আশ্চর্য! এত অল্প বয়সে এত ভুল! এক রাত্রির মধ্যে আমার কথা তুলিয়া গিয়াছ!’

মহুয়া—‘আপনি অচেনা যুবক, আপনার সঙ্গে এই নদীর ঘাটে নির্জনে কথা বলিতে বড় সরম পাই।’

নদের চাঁদ—‘বেশ, জল তুলিয়া কলসী ভর্তি কর! আমার জানিতে বড় সাধ হয় তুমি কোথা হইতে আসিয়াছ? তোমার পিতামাতা কে, এদেশে আসিবার পূর্বে তুমি

কোথায় ছিলে? হাসিমুখে আমার কথার উত্তর দাও। আমার সঙ্গে কেউ নাই। নিতান্ত নির্জন স্থান। তোমার লজ্জার কোন কারণ নাই।’

মহুয়া—‘রাজকুমার, আমাকে এ-সকল প্রশ্ন করিয়া কেন কষ্ট দিতেছেন? এই দুঃখিনীর কেহ নাই। আমার মা-বাপ বা ভাই কেউ নাই, আমি স্রোতের শ্যাওলা, নিরাশ্রয়ভাবে ভাসিয়া বেড়াইতেছি। আমার মত হতভাগিনী সংসারে নাই, এদেশে কি তেমন দরদী কেউ আছে, আমি যঁার কাছে প্রাণ খুলিয়া মনের কথা বলিতে পারি? আমি নিজের জ্বালায় নিজে মরিতেছি। কে আমার মনোবেদনা বুঝিবে? কাকেই বা বলিব? রাজকুমার! আমার দুঃখ বুঝিয়া আপনার লাভ কি? আপনি রাজ্যেশ্বর, কোন ভাগ্যবতী রাজকুমারীকে বিয়া করিয়া সুখে ঘর করিতেছেন, আপনি দুঃখিনীর কথা শুনিয়া কি করিবেন?’

নদের চাঁদ কৃত্রিম ক্রোধ প্রকাশ করিয়া বলিলেন, ‘মহুয়া তুমি নির্মম, আমার মনে কতখানি দরদ তা তুমি বুঝিতে চাও না। তুমি মিথ্যা কথা কেন বলিতেছ? আমি বিবাহ করি নাই।’

মহুয়া—‘আপনার পিতামাতার মন কঠিন, তাঁহারা এখন পর্যন্ত আপনার বিবাহ দেন নাই।’

রাজকুমার বলিলেন—‘মহুয়া তোমার মা-বাপের মনও কম কঠিন নহে। তাঁহারাও তোমাকে এতদিন পর্যন্ত কুমারী করিয়া রাখিয়াছেন, বিবাহ দেন নাই।’

মহুয়া—‘আপনি এখন পর্যন্ত বিয়া করেন নাই কেন? আপনার দুঃখ কি?’

নদের চাঁদ—‘মহুয়া তোমার মত সুন্দরী ও গুণশীলা কোন কন্যা পাইলে আমি বিবাহ করিতে রাজী হইতে পারি, আমি সেই প্রতীক্ষায় আছি।’

মহুয়া—‘রাজকুমার! আপনি বড় নির্লজ্জ, আপনি আমাকে এইরূপ অশিষ্ট কথা শুনাইতেছেন, গলায় দড়ি বাঁধিয়া আপনি গজায় ডুবিয়া মরুন, ছিঃ!’

নদের চাঁদ হাসিয়া বলিলেন, ‘যে দড়ি দিয়া কলসী বাঁধিব এবং যে কলসী জলে ভর্তি করিয়া ডুবিয়া মরিব সে দড়িই বা কোথায়, সে কলসীই বা কোথায়? আমার কাছে তুমি গভীর গজা—এই গজায় ডুবিয়া মরিতে সাধ যায়—

‘কোথায় পাব কলসী? কন্যা কোথায় পাব দড়ি।

তুমি হও গহিন গজা আমি ডুইবা মরি॥’

চন্দ্রলেখা যেরূপ সাম্ভাগ্যগনে মিলাইয়া যায়, এই দুই তরুণ-তরুণীর রহস্যলাপ তেমনই নদীর ঘাটে মিলাইয়া গেল। সেদিন এই পর্যন্ত।

পালঙ্কের কাছে মনের বেদনা প্রকাশ

আর—একদিন, মহুয়া কপালে কর ন্যস্ত করিয়া চুপ করিয়া বসিয়া আছে, পালঙ্ক সেই তার চুলগুলির মধ্যে আঙ্গুল চালাইয়া ধীরে ধীরে বেণীমুক্ত করিতেছে; পালঙ্ক অতি মৃদুস্বরে বলিল, ‘মহুয়া, আমার প্রাণের সেই, তুমি এ কয়েকদিন যাবৎ যেন কত



উৎসবের কাজে আগ্রহের সহিত রোজই সম্মুখকালে একা একা নদীর ঘাটে যাও কেন? আমার মনে হয়, তুমি রোজ রাত্রি কাঁদিয়া কাটাও, তোমার চোখের কোঠায় অশ্রুর দাগ। কথা বলিতে যাইয়া কখনও কখনও তোমার চোখ দুটি অশ্রুপূর্ণ হয়। আমার প্রাণের সহি, বল দেখি ; কিসের জন্য তোমার এত দুঃখ! প্রায়ই দেখিতে পাই, তুমি দীর্ঘশ্বাস ফেলিয়া রাজবাড়ীর দিকে কাতরভাবে চাহিয়া থাক। এদিকে নগরে শূন্যে, নদের চাঁদ ঠাকুর তোমার গান শুনিয়া পাগলের মত হইয়া গিয়াছেন।’

এই কথা শুনিয়া পালঙ্ক সখীর গলা জড়াইয়া ধরিয়া মহুয়া কাঁদিতে কাঁদিতে বলিল, ‘পালঙ্ক, আমার উপায় বলিয়া দে! আমি মনের আগুন কেমন করিয়া নিভাইব, আমি যে কিছুতেই মনকে সম্বরণ করিতে পারিতেছি না। তোরা আমাকে লইয়া চল, এদেশ ছাড়িয়া যাই। আমি কত চেষ্টা করিয়াছি, মনকে বুঝাইতে পারিলাম না।’

পালঙ্ক—‘প্রাণের সহি! তুমি আমার উপদেশ মত কাজ কর। সাতদিন নদীর ঘাটে যাইও না। বাড়ীতে লুকাইয়া থাকিও। নদের ঠাকুর খুঁজিতে আসিলে আমরা তাঁহাকে বলিব, সুন্দরী মহুয়া মরিয়া গিয়াছে।’

মহুয়া বলিল—‘সাতদিন তো দূরের কথা, একদণ্ড তাঁহাকে না দেখিলে মরিয়া যাইব। চন্দ্রসূর্যকে সাক্ষী করিয়া বলিতেছি, ঠাকুর নদের চাঁদকে আমি আমার প্রাণমন সমর্পণ করিয়াছি, তিনিই আমার প্রাণের স্বামী।

‘বেদেদের সঙ্গে আমি যথা তথা যাই।

আমার মন বাঁধিয়া রাখে হেন স্থান নাই॥’

‘আমি এখন তোমাদের পর হইয়া গিয়াছি—

‘বঁধুরে লইয়া আমি হব দেশান্তরী।

বিষ খাইয়া মরিব কিম্বা গলায় দিব দড়ি॥’

হোমরার সন্দেহ, আড়িপাতা

স্থান উলুকাঁদা—বেদেদের নূতন বাড়ী, সম্মুখে পুকুরপাড়ে সজী-বাগান।

হোমরা তাহার কনিষ্ঠ মান্কা বেদেকে বলিতেছে, ‘এই দেশে আর আমার থাকা হইবে না, চল এদেশ ছাড়িয়া যাই। বাড়ীঘর দিয়া কি করিব? বরং ভিক্ষা মাগিয়া খাইব, তাও ভাল। তুমি কি কানাঘুসা কিছু শুনিতে পাও নাই। মহুয়া রাজকুমারের জন্য পাগল হইয়াছে, এখানে কোনক্রমেই আর থাকা উচিত নহে।’

ছোট ভাই ধমক দিয়া উঠিল, ‘তুমি কি পাগলের মত বকিয়া যাইতেছ?

‘...এমন কথা না বলিও তুমি।

ইচ্ছা হয় ছেড়ে যেতে এই সোনার জমি।

শানে বাঁধা পুকুরটি গলায় গলায় জল।

পাকিয়াছে শালিধান, সোনার ফসল॥

তা দিয়া করব মোরা শালিধানের চিড়া।

এই দেশ না ছাড়ি যাইও—আমার মাথার কিরা॥’

ফাল্গুনের অন্ত হইয়াছে, চৈত্র মাসে ডালের উপর বসিয়া কোকিল ডাকিয়া উঠিতেছে, সেই সুরে বোটার উপর দাঁড়াইয়া কুন্দ ও মালতী ফুল শরাহত হরিণীর ন্যায় ঘন ঘন কাঁপিয়া উঠিতেছে; বেদেদের ক্ষেতে অপৰ্যাপ্ত শালিধান পাকিয়া মাটির দিকে নুইয়া পড়িয়াছে, তাহাদের অগ্রভাগ রাজ্জা হইয়া উঠিয়াছে। রাত্রি নিস্তম্ভ নিখর, কেবল মাঝে মাঝে রহিয়া রহিয়া ‘বউ কথা কও’ ঘুরিতে ঘুরিতে আকাশে চীৎকার করিয়া বেড়াইতেছে, তাহার স্বরে কোন্ অনির্দিষ্ট মানিনীর মান ভাঙিতেছে কে বলিবে? সেই নিবিড় নিষ্কমল আকাশে দাঁড়াইয়া প্রকৃতি যেন বৃন্দশ্বাসে কোন যোগ সাধনা করিতেছে। বেদেদের নূতন বাড়ীঘর, সুমিষ্ট পুকুরের তীরে বড় বড় ঘর, বেদেরা তাহাতে বড় আরামে ঘুমাইতেছে, তাহাদের নাসিকার শব্দে গভীর সুস্থিতি বুঝাইতেছে।

দ্বিপ্রহররাত্রে নদের চাঁদের ঘুম ভাঙিয়া গেল, শিয়রে স্বর্ণমণ্ডিত সজ্জেকত বাঁশীটা ছিল, তিনি তাহাতে ফুঁ দিলেন। বাঁশীর বিলাপ দূরস্থিত উলুকাঁদার বাগানে এক বিরহিণী মর্মে প্রবেশ করিয়া তাহার ঘুম ভাঙাইয়া দিল। অতি ব্যস্তসমস্ত ভাবে মল্লয়া উঠিয়া কলসী কাঁখে বেদেদের কুটীরের পাশ দিয়া উন্মত্তবেগে নদীর ঘাটে ছুটিয়া আসিল। আসিয়া দেখে, নদের চাঁদ তাহার পূর্বেই বিভোর হইয়া বাঁশী বাজাইতেছে। বিলম্বে অসহিষ্ণু হইয়া বাঁশী কাঁদিয়া ডাকিতেছে। আকাশের চাঁদ তাহাকে পৃথিবীর চাঁদকে দেখাইয়া দিল, তখন কি আনন্দ! দুইজনে দুইজনের আলিঙ্গনাবন্ধ, এক চক্ষু আনন্দাশ্রুপূর্ণ, আর এক চক্ষু আশঙ্কাতুর। রাজপুত্র বলিলেন, ‘এই ঐশ্বর্যের ছাইপাশ দিয়া আমি কি করিব, চল আমরা এখনই এই রাজ্য ছাড়িয়া যাই।’ মল্লয়া কাতর কণ্ঠে বলিল, ‘না, তাহা হইবার নয়। আমি তোমাকে ছাড়িয়া থাকিতে পারিব না, এই রাজৈশ্বর্য হইতে টানিয়া বনেজঙ্গলে লইয়া যাইতে পারিব না, আমি তোমার মুখখানি দেখিতে দেখিতে এই নদীতে—এই কামনা—সায়রে ডুবিয়া মরিব, যাহাতে পরজন্মে তোমায় পাই। হায়! যদি তুমি ফুল হইতে তবে তো তোমায় খোঁপায় বাঁধিয়া এখনই পলাইয়া যাইয়া বনে লুকাইয়া থাকিতে পারিতাম!

‘বধু, আমি তোমায় কি বলিব! এই বেদের মেয়েকে দিয়া তুমি কি করিবে? এই আবর্জনা তুমি এই খানে ফেলিয়া রাখিয়া ঘরে যাও, সুন্দরী দেখিয়া কোন রাজকন্যাকে বিবাহ করিয়া সুখী হও। আমার সঙ্গে এক ঘাটে পা দিলে তুমি নিজের রাজ্য-সম্পদ সকলই নষ্ট করিবে।’ যুবরাজ তাহাকে বাহুপাশে বন্ধ করিয়া বলিলেন, ‘আমার সকল রাজ্য-সম্পদ হইতে এই সম্পদ বড়।’

হোমরা অলঙ্কিতে তাহাদের পিছনে ছিল, খানিকটা দূরে ওৎ পাতিয়া সে ইহাদের কথাবার্তা শুনিল, তারপরে ধীর পাদক্ষেপে উলুকাঁদাতে নিজের শয়ন ঘরে যাইয়া নিব্বা হইয়া বসিয়া রহিল।

‘অবিদিত গত্যামা’ রাত্রি কি ভাবে কাটিল তাহা নদের চাঁদ অথবা মল্লয়া কিছুই জানিতে পারিল না—কত অশ্রু, কত দুঃখ, কত সুখ, কত প্রলাপ, কত বিলাপ! রাত্রি

ভোর হইয়া আসিল, উষার পায়ে আলতার ছটা পড়িয়া পূর্ব গগনের কয়েকখানি পাতলা মেঘ ঈষৎ রক্তবর্ণে রঞ্জিত হইয়া উঠিল। যুবরাজ বাড়ীতে চলিলেন, মহুয়াও অন্যমনস্ক ভাবে কলসীতে জল ভরিয়া চলিয়া গেল।

ইহার মধ্যে মহুয়া কোনরূপ একটু সুবিধা করিয়া নদের ঠাকুরের পায়ে প্রণাম করিয়া বলিল, ‘আমরা এদেশ ছাড়িয়া যাইব, না যাইয়া উপায় নাই, আমি কুলনারী—কুল—মানের ভয় আছে, কিন্তু তোমাকে ছাড়িয়া কেমন করিয়া থাকিব, কেমন করিয়া তোমাকে ছাড়া প্রাণ ধারণ করিব?’

‘তোমার সঙ্গে বঁধু রে আমার এই শেষ দেখা।  
কেমন করি থাকব আমি হইয়া অদেখা॥

‘তোমাদের দেওয়া সুন্দর বাড়ীঘর পড়িয়া থাকিবে ; তাহাতে খেদ নাই। এ সব ছাড়িয়া যাইব, কিন্তু তোমাকে ছাড়িয়া কেমন করিয়া থাকিব, আমার পাগল মনকে কেমন করিয়া বাঁধিয়া রাখিব?’

‘বঁধু, বুক ফাটিয়া যাইতেছে, তোমার সজ্জেকত বাঁশীর ডাক না শুনিয়া আমি সারাদিন কেমন করিয়া কাটাইব। আজ কি মধ্যরাত্রে আমাদের সুখ-নৈশভ্রমণ শেষ হইল?’

‘পড়্যা রইল ঘরবাড়ী পড়্যা রৈলা তুমি।  
কেমন কৈরা পাগল মন বাঁধা রাখব আমি॥  
আর না জাগিয়া বঁধু পোহাইব নিশি।  
আর না শুনিব তোমার পাগল-করা বাঁশী॥

‘তোমার সোণা মুখখানি ঘুম ভাঙার পরে আর দেখিব না, চক্ষু দুটি কত অন্ধিসন্নিহিতে সেই মুখ দেখিবার জন্য উতলা হইয়া থাকে, হায় সকলই ফুরাইল।

‘যদি কখনও মনে হয়, তবে বঁধু দূর উত্তরদেশে হিমালয় পর্বতের নিম্নভূমিতে চলিয়া যাইয়া আমায় একবার দেখিয়া আসিও। সেখানে প্রতি বৎসর বেদেরা কয়েকমাস বাস করিয়া থাকে, তুমি কতদিন পরে সেইখানে যাইও। আমাদের বাড়ীতে নলখাগড়ার বেড়া ও দক্ষিণ-দুয়ারী ঘর, সেইখানে আমায় পাইবে, প্রাণের অতিথিকে পাইলে আমি শালিধানের চিড়া ও সে দেশের বড় বড় মর্তমান কলা খাইতে দিব। ঘরে মৈষের দই থাকে, তাহা তুমি নিজ হাতে হাঁড়ি হইতে লইয়া পাইবে, আজই তোমার সঙ্গে আমার বোধ হয় শেষ দেখা, আর কি আমাদের সুখের মিলন পোড়া অদৃষ্টে লেখা আছে?’

যুবরাজ ভাবিলেন, ‘মহুয়া আসন্ন বিচ্ছেদের আশঙ্কায় রাজাই কত না প্রলাপ বলে, এও সেইরূপ উক্তি। উলুকাঁদার বাড়ীঘর, সজী ও ধানের ক্ষেতসকল ছাড়িয়া হোমরা বেদে কোথায় যাইবে? এখানে যতটা সম্ভব আমি বেদেরের জন্য সুবিধার ব্যবস্থা করিয়াছি।’ তিনি মহুয়াকে বলিলেন, ‘কেন বিচ্ছেদের বৃথা আশঙ্কা করিতেছ, আমাদের কি আর ছাড়াছাড়ি হইতে পারে? অসম্ভব।’

মহুয়া একথা শুনিয়া কাঁদিতে লাগিল।



## বেদেদের পলায়ন

মানকাকে নির্জনে লইয়া গিয়া দৃঢ় স্বরে হোমরা বেদে বলিল—‘তাই, এখন আর কোন দ্বিধা বা সন্দেহ নাই, আমি নিজে দেখিয়াছি। তোমার এই শালিধান পড়িয়া থাকুক, উলুকাঁদার শালিধানের চিড়া আর খাইতে হইবে না। বোঁচকা-পুঁটলী বাঁধ, আজ রাত্রি প্রায় সবটাই আঁধার, চল এই সুযোগে পালাই, না হইলে নদের ঠাকুরের বেড়াঙ্গলে আমাদের পড়িতে হইবে, সেখানে কারাগারে চিরবন্দী হইয়া থাকিব। নতুবা ইহারা আমাদিগকে মাটির তলে পুঁতিয়া মারিবে। হউন তিনি রাজা, আমি কিছুতেই এই অনাচারের প্রশ্রয় দিব না।’

তখনই রাত্রের আঁধারে বেদেপাড়ায় সাজ সাজ রব পড়িয়া গেল। বাঁশ, দড়ি, তাম্বু, ধনু, ছিলা, বেদেদের ঘাড়ে স্থান পাইল, সেই নিস্তব্ধতার ভিতর দিয়া ছাগল, ভেড়া, বানর, ঘোড়া, শিয়াল, সজারু—সকলগুলি বনের পশু ও তোতা, টিয়া প্রভৃতি পাখী সহ বেদেরা আঁধারে গা ঢাকিয়া বামুনডাঙ্গা গ্রাম ছাড়িয়া গেল। পরদিন প্রাতে নগরের লোক বিস্মিত হইয়া দেখিল, উলুকাঁদার মস্ত মস্ত ঘরবাড়ী একেবারে খালি। পাকা ধানের একটী আঁটিও তাহারা নেয় নাই। তাহাদের নিজেদের যাহা কিছু সম্বল ছিল শুধু তাহাই লইয়া আঁধার রাতে তাহারা পলাইয়া গিয়াছে। নগরবাসীরা এ উহার মুখের দিকে চাহে, ব্যাপার কি? কেহই বলিতে পারে না। তবে একথা ঠিক, যে হোমরা, মানকা ও তাহাদের দলের একটী প্রাণীও আর সেখানে নাই। ছাগলগুলি সেই প্রান্তরে আর চরিয়া বেড়ায় না, বেদেদের পাখীর স্বরে সে অঞ্চলের বাতাস আর মুখরিত হয় না। সুন্দরীশ্রেষ্ঠা মহুয়ার মুখখানি পদ্মদীঘির মধ্যে আর একটী নূতন পদ্মের মত স্নানকালে ফুটিয়া উঠে না, পালঙ্কও নিরুদ্দেশ হইয়াছে, ভিটা খালি, ঘর শূন্য। বহু লোক আসিয়া সেখানে প্রভাতকালে জড় হইয়া এই রহস্য সমাধানের আলোচনায় যোগ দিতে লাগিল, যতই কলরব ও বাগবিতণ্ডা বৃদ্ধি পাইতে লাগিল, ততই প্রশ্ৰুতীর জটিলতা বাড়িয়া চলিল।

## নদের চাঁদের অবস্থা

সবে এক গ্রাস ভাত মুখে দিবেন, এমন সময় এই সংবাদ নদের চাঁদের কর্ণগোচর হইল। ভাতের গ্রাস মাটিতে পড়িয়া গেল। মাতা ডাকিতে লাগিলেন, পরিজনেরা ডাকিতে লাগিল, কিন্তু যুবরাজ কোন সাড়া দিলেন না, ফ্যাল ফ্যাল করিয়া চাহিয়া রহিলেন; সকলে বলাবলি করিতে লাগিল—‘নদের ঠাকুর পাগল হইয়াছেন’।

‘যখন নাকি নদের ঠাকুর এই কথা শুনিল।  
খাইতে বসি মুখের গ্রাস ভূমিতে পড়িল॥  
মায় ডাকে সবে ডাকে নাহি শুনে কথা।  
নদের ঠাকুর পাগল হইল শুনি যথা তথা॥’

নদের ঠাকুর ঘুরিয়া ঘুরিয়া উলুকাঁদার সজীবাগ ও ঘরবাড়ী দেখিতে লাগিলেন। দিনের বেলা এইভাবেই কাটে; এইখানে বসিয়া মহুয়া আমার জন্য বিনা সূতে মালা

গাঁথিত, এইখানে সে বাঁশী শুনবার জন্য নদীর দিকে একদৃষ্টে চাহিয়া থাকিত। এইরূপ ভাবনার শেষ নাই, কত কথা, কতদিনের সুখদুঃখের কাহিনী মনে পড়ে, সত্যই বুঝি নদের চাঁদ পাগল হইলেন।

একদিন তিনি মাকে বলিলেন, ‘মা আমার আর বামুনডাঙা ভাল লাগিতেছে না, এ দেশে হাওয়া বর্ষাকালে বড় খারাপ হয়, সর্বদা যেন শীতের শিহরণে গায় কাঁটা দেয়। মা, তুমি অনুমতি কর, আমি দূরতীর্থগুলি দেখিয়া আসি।’

মা বলিলেন, ‘আমি তোকে ছাড়া এই পুরীতে কি লইয়া থাকিব? রাজ্যই বা দেখে শুনে কে? মায়ের মনের কষ্ট ও দুচ্চিন্তা তোরা কি করিয়া বুঝিবি? বর্ষার রাত্রের আর্দ্র বস্ত্র পিঠে শুকাই না, মাঘ মাসের শীতে কতবার গা ধুইয়া কাটাইতে হইয়াছে, এক মুহূর্ত তোকে কোল হইতে বিছানায় নামাই নাই। মায়ের মনের দুচ্চিন্তা তোরা কি করিয়া বুঝিবি?’

‘বিদেশে বিভূয়ে যদি ছেলে মারা যায়, ছয় মাসের পথ দূর হইতে মায়ের মন তাহা জানিতে পারে—

‘বিদেশে বিপাকে যদি পুত্র মারা যায়।  
দেশে না জানিবার আগে জানে কেবল মায়।’

‘আমি কিছুতেই তোমাকে ছাড়িয়া থাকিতে পারিব না, যক্ষের মত কৃপণ তার বকের মধ্যে লুকানো টাকার থলিয়া ছাড়িয়া দিতে পারে, কিন্তু আমি তোমাকে প্রবাসে পাঠাইয়া ঘরে একা থাকিতে পারিব না।

‘তোমারে না দেখলে পুত্র গলে দিব কাতি।  
তুমি পুত্র বিনে নাই আমার বংশে দিতে বাতি।  
ভিক্ষা মেগে খাব আমি তোমারে লইয়া।  
উরের ধন দূরে দিব, তবু না দিব ছাড়িয়া॥’

### গৃহত্যাগ

এদিকে সুবিধা হইল না। নদের চাঁদ রাত্রি দ্বিপ্রহরের সময় ঘুম হইতে উঠিয়া উদ্দেশ্যে মাতাকে ও অপরাপর গুরুজনকে প্রণাম করিলেন, চন্দ্রসূর্যকে সাক্ষী করিয়া বর প্রার্থনা করিলেন ‘যেন আমার অভীষ্ট সিদ্ধ হয়’। শতস্নেহজড়িত সেই রাজগৃহ ছাড়িতে তাঁহার কষ্ট হইল না। হিমালয় পাহাড় কোথায়? নলখাগড়ার বেড়া, দক্ষিণ-দুয়ারী ঘর ও বেদেপাড়া কোথায়?—এই চিন্তা তাঁহার মনে খেলিতে লাগিল, আর কোন চিন্তা নাই।

‘রাত্রি নিশাকালে ঠাকুর কি কাম করিল।  
বেদের নারীর ল্যাগা ঠাকুর বিদেশে চলিল॥  
কিসের গয়া, কিসের কাশী, কিসের বৃন্দাবন।  
বেদের কন্যার লাগি ঠাকুর ভ্রমে ত্রিভুবন॥

এক মাস দুইমাস করিয়া তিনমাস ঘুরিল—কোথাও বেদের দলের সাক্ষাৎ মিলিল না। জৈন্তার পাহাড়-দেশ, ঘন বিটপীসমাকীর্ণ অতি নিবিড় গহিন বন, নানাদেশ ঘুরিয়া চন্মতি ঠাকুর বন হইতে বনে, পাহাড় হইতে পাহাড়ে ঘুরিতে লাগিলেন, বেদের দল কোথায়? মহুয়াই বা কোথায়?

রাখাল মহিষ ও গরু চরাইয়া গাছতলায় বসিয়া বাঁশী বাজায় ; নদের ঠাকুর তাহার কাছে যাইয়া বসেন, তাঁহার সুদর্শন মূর্তি দেখিয়া রাখাল বালকেরা বিস্মিত ইয়া বাঁশী বাজানো ক্ষান্ত করিয়া জিজ্ঞাসা করে, ‘কে তুমি ঠাকুর, এমন রূপ তুচ্ছ করিতেছ কেন, মাথায় তোমার জটা, দেহ তোমার শীর্ণ, বস্ত্র তোমার ছিন্ন, ধূলিবালিতে শরীর স্নান, তোমার কি কেউ নাই? চল আমরা ঐ নির্বরের জলে তোমাকে স্নান করাই, শরীর মার্জনা করিয়া দেই, না খাইয়া তুমি অস্থিচর্মসার হইয়াছ, আমরা তোমাকে গাছের মিষ্ট ফল পাড়িয়া দিব, আমাদের মায়েরা তাহা কাটিয়া দিবে, তুমি আমাদের কুঁড়ায় চল।’

নদের চাঁদ বলিলেন, ‘স্নান করা, খাওয়াদাওয়ার কথা পরে, তোমরা একদল বেদেকে কি এই পথ দিয়া যাইতে দেখিয়াছ? তোমরা কি আমার মহুয়াকে দেখিয়াছ? তাহার চুলগুলি মেঘের লহরীর মত, রাজা পা-দুখানি ঝুঁইবার লোভে লুটিয়া পড়ে। তোমরা কি তাকে দেখে নাই? একবার দেখিলে জন্মে তাকে আর ভুলিতে পারিবে না। সে বাঁশ ও দড়ি লইয়া খেলা দেখায়, নৃত্য করে। সে খেলা ও নৃত্য যদি দেখিতে, তবে আর তাহা জন্মে ভুলিতে পারিতে না। এই পুকুরে কি আমার জলপদ্ম ফুটিত, এই পাড়ে কি সে স্থল-পদ্ম হইয়া ফুটিত, তবে আমি পুকুরের জলে ডুবিয়া মরিব, আমার অঙ্গ শীতল হইবে। যদি এই পথ দিয়া পুকুরে জল আনিতে যাইত, হায়রে একবারটা যদি তাহাকে দেখিতে পাইতাম, তবে আমি পৃথিবীর সকল কথা ভুলিয়া পথের পানে তাকাইয়া থাকিতাম।

‘আকাশের পাখীরা দূরে উড়িয়া যাইতেছে—ইহারা বহু দূর পর্যন্ত দেখিতে পাইতেছে। ইহারা কি আমার মহুয়াকে দেখিতে পাইতেছে?

‘উইড়া যাওরে পাখী সব নজর বহুদূর।

এই পথে বেদের দল গেছে কতদূর॥

কোথায় গেলে পাব কন্যা তোমার দয়শন।

তিলেক অদেখা হলে হইত মরণ॥’

### মহুয়ার পথের চিহ্ন

এইরূপ উদ্ভ্রান্তভাবে নদের ঠাকুর পথচারীদিগকে, তরুলতা ও আকাশের পাখীগুলিকে সম্বোধন করিয়া প্রলাপ বকিতে বকিতে চলিয়া যাইতে লাগিলেন। বৃষ্টিবাদল মাথার উপর দিয়া চলিয়া যাইতেছে, হয়ত বড় বড় গাছ আছে, তাহার তলায় যাইয়া দাঁড়াইলে জল হইতে আত্মরক্ষা চলে ; কিন্তু নদের চাঁদ তথায় যাইতেন না ; রৌদ্রে মাথা পুড়িয়া গেলেও সেদিকে খেয়াল ছিল না। কিন্তু তাঁহার দৃষ্টি প্রখর ছিল, সহসা উক একটা প্রান্তরভূমি দেখিয়া তিনি বসিয়া পড়িলেন তাঁহার একমাত্র লক্ষ্যের দিকে।

তিনি দেখিলেন মাটির ডেলা দিয়া উনুন তৈরী আছে, রন্ধনের কালিমাখা সেই উনুন দেখিয়া বুঝিতে পারিলেন, মহুয়া তথায় বসিয়া রান্না করিয়াছে। নদের চাঁদ সেখানে বসিয়া কাঁদিতে লাগিলেন, ঘোড়ার খুরের দাগ আছে—অদূরে শ্যাম-দূর্বীর স্বপ্নাঙ্কন প্রাপ্তরে অর্ধভুক্ত দর্ভাজকুর দেখিয়া বুঝিলেন, সেখানে বেদেদের ছাগলে ঘাস খাইয়াছে, সেই সকল চিহ্ন দেখিয়া বুঝা গেল, বেদেরা ফাল্গুন ও চৈত্র মাসে সেই জায়গায় ছিল।

‘সেইখানে বসিয়া কন্যা করেছে রন্ধন।

তথায় বসি নদের ঠাকুর জুড়িল ক্রন্দন॥

ঘোড়ার পায়ের খুরের দাগ, ছাগলে খাইত ঘাস।

এইখানে আছিল কন্যা ফাল্গুন চৈত্র মাস॥’

### পথে নানা দুঃখের কথা

আষাঢ় মাসে পূবের হাওয়া পশ্চিম হইতে বহিতে লাগিল। ভাদ্র ও আশ্বিন মাসের জল-ঝড় মাথার উপর দিয়া গেল। দুর্গোৎসবের সময় বাড়ীতে কত ধূমধাম, বাদ্যভাণ্ড, দরিদ্রভোজন ও দীনদুঃখীকে নব বস্ত্র দান ; কিন্তু হায়! তাঁহার জন্য রাজবাড়ীর লোকেরা হাহাকার করিয়া কাটাইতেছে। মাতা মনুময়ী ভগবতীর পাদপীঠে পড়িয়া মাটিতে লুটাইয়া কাঁদিতেছেন! আজ এই উৎসবের দিনে, নদের চাঁদের পেটে ভাত নাই, মাথায় জটা, কটীতে ছিন্ন বস্ত্র, তিনি ‘মহুয়া’ ‘মহুয়া’ বলিয়া জজ্জালে জজ্জালে খুঁজিতেছেন। মণি হারাইয়া গেলে বণিক যেরূপ খোঁজে, মহুয়াকে তেমনই করিয়া খুঁজিয়া বেড়াইতেছেন। কার্তিক মাসে ছেলেদের মজালের জন্য মায়েরা ঘটা করিয়া কার্তিকপূজা করিয়া থাকেন, এ সময়ে বুকের সোণার পুতুলের মত তাঁহাকে মাতা খুঁজিতেছেন। রাজবাড়ীর কার্তিকপূজা বৃথা হইয়া গিয়াছে। মাতার দুলাল পুত্র, রাজগৃহের একমাত্র প্রদীপ বনের কোণে ঝোপের কোণে জোনাকিয় মত অজ্ঞাতবাস করিতেছেন! কোন্ দিন এই দীপ তৈলহীন সন্তিভায় মত নিবিয়া যাইবে, কে বলিবে!

### অকস্মাৎ মিলন

অগ্রহায়ণ মাসে অল্প অল্প শীত পড়িয়াছে, একদিন অতি সৌভাগ্যবশে হঠাৎ নদের চাঁদ দেখিলেন কংস নদীর পুষ্টিত সৈকতে দাঁড়াইয়া মহুয়া জল ভরিতেছে।

দুইজনে দুইজনকে দেখিলেন, অতিথি বেশে নদের চাঁদ বেদের কুটীরে উপস্থিত হইলেন।

দলের লোক বলাবলি করিতে লাগিল, মহুয়া এই ছয়মাস আঁচল পাতিয়া মাটিতে শুইয়াছিল। নিজে রাধে নাই, কোন খেলায় যোগ দেয় নাই। বাতের বেদনায় রাতদিন ধড়ফড় করিয়াছে, মাথার বেদনায় সারারাত্রি ঘুমাইতে পারে নাই। আজ হঠাৎ এত উৎসাহ কেন? যেন নূতন উদ্যমে কাজে লাগিয়া গিয়াছে—



‘ছয় মাসের মড়া যেন উঠি হইল খাড়া।’

বারংবার জল আনিতে নদীর ঘাটে যাইতেছে, কি ফুঁটি!  
হোমরা বেদে বলিল, ‘মানকা, এই নবাগত অতিথিকে ভাল করিয়া পরীক্ষা  
করিয়া দেখিতে হইবে। আমার কেমন সন্দেহ হইতেছে। যাহা হউক যদি এই ব্যক্তি  
একান্তই আমাদের দলে খেলা শিখিতে চায়, তবে ক্ষতি কি?’

‘আমার কাছে থাক ঠাকুর সুখে কর বাস।  
দেশে দেশে ঘুরি ফিরি লইয়া দড়ি বাঁশ॥  
যত্ন করি শিখিও খেলা থেকে মোদের পাশে।  
বার মাস ঘুরে আমরা ফিরি দেশে দেশে॥’

সেদিনই—

‘অতি যত্নে কন্যা তথা করিলা রক্ষণ।  
জাতি দিয়া নদীয়ার ঠাকুর করিলা ভোজন॥’

#### পলায়ন

কয়েক দিন অতীত হইয়া গিয়াছে। হোমরা বেদে সঠিক বুঝিয়াছে।

একদিন রাত্রিকালে মহুয়া ঘুমাইতেছে, পৌর্ণমাসী রাত্রি, চাঁদ আবেল আড়ালে  
ঢাকা পড়িয়াছে। দুই—একটা ক্ষীণ নক্ষত্র জ্বলিতেছে, তরল মেঘ সোণার পাতার মত  
তাহাদের উপর দিয়াও চলিয়া যাইতেছে, জগৎ নিস্তব্ধ, নিথর।

মহুয়া ঘুমাইতেছিল, সোণার অতিথির কথা স্বপ্নে দেখিতেছিল, তাহার মুখখানি  
ঘুমের ঘোরে স্বপ্ন দেখিয়াও আনন্দাশ্রু গড়াইয়া গড় পড়িতেছে, এমন সময় মাথার  
নিকটে কি মেঘগর্জন! মহুয়া তাড়াতাড়ি উঠিয়া দিখিল, জ্বলন্ত অগ্নির মত দুই চক্ষু  
বিস্ফারিত করিয়া হোমরা বেদে শিয়রে বসিয়া আছে।

মহুয়া উঠিয়া বসিল। হোমরা বলিল, ‘এই ষোল বছর মায়েল মত তোমাকে  
পালন করিয়াছি, আজ আমার একটা কথা তোমাকে পালন করিতে হইবে। এই  
বিষ—মাখানো ছুরিখানি লও, নদীর ঘাটে আমার সেই শত্রু শূইয়া আছে, তুমি তাহার  
বুকে এই ছুরি বিধাইয়া মৃত দেহটা টানিয়া নদীর জলে ফেলিয়া দিয়া আইস।’

ঘুমের ঘোরে কি করিতে হইবে মহুয়া ভাল করিয়া বুঝিল না। ছুরিখানি হাতে  
লইয়া সে নদীর ঘাটের দিকে রওনা হইল।

‘পায়ে পড়ে মাথার চুল চোখে পড়ে পানি।  
উপায় চিন্তিয়া কন্যা হৈল উন্মাদিনী॥’

সেই নদীর ঘাটে পাতার বিছানা, হিজল গাছের নীচে দেবমূর্তির মত নদের চাঁদ  
ঘুমাইয়া আছেন, মেঘ সেইক্ষণে চাঁদকে ছাড়িয়া দিয়াছে, চন্দের আলো মুখখানিতে  
পড়িয়াছে। স্বর্গ হইতে দেবতা কি ভুলে মাটিতে আসিয়া ঘুমাইতেছেন?

মহুয়া ডাকিতেছে, ‘উঠ—তুমি আমার মাথার ঠাকুর, তোমাকে মারিয়া জলে ফেলিয়া দিব! তাও কি হয়, তার পূর্বে এই ছুরি নিজের বুকে বিদ্ধাইয়া প্রাণ দিব।’ কুমারীর স্পর্শে নদের ঠাকুর জাগিয়া দেখিল, মহুয়ার চাঁদপানা মুখখানি জলে ভাসিতেছে, সে আত্মহত্যার জন্য উদ্যত।

ঘুমের আবেশে মহুয়ার এই মুখখানিই নদের চাঁদ দেখিতেছিল, সে মহুয়ার হাত হইতে ছুরিখানি কাড়িয়া লইল। মহুয়া বলিল, ‘তুমি রাজার ছেলে, বামুন, কেন আমার জন্য তোমার এত কষ্ট! হতভাগিনী তোমার পায়ের কাছে মরিয়া যাউক। তুমি বাড়ী ফিরিয়া যাও, তুমি সকলের চোখের দুলাল, একটা সুন্দরী মেয়ে বিবাহ করিয়া সুখে ঘর কর। আমি তোমার সুখের পথে কাঁটা হইয়াছি। এখানে মরিতে পারিলে সে যে আমার সুখের মরণ হইবে।’

নদের চাঁদ—‘আমার ঘরে ফিরিবার সাধ নাই, সাধ্য নাই; আমি জাত দিয়াছি। মা-বাবা ভাই-বন্ধু আমার সকলই তুমি। তোমাকে ছাড়া আমি কিছু জানি না, তথাপি যদি তুমি আমায় ছাড়িয়া দাও তবে এই ছুরি গলায় বিধাইয়া এখনি মরিব। তোমাকে না পাইলে আমি বাড়ীঘরে গিয়া কি করিব! এইখানেই আজ আমার শেষ।’

তখন মহুয়া দৃঢ় পাদক্ষেপে উঠিয়া দাঁড়াইল, বলিল, ‘তোমার এত ভালবাসা, আমি কি ইচ্ছা করিয়া আমার মাথার সোণার সিঁথি ফেলিয়া দিতে পারি? উঠ, চল আমরা দুইজনে এখান হইতে পলাইয়া যাই। বাপের বড় বড় তেজী ঘোড়া আছে—তাহার একটা লইয়া আসি।’

### দুই বৎসরের ষড়যন্ত্র ও প্রতিশোধ

ঘোড়া উপস্থিত হইল, দুইজনে সেই ঘোড়ায় চড়িয়া ছুটিল। তখন আবে আবার চাঁদকে ডাকিয়াছে, অস্পষ্ট জ্যোৎস্নায় দুইটি ঘোড়সওয়ার চন্দ্রসূর্য সাক্ষী করিয়া নদীর পাড় দিয়া ছুটিল! বহুদূর হইতে ঘোড়ার খুরের শব্দ হোমরা বেদের কাণে প্রবেশ করিল, সে মহুয়ার প্রতিজ্ঞা করিতে করিতে ঘুমাইয়া পড়িয়াছে—

‘চাঁদ সুরুজ যেন ঘোড়ায় চড়িল।

চাবুক খাইয়া ঘোড়া শূন্যেতে উড়িল।’

দুই জনে নদীর পাড়ের কোন একটা স্থানে ঘোড়া হইতে নামিয়া পড়িল। মহুয়া ‘লাগাম ছাড়িয়া ঘোড়ার পৃষ্ঠে মারল খাবা’। ঘোড়াকে সম্বোধন করিয়া মহুয়া বলিল, ‘ফিরিয়া বাপের বাড়ীতে যাও, যদি কহিতে পার, জানাইও, মহুয়াকে জজ্ঞালের বাঘে খাইয়াছে—সে আর বেদের কুটীরে যাইবে না।’

সম্মুখে বড় নদী—পাড় কূল দেখা যায় না, উত্তাল তরঙ্গ, এই নদী কি কবিতা পার হইবে? কিন্তু পার হওয়া চাই, নতুবা বেদেরা আসিয়া পড়িবে। শেষরাত্রের শেষ যাম অতীত প্রায়, তাহারা তীরে দাঁড়াইয়া উষার পূর্বাভাস দেখিতে পাইল, নদীর একটা অংশ এবং দিগন্তরেখায় কে যেন আবীর ছড়াইয়া দিয়াছে! উত্তাল ঢেউগুলি

তটভূমিতে আঘাত করিয়া উন্মত্ত যোদ্ধার বেশে আবার আক্রমণ করিতে ফিরিয়া আসিতেছে।

‘কি সুন্দর পাখীগুলি, নানাবর্ণের পালকে কত বিচিত্র রঙের খেলা দেখা যাইতেছে, মহুয়া, কি করিয়া এই ঘোর সিন্ধু পার হওয়া যায়?’

‘না, ঠাকুর, ওগুলি পাখীর পাখা নয়, ভাল করিয়া দেখ, খুব বড় নৌকার অনেকগুলি পালের মত দেখাইতেছে না কি? কত উঁচুতে পালগুলি উড়িতেছে, ঐ দেখ কাছে আসিয়া পড়িয়াছে।’

উভয়ে সন্তুষ্ট হইল, ‘এই নৌকায় যদি পার হইয়া ওপারে যাইতে পারি, তবে আর ভয় নাই’।

নদের ঠাকুর চীৎকার করিয়া বলিলেন—

‘আমরা দুইজন অনাশ্রয় পথিক, নদীর ওকূলে যাইব।

‘বিস্তার পাহাড়িয়া নদী ঢেউয়ে মারে বাড়ি।

এমন তরঙ্গা নদীর কেমনে দিব পাড়ি॥

গহিন গম্ভীরা নদী—অলছ তলছ পানি।

পার কৈরা দিলে বাঁচে এ দুইটি পরাণী॥’

সেখান দিয়া এক সদাগর যাইতেছিল। কন্যার রূপ দেখিয়া সে মুগ্ধ হইল—

‘মাঝিমাল্লায় ডাক দিয়া কয় সদাগর।

কূলেতে ভিড়াও নৌকা—তোমরা সত্তর॥

কূলেতে ভিড়িল নৌকা উঠিল দুজন।

চলিল সাধুর নৌকা পবন-গমন॥’

সদাগরের ইচ্ছিতে যে স্থানে সেই নদীর ভীষণ আবর্ত, সেইখানে সহসা মাঝিরা নদের ঠাকুরকে ফেলিয়া দিয়া অতি দ্রুত নৌকা বাহিয়া চলিল।

নদের চাঁদ সেই আবর্তের ঘূর্ণিপাক হইতে একবার মাথা জাগাইয়া বলিলেন—

‘বিদায় দেও গো কন্যা আমায়—শেষ বিদায় মাগি।

তোমার আমার শেষ দেখা এই জন্যের লাগি॥’

এই কথা বলিয়া নদের চাঁদ জলের পাকে তলাইয়া গেলেন।

কন্যা চীৎকার করিয়া বলিল—

‘যে ঢেউয়ে ভাসাইয়া নিল আমার নদের চাঁদ।

সেই ঢেউয়ে পড়িয়া আমি ত্যজিব পরাণ॥’

বিদ্যুদ্বেগে মহুয়া জলে ঝাঁপ দিয়া পড়িল, বিদ্যুদ্বেগে মাঝিমাল্লারা তাহাকে জোর করিয়া ধরিয়া তুলিল।

সদাগর তখন মহুয়ার কাছে অগ্রসর হইয়া বলিল—‘তুমি রূপেগুণে ধন্যা, তোমার অভাব কি? কেন তুমি মৃত্যুকামনা করিতেছ! চল, আমাদের দেশে, আমার বাড়ী লোকলস্কর, সৈন্য-সেনাপতিতে ভরা, তুমি সকলের ঠাকুরাণী হইয়া থাকিবে।

‘তোমার শয়নগৃহ সাজাইবার জন্য, তোমার প্রসাধনের জন্য অনেক দাসী থাকিবে, তারা তোমার পা ধোয়াইয়া দিবে, তুমি স্বর্ণপালঙ্কে বসিয়া থাকিবে। কাঁচা সোণায় গড়িয়া তোমার কাণে কর্ণফুল দিব—তুমি নীলাম্বরী শাড়ী পরিবে। শীতকালে তোমার জন্য মসৃণ কোমল তুলা-ভরা লেপ থাকিবে, তাহাতে যদি তোমার শীত না ভাঞ্জে তবে আমার বুকের উপর তুমি থাকিবে। আমি নিজ হাতে পানের খিলি বানাইয়া তোমার মুখে দিব, গ্রীষ্মের রাত্রিতে আমরা জোড়-মন্দির ঘরে থাকিব, পদ্মের গন্ধ লইয়া শীতল বাতাস সেই ঘুরে আসিবে, আমার বুকে তুমি সুখে নিদ্রা যাইবে।

‘আর যখন আমি বাণিজ্যে যাইব, তোমাকে লইয়া আমি দেশ দেশান্তর দেখাইব, কত রাজ্য, কত নদনদী, পাহাড়প্রান্তর, রাজার রাজধানী আমরা দেখিয়া বেড়াইব। হীরামণি দিয়া আমি তোমার গলার হার তৈরী করিয়া দিব। সোণা ও মোতি দিয়া তোমার “কামরাজ্ঞা শাখা” গড়াইব। তোমার বেণী বাঁধিবার জন্য হীরামণি-জড়িত কত সুন্দর সোণার সূতা থাকিবে, এবং উদয়তারা, নীলাম্বরী, মেঘডুম্বর এবং অগ্নিপাটের শাড়ীতে তোমার রূপ আরও উজ্জ্বল হইবে, এই শাড়ীগুলির এক-এক খানির মূল্য লক্ষ টাকা।

‘বাড়ীর কাছে শাণে বাঁধা চারি কোণা পুষ্কর্ণী।  
সেই ঘাটেতে তোমার সঙ্গে সঁতার দিব আমি॥  
অন্দর মহলে আমার ফুলের বাগান।  
দুইজনে তুলিব ফুল সকাল বিহান॥  
চন্দ্রহার পরাইয়া নাকে দিব নথ।  
নৃপুরে সোণার বুনবুনি বাজবে শত শত॥’

কিছু না বলিয়া মহুয়া তখন সদাগরের জন্য পানের খিলি বানাইতে লাগিল, তাহার সুন্দর ও গম্ভীর মুখে প্রাতঃসূর্যের আলো পড়িয়া তাহা আরক্ত করিয়া দিল। সাধু সেই মুখ দেখিয়া এবং মহুয়ার তাহার জন্য কর্মতৎপরতা দেখিয়া হাতে স্বর্ণ পাইল। এদিকে বেদেদের অভ্যাসমত মহুয়ার মাথার চুলে তক্ষকের বিষ বাঁধা ছিল, চূণ ও খয়েরের সঙ্গে মহুয়া গোপনে সেই বিষ মিশাইল। মহুয়ার মুখে আর গাম্ভীর্যের কোন চিহ্ন নাই, সে সদাগরের সঙ্গে হাসিয়া কৌতুক করিতে লাগিল এবং নিজ হাতের সাজা পানের খিলি আদর করিয়া সাধুর মুখে দিল, সাধু কৃতার্থ হইল।

‘তুমি আমাকে পান খাইতে দিলে, একটা নেশার আমেজ আসিয়াছে, তোমার কাছে আমি শূইয়া একটু ঘুমাইব।’

মহুয়া মাঝিমাল্লাদের সকলের হাতে একটী করিয়া খিলি দিল। সেই খিলি খাওয়ামাত্র তাহারা নৌকার পাটাতনের উপর ঢলিয়া পড়িল। মহুয়া এই বিষের ক্রিয়া দেখিয়া ডাইনীর মত হাসিতে লাগিল এবং কালবিলম্ব না করিয়া তাহার সঙ্গে যে ছুরিটা ছিল, তাহা দিয়া ডিঙ্গার কাছি কাটিয়া ফেলিল।

‘অচৈতন্য হইয়া সাধু পড়িয়াছে নায়।  
কুড়ুল মারিল কন্যা ডিঙ্কার তলায়॥  
ঝাপ দিয়া পড়ে কন্যা জলের উপর।  
ভরা সহ সাধুর ডিঙ্কা ডুবি হৈল তল॥’

এই সমস্ত ব্যাপার এরূপ সাংঘাতিক দ্রুততার সহিত সম্পাদিত হইল যে উহা কোন ঐন্দ্রজালিক ঘটনার ন্যায় প্রতীয়মান হইল।

নদীর পরপারে বন, মহুয়া নদের চাঁদকে ঝুঁজিয়া বেড়াইতেছে।

‘এই গভীর জঙ্গলের কোন্ খনিতে মণি লুকাইয়া আছে—কোন্ বনে ফুল ফুটিয়াছে—যাহার ঘ্রাণে আমার প্রাণ মত্ত হইয়া আছে? আমাকে সেই ফুলের সম্প্রদান কে দিবে? সেই মণির খনির কথা কে বলিয়া দিবে? হে পাখীসকল! তোমরা ঝাঁকে ঝাঁকে আকাশে উড়িতেছ, আমার বঁধু ভাসিতে ভাসিতে কোথায় গিয়াছেন, আমাকে বলিয়া দাও, আমি জন্মদুঃখিনী! হে বাঘ—ভালুক! আমি নিজের দেহ দিয়া তোমাদের ক্ষুধা মিটাইব, কিন্তু আগে আমার বন্ধুর সম্প্রদান আমাকে বলিয়া দাও। হে জলের হাজার—কুম্ভীর! তোমরা আমার বিদেশী বন্ধুর কথা বলিয়া আমার কর্ণ তৃপ্ত কর—

‘ডালেতে বসিয়া আছ ময়ূর—ময়ূরী।  
তোমরা কি জান সে কথা, কহ সত্য করি॥  
দরিয়ায় গলিয়া পড়ে আমার হীরার হার,  
কে কহিবে কোন্ অতলে সে হার আমার॥’

ঘুরিতে ঘুরিতে মহুয়া ক্রান্ত হইল, তাহার ক্ষুধা নাই, তৃষ্ণা নাই, শরীরে সুখদুঃখ—বোধ নাই। বহু বন্য বাঘ হাঁ করিয়া আসিতেছে, কিন্তু মহুয়াকে দেখিয়া অন্য পথে চলিয়া যায়। অভাগীকে কে খাইবে? বড় বড় অজগর সর্প হরিণ ধরিয়া খায়, মহুয়াকে দেখিয়া দূরে চলিয়া যায়।

‘আমাকে নদী তার শীতল জলে স্থান দিল না, জমিনের পশু ও হিংস্র জীব ক্ষুধার তাড়নায় দিনরাত পাগল হইয়া ঘোরে—তাহারাও হতভাগিনীকে নিল না।’

‘আমার বঁধুকে আর পাইব না, এই কথা ভাবিতে আমার বুক ফাটিয়া যায়। এত বড় রাজ্যপাট তিনি আমার জন্য সমস্ত তৃণের মত ছাড়িয়া আসিলেন। এত বড় রাজপ্রাসাদ ছাড়িয়া নদীর কূলে হিজল গাছের মূলে আশ্রয় লইলেন। দুষমন সদাগর সেই আমার প্রাণবঁধুকে জলে ডুবাইয়া মারিয়া ফেলিয়াছে!’

‘তিনি আমার জন্য প্রাণ দিলেন, আমি কি জন্য আর বাঁচিয়া থাকিব?’

‘এই না নদীর জলে ডুবিয়া মরিব।  
বৃক্ষডালে ফাঁসি দিয়া পরাণ তাজ্জিব॥’

## পুনর্মিলন ও সন্ন্যাসীর হাতে বিপদ

‘কিন্তু আমি এখনও সমস্ত চেষ্টা নিঃশেষ করি নাই। কি জানি যদি তিনি এখনও বাঁচিয়া থাকেন, ভাল হইয়া আমাকে না পাইয়া প্রাণ দিবেন, আমি বনে বনে, নদীর কূলে পুনরায় খুঁজিব। যখন সমস্ত সম্ভান বিফল হইবে, তখনও মরণের পথ খোলা থাকিবে।’

আবার মনুয়া গভীর জঙ্গলের ঘোর বনস্পতিগণের লতায় জড়ানো গূঢ় দেশে প্রবেশ করিল, ভাঙ্গা মন্দির হইতেও কি ক্ষীণ কাতর ধ্বনি উঠিতেছে।

রাত্রি হইয়া আসিয়াছে, সর্পসঙ্কুল সেই ভাঙ্গা ইটের স্তূপে মনুয়া প্রবেশ করিল, কতকগুলি পাতা-লতার মধ্যে কঙ্কালসার একটা মনুষ্যের দেহ দেখিয়া সে চমৎকৃত হইল।

‘শুকাইয়া গেছে মাংস পড়ে আছে হাড়।

মন্দিরের মাঝে দেখে কন্যা মড়ার আকার॥

চিনিতে না পারে কন্যা সুন্দর বয়ান।

লক্ষিয়া দেখিল কন্যা ঠাকুর নদের চাঁদ॥’

এই কি সেই দেববাহিত, রূপবান তরুণ রাজকুমার, কিন্তু প্রেমের চক্ষু তাহার রক্ত আবিষ্কার করিতে পারে—আবর্জনা ও ধূলিবালি তাহার দৃষ্টি লোপ করিতে পারে না ; মনুয়া ভাবিল, ‘এখন যখন তোমায় একবার পাইয়াছি তখন যেমন করিয়া হউক তোমায় বাঁচাইব, নতুবা দুই জনেরই গতি এক হইবে।’

তখন সেখানে একটি সন্ন্যাসী উপস্থিত হইল। সন্ন্যাসীর মস্তকে জটা বাঁধা, গৌফ ও শাশুবহুল মুখ শীর্ণ ও শুম্ভ চুলের বর্ণ কটা-পিঞ্জল, সে মনুয়াকে জিজ্ঞাসা করিল—

‘কে গো তুমি এই রাত্রিকালে হিংস্রজন্তুসঙ্কুল এই ঘোর অরণ্যে আসিয়াছ? তোমাকে রাজকন্যা বলিয়া মনে হইতেছে, তরুণ বয়সে তুমি কি পাপ করিয়াছিলে যাহাতে তোমার নির্মম মাতাপিতা তোমাকে বনবাস দিয়াছেন? তাঁহাদের হৃদয় নিশ্চয়ই পাষণে গড়া, তোমার মত রূপসী কন্যাকে এই ঘোর বনে পাঠাইয়া দিয়া তাঁহারা কেমন করিয়া বাঁচিয়া আছেন?’

মনুয়া তাঁহার পা ধরিয়া কাঁদিতে লাগিল। আদ্যন্ত সমস্ত কথা তাঁহাকে বলিবার সময় তাহার দুইটা চক্ষের জল পড়িয়া সন্ন্যাসীর পদদ্বয় ভিজাইল, সন্ন্যাসী তাঁহার লম্বা দাড়ি ও গৌপ ও দীর্ঘজটা লইয়া বিব্রত হইয়া পড়িল। সেই মূতপ্রায় রোগীকে পরীক্ষা করিয়া সে বলিল—

‘দারুণ অকাল্য জ্বর হাড়ে লাগি আছে।

পরাণে বাঁচিয়া আছে মইরা নাহি গেছে॥’

‘আমি যাহা বলি তাহা কর তোমার স্বামী বাঁচিয়া উঠিবে। ঐ যে গাছটা দেখা যাইতেছে, নিশ্বাস বন্ধ করিয়া নদীর জলে তাহার পাতা ভিজাইয়া লইয়া আইস, ঐ পাতার রস মন্ত্রপূত করিয়া খাওয়াইয়া দিলে এই রোগী ভাল হইবে।’

মহুয়া সমস্ত প্রাণমন দিয়া শূশ্রূষা করিতে লাগিল ও রীতিমত দিনে তিনবার ঔষধ দিতে লাগিল। নদের ঠাকুর চক্ষু মেলিয়া চাহিলেন, আরও দুই এক দিন পরে তিনি উঠিয়া বসিতে পারিলেন এবং মহুয়ার কাছে ভাত খাইতে চাহিলেন।

রাজকুমারের কথা শুনিয়া মহুয়া কাঁদিতে লাগিল। এদিক সন্ন্যাসীর আদেশে মহুয়া রোজই তাহার পূজার জন্য সাজি ভরিয়া ফুল আনিতে যায়, কিন্তু যেদিন নদের চাঁদ ভাত চাহিলেন, সে দিনটা মহুয়া কাঁদিয়া কাটাইল, সেদিন আর সে ফুল তুলিতে গেল না।

‘কোথায় পাইব ভাত এই গহিন বনে।

ফুল নাহি তোলে কন্যা থাকে অন্যমনে॥’

এদিকে সন্ন্যাসীর সৎযমের বাঁধ টুটিয়া গিয়াছে, সে মহুয়ার রূপযৌবন দেখিয়া ভুলিয়া গিয়াছে। সে যতই চেষ্টা করে, কিছুতেই মনকে প্রবোধ দিতে পারে না। টাটকা ফুলে সাজি ভর্তি, তবুও মধ্যরাত্রে আসিয়া সে দরজায় আঘাত করিয়া মহুয়াকে জাগায়। একদিন গভীর রাত্রে সে মহুয়াকে ডাকিয়া ঘুম হইতে উঠাইল এবং বলিল ‘আজ পূর্ণিমা, শনিবার, চল, গভীর জঙ্গল হইতে তোমার স্বামীর ঔষধ কুড়াইয়া লইয়া আসি!’

#### গভীর বনপথে স্বীয় অতিথায় প্রকাশ

সেই রাত্রে গভীর বনপথে নদীর তীরে যাইতে যাইতে সন্ন্যাসী বলিল, ‘কুমারী, আমি তোমার রূপের মোহে পাগল হইয়াছি, তুমি আমাকে তোমার যৌবন দান করিয়া সুখী কর। আমি তোমার পদাশ্রিত, আমার কি অপরাধ, স্রষ্টা কেন তোমাকে এত রূপের রূপসী করিয়া গড়িয়াছিলেন?’

স্বামীর সেই অবস্থায় মহুয়ার মন ভাঙিয়া গিয়াছে, সে পাগলের মত হইয়া গিয়াছে। সন্ন্যাসীর কথা শুনিয়া তাহার মস্তকে যেন কেহ ঝাঁড়ার আঘাত করিল। কিন্তু সে ভয় বা আশঙ্কার কোন কথা বলিল না, অতিশয় সংযত ভাষায় ধীর কণ্ঠে বলিল, ‘আমার স্বামীকে আগে বাঁচাইয়া দাও, তারপরে আমি সত্য করিতেছি, তোমার ইচ্ছা পূর্ণ করিব।’

কিন্তু তাহার কথায় সন্ন্যাসীর যে প্রত্যয় হয় নাই তাহার বিবর্ণ মুখ দেখিয়া তাহা বুঝা গেল। সন্ন্যাসী এবার তাহার খোলস ছাড়িয়া স্পষ্ট কথায় বলিল, ‘আমি তোমাকে স্পষ্ট কথায় জানাইতেছি তোমাকে দুই দিন সময় দিলাম, তুমি এই সময়ের মধ্যে বিষ খাওয়াইয়া তোমার স্বামীকে মারিয়া ফেল।’

এই কথা শুনিয়া শিরুপায় অবস্থায় মহুয়া ঘরে ফিরিয়া আসিল। নদের চাঁদের সজ্ঞা পরামর্শ করিল। রাজকুমার কি বলিবেন? তাহার উঠিয়া বসিবার সাধ্য নাই। দান্বণ জুরে তিনি একেবারে শক্তিহীন হইয়া গিয়াছেন, দাঁড়াইবার বল নাই, দুই পা চলিলে হাঁটুতে হাঁটুতে লাগে।

## দু দিনের জন্য সুখের সংসার

মহুয়া সেইদিন ঘোর রাত্রে তাঁহাকে কাঁধে তুলিয়া লইল, পার্বত্য পথে স্বামীর দেহ কাঁধে করিয়া দেবাদিদেব শিবের মত চলিতে লাগিল—

‘নিশিকালে যায় কন্যা ফিরে ফিরে চায়।  
দারুণ সন্ধ্যাসী যদি পাছে নাগাল পায়॥’

সেই পার্বত্য প্রদেশের হাওয়ায় নদের চাঁদের স্বাস্থ্যের উন্নতি হইল। আর ছয় মাসের মধ্যে তিনি সুস্থ ও সবল হইয়া উঠিলেন। মহুয়া পর্যাপ্ত আনন্দে সুস্বাদু বনের ফল ও ঝরণার জল লইয়া আসে, তাহাতে নদের চাঁদ তৃপ্তি লাভ করেন।

‘ঝরণার জল আনে কন্যা, আনে বনের ফল।  
তা খাইয়া নদের চাঁদের গায়ে হল বলা॥’

এইভাবে অনেক দিন সেই দম্পতি বনে বনে কাটাইয়া দিল, তাঁহাদের ঘর—বাড়ী নাই, যেখানে সেখানে রাত্রিযাপন করা হয়। যেখানে পূর্ব—রাত্রি যাপন করা হইয়াছিল, বনের পক্ষীর মত ফিরিয়া আবার সেই বনের কুলায়ে উপস্থিত হয়।

একটা জায়গা দেখিয়া নদের চাঁদের ভারী পছন্দ হইল, তাঁহারা সাতরাইয়া নদীর অপর পারে গেলেন,

‘সামনে পাহাড়িয়া নদী সাতার দিয়া যায়।  
বনের কোয়েলা তথা ডালে বসি গায়॥  
এইখানে বাঁধ কন্যা নিজ বাসা ঘর।  
এইখানে থাকিব মোরা দৌহে নিরন্তর॥  
সামনে সুন্দর নদী ঢেউয়ে খেলায় পানি।  
এইখানে রহিব মোরা দিবস রজনী॥  
চৌদিকেতে রাস্তা ফুল ডালে পাকা ফল।  
এইখানেতে আছে কন্যা মিঠা ঝরণার জল॥’

এইখানে দম্পতি কয়েক দিন ঘর করিল। তাহাদের সে সুখ স্বর্গ হইতে যেন দেবতারাও ঈর্ষা করিতে লাগিলেন।

একদিন মাছ খাইতে যাওয়া নদের ঠাকুরের গলায় মাছের কাঁটা বিধিল। বেদের মেয়ে অস্থির হইয়া দেবীকে কালো ও ধবল পাঁঠা মানত করিল। আর একদিন নদের চাঁদের জ্বর হইয়া মাথার বেদনা হইল, মহুয়া সারারাত্রি শিয়রে বসিয়া তাহার স্বামীর মাথায় কোমল হাত বুলাইতে লাগিল। কোণাকুনি পথ ধরিয়া নদের চাঁদ হাটের পথে যান, মহুয়া তাঁহার কণ্ঠলগ্ন হইয়া কাণাকাণি বলিয়া দেয়—‘আমার জন্য কিন্তু নথ আনা চাই, দেখ ভুলো না।’ দুইজনে বনের ফল পাড়িয়া ও কুড়াইয়া আনে, দুইজনে



আনন্দ করিয়া খায়। আলির পদচিহ্নযুক্ত একটা মালাম পাথর সেই নিভৃত জঙ্গলে পড়িয়াছিল, তাহারা তাহাতে শুষিয়া গল্প করিতে করিতে ঘুমাইয়া পড়ে। প্রভাতে উঠিয়া তাহারা দুইজনে বনের বহুদূরে ভ্রমণ করিয়া আসে, আসিবার সময় বনের নানাপ্রকার সুস্বাদু ফল পাড়িয়া লইয়া আসে—

‘বাপ ভুলে মায় ভুলে, ভুলে ঘরবাড়ী।  
দেশ ভুলে বন্ধু ভুলে স্বজন পেয়ারী॥  
মনের সুখে দুইজনে কাটে দিনরাত।  
শিরেতে পড়িল বাজ পুন অকস্মাৎ॥’

### বজ্রাঘাত

একদিন সম্প্রাবেলা সেই পার্বত্য দেশে রক্তবর্ণ ফুলের মধ্যে অস্তগামী সূর্যের রক্তিম আভা খেলিতেছিল, ক্রমশ সূর্য আর দেখা যায় না, পশ্চিম আকাশের লাল রং মিলাইয়া গেল এবং ঘনীভূত মেঘ দিগদিগন্ত ছাইয়া ফেলিল। বন-দম্পতি দুইজনে বহুদূর পর্যটন করিয়া আসিয়াছিল, পরস্পরের সঙ্গ লাভ করিয়া তাহাদের পথ-শান্তি বোধ হয় নাই। আনন্দের হিল্লোলে যেন দীঘির জলে দুটা নব-নলিনী ভাসিয়া বেড়াইয়াছে।

সেদিন মালাম পাথরে বসিয়া দুইজনে আলাপ করিতেছিল। নদের চাঁদ বলিলেন—‘আমার একটা কৌতূহল আছে, তাহা তুমি মিটাও নাই। তুমি কাহার কন্যা, কিরূপে দস্যুদের হাতে পড়িলে এবং অতীত জীবন কিভাবে কাটাইয়াছ, কতবার এই প্রশ্ন জিজ্ঞাসা করিয়াছি, প্রতিবারেই তুমি আমার কথার উত্তর এড়াইয়া গিয়াছ, তোমার চক্ষু অশুভারাক্রান্ত হইয়াছে; তোমার মনের বেদনা বুঝিয়া আমি পীড়াপীড়ি করি নাই, আজ সেই কথা আমাকে বল! তুমি সেদিন বলিয়াছ, যখন ছয় মাসের তুমি শিশু, তখন হোমরা তোমাকে চুরি করিয়া লইয়া আসিয়াছে, ইহার অধিক কিছু বল নাই, কেবল দরবিগলিত অশ্রুতে তোমার মুখ ভাসিয়া গিয়াছে, আজ একটীবার বল, এইখানে বসিয়া তোমার অতীত ইতিহাস শুনিব।’

অদূরে নদী বহিয়া যাইতেছিল এবং মেঘগর্জনের সঙ্গে সঙ্গে নদীতরঙ্গের ক্ষুণ্ণ গর্জন শোনা যাইতেছিল। এমন সময় আকাশ-বাতাস প্রকম্পিত করিয়া কাহার বাঁশী বাজিয়া উঠিল।

সেই সুর শুনিয়া মহুয়া থরথরি কাঁপিতে লাগিল এবং নদের চাঁদের ক্রোড়ে ঢলিয়া পড়িল। ‘তোমাকে কি কোন সর্পে দংশন করিয়াছে?’ অতি ব্যস্তসমস্তভাবে রাজকুমার তাহার দেহ পরীক্ষা করিতে লাগিলেন।

মহুয়া অতিকষ্টে আত্মসংবরণ করিয়া আস্তে আস্তে বলিল, ‘আমাকে সাপে কামড়ায় নাই কিন্তু আমাদের সুখনিশি প্রভাত হইয়া আসিতেছে, কুমার, কাল যদি বাঁচিয়া থাকি, তবে আমি তোমাকে আমার অতীত ইতিহাস শুনাইব। কিন্তু আমাদের দিন শেষ হইয়া আসিয়াছে। ঐ যে বাঁশীর সুর শুনিতে পাইলে, উহা আমার সেই

পালঙ্কের সজ্জেকত-বাঁশীর সুর। বেদেরা বহু চেষ্ঠায় আমাদের সম্মান জানিতে পারিয়াছে, দলবল লইয়া আমার ধর্মপিতা হোমরা আসিতেছে। সেইয়ের সাবধানতাজ্ঞাপন সজ্জেকতে আমি কি করিব? এখান হইতে পলাইবার আর উপায় নাই। আজ রাত্রি তোমার বৃকে মাথা রাখিয়া শুইয়া থাকিব। আমার এমন আরামের স্থান স্বর্গেও মিলিবে না। কি করিব? বিধাতা আমাকে স্বর্গসুখ হইতে বঞ্চিত করিলেন!’

নদের চাঁদের গায়ে হেলিয়া মছুয়া কুটীরে প্রবেশ করিল, শাদা ও রক্ত সুগন্ধি ফুল বাসরশয্যার এক কোণে সাজি ভরিয়া মছুয়া রাখিয়া দিয়াছিল, আজ আর সেই সুখের বাসর সাজাইতে তাহার সামর্থ্যে কুলাইল না। সে প্রাণপতিকে নিবিড়ভাবে জড়াইয়া ধরিয়া মৃত্যুর অপেক্ষা করিয়া রহিল।

রাত্রি প্রভাত হইলে তাহারা কুটীর ছাড়িয়া বাহিরে পা দেওয়ামাত্র দেখিতে পাইল, বেদেরের কুকুর কুটীরখানি বেঁটন করিয়া আছে, সম্মুখে হোমরা বেদে ও তাহার দলবল। হোমরার হাতে বিষাক্ত ছুরি, বিদ্যুতের মত চমকাইতেছে। হোমরা ছুরিখানি মছুয়ার হাতে দিয়া বলিল, ‘তুমি এই মুহূর্তে আমার দূশমনের বৃকে এই ছুরি বিধাইয়া দাও, এবং আমার সঙ্গে চলিয়া আইস। ছোটকাল হইতে আমি তোমাকে কত যত্নে পালন করিয়াছি এবং এই সৃজন বেদকে আমাদের সমস্ত খেলা কৌতুক শিখাইয়াছি। এই সুগঠিতদেহ প্রিয়দর্শনমূর্তি’ সৃজন তোমার অনুরক্ত, ইহাকে আমি আমার জামাতারূপে গ্রহণ করিয়াছি। তুমি ইহাকে গ্রহণ করিয়া বৃন্দ বয়সে আমার মনে একটু সান্ত্বনা দান কর, এবং তোমার জন্য এত যে করিলাম, তাহার এই প্রতিদান দিয়া আমাকে সুখী কর এবং তুমি নিজেও সুখী হও।’

মছুয়ার মুখ এবার ফুটিল, সে এ পর্যন্ত হোমরার কোন আদেশ লঙ্ঘন করে নাই, তাহার কোন কথায় প্রতিবাদ করে নাই। আজ হোমরার চেহারা সিন্দূরের আভাযুক্ত কালো মেঘের মত, তাহার কালো বর্ণের উপর ক্রোধের লালিমা দেখা যািতেছে, চোখ দুটি অগ্নিস্ফুলিঙ্গের মত জ্বলিতেছে, এই কালবৈশাখী মেঘকে দেখিলে শত্রুর মুখ শূকাইয়া যায়। মছুয়া কিন্তু এবার ভয় পাইল না, সে ধীরকণ্ঠে কবুণ স্বরে বলিল ‘বাবা, তুমি কোন্ ব্রাহ্মণের আশ্রয় হইতে, কোন্ জননীর মর্মান্তিক আর্তনাদ উপেক্ষা করিয়া আমাকে তুলিয়া আনিয়াছিলে, তাহা আমি জানি না, আমি জন্মে মা-বাপ কি বস্তু তাহা দেখিতে পাই নাই।

‘শুন শুন ধর্মপিতা বলি যে তোমায়।

কার বৃকের ধন তোমরা আনিছিল। হায়॥

ছোটকালে মা বাপের কোল শূন্য করি।

কার কোলের ধন তোমরা করেছিল। ছুরি॥

জন্মিয়া না দেখিলাম কতু বাপ-মায়।

কর্মদোষে এত দিনে প্রাণ মোর যায়॥’

পালঙ্ক সখীর দিকে চাহিয়া মছুয়া বলিল, ‘এই বেদেরের মধ্যে তুমিই আমার মনের বেদনা বৃদ্ধিতে পারিবে।’ এই বলিয়া রাজকুমারকে বলিল, ‘তোমায় পাদপদ্মে অসংখ্য প্রণাম, জন্মের মত তোমার মছুয়াকে বিদায় দেও। মছুয়ার জন্য অনেক

সহিয়াছ, এবার তোমার আমার দুঃখের শেষ’—বলিতে যাইয়া চোখে জল আসিতে উদ্যত হইল। কিন্তু মহুয়া সে উদ্যত অশ্রু সম্বরণ করিল এবং হোমরাকে বলিল—

‘বাবা, আমি তোমার সুজন-খেলোয়াড়কে চাই না। তুমি কার সঙ্গে কার তুলনা করিতেছ? চন্দ্রকে পরাজয় করিয়া আমার স্বামীর কান্তি শোভা পাইতেছে, তাঁহার কাছে সুজন বাদিয়ার জোনাকির মত ক্ষীণ আলো। আমার স্বামীকে ছাড়িয়া আমি একদিনও বাঁচিতে চাই না, তিনিই আমার একমাত্র গতি।

‘সোণার তরুয়া বন্ধ একবার দেখ,  
আমার চক্ষু নিয়া তুমি একবার দেখ।’

কাল মেঘের মত হোমরা গর্জন করিয়া উঠিল, এবং নদের চাঁদকে হত্যা করিতে মহুয়াকে আদেশ করিল।

তখন ধীরে ধীরে মহুয়া সেই বিষাক্ত ছুরি নিজের বুকে বিঁধাইল এবং সেইখানে ঢলিয়া পড়িল। বেদের দল তখন নদের চাঁদের উপরে ঝাঁপাইয়া পড়িয়া তাঁহাকে খন্ড খন্ড করিয়া ফেলিল।

#### সমাধির দৃশ্য : পালঙ্ক সই

ইহার পরে আর একটি দৃশ্য। হোমরা বেদের চক্ষের জল মানিল না, কাল মেঘের বর্ষণ আরম্ভ হইল, সে নিজের দলকে ডাকিয়া বলিল—‘তোমরা দেশে চলিয়া যাও, মানকা তোমাদের দলপতি হইবে। আমি কি লইয়া দেশে যাইব? যাহাকে ছয় মাসের শিশুকাল হইতে বুকে করিয়া এত যত্নে পালন করিয়াছি, সেই বুকের ধন ফেলিয়া আমি কি লইয়া ঘরে যাইব? রাজকুমার মহুয়াকে ভালবাসিত, সে ভালবাসা কথার কথা নহে, মহুয়ার জন্য সে রাজ্য-ধন-জাতি-কুল সব ছাড়িয়া বনবাসী হইয়াছিল। এতটা জানিলে, উভয়ের এতটা প্রগাঢ় ভালবাসার কথা জানিলে, আমি বিরোধী হইতাম না, আমি ভাবিয়াছিলাম নদের চাঁদ চোরের মত আমার ঘরে হানা দিয়া মহুয়াকে লইয়া পলাইয়া আসিয়াছে।’

হোমরা মানকাকে কহিল—

‘হোমরা ডাক দিয়া বলে মানক্যা ওরে ভাই।  
দেশেতে ফিরিয়া আমার কোন কার্য নাই॥  
কবর কাটিয়া দেহ মহুয়াকে মাটি।  
বাড়ীঘর ছাইড়া ঠাকুর আইল কন্যার লাগি।  
দুইজনে পাগল ছিল দুইজনের লাগি॥  
হোমরার আদেশে তারা কবর কাটিল।  
একসঙ্গে দুইজনে মাটি চাপা দিলা॥

বিদায় হইল সব বাদিয়ার দল।  
যে যাহার স্থানে গেল শূন্য সেই স্থল॥

বেদেরা দেশে চলিয়া গেল, কোন অনির্দিষ্ট পথে অনুতপ্ত বেদের দলপতি  
শোকভারাক্রান্ত চিন্তে ঘোর অরণ্যের দিকে চলিয়া গেল।  
কেবল রহিল সেখানে পালঙ্ক সই। সে ছিল মহুয়ার সুখদুঃখের সাথী।

‘রহিল পালঙ্ক সই সুখদুঃখের সাথী।  
কাঁদিয়া পোহায় কন্যা যায় রে দিনরাতি॥  
অঞ্চল ভরিয়া কন্যা বনের ফুল আনে।  
মনের গান গায় কন্যা বইসা মনে মনে॥  
চক্ষের জলেতে ভিজায় কবরের মাটি।  
শোকেতে পাগল হইয়া করে কাঁদাকাটি॥’

সে কাঁদিয়া গান করে, ‘উঠ সই, আবার তোমরা প্রেমের খেলা খেল, সেই দৃশ্য  
দেখিয়া আমার চক্ষু ভূত হউক। দূরন্ত বেদের দল চিরদিনের জন্য চলিয়া গিয়াছে,  
তাহারা আসিবে না। আমি চিকনিয়া ফুলে তোমাদের জন্য মালা গাঁথিয়া দিব।  
আমরা দুই সই কাড়াকাড়ি করিয়া ফুলের মালা গাঁথিব এবং “দুই জনে সাজাইব ঐ  
না নাগর কালা”—

‘পালঙ্ক সইয়ের চক্ষের জলে ভিজে বসুমাতা।  
এইখানে হল সাজা নদের চাঁদের কথা॥’

### আলোচনা

আমি যখন এম.এ. ক্লাসের ছাত্রদিগকে পড়াইতাম তখন প্রতি বৎসর নবাগত  
ছাত্রদিগকে এই একটি প্রশ্ন করিতাম—‘নদের চাঁদ ও মহুয়া—উভয়ে উভয়ের প্রতি  
অনুরক্ত ছিল, ইহাদের মধ্যে তোমরা কাহাকে উচ্চস্থান দিতে চাও, প্রেমের ত্যাগ  
হিসাবে কাহাকে বড় বলিবে?’

অধিকাংশ ছাত্রের এক উত্তর, নদের চাঁদ শ্রেষ্ঠ, বেদের মেয়ের ত্যাগ তো কিছুই  
নহে। এত রূপ এত গুণ, এত ঐশ্বর্য, এত বড় বামুনের কুল—সে সমস্তই তো  
বিসর্জন দিয়াছিল নদের চাঁদ এই বেদের মেয়ের জন্য। মহুয়া আর তেমন কি  
করিয়াছে? এত বড়, সর্ব গুণে শ্রেষ্ঠ, তরুণবয়স্ক প্রণয়ীকে পাইয়া তো সে কৃতকৃতার্থ  
হইয়া গিয়াছে, তাহার ত্যাগ তো তুলনায় কিছুই নহে। যখন হোমরা বামুন রাজার  
নগর হইতে তাহাকে লইয়া পার্বত্য প্রদেশে তাহার বাড়ীতে লইয়া গেল, তখন সে  
প্রতিবাদ না করিয়া বাপের সঙ্গে সঙ্গে চলিল। এদিকে রাজকুমার তাহার রাজ্যপাট

ছাড়িয়া বনে জঙ্গলে উপবাসী থাকিয়া গাছের তলায় শুইয়া থাকিত, তাহার চোখে ঘুম ছিল না, মাথার কৃষ্ণ চাঁচর কেশ জটাবস্থ হইয়া গিয়াছিল। যিনি স্বর্ণপালঙ্কে দূগ্ধফেননিত শয্যায় শুইতেন, পাচকেরা রাত্রিদিন যাহার জন্য সুখাদ্য প্রস্তুত করিতে ব্যস্ত থাকিত, যাহার সেবার জন্য দাসদাসী চাকর-নকরের অভাব ছিল না, একটু শিরঃপীড়া হইলে চিকিৎসকের মেলা বসিয়া যাইত, সেই রাজকুমার নদের চাঁদ বেদের মেয়ের জন্য যাহা সহিয়াছিলেন তাহার তুলনা নাই। ঘুরিয়া ফিরিয়া নদের চাঁদের মহিমাকীর্তনই অনেক ছাত্র করিতেন।

কিন্তু দুই-একটি ছাত্র মহুয়ার শ্রেষ্ঠত্ব প্রতিপাদনে চেষ্টিত ছিলেন। তাঁহারা বলিতেন—

যাহার যাহা আছে সে তাহা ত্যাগ করিলে যথেষ্ট ত্যাগ হয়, ফকির কখনও রাজ্য ত্যাগ করিতে পারে না, সে যদি তাহার ভিক্ষার ঝুলিটা ত্যাগ করে, তবেই বুঝিতে হইবে, তাহার সর্বাপেক্ষা বড় ত্যাগ করিয়াছে। সুতরাং মহুয়া যদি রাজপদ ত্যাগ না করে, তবে তাহাকে ছোট বলা যায় না। এখন দেখিতে হইবে, তাহার যাহা কিছু তাহার সমস্তখানি তাহার প্রেমাস্পদের পায়ে সে দিতে পারিয়াছিল কি না। রাজপুত্র বনে যাইয়া মহুয়ার জন্য ছয়মাসকাল অকথ্য কষ্ট স্বীকার করিয়াছিলেন, কিন্তু এই ছয়মাস মহুয়া কি করিয়াছে তাহা দেখিতে হইবে।

এই ছয়মাস মহুয়া আঁচল পাতিয়া ভূমিশয্যায় শুইয়াছে, সারারাত্রি সে একদণ্ড ঘুমায় নাই। মাথার বাথা ছুতো করিয়া সে একদিনও রান্নাবাড়া করে নাই, হয়ত বন্য কোন কষায় ফল খাইয়া জীবন ধারণ করিয়াছে। সে তাহাদের দলের লোকের সঙ্গে খেলা দেখাইতে যায় নাই, কোন কৌতুক করে নাই, নীরবে কাঁদিয়াছে এবং মৃতের মত ঘরের এক কোণে পড়িয়া ছিল, যেদিন নদের ঠাকুর আসিলেন সেদিন অকস্মাৎ সে সজীব ও সক্রিয় হইয়া দাঁড়াইল। সজ্জীরা দেখিয়া বিস্মিত হইল—

‘ছয় মাসের মড়া যেন সামনে হৈল খাড়া।’

তাহারা মহুয়ার আকস্মিক কর্মঠতার পরিচয় পাইয়া আশ্চর্য হইয়া গেল।

সুতরাং নদের চাঁদ ছয়মাস বনেজঙ্গলে ঘুরিয়া যে কষ্ট সহিয়াছেন, মহুয়া সেই বন্যদেশের নিভৃত কুঁড়ে ঘরে পড়িয়া তাঁহার জন্য কম কষ্ট সহে নাই।

নদের চাঁদ প্রেমের স্রোতে ভাসিয়া গিয়াছিলেন, বড়মানুষের ছেলে আদরে লালিত। তাঁহার আবদারের অন্ত নাই। যখন তাঁহার ভালবাসা জন্মিল, তখনই সমস্ত প্রাণমন ঢালিয়া দিলেন। সেই যে দড়ির উপর কলসী লইয়া নৃত্যের সময় তিনি বলিয়া উঠিয়াছিলেন, ‘পড়্যা বুঝি মরে’, প্রথম পরিচয়ে এই দৃষ্টিস্তা তাঁহার হৃদয়ের অগ্রদূত। মহুয়াকেও প্রথম হইতেই আকৃষ্ট হইতে দেখিতে পাই। তিনি খেলা সাজা করিয়া অনেক কিছু পুরস্কার চাহিলেন, কিন্তু মনে মনে বলিলেন—‘নদের ঠাকুরের মন যেন গো পাই’। উভয়েই উভয়ের প্রতি প্রথম দর্শন হইতে আকৃষ্ট হইয়াছিলেন। নদের চাঁদের কোন সংযম ছিল না, তিনি প্রেমের মহামুগ্ধিতে নিজেকে সম্পূর্ণরূপে ছাড়িয়া দিয়া ভাসমান একটা তৃণের মত অদৃষ্টের পথে চলিয়াছিলেন। এই গতি কোথায় থামিবে, কিম্বা কোন লক্ষ্যে তাঁহাকে পৌছাইবে এ-সকল তাঁহার মনে

উদয়ই হয় নাই। তিনি প্রেমদেবতার হাতের একটা পুতুলের মত হইয়া গিয়াছিলেন, তাঁহার নিজের কোন শক্তা ছিল না, তিনি একেবারে আত্মহারা হইয়া গিয়াছিলেন। প্রেমধর্ম তাঁহাকে অপূর্ব সহ্যগুণ দিয়াছিল, ভালমন্দের বিচার, ন্যায়-অন্যায়ের বিচার, ভবিষ্যতের চিন্তা, নিজ সুখদুঃখের জ্ঞান, বিপদের আশঙ্কা—এ সমস্তই তাঁহার লুপ্ত হইয়াছিল। সুতরাং নদের চাঁদ যে প্রেমের আদর্শ হিসাবে কাহারও অপেক্ষা কোন বিষয়ে ন্যূন ছিলেন, তাহা বলা যায় না। প্রেমদেবতার পদে সর্বস্ব অর্ঘ্য দিয়া তিনি তাহার পূজারী হইয়াছিলেন। ইহার খুঁত ধরিবে কে? যে দেশেই যিনি প্রেমের বড় আদর্শ দেখাইয়াছেন, কেহই নদের চাঁদকে ডিজাইয়া যাইতে পারেন না।

কিন্তু মনুয়া প্রেমবৃষ্টির আদর্শে পৌছিয়াও আরও কতকগুলি গুণ দেখাইয়াছেন, যাহা সাহিত্য বা সমাজে আমরা সচরাচর দেখিতে পাই না। তিনি অসংযত অবাধ প্রেমের স্রোতে গা ঢালিয়া দিয়াও সংযম এবং ভাবী চিন্তার প্রবৃত্তি সজাগ রাখিয়াছিলেন। তাঁহার মত উদ্ভাবনী শক্তিও মেয়েদের মধ্যে দুর্লভ।

প্রথমত মনুয়া রাজকুমারের প্রেমকে খুব বিশ্বাসের চোখে দেখিতে পারেন নাই। তিনি ভাবিয়াছিলেন, বড়মানুষের দুলাল ছেলের এ একটা খেয়ালও হইতে পারে। তিনি নিজে মজিয়া কুলশীল বিসর্জন দিয়াছিলেন, কিন্তু তিনি নদের চাঁদকে মজাইতে প্রস্তুত হন নাই। তিনি যদি ইঞ্জিতে তাঁহাকে বুঝাইতেন, তাঁহার পিতার সঙ্গে তিনি যাইবেন না, তাহা হইলে হোমরা বেদের কি সাধ্য ছিল, মনুয়াকে লইয়া সে স্থান হইতে পলাইয়া যাইতে? কিন্তু তিনি বুঝিয়াছিলেন, তাঁহার এই সাহচর্য কুমারের পক্ষে শুভঙ্কর হইবে না; তাঁহার মাতা এবং স্বগণ কেহই এই প্রেমের প্রশ্রয় দিবেন না, হয়ত তিনি রাজ্যপদ, কুলশীল হারািয়া একেবারে নিঃস্ব হইবেন। তাহার পর বড়মানুষের খেয়াল; যেমন শতকরা ৯৯ জনের হয়, কতকদিন পরে যদি রাজকুমারের খেয়াল ছুটিয়া যায়, তবে তাঁহার কি গতি হইবে? তখন তিনি দেখিবেন, বেদের মেয়ের উপর তাঁহার আর অনুরাগ নাই, অথচ তাঁহার জন্য তিনি সম্পূর্ণরূপে রিক্ত হইয়া সর্বস্ব বঞ্চিত হইয়া পথে আসিয়া দাঁড়াইয়াছেন! তাঁহার এই অবস্থা মনুয়া কল্পনা করিতেও শঙ্কিত হইয়াছিলেন। প্রকৃত ভালবাসার ধর্ম এই যে, তাহা প্রণয়ীর ইচ্ছান্তিকে সর্বাপেক্ষা বড় করিয়া দেখে, এই প্রেরণায় মনুয়া নিজে সর্বস্ব বঞ্চিত হইয়াও রাজকুমারের যাহা ইচ্ছা তাহা নিজের সাময়িক সুখের প্রবৃত্তি অপেক্ষা বড় করিয়া দেখিয়াছিলেন এবং এই জন্য তাঁহার বিরহে মৃত্যুকে নিঃশব্দে বরণ করিয়া লইবার জন্য স্রীয বন্যাকুটিরে হোমরার সহিত প্রত্যাবর্তন করিয়াছিলেন। প্রণয়ীর এই ভবিষ্যৎ ইচ্ছা কামনা তাঁহার প্রেমের একটা অঙ্গ, আমরা ইহার পরে আরও পরিষ্কার করিয়া দেখাইব।

প্রতি বিপদের মুখে মনুয়া যে উদ্ভাবনী শক্তি দেখাইয়াছেন, তাহাও সচরাচর মেয়েদের মধ্যে দেখা যায় না, এজন্য কোন উপায়ই তাঁহার অগ্রাহ্য হয় নাই। কৌশলে হনন, নৌকার ভরাডুবি করিয়া ধনেপ্রাণে শত্রুর সর্বনাশ, এ সমস্ত উপায় হিসাবে তাঁহার গ্রহণীয় হইয়াছিল। সদাগরকে তিনি ভালবাসার ভাণ দেখাইয়াছিলেন, সন্ন্যাসীকেও তিনি মিথ্যা ভরসা দিয়াছিলেন, ‘আমার স্বামীকে বাঁচাইয়া দাও, আমি তোমার অভিলাষ পূর্ণ করিব।’ মোট কথা তাঁহার প্রাণের দেবতাকে লাভ করা ও তাঁহাকে রক্ষা করিবার জন্য যখন যে প্রয়োজন হইয়াছে তাহা তিনি করিয়াছেন।

তাহাতে মিথ্যা কথা, লোকহত্যা ও পরের সর্বস্ব লোপ—এসকল কোন কার্য হইতে তিনি বিরত হন নাই। এই রমণীর মত সর্ববিপদে নিজের সামর্থ্যের উপর নির্ভর করিয়া রজামঞ্চে অগ্রসর হইতে কে কোন নারীকে দেখিয়াছে?

যখন সন্ধ্যাসীর হাতে লাক্ষিত হইয়া স্বামীর প্রাণনাশের প্রচুর সম্ভাবনা তিনি দেখিলেন, তখন সম্পূর্ণরূপে অসহায় কঙ্কালসার উঠিতে বসিতে অশক্ত নদের চাঁদকে পৃষ্ঠের উপর ফেলিয়া শিকার লইয়া পলায়নপর বাঘিনীর মত তিনি পর্বতের শৃঙ্গে আরোহণ করিয়া পর্যটন করিতে লাগিলেন। বঙ্গানারীর এই অপূর্ব দৃশ্য আর কোথায় কে দেখিয়াছে? প্রাচীন সাহিত্যে বাঙ্গালী রমণী অনেকটা সীতার ছাঁচে ঢালা; তাঁহারা সহিতে, প্রাণত্যাগ করিতে, প্রেমের জন্য যথাসাধ্য আত্মসমর্পণ এমনকি প্রাণত্যাগ করিতে সর্বদা প্রস্তুত! কিন্তু এই পাহাড়িয়া রমণীর মত বিপদের সময় অলৌকিক উদ্ভাবনী শক্তি ও আশ্চর্য মৌলিকতা কে কবে দেখাইয়াছে? মহুয়া—চরিত্র জলে ভাসা পদ্মফুল নহে, বায়ুচালিত তৃণ নহে, প্রেমের স্রোতে নিমজ্জমান একখানি স্বর্ণ-ভিঙ্গা নহে, এই চরিত্রের আগাগোড়া মৌলিক রহস্যাবৃত। বঙ্গসাহিত্যে কেন, অন্য কোন সাহিত্যে ইহার জোড়া আছে বলিয়া আমরা জানি না। এজন্য অধ্যাপক স্টেলা ক্রামরিশ্ বলিয়াছেন, ‘ভারতীয় সাহিত্য আমি যতটা পড়িয়াছি তন্মধ্যে মহুয়ার মত আর একটি চিত্র আমি দেখি নাই’।

পূর্বেই বলিয়াছি, মহুয়ার মনে অনেক দিন পর্যন্ত সন্দেহ ছিল যে, নদের ঠাকুরের ভালবাসা গভীর হইলেও তাহার স্থায়িত্বে বিশ্বাস নাই; এই গভীর স্নেহ কিছুদিন পরে শুকাইয়া যাইতে পারে, উহা বড়মানুষের খেয়াল, খুব ধোঁয়ার সৃষ্টি করিয়া কতক দিনের মধ্যে উবিয়া যাইতে পারে। এই আশঙ্কায় তিনি প্রথম প্রথম ইহার বেশী প্রশ্নই দেন নাই, কুমার পাছে এই মোহে পড়িয়া সর্বস্বান্ত হন এবং শেষে গৃহে ফিরিবার পথ না পান।

কিন্তু যেদিন মহুয়া সত্য সত্য বুঝিলেন, নদের চাঁদের প্রেম ‘নিকষিত হেম’, ইহা বড়মানুষের ছেলের একটা চলন্ত খেয়াল নহে, সেদিন সম্পূর্ণভাবে তাঁহার কাছে সে ধরা দিল। সেই চাঁদের জ্যোৎস্নায় অস্ত্রে বেষ্টিত আধ-আলো আধ-আঁধার রাত্রে নদীর ঘাটে হিজল গাছের মূলে সে শায়িত নদের চাঁদের পাশে বসিয়া বলিল, ‘তুমি মায়ের কত আদরের ছেলে, চোখের মণি! তোমার অতুল ঐশ্বর্য, ব্রাহ্মণবংশের সম্মান, তুমি পাগল, এ—সকল কেন খোয়াইবে? তুমি ঘরে ফিরিয়া যাও। সুন্দরী দেখিয়া কোন রমণীকে বিবাহ কর। বাড়িয়ার এই বালিকাকে দেখিয়া কেন চির-হতভাগ্যের জীবন বরণ করিতে চাহিতেছ?’

‘সেই দিন উদ্ভূতের রাজকুমার অতি কবুণ কণ্ঠে বলিলেন, ‘ছি মহুয়া! তুমি কি বলিতেছ! আমি তো তোমার হাতে ভাত খাইয়াছি, আমার জাতের বালাই কি আর রাখিয়াছি! আমি বাড়ীঘর স্বজন-বন্ধু সব ছাড়িয়া আসিয়াছি, আমার ঘরে ফিরিবার আর কোন উপায় রাখি নাই, তুমি যদি আমায় প্রত্যাখ্যান কর, তবে এখনই এই বিশ্বের ছুরি বুকে বিধাইয়া তোমাকে দেখিতে দেখিতে প্রাণত্যাগ করিব, আমার ইহা ভিন্ন এখন আর কোন গতি নাই।’

এই কথা শুনিয়া মহুয়া বুঝিলেন, ‘সত্যই তো কুমার জাতি দিয়াছেন, বাড়ী ফিরিবার পথ তিনি নিজে নিরোধ করিয়াছেন, তবে তো চিরদিনের জন্য ইনি আমার

হইয়াছেন!’ আনন্দে তাঁহার চক্ষু প্রফুল্ল হইয়া উঠিল, তিনি বলিলেন, ‘এখন আমার স্বগণ, ধর্মপিতা—ইহাদের কেহ আর আমার স্বগণ নহে। তুমি যেখানে যাইবে, সেইখানে আমার পথ, আমার অন্য পথ নাই।’

মহুয়া ও নদের চাঁদ সেইদিন ঘোড়ায় চড়িয়া রওনা হইলেন, তাহা পৃথিবী ছাড়িয়া যে স্বর্গের পথ—সেখানে দুধারে কণ্টকতরু থাকুক, তাহাতে প্রতি মুহূর্তে প্রাণের আশঙ্কা থাকুক—সেই পথই মহুয়ার পরম ঈক্ষিত পথ। সেই দিন তিনি নিজেকে সম্পূর্ণভাবে নদের চাঁদের কাছে ধরা দিলেন। পূর্বেই তাঁহার কাছে গোপনে মনের ভিতরে আত্মদান করিয়াছিলেন, আজ বিজয়ের গৌরবে উৎফুল্ল হইয়া তিনি প্রকাশ্যভাবে নদের চাঁদের হইয়া গেলেন।

মহুয়া নদের চাঁদের কি গুণ দেখিয়া ভুলিয়াছিলেন? তিনি রূপে মুগ্ধ হইয়াছিলেন সত্য, কিন্তু তাঁহার অনুরাগ প্রধানত রাজকুমারের ত্যাগ ও আন্তরিকতার উপর, আস্থামূলক ভিত্তির উপর প্রতিষ্ঠিত হইয়াছিল। যেদিন কংস নদীর পাড়ে উঠিয়া তিনি নদের চাঁদকে খুজিয়া পাইলেন না সেদিন তাঁহার অনুরাগের কারণ বিলাপচ্ছলে স্পষ্ট করিয়া বলিয়াছিলেন—

‘রাজপুত্র হইয়া যে আমার জন্য ভিখারী হইয়াছে, এত ধনদৌলত, এত বংশের মর্যাদা, বড়মানুষের ছেলের এত প্রলোভন যাহাকে বন্ধ করিয়া রাখিতে পারে নাই, আমার জন্য যে সমস্ত ত্যাগ করিয়া ভিক্ষুক হইয়া আসিয়াছে, তাহাকে ছাড়া আমি কেমনে থাকিব? সে যে আমার গলার হার ছিল—

‘দরিয়ায় পড়ে গেছে আমার গলার হার।’

গুণ—উপলব্ধির উপর এই ভালবাসা প্রতিষ্ঠিত হইয়াছিল, এজন্য এই প্রেম এত দৃঢ় ছিল! ইহা চোখের নেশা নহে।



## মাণিকতারা

### ব্রহ্মপুত্র নদ

গল্পটি গানের ভাষায় রচনা করিয়াছেন আমীর নামক এক বৃন্দ মুসলমান কবি। তাঁহার বাড়ী ছিল মৈমনসিংহ জেলার কোন গ্রামে ; উত্তর দিকে বিশালস্রোতে ব্রহ্মপুত্র নদ বহিয়া যাইত। ব্রহ্মপুত্রের পাড়ে গঞ্জের হাট নামক একটা বন্দর ছিল। এই বন্দরটি গল্পবর্ণিত ঘটনার লীলাস্থল। কবি সর্বপ্রথম ব্রহ্মপুত্র নদের একটা প্রশস্তি গাহিয়া গঞ্জের হাটের বর্ণনা দিয়াছেন।

ব্রহ্মপুত্র নদের আবর্তশীল জলরাশির অভ্যন্তরে মাঝে মাঝে প্রলয়ঙ্কর একটা ক্ষুধা গর্জন শোনা যাইত ; লোকে বলিত, নদের গভীরতর নিম্নদেশে একটা ব্রহ্মদৈত্য বাস করে এবং সে—ই মাঝে মাঝে ওরূপ একটা ক্ষুধা গর্জন করিয়া উঠে। কবি এই নদের ভয়াবহ রূপ যে রূপ আঁকিয়াছেন, তেমনই আবার সেই বিরাট জলরাশির মহান দৃশ্য দেখিয়া বলিয়াছেন—

‘হায় রে গাঞ্জের কি বাহার!  
ও তার এ পার আছে,      ও পার নাইকো,  
চোখে মালুম দেয় না তার।’

এ পারে থাকিয়া কবি বলিতেছেন, ‘এ পার তো দেখিতেছি, কিন্তু ও পার নাই’—তারপরে কথাটা আর একটু শূন্য করিয়া বলিতেছেন, ‘হয়ত ও পারও আছে, কিন্তু তাহা চোখে মালুম হয় না।’ জলের ঘূর্ণিপাক দেখিয়া তিনি অভিভূত হইয়া তাহার মধ্যেও নদের মহান ছবি উপলব্ধি করিয়া বলিতেছেন—

‘ও তার পানির তলে পাক পইড়াছে দেখতে লাগে চমৎকার।  
গাঞ্জের কি বাহার॥’

কিন্তু তীরে দাঁড়াইয়া নদের ভৈরব রূপ উপভোগ করিতে যাইয়া কবি মাঝদের আতঙ্কের কথা বিস্মৃত হন নাই, লিখিয়াছেন, যখন এই উদ্দাম জলরাশির উপর দিয়া ঝঞ্জা ও তুফান বহিয়া যায়, তখন

‘নাও ছাড়ে না কর্ণধার।’

কর্ণধার নৌকা ছাড়িতে সাহসী হয় না। ঝড়ের সময় নৌকার ছাদের মত উচু একটা ঢেউ উঠে; ঢেউয়ের মুখে ফেনা, যেন উচ্চৈঃশ্রবা তুরঙ্গ রণোন্মাদনায় ছুটিয়াছে। শূশুক, তিমি, হাঙ্গার প্রভৃতি জন্তু চোখে অন্ধকার দেখিয়া নদীর তলা ছাড়িয়া উপরে উঠিতে থাকে। ঝড়ের বেগে তীর হইতে সমূলে উৎপাটিত গাছগুলি জলে পড়িয়া তীরবেগে পূর্বের দিকে গারো পাহাড়ের অভিমুখে ছুটিয়া যায়—

‘গাছ বিরক্ষী [বৃক্ষ] চুবন খাইয়া ভাইসা যায় পূব পাহাড়।  
হায় রে গাঞ্জের কি বাহার॥’

এই বহুরূপ নদের দৃশ্যের মুহূর্মুহু পরিবর্তন হয়, ঝড় চলিয়া গেলে দিগদিগন্তব্যাপী জলরাশি একেবারে স্থির একটা দৃশ্যপটের মত হয়, তখন এই গর্জনশীল

‘নদের মুখে নাই রে রা’—

নিঃশব্দে জল চলিয়াছে—পরিচালকের নির্দেশে মূকবৎ সৈন্যরাশির মত। তখন ভাতের থালার মত নদ পড়িয়া থাকে। বাতাস না থাকিলে তাহার ঘুম ভাঙ্গাইবে কে? আবার যখন ঝঞ্ঝা আসিবে, তখন তাহার ঘুম ভাঙ্গিবে।

### গাঞ্জের হাট

এই ব্রহ্মপুত্রের তীরে ‘গাঞ্জের হাট’ নামক বন্দর। প্রতি সপ্তাহে তিন দিন সেখানে হাট বসে। নদের এই বঁকে খেয়ার নৌকা ঘাটে বাঁধা, হাটের দিনে তথায় অসম্ভব লোকের ভিড় হয়। অনেকেই হাট করিতে আসিয়া সেদিন আর বাড়ী ফিরিতে পারে না, সুতরাং জিনিসপত্র বিকিকিনি করিয়া সেই হাটেই রসুই করিয়া খায় এবং হাটের একখানি ছোট ঘর ভাড়া লইয়া রাত্রিটা সেইখানেই কাটাইয়া দেয়। এই ঘাটে শত শত খেয়া নৌকা ও মান্দার কাঠের বড় নৌকা ভাড়াটিয়ার জন্য প্রতীক্ষা করিয়া থাকে। এই সকল মাঝিরা মা-বাপ ও স্বগণদের কথা ভুলিয়া যায়, ঝড়তুফান গ্রাস্য করে না। প্রবল বাতাসের মধ্যে ভাটিয়াল গান গাহিতে গাহিতে নৌকা ছাড়িয়া দেয় এবং অদৃষ্ট মন্দ হইলে বুদ্ধদের মত নদের আবর্তের মধ্যে পড়িয়া ডুবিয়া যায়।

এখন খেয়া নৌকার ভাড়ার কথা বলিতেছি তাহা শোন। সে এক কড়ির পাহাড় ভাড়াটিয়াকে গুণতি করিয়া দিতে হয়। হিসাব করিয়া তাহা বলিয়া দিব, তাহা শুনিলে তোমার তাক লাগিবে।

চার কুড়ি কড়িতে এক পণ হয়, এইরূপ ষোল পণে এক কাহন হয়। দশ কাহন কড়ি মজুরা দিয়া লোকজনকে গাঙ্গা পাড়ি দিতে হয়। দশ কাহন কড়ি—অর্থাৎ দশ টাকা—খেয়া নৌকার ভাড়া। ইহা দিলেই যে বিপদ উদ্ভাব হইল, এ কথা বলা যায় না। দশ কাহন কড়ি দিয়া এ পার হইতে ও পারে পৌঁছিলে লোকজন সেরপুর গ্রাম

পাইবে, এইজন্য সেরপুর অঞ্চলটার নাম ‘দশ কাহনিয়া’ হইয়াছে। সেরপুর পৌছিয়া যাত্রী ঈশ্বরের নাম স্মরণ করে—

‘ব্রহ্মপুত্রের পাড়ি দিয়া দশ কাহন দিয়া কড়ি।  
মাটি পাইয়া লোকে কহিত আল্লা, রসুল, হরি।’

কিন্তু সকলের ভাগ্যে নিরাপদে আসিয়া সেরপুর গ্রামে পৌছিতে পারা সহজ ছিল না। কতজনের মাঝদরিয়ায় সলিলসমাধি হইত ; সেই গাঙ্গে গাঙ্গাচিলগুলির মত চোর দস্যু ইতস্তত ঘুরিত, তাহাদের টাকাকড়ি, জহরত এই সকল দস্যুরা লুণ্ঠন করিয়া লইয়া যাইত।

মাঝিরাও সকলেই নিরীহ ও সাধুপ্রকৃতির ছিল না—  
‘কেই বা ভাল কেউ বা মন্দ থাকত নায়ের মাঝি।  
দিন দুপুরে মারত ছুরি হয় রে এমন পাঙ্গি।  
লুইটা নিত, কাইড়া নিত জহরপাতি যত।  
ঐ বনে জঙ্গলে নিয়া নেংটা ছাইড়া দিত।  
কেউ বা মাথায় কুড়াল মারে, কেউ বা কাটে গলা।  
হস্তপদ বন্ধন কইরা ফেলত নদীর তলা।  
খুইলা নিত জহরপাতি অঙ্গে যা পৈরাছে।  
ঝাঁপি, টোপলা খুইলা নিয়া দিত ওস্তাদের কাছে।’

এই ‘ওস্তাদ’ অর্থ চোরডাকাতদের সর্দার। সুতরাং ব্রহ্মপুত্রের জলে যেরূপ হাজার, কুম্ভীর ছিল, জলের উপর যে-সকল মাঝি ছিল, তাহারাও ভীষণতায় কম ছিল না, তাহারা কেহ কেহ ভূরপ্রকৃতি নর-বেশী, প্রভেদ এই যে তাহারা বন্ধুর ছদ্মবেশে আসিত।

বিশু নাপিত ও তাহার পরিবারবর্গ

এই সর্বনেশে ব্রহ্মপুত্রের পারে একটি দরিদ্র নাপিত-পরিবার বাস করিত। বিশু নাপিতের জাতব্যবসায়ে কোন রোজগার ছিল না, অথচ কয়েকটি শিশুসন্তান ও স্ত্রী তাহার পোষ্য ছিল। তাহার ঘরের ছাদে ছন্ ছিল না, বর্ষার সময় মুখলধারে বৃষ্টি পড়িত। শিশুদের লইয়া বিশু ও তাহার স্ত্রী জলে ভিজিত। বেড়া একটুও মজবুত ছিল না ; বিশু বনজঙ্গল হইতে লতাপাতা লইয়া আসিয়া কোনরূপে ঘরের বেড়ার ফাঁক ভর্তি করিত ; গৃহিণী ও শিশুগুলি লইয়া প্রায়ই বিশু ভিক্ষা করিয়া খাইত, কোন কোন দিন এই ক্ষুদ্র নাগা সন্ন্যাসীর দল দেখিয়া গৃহস্থ চৈতামেচি করিয়া তাহাদিগকে বাড়ী হইতে তাড়াইয়া দিত, সেদিন তাহারা হরিবাসর করিত। কোনদিন আবার দৈবযোগে বিশু দিনমজুরী পাইলে সকলে মিলিয়া কিছু উপার্জন করিত।

বিশুর জ্যোষ্ঠপুত্রের নাম বাসু—সে বার বছরে পা দিয়েছে, কিন্তু দুনিয়ার অকর্মা, সে কিছুই শিখে নাই। দ্বিতীয় পুত্র কুশাই—সে ব্রহ্মপুত্রে সাঁতার কাটিতে যাইয়া ডুবিয়া গেল; প্রতিবেশীরা বহু ঝুঁজিয়া তাহাকে পাইল না; তৃতীয় পুত্র দাসু মায়ে়ের সঙ্গে গাঞ্জে নাহিতে গিয়াছিল, শত শত লোক স্নান করিতেছে, এমন সময় সর্বাপেক্ষা দুর্ভাগা দাসুকে চিনিতে পারিয়াই যেন একটা হাজার আসিয়া তাহাকে পা ধরিয়া টানিয়া লইয়া গেল, কত বর্শা মারিয়া, জাল ফেলিয়া কেহ তাহাকে রক্ষা করিতে পারিল না। চতুর্থটি গাছে উঠিতে যাইয়া ডাল ভাজিয়া মাটিতে পড়িয়া গেল, তদবধি সে বিছানায় পড়িয়া কয়েক মাস বৃকের যন্ত্রণা ভুগিয়া শেষে চির-অব্যাহতি পাইল।

বিশু নিতান্ত বিপদে পড়িয়া বিধাতাকে ডাকিয়া তাহার কাহিনী শুনাইল ‘কতদিন তো না খাইয়া ইহাদের লইয়া উপবাস করিয়াছি, তখন ফিরিয়াও তাকাও নাই। যাহা হউক ছেলেগুলি যখন কথা বলিত, তখন তাহাদের কলরবে কর্ণে আমার মধুবৃষ্টি হইত। এত সুখই বা তোমার বৃকে সহিবে কেন, একে একে সব কয়টি হরণ করিয়াছ। অবশিষ্ট এক বাসু—এক পেটি তৈলের মত, একবার একটু গড়াইয়া পড়িলেই নিঃশেষ হইবে। আমি জিজ্ঞাসা করি, এই সন্তানগুলি তুমি দিলেই বা কেন, নিলেই বা কেন? আমি যে আর এত কষ্ট সহ্য করিতে পারিতেছি না। আমার প্রাণ তোমাকেই দিব, আমি আর ঘরে ফিরিব না।’

বিশু নাপিত চীৎকার করিয়া বিধাতাকে এই সকল প্রশ্ন করিতে লাগিল। কিন্তু এই সকল প্রশ্নের উত্তর তিনি দিতে পারিবেন না, বলিয়াই হয়ত বিধাতা নিরুত্তর রহিলেন।

ইতস্তত ঘুরিয়া শোকগ্রস্ত বিশু নাপিত নদীর একটা ভাজানপাড়ে বসিয়া বিলাপ করিতে লাগিল। কতক্ষণ সে বেহুঁশের মত তথায় ছিল, তাহা সে বুঝিতে পারে নাই, অলক্ষিতে একটা সূতার মত দাগ সেই নদীর বহু দূর ব্যাপিয়া দেখা দিল, নদ যে একটা গন্ডি আঁকিয়া তাহা স্রীয় গর্ভস্থ করিতেছে, বিশু তাহা খেয়াল করে নাই; অকস্মাৎ সেই চাপ ভাজিয়া মহাশব্দে জলের মধ্যে পড়িয়া গেল। চারিদিকে উর্মিরাশি থেঁথে করিয়া সেই স্থানে একটা কোলাহলব সৃষ্টি করিল, বাসুর মা ছুটিয়া আসিয়া দেখিল সেই উত্তাল ঢেউরাশির মধ্যে একটা মানুষ তাহার কুটারের দিকে ক্ষণেকের জন্য দৃষ্টিপাত করিয়া অতলে ডুবিয়া গেল। স্বামীর এই শোচনীয় মৃত্যু দেখিয়া বাসুর মা মাটিতে পড়িয়া লুটাপুটি করিয়া কাঁদিতে লাগিল।

‘আমার আর এ জগতে কে আছে, চরণের দাসীকে একাকী ফেলিয়া কোথায় গেলে?’ এই বলিতে বলিতে বাসুর মা জীবন ত্যাগ করিতে প্রস্তুত হইল। একবার ভাবিল, গলায় শাড়ীর আঁচল বাঁধিয়া কোন গাছের ডালে আত্মহত্যা করে, আবার ভাবিল বাসুকে কেমন মানুষ করিব, তাহাকে লইয়া একা ঘরে কেমন করিয়া থাকিব? তখন বৃকে ছুরি বিধাইয়া প্রাণ ত্যাগ করিবার সজ্জন করিল কিন্তু শেষে স্থির করিল, যেখানে তাহার একাধিক পুত্র ডুবিয়া মরিয়াছে, স্বামী যেমন চোখের সামনে গেলেন, ব্রহ্মপুত্রের সেই শীতল জলই তাহার শেষ আশ্রয়। তখন সে ছুটিয়া সেই নদের দিকে চলিল, ঝাঁপাইয়া পড়িবার জন্য। এমন সময় পিছু হইতে বাসু ‘মা মা’ বলিয়া ডাকিল। ফিরিয়া চাহিয়া মাতা পুত্রের ‘সোণামুখখানি’ দেখিতে পাইল, তাহার মন বাৎসল্যে ভরিয়া গেল—

‘ভুলি গেল পতির কথা আর মনের জ্বালা ।  
আমীর কয় আর মরবা কেন চক্ষু মুইছা ফেলা ॥’

আর মরা হইল না। বাসুকে লইয়া তাহার মাতা স্বীয় জীর্ণ কুটীরে প্রবেশ করিল; প্রতিবেশীদের মধ্যে যাহারা দয়ার্দ্র ছিল তাহাদের সাহায্যে বাসু ও তাহার মা খুব কষ্টেসৃষ্টে দিন গুজরান করিতে লাগিল। বাসুর মা কিছুতেই স্বামীর মার ঘরখানি ছাড়িল না। বাসুকে বুকে করিয়া পাখী যেমন তাহার শাবকটাকে বুকের তলে রাখিয়া দিনরাত পাহারা দেয় তেমনই ভাবে তাকে পালন করিতে লাগিল।

### বাসু তরুণ বয়সে

পাড়ায় বাসুর মায়ের ইষ্টকুটুম্ব কেহ ছিল না, তাহার মা-বাপ অথবা আপনার বলিতে অন্য কেহ ছিল না; পাড়াপড়শীর মধ্যে কয়েক ঘর জেলে ও এক ঘর মুচি ছিল। যে অনাথ, তাহার ভার বিধাতা লয়েন, কুচনী পরিবারের কানুর মা বাসুর মার অন্তরঙ্গ হইল; তাহারা উভয়ে সখীত্ব সূত্রে আবদ্ধ হইল। এই আত্মীয় আত্মীয়তায় বাসুর মা যেন হাতে স্বর্গ পাইল।

কানুর বয়স বিশ, সবে তাঁহার গৌফের রেখা দিয়াছে, বাসু তাহার তিন বছরের ছোট, সে সর্বদা কানুর পিছনে পিছনে থাকে। কানুর প্রকৃতিটা বড় উদাস, তার সঙ্গে বাসুর এইরূপ সর্বদা ঘোরাফেরা তাহার মাতা পছন্দ করিত না। অথচ এরূপ উপকারী বন্ধুর পুত্র, সে এ সম্বন্ধে মুখ ফুটিয়া কানুকে নিষেধ করিতেও পারিত না। কানুর মার মনটা দরদে ভরপুর। রোজই কিছু না কিছু তাদের বাড়ীতে লইয়া আসিত, কোনও দিন গামছায় বাঁধিয়া কিছু চাল-ডাল, এক পেটি তৈল আনিয়া বাসুর মাকে উপহার দিত, কোনও দিন বা কানুদের বাড়ীর পিছনে যে মহিষের বাথান ছিল সেইস্থান হইতে সে চুজা ভরিয়া বাসুর জন্য দুধ আনিয়া দিত, কোন কোন দিন নিজ বাগানের সদ্য-ভাজা বেগুন, কাঁচা লঙ্কা ও বাড়ীর গাছের বেল সহিকে দিয়া হাসিমুখে তাহার সঙ্গে কথা কহিয়া দুই দণ্ড কাটাইয়া দিত।

বাসুর মা নিজেও কর্মঠ, কোন দিন বসিয়া থাকে নাই, আজ এই বিপদের দিনে সে নিশ্চেষ্ট ছিল না, জেলেদের বাড়ীতে যাইয়া সে সূতা কাটিত, তাহাদের ধান ভানিত। পারিশ্রমিক হিসাবে সে বাসুর জন্য কিছু মাছ ও ক্ষুদ্রকুঁড়া যাহা পাইত তাহাই সন্তুষ্টচিত্তে বাড়ীতে লইয়া আসিত। সে ভাবিত, কবে বাসু বড় হইয়া জাতব্যবসা আরম্ভ করিবে এবং কবেই বা তাহার এই দুর্দিন ঘুচিবে!

### বাসু যৌবনে : কানুর সাক্ষরদ

এদিকে দেখিতে দেখিতে বাসু নাপিতের বয়স বাড়িয়া চলিল; তাহার বয়স বিশ বৎসর পূর্ণ হইল।

‘বিশ বছইরা জোয়ান হৈল সেই বাসু ছোঁড়া।  
পাড়ায় পাড়ায় ঝোপ জঙ্গলে লাফায় যেন ঘোড়া॥  
সাকরেদ হৈল বাসু নাপিত ওস্তাদ কানু কোচ।  
মানুষ গরু কেউ মানে না ফুলাইয়া ফিরে মোচ॥

বাসুদের বাড়ীর পিছনে মস্তবড় একটা বটের গাছ আছে। বহুদিনের পুরানো গাছ, লোকে তাহাকে ‘দেও বিরিক্ষী’ [দেববৃক্ষ] বলিত, সকলের বিশ্বাস, বৃক্ষটী দেবপ্রতিষ্ঠিত। এজন্য কেহ তাহার কাছে বড় একটা ঘেঁষিত না। একদিন রাত্রিবেলায় বাসুর মা বাসুকে লইয়া তাহাদের কুঁড়ে ঘরখানিতে শইয়া আছে, এমন সময় সেই গাছ হইতে মানুষের স্বরে কেহ যেন কথা বলিতেছে, শুনিতে পাইল। বাসুর মা স্পষ্ট এই কথাগুলি শুনিতে পাইল—‘বাসুর মা, নিশ্চিন্ত মনে শইয়া আছ, ঘরের চালে নতুন ছন লাগাইয়াছ, ঝুটিগুলিও নতুন, বেড়াতে নতুন পাতা, কিন্তু আকাশের কোণে কি ঘোর করিয়া মেঘ উঠিয়াছে, বাহিরে আসিয়া তাহা চাহিয়া দেখ ; এখনই ঝড় উঠিলে তোমার কুঁড়েঘরখানি উড়াইয়া লইয়া যাইবে, তখন তোমাদের মাথা গুঁজিবারও জায়গা থাকিবে না।’

বাসুর মা একটু ভয় পাইয়া বাসুকে জড়াইয়া ধরিয়া বলিল, ‘কে তুমি! আমার বাড়ীতে বসিয়া এই গভীর রাত্রে আমাকে ভয় দেখাইতেছ? আমি পতিপুত্রহীনা, একমাত্র বাসুকে লইয়া একলা ঘরে পড়িয়া আছি, আমার কুঁড়েঘরটা যদি মাটিতে পড়িয়া যায়, আমি যদি দুর্ঘোণে পড়িয়া মরি, তবেই বা কি? তুমি আমার গাছটার উপর থাকিয়া আমাকে ভয় দেখাইয়া তামাশা করিতেছ!’

বৃক্ষারোহী বলিল, ‘মাসীমা, আমি যে তোমার সইয়ের ছেলে—আমার নাম কানু, বাসু আমার অতি স্নেহের বন্ধু। তুমি কি আমাকে চিনিতে পারিলে না, আমি কি তোমাকে তামাশা করিতে পারি? বাসু আমাকে দাদা বলিয়া ডাকে আমি কিছু খাবার জিনিস পাইয়াছি, দুই ভাই একত্রে বসিয়া খাইব। মাসীমা, তুমি বাসুকে জাগাইয়া দাও—ঐ দেখ, অল্প ঝড় হইয়া মেঘ উড়িয়া গিয়াছে, এবার আর তোমার কুঁড়েঘরে হাওয়া লাগিবে না, বাসুকে জাগাইয়া দাও।’

বাসুর মা অভ্যন্ত লজ্জিত হইল, এ যে কানু, তাহার সইয়ের ছেলে, ইহা সে ভাবে নাই। সে বলিল, ‘কানু আমি তোমায় না চিনিয়া মন্দ কথা বলিয়াছি, আমাকে মাফ কর। এই নিশাকালে আমি বাসুকে ছাড়িয়া দিতে পারিব না—

‘এক বাসু যে কলিজা আমার অশ্বলের লাঠি।  
ঐ সোণার চাঁদ বদন দেইখা পথে পথে হাঁটি।’

‘আজ রাতটা পোহাইলে কাল সকালে আসিয়া বাসুকে লইয়া যাইও। রাত্রে আমার বুকের ধনকে বুকছাড়া করিব না।’

ইহার মধ্যে বাসু জাগিয়া উঠিয়াছে। সে তাহার মাকে জিজ্ঞাসা করিল, ‘এত রাত্রে মা তুমি কার সঙ্গে কথা বলিতেছ?’ মায়ের কাছে কানুর আসার কথা শুনিয়া বাসুর মনে আনন্দ আর ধরে না।

‘লক্ষ্য দিয়া উঠে বাসু মায়ের হাত ঠেইলা।  
ঘরের কোণে বাহির হৈল ঘরের কেওয়ার খুইলা॥

ছুটিয়া যেয়ে বাসু ধরে দাদা কানুর গলা।  
এত রাত্রে কি কারণে দাদা আমার বাড়ী আইলা॥’

কানু বলিল, ‘তোমাকে দিয়া কিছু দরকার ছিল, তা তোমার মা এত রাতে আমার কাছে তোমাকে আসিতে দিতে ভয় করেন, তাই মুশকিলে পড়িয়াছি।’

কানু বলিল, মায়ের কথায় কি হইবে, আমি তোমার সঙ্গে এখনই যাইতেছি। তুমি কি অনিয়াছ, দুই ভাই একত্র বসিয়া খাইব।’

‘মায়েরে কইল উইঠা মাগো ঘরের কেওয়ার মার।  
ভাইয়ের সঙ্গে ভাই চলেছে চিন্তা কেন বা কর?’

বাসু আর কানু চলিয়া গেলে বুড়া মা একা ঘরে পড়িয়া কাঁদিতে লাগিল। তাহার গায়ের যত দেবতা ছিল, তাহাদিগকে ডাকিয়া মানত করিতে লাগিল।

‘দোহাই দেই বুড় ঠাকরুণ, আমার বাসুকে ভাল রাখুন,  
ভাইজা দিমু ছাতু গুরা চাইল।  
দোহাই মাগো সুবচনী, বাসু ভাল থাকে জানি,  
গুয়া পান দিমু তোরে কইল॥  
পৈঁচার ডাক শুনৈ নারী, অমনই কয় তাড়াতাড়ি,  
ডাইকো নারে কাল পৈঁচা আর।  
বোয়াল মাছ ভাইজা দিমু, শৈল মাছ পুইড়া দিমু,  
বুকের সোণা বুকে দাও আমার॥’

এইরূপ দুচ্চিন্তায় ও মানত করিতে করিতে রাত পোহাইয়া গেল, ‘কাল নিশি পোহাইল, কাহা কাহা কাক ডাকিল’, কিন্তু বাসুর মা আবার ঘুমাইয়া পড়িল।

#### বাসুর পঞ্চম ডাকাতি

কিছুদূর হাঁটিয়া যাইয়া এক গাছতলায় বসিয়া কানু বাসুকে বলিল, ‘আজ এক বুড়ো বামুন ও তাহার বামনী গাঞ্জের ওপারে যাইবে। সোণা মাঝির নৌকায় রাত থাকিতে আমরা তাহাদিগকে পার করিয়া দিতে হইবে। তুমি কি আমার সঙ্গে যাইতে পারিবে?’

বাসু বলিল—

‘সোণা মাঝি আপন ভাড়া রাইখা।  
তোমাকে দিল নৌকাখানি কোন্ সুবিধা দেইখা॥’

কানু বলিল, ‘তুমি বুঝি জান না, এই চারপাঁচ দিন সোণা মাঝি জুরে বেইশ, তাহার নৌকা ঘাটে বাঁধা আছে। আমরা তাহার নৌকাখানিতে ঠাকুর-ঠাকরুণকে

তুলিয়া লইয়া গঞ্জের ঘাটের ভীষণ আবর্তের মধ্যে নৌকাখানি ডুবাইয়া দিব। বুড়ো বামুনের যে সকল টাকা মোহর এবং জহরত আছে তাহা আর কি বলিব, তাহা এক রাজার ঐশ্বর্য। কাল সম্মুখাবেলা আমি তাহা দেখিয়াছি।

বাসু বলিল, ‘দাদা তুমি ঠাকুর-ঠাকুরাণীকে ব্রহ্মপুত্রের ঘূর্ণিপাকে ডুবাইবে কিন্তু নৌকাখানি ডুবিলে সেই ভয়ানক ঘূর্ণিপাক হইতে আমরা কিভাবে উদ্ধার পাইব? সে বড় বিষম স্থান, তাহার মধ্যে পড়িলে কেউ রক্ষা পায় না, আমরা দুজনে কি ভাবে রক্ষা পাইব?’

কানু বলিল, ‘ভাই, আমি কি আগে না বুঝিয়া কোন কাজে হাত দেই? তুমি ভাবিও না, আমি শম্ভু জেলের কাছ থেকে একটা-খুব লম্বা দড়ি চাহিয়া আনিয়াছি। সে দড়িটা এত লম্বা যে তুমি তাহা ধারণাই করিতে পারিবে না। সেই দড়িটার একটা দিক গাঞ্জোর পাড়ের বড় শিমূল গাছটার সঙ্গে বাঁধা থাকিবে, আর একটা দিক একটা ভূয়ার সঙ্গে আটকাইয়া রাখিব, ভূরাটা একটা খুব আলগা দড়ির জোরে নৌকার সঙ্গে সঙ্গে চলিবে, উদ্দেশ্য সিদ্ধ হইলে আমরা সেই ভূরায় চড়িয়া অনায়াসে বাড়ীতে ফিরিতে পারিব। যত জহরত, টাকা ও মোহর আছে, তা লইয়া আমরা নৌকার তলে কুড়ুলের ঘা মারিয়া উহা জলে ডুবাইয়া দিব।’

‘দাইড়া ঠাকুর নাড়বে দাড়ী ছাগল যেমন নাড়ে।  
ভূয়ার দড়ি টাইনা আমরা আসবো নদীর পারে॥  
ঠাকুর-ঠাকুরাইণ মইরা গেলে আর কি মনে ভয়।  
কাছি দিমু শম্ভুর বাড়ী কোন্ বেটা কি কয়॥  
মনের মত বেসাত দিমু মায়ের হস্তে নিয়া।  
সেই বেসাতে দুই ভাই মিলা পরে করমু বিয়া॥’

যেমন কথা তেমনই কাজ। যখন কার্য সমাধা করিয়া বাসু ও কানু বাড়ী ফিরিল, তখন পূর্বদিকে আকাশ রাস্তা হইয়া উঠিয়াছে, তখন চিল, কাক এবং আর আর পাখীরা ডাকিয়া উঠিয়াছে। বাসু ডাকিয়া তাহার মাকে ঘুম হইতে উঠাইয়া বলিল, ‘মা উঠ জাগ, আজ হইতে তোমার সমস্ত দুঃখ দূরে গেল, এখন হইতে গতর খাটাইয়া আর হাড়ভাঙ্গা খাটুনি খাটিতে হইবে না, আর দিন রাত চোখের জল ফেলিতে হইবে না।’

বাসুর মা উঠিয়া বসিল এবং বলিল, ‘বাহা কি আনিয়াছ? একদিন খাইলে তো আর সম্বৎসরের ক্ষুধা মিটিবে না।

বাসুর মার জ্বর

বাসু তাহার হাতে সেই বামুনের টোপলা দিয়া বলিল, ‘দেখ কি আনিয়াছি।’

‘কথা শুনি বাসুর মা টোপলা যে খুলিল।  
আধার ঘর আলো হইয়া চক্ষু ভইরা গেল॥  
বেশর আছে, বুমকা আছে, আর নারিকেল ফুল।  
চিক রইয়াছে, সিঁধি আছে, আর কর্ণফুল॥



সোণার মালা-বাজু আছে অমর আছে বৃকের পাটা।  
 সোণার হাঁসা গাঁথা আছে, কান খোঁচানী কাঁটা॥  
 নখে আছে চুনি মণি আর মুক্তা ঝুল মূল।  
 গোঙা বাইশেক তাবিজ আছে আর যে বকফুল॥  
 চন্দ্রহার, সূর্যজহার, রূপার বাকুখাড়।  
 চরণপদ্মে বাঁধা আছে গুজরী দুই গাছ সরু॥  
 সুলতানী মোহর আছে, বাদশাই গোরে টাকা।  
 আর আছে ছোট বড় সোণা রূপার চাকা॥  
 খইরকা মুষ্টি আর আছিল আগুনপাটের শাড়ী।  
 সোণার বাটী, আভের কাঁকুই, সোণার আছাড়ি॥’

বাসুর মা বিস্মিত হইয়া জিজ্ঞাসা করিল, ‘এ সব কি, এ রাজা বাদশাহের বেসাতি তুমি কোথায় পাইলে?’

বাসু তখন গর্বের সহিত তাহার ও কান্দার বৃত্তান্ত বর্ণনা করিল ; সেই সমস্ত কথা শুনিয়া, বাসুর মা থরথর কাঁপিতে লাগিল, এবং বলিল—

‘কি কর্ম করেছে বাপু হইল সর্বনাশ।  
 ব্রহ্মবধ কৈরা তুই বাড়ালি তরাস॥  
 চোখে আর দেখমু নারে বড় কুটুম নারী।  
 ব্রহ্মশাপে কেউ না থাকবে বংশে দিতে বাতি॥  
 হৈয়া ক্যান্ধে না মরিলি, হৈত না এত জ্বালা।  
 এমন দূশমনের হায়রে ডুইবা মরা ভাল্লা॥’

যে বাসু তাহার নয়নের মণি ছিল, অহোরাত্র একবার যার মুখখানি না দেখিলে বাসুর মা পাগল হইয়া যাইত, স্বামীবিয়োগের পর আত্মহত্যা করিতে যাইয়া বাসুর মা যাহার মুখের মা ডাক শুনিয়া ঘরে ফিরিয়া আসিয়াছিল, আজ সে সেই প্রাণপ্রতিম পুত্রের মৃত্যু কামনা করিতেছে!

একদিকে বাসুর মা কাঁদিতেছে ও চোখের জল মুছিতেছে, অন্য দিকে বাসু তখন ‘বেসাতি’ লইয়া মাটির নীচে রাখিতেছে। সারাদিন বাসুর মা একবিন্দু জল পান করিল না, রাগ করিয়া বাসুর সঙ্গে কথা কহিল না এবং তাহার মুখের দিকে তাকাইল না। প্রভাতে দেখা গেল, বাসুর মার চক্ষু দুটি বিবর্ণ হইয়াছে এবং অত্যন্ত শীত করিয়া জ্বর আসিয়াছে। এই ভাবে চার-পাঁচ দিন বিঘোর অজ্ঞান অবস্থায় সে বিছানায় পড়িয়া রহিল। প্রতিবেশীদের দুষ্চিন্তার কারণ হইল, বাসুর মুখ শুকাইয়া গেল। সকলে মিলিয়া বাসুকে বলিল ‘বাসু, তোমার মা বড় দুঃখী, সে যে মরিতে বসিয়াছে, তার চিকিৎসার ব্যবস্থা কর।’

তিন কড়ি কবিরাজের চিকিৎসা।

‘প্রহর তিনেক হাট্যা বাসু যায় যে তুরাতরি।  
 তিনকড়ি যে মস্ত বৈদ্য পাইল তার বাড়ী॥

হাঁক ছাড়িয়া ডাকে বাসু কবিরাজ ম'শয় ।  
 আমার মা যে অখন তখন—তোমাকে যাইতে হয়॥  
 তিনকড়ি কবিরাজ শূইনা ধুতি চাদর লইল ।  
 চাদরের খুঁটির মধ্যে দাওয়াই বাশ্শিয়া লইল॥  
 হাতে নিল বাঘা-লাঠি, কাঁধে লইল ছাতি ।  
 তুলসীতলায় যাইয়া বৈদ্য ঠেকাইল তার মাথি॥  
 কিষ্ট বর্ণ দেহখানি, তেল-তেলা তার গা ।  
 খাটা খুটা লাফা গোফা, ফাটা ফাটা পা॥  
 কুতকুতিয়া চায় কবিরাজ গুরগুরিয়া যায় ।  
 পাছে পাছে বাসু নাপিত উল্টা হোঁচট খায়॥  
 বাসুর বাড়ী যাইয়া বলে বৈদ্য তিনকড়ি ।  
 তোমার মা যে ভাল হবে খাইলে তিন বড়ি॥  
 আজকা দিও বেলের ছাল ও নিমের পাতার ঝোল ।  
 কালকা দিও গরম কৈরা সজ্জ ভিজানো জল॥  
 পরশু দিবা লাল বড়িটা কাঞ্জি দিয়া গুইলা ।  
 তর্শু দিবা নীল বড়িটা কুয়ার পানি তুইলা॥  
 শেষাশেষি দিবা বাসু এই না ধলা বড়ি ।  
 আরাম হইবে তোমার মা, থাকবে না জ্বরজারি॥  
 চাকুল ধানের ভাত খিলাইও, শরীরে ঢাইল জল ।  
 ধলা বাড়ি খাওয়াইলে দিও, তেঁতুলের অম্মল॥  
 কবিরাজের কথা শূইনা বাসু নিল বড়ি ।  
 'বিদায় হবার সময় হয় যে,' কইল তিনকড়ি॥  
 এক কুলা চাল দিল, দাল একডালা ।  
 গাছের থেকে তুইলা দিল বেগুন, লজ্কা, কলা॥  
 হলদি দিল, লবণ দিল, পেটি ভইরা তেল ।  
 বিদায় পাইয়া কবিরাজ ম'শয় হাসতে হাসতে গেল॥  
 সন্ধ্যা বেলা বাসুর মা যে চক্ষু মেইনা চাইন ।  
 জন্মের মত বাসুকে খুইয়া স্বর্গে চইলা গেল॥'

বিবাহের চেষ্টা

মায়ের মুখে আগুন দিয়া, কাঁদিতে কাঁদিতে তাহাকে ব্রহ্মপুত্রের জলে ভাসাইয়া দিয়া  
 বাসু দিন কয়েক আর ঘরের বাহির হইল না । মনে মনে ভাবিতে লাগিল—‘আমার  
 দোষেই মা মরিয়া গেল, এ দুঃখ কি করিয়া সহ্য করিব? এ দেশ ছাড়িয়া অন্য  
 কোনখানে যাইয়া ভিক্ষা করিয়া খাইব । সারাদিন পরে সন্ধ্যাকালে বাসু হাত  
 পোড়াইয়া নিজে একবার ঝাঁপিয়া খায় । কানু ও তাহার মা তাহাকে কত সান্ত্বনা দেয়.  
 ৪/৫ দিন সে তাহাদের কথা শুনিয়াও কোনই উত্তর দেয় না । কিছু ক্রমে ক্রমে  
 পুনরায় তাহার অভ্যাস আবার প্রবল হইল, কানুর সজ্জা সে ছাড়িতে পারিল না এবং  
 আবার দুইজনে মিলিয়া নিরীহ পথিকদের উপর রাহাজানি কারিতে লাগিল ।

কানুর মা বাসুকে বলিল, ‘নিজে একবেলা কি ছাইপাঁশ রান্না কর, মুখখানি শুকাইয়া গিয়াছে, কালজিরা হাড়গুলি দেখা যাইতেছে। তোমার ঘরে কেহ নাই। দেখিয়া শুনিয়া বিবাহ কর, না হইলে এমনভাবে দিন গুজরান হইবে কিরূপে? এইখান থেকে তিন ক্রোশ দূরে মাইন্দা গ্রাম, সেখানে সাধু শীল নামক তোমাদের জাতির একটি ভাল লোক আছে, শুনিয়াছি তার একটি সুন্দরী মেয়ে আছে, তুমি সেখানে যাইয়া বিবাহের প্রস্তাব কর। নির্বন্ধ থাকিলে তোমার ভাগ্যে একটি ভাল বউ জুটিয়া যাইতে পারে।’

এই কথাগুলি বাসুর মন্দ বোধ হইল না। পরদিন প্রত্যুষে উঠিয়া সে চাদরখানি লইয়া মাইন্দা গ্রামের দিক রওনা হইয়া গেল। চৈত্র মাসের মাথাফাটা রোদ, বাসু তাহার চাদরখানা ভাল করিয়া মাথায় বাঁধিয়া লইল। বেলা প্রায় তিন প্রহরের সময় সে মাইন্দা গ্রামে আসিয়া পৌঁছিল। সম্মুখে বালুখালির টলটল জল। বাসুর বড়ই তৃষ্ণা পাইয়াছিল, তাহার মনে হইতেছিল সে খালের জল প্রাণ তরিয়া অঞ্জলিতে করিয়া খাইয়া তৃষ্ণা নিবারণ করে।

খালের এপাড়ে কোন বসতি নাই, একটা বড় শিমূল গাছে টকটকে লাল ফুল ফুটিয়া আছে, ওপাড়ে ঘন বসতি, সারি সারি বাড়ীর এবং সেখান হইতে মেয়েরা কলসী কাঁখে জল লইতে আসিতেছে এবং জল ভরা হইলে মৃদুমম্ম্বর গতিতে বাড়ী ফিরিয়া যাইতেছে। হঠাৎ বাসু দেখিল, একটা পরমা রূপসী কন্যা ওপাড়ের এক বাড়ী হইতে খালের দিকে আসিতেছে, বাসু সেই সময় খালে নামিয়া জল খাইতে লাগিল, সেই সুন্দরী রমণী চক্ষু মাটির দিকে নত করিয়া আসিতেছিল। সে বাসুকে দেখিতে পাইল না। তাহার বুকে শ্যামলী রঞ্জের একটা গামছা—আর, ‘ছাড়িয়া দিছে চুল। সেই চুলে পায়ের পাতা পাইয়াছে নাগুল।’ সেই অঙ্গরার মত রূপসী কন্যাকে দেখিয়া বাসু স্তম্ভ হইয়া দাঁড়াইয়া রহিল। ‘বাসু ছিল সোণার কান্তি রূপ মনোহর।’ মেয়েটা চোখ মেলিয়া চাহিতেই তাহাকে দেখিতে পাইল। কুমারী বাসুকে দেখিয়া খুব সুন্দর মনে করিল। এই প্রথম দর্শনেই উভয়ে উভয়ের রূপে মুগ্ধ হইল। বালুখালি খুব ছোট খাল, এপাড় হইতে কথা বলিলে তাহা বেশ শোনা যায়। বাসু খালের পাড়ে দাঁড়াইয়া মৃদুম্বরে যাহা বলিল তাহা সেই খালের কিম্বা তাহার রূপের প্রশস্তি মেয়েটার কাণে সে সকল কথা ভালই লাগিল।

বাসু বলিল—

‘বালুখালির টল—টলা জল, আঁচল ধরি টানে।  
অঞ্জের বর্ণ দেখি—লৌ ছুটে জানে॥  
সার্থক জনম তোর বালুখালির জল।  
এমন চাঁদ বুকে করি পাইয়াছ বল॥

‘কিন্তু তোমার পরিচয় জিজ্ঞাসা না করিয়া আমি কতকটা পরিচয় পাইয়াছি। তোমার সুন্দর মুখখানি আমার চেনা। এইবার লইয়া দুইবার তোমাকে দেখিলাম। মনে হয় বহুদিন পূর্বে তোমাকে একবার গঞ্জের হাটে দেখিয়াছিলাম।’

কন্যা বলিল, ‘তোমার ঠিকই মনে আছে, আমি শৈশবে বাবা-মায়ের সঙ্গে গঞ্জের হাটে একবার গিয়াছিলাম।’

‘বাপ মায়ের সঙ্গে আমি যাইয়া তোমার ঘরে।  
পথ চলিতে দেখিলাম তুমি রইছ ঘরে॥  
ফুলবাতাসা দিয়া খাইলাম বিনি ধানের খই।  
তোমার মা যে আইনা দিল সিকায় তোলা দই॥  
তোমার মা কইল হাস্যা আমায় কোলে লইয়া।  
আমার ঘরে আইস মা ঘরের পশ্মী হইয়া॥’

বালিকাকালের এই সকল কথা তরুণীর এখনও মনে আছে ; মেয়েদের কাঁচা মনে যে দাগ পড়ে, তাহা সহজে মিলাইয়া যায় না। বালিকা বলিল, ‘আমার নাম মাণিকতারা—বাবার নাম সাধু শীল, পূর্বের দিকে ঘাটের পাড়ে আমাদের বাড়ী—শেষে অতি স্বল্পাক্ষরা কথায় একটা ইজিত দিয়া চূপ করিল ; সে কথা কয়টি এই—‘কুটুম্বিতা হবার পারে খুসী থাকলে দিল’—অর্থাৎ আমার বাবার মন প্রসন্ন হইলে কুটুম্বিতা হইতে পারিবে। বালিকা ঘাটেই রহিয়া গেল, বাসু পূর্ব ঘাটের দিকে যাইয়া সাধু শীলের বাড়ীতে উপস্থিত হইল। সাধু তখন সবে স্নান করিয়া অন্দর বাড়ীতে ঢুকিবে, এমন সময় বাসুর ডাক শুনিয়া আবার বাহিরে আসিল। বাসু তাহাকে প্রণাম করিলে সে বলিল—

‘—তোমাকে বাপু চিনবার পারলাম না।  
কার বা বেটা, কিবা নাম, কোথায় আস্তানা॥’

বাসু বলিল, সে গঞ্জের ঘাটে বিশু নাপিতের ছেলে। তাহার কেহ নাই, মা-বাপ ভাই সকলেই মরিয়া গিয়াছে। তখন সাধু শীল আদর করিয়া তাহাকে চণ্ডীমণ্ডপ ঘরে বসাইল এবং অন্দরে যাইয়া গিল্লিকে বলিল, ‘গঞ্জের ঘাটের বিশু নাপিতের ছেলে বাসু আসিয়াছে।’ গিল্লি বলিল, ‘কি প্রয়োজন?’ সাধু বলিল, ‘তাহা তো এখনও শূনি নাই’; এই বলিয়া একটা বালিশ হাতে করিয়া ফিরিয়া আসিয়া বাসুর তথায় আসিবার কারণ জিজ্ঞাসা করিল। বাসু অতি বিনীতভাবে চোখ দুটা মাটির দিকে নত করিয়া বলিল, ‘আমার ঘরে কেহ নাই, আমি একলা, ঘরের লোক খুঁজিতে বাহির হইয়াছি। শূনিয়াছি—আপনার একটা বিবাহযোগ্য কন্যা আছে, যদি আপনি অনুগ্রহ করিয়া আমাদের পরিবারের সঙ্গে কুটুম্বিতা করেন, তবে আমি চিরদিন আপনার অনুগত সেবক হইয়া থাকিব।’ তাহার কথায় কোন জড়তা বা অস্পষ্টতা ছিল না। সাধু শীল এই যুবকটিকে দেখিয়া মনে মনে খুসী হইল এবং পুনরায় অন্দরে যাইয়া গিল্লিকে হাসিতে হাসিতে বলিল, ‘মাণিকতারার বর তো নিজেই আমাদের চণ্ডীমণ্ডপ-ঘরে বিবাহের প্রস্তাব করিয়াছে।’ গিল্লি বলিল, ‘সে ভাল, আমি বেড়ার ফাঁক দিয়া বাসুকে দেখিয়া লইয়াছি, বেশ বর। এখন দুপুর, বেলা হেলিয়া পড়িয়াছে, এমন অতিথিকে তো ভাল করিয়া খাওয়াইতে হয়। তুমি যাও, আমি উনান জ্বালিবার উদ্যোগ করি।’

সাধুর তিনটি পুত্রের একজনও বাড়ীতে নাই। বড় ছেলেটি মাছ ধরিতে বাহির হইয়াছে ; একা সাধু কোন দিক সামলাইবে, এজন্য একটু চিন্তিত হইল। গিন্ধি বলিল, ‘মেজ বউ তুমি রান্না কর গিয়ে।’ অপর পুত্রবধূকে জোগান দেওয়ার জন্য নিযুক্ত করিয়া রান্না ঘরে পাঠাইয়া দিল। বেলা অনেক হইয়াছে, বাসুকে স্নান করিবার জন্য অন্তর হইতে তেল পাঠাইয়া দেওয়া হইল ; বাসু তেল মাখিয়া নদীর ঘাটে স্নান করিতে চলিয়া গেল।

এমন সময়ে বড় ছেলে মস্তবড় একটা বুই মাছ লইয়া আসিল এবং তার পরেই দ্বিতীয়টা কতকগুলি খেলসা, পুটি ও কৈ মাছ ধরিয়া আনিল। ছোট ছেলে মোটা মোটা কতকগুলি চই এবং অন্যান্য শাক লইয়া আসিয়াছে। বাসু স্নান করিয়া আসিলে টাটকা ভাজা মুড়ি তেলনুনে মাখিয়া তাহাকে খাবার দেওয়া হইল। মুড়ির পরে আর এক দফা গুড়ের বাতাসা ও চিড়ার মোয়া আসিল, বড় বড় পাকা ডোয়া ফল ভাজিয়া তাহার মস্ত মস্ত কোয়া, মর্তমান কলা ও তিলের নাড়ু দিয়া আর এক পাত্র সাজান হইল। ইহার পরে ঘন দুধ একবাটী ও শর্করার লাডু দেওয়া হইল। জলখাবার হিসাবে খাওয়াটি বেশ উপাদেয় হইল। বাসু উদরপূর্তি করিয়া খাইয়া চণ্ডীমণ্ডপ ঘরে যাইয়া বেশ আরামে ঘুমাইয়া পড়িল।

আতিথ্য : রান্না ও পরিবেষণ

এদিকে মেজ বউ ডালে কাঁটা দিয়া কড়াইতে চড়াইয়া দিয়াছে, ডাল কিছুতেই গলে না ; বড় বউ মাছ ধুইতে পুকুরঘাটে গেলে কৈ মাছের কাঁটা আজুলে বিধিয়াছে, তাহার যন্ত্রণা দেখিয়া শাশুড়ী সেই কাঁটা-বিধা যায়গায় বাটা লঙ্কা দিয়া তাঙ্গি মারিয়াছেন। মেজ বউ কিছুতেই ডাল গলাইতে পারিতেছে না। নূতন আত্মীয় অতিথি, তাহার পাতে এই ডাল কি করিয়া দেওয়া যায়?

‘বাস্ত হইয়া মেজ বউ ডালে মারে ঘা।

চরকা যেমন ঘ্যানর ঘ্যানর করতে লইল রা।’

রান্নার দেরি দেখিয়া—

‘ভাসুরে করে কিচিরমিচির দেওরে করে রাগ।

ফোঁটা তিলক কাইটা শ্বশুর সাজ্যা আছে বাঘা॥

ক্ষিধার জ্বালায় জ্বল্যা মৈল অজ্ঞা কুটি কুটি।

সোয়ামী আইসা রাগ কর্যা ধন্য চুলের মুঠি॥

মায় আস্যা বউ ছাড়ালো নিল হাতে ধর্যা।

জল পান করিতে দিল তিন ছেলেরে বাড়্যা॥

যাহা হউক, রান্নার পর্ব শেষ হইয়া গেল, বড় ঘরের আজিনায় পাঁচ খানা পিড়ি পড়িল। পাঁচ থালা সাজাইয়া তিন পুত্র সহ সাধু শীল ও নবাগত বাসুকে দেওয়া হইল—

‘পঞ্চ জনের সম্মুখেতে দিল পঞ্চ থাল।

বাসুর থাল চাইয়া দেখ্যা সাধুর চক্ষু হৈল লাল॥

তাহার রাগের কারণ এই যে, বাসুর পাতে কেন ভাজাপোড়া দেওয়া হইয়াছে? এই উপলক্ষে সাধু তাহার গিন্ধির উপর রাগ করিয়া একটা নাতিদীর্ঘ বক্তৃতা করিল; সে বলিল, ‘তোমরা মেয়েমানুষ হইয়া সংসারের রীতি জান না, অনাচারে আমার গৃহ ছারখারে যাইবে। প্রথমবার কি বরকে ভাজাপোড়া দিতে আছে? তাহা হইলে যে আমার এত আদরের মেয়ে শ্বশুর বাড়ীতে যাইয়া শূকাইয়া আধমরা হইবে। শাশুড়ী দিনরাত্র তাহাকে ভাজিবে অর্থাৎ গালিমন্দ দিবে, নন্দাইরা ভাজিবে এবং দেবরেরা কথায় কথায় রাগ করিয়া নূতন বউটিকে জ্বালাতন করিয়া মারিবে—এ সকল কথা তো গৃহস্থ মাত্রই জানে।’ এরূপ অকাট্য শাস্ত্রবচন স্বামীর মুখে শুনিয়া বাসুর থালায় যে সকল ভাজাপোড়া দেওয়া হইয়াছিল, তাহা গিন্ধি উঠাইয়া লইল। কিন্তু বাসু ইহাতে খুব সন্তুষ্ট হইল না—

‘বাসু ভাবে হায় কি হৈল এই না কর্মে ছিল।

মস্তবড় কৈ মাছ ভাজা আর বেগুন পোড়া গেল॥

আলু ভাজা, বেগুন ভাজা, ভাজা তিলের বড়া।

বেসন দিয়া উকি ভাজা চাপটি কড়কড়া॥

এই সকল মনের মত দ্রব্য পাইয়া সে খাইতে পাইল না। কিন্তু দুঃখের মধ্যে একটা সান্ত্বনার কথা ছিল; সে যে এই বাড়ীর ভাবী জামাই হইবে, তাহার ইজিত শ্বশুর মশায় দিয়াছেন।

ছোট বউ আসিয়া কলাই শাক দিয়া রান্নাকরা কৈ মাছের মুড়িঘণ্ট অনেকখানি দিয়া গেল। শুক্তানি দিয়া বাসু অনেকটা ভাত খাইয়া ফেলিল। তারপর খেলসা—পুঁটির চচ্চড়ি আসিল, বাসু তাহার প্রতি যথেষ্ট ন্যায়াবিচার করিল। মেজো বউ কিছুতেই ডাল গলাইতে পারে নাই, সেই আধাগলা ডাল বাটিতে পড়িয়া রহিল, বাসু তাহা স্পর্শ করিল না। কিন্তু বোয়ালের পেটি দিয়া মুগডালের যে ঘণ্ট রান্না হইয়াছিল, তাহা বাসু খুব তৃপ্তির সঙ্গে খাইল, তবে সেই ঘণ্টে কিছু অতিরিক্ত মাত্রায় লজ্জা পড়াতে তাহা টকটকে লাল বর্ণ হইয়াছিল, খাইতে বেশ মুখরোচক হইয়াছিল, সুতরাং নাকের জলে চোখের জলে মিশাইয়াও বাসু তাহার পুরা একবাটি খাইতে ছাড়িল না। রুই মাছের ঝোল সে সাবাড় করিয়া পুনরায় শূন্য বাটিটার উপর দৃষ্টিপাত করিল, এক বউ আসিয়া বাটিটা আবার ভর্তি করিয়া দিল। একবাটি আমসীর অম্বল সে এক চুমুকে খাওয়াই ফেলিল এবং উপসংহারে এক বাটি ঘন দুধ ও একবাটি দই খাইয়া সে স্বস্তির নিশ্বাস ফেলিল। সাধু শীল বাসুর খাওয়া দেখিয়া খুসী হইল—

‘বাসুর খাওয়া দেখ্যা সাধু খুসী হৈল মনে।

এই ছেলে পরাণে বাচ্যা থাকবে অধিক দিনে॥

সাধু তাহার তিন পুত্র লইয়া বালুখালিতে মুখ ধুইতে গেল, কিন্তু বাসু আচমনশালায় যাইয়া মুখ ধুইয়া আসিল।

ভোজনান্তে তিন পুত্র ও বাসুকে লইয়া গিয়া সাধু শীল চণ্ডীমণ্ডপ ঘরে বসিল। সেখানে সে বাসুকে মন খুলিয়া সোজাসুজি ভাবেই কয়েকটি কথা বলিল, ‘আমার মাণিক যেমন রূপসী, তেমনিই গুণশীল। সে একা সংসারের কাজ এতটা করিতে পারে যে তা দেখিলে পুরুষ মানুষেরও তাক লাগিয়া যাইবে, কিন্তু মেজাজটা একটু কড়া, অথবা হস্তক্ষেপ বা সর্দারী করিতে আসিলে, তাহার নাক কাটিয়া রাখে—এই যা একটু দুর্দান্ত প্রকৃতি। তোমার ঘরে যাইবে, সে ভাল কথা ; কিন্তু তোমায় একটা কথা জিজ্ঞাসা করি—তোমার মা-বাপ নাই, ঘরে দ্বিতীয় ব্যক্তি নাই, মাণিক কেমন করিয়া এই অল্প বয়সে ঘরের কাজ একলা করিবে, যোগান দেওয়ার পর্যন্ত লোক নাই। কাহার সঙ্গেই বা দুদণ্ড আলাপ করিয়া জুড়াইবে? আর তুমি পুরুষ ছেলে, রাতবিরাতে যদি কোন সময় বাড়ীতে না থাক, তবে একলা ঘরে সে কি করিয়া থাকিবে?’

### বিবাহের দিন স্থির

তিন ভাইয়েরই বাসুকে দেখিয়া পছন্দ হইয়াছে, তাহার একজন বলিল, ‘কেন বাবা, আমাদের বোনের মেয়ে পঞ্চ তো সম্প্রতি বিধবা হইয়াছে, সে সর্বদা খাওয়া-পরার কথা ভাবে...’ বাসু তখনই বলিল, ‘বেশ তো আমি তাহাকে আদর করিয়া নিজ বাটীতে লইয়া যাইব, সে যতদিন বাঁচিবে, আমি তাহাকে যত্নপূর্বক অনু-বস্ত্র দিয়া পালন করিব।’

সাধু শীল এবার আর অমত করিল না। বউ তিনজন ও গিন্নি, তাহারা সকলেই অনুকূল মত প্রকাশ করিল।

বিবাহের দিন বৈশাখ মাসের প্রথমভাগেই হইবে নির্দিষ্ট হইল—

‘বিকাল বেলা খাইল বাসু দুগ্ধ আর চিড়া।

ধুতিচাদর লৈয়া বাসু বাড়ীতে আইল ফিরা॥

বাসু গণক দিয়া পঞ্জিকা দেখাইয়া ৫ই বৈশাখ বিবাহের দিন স্থির করিল। সে ৩০০ টাকা পণস্বরূপ সাধু শীলকে দিল। যথারীতি বিবাহ হইয়া গেল।

‘বিয়ার রাতে তিন বউ আর পাড়ার যত মাইয়া।

মনের মত আমোদ করে নানা গান গাইয়া॥’

স্ত্রী-আচার সমস্ত সুসম্পাদিত হইল। মাতা চোখ মুছিতে মুছিতে কন্যাকে আশীর্বাদ করিল। অন্যান্য আচারের পরে মাকে প্রণাম করিয়া মাণিকতারা তাহার হাতে কিছু ইন্দুরের মাটি দিল—এই মাটি দেওয়ার মন্ত্রটি উচ্চারণ করিতেও সে ভুলিল না—

‘এত দিন যা খাইয়াছিলাম মা ফিরাইয়া দিলাম তাই।  
জন্মের মত ঋণ শোধ হইল এখন আমি যাই॥’

এই মন্তব্যটি লইয়া মুসলমান কবি একটু শ্লেষ করিয়া বলিয়াছেন—

‘সেক বয়াতি জামাৎ উল্লা হাসি হাসি হয়।  
কথা শূনি দুঃখে মরি এই বা কি আর হয়॥  
মায়ের বুকের একফোঁটা দুধ হয় যে মহাঋণ।  
দুনিয়ার কেউ শুধিবারে নাারে সেই ঋণ॥  
হেন্দুর শাস্ত্র মহাশাস্ত্র এই কথা কি ঋণটি।  
বেবাক ঋন শূইধা গেল দিয়া ইন্দুর মাটি॥

যাওয়ার সময় মাণিকতারা ছলছল চোখে তাহার মাতাকে বলিয়া গেল, যেন পঞ্চুকে শীঘ্র পাঠাইয়া দেওয়া হয়।

হ রি কে ল পাখী খা ও য়া র সা ধ

বর ও কনে বাড়ী ফিরিয়াছে। কানুর মা পড়শী লইয়া আসিয়া বউকে দেখিয়া খুব খুসী, তারা বলাবলি করিতে লাগিল, যোটক অতি চমৎকার হইয়াছে। বাসু আর ঘর হইতে বাহির হয় না।

একদিন দুপুর বেলা খাওয়াদাওয়ার পরে বাসু খুব গরম বোধ করিল। গ্রীষ্মকাল—সে ঘরে থাকিতে পারিল না, বাহির হইয়া বাগানের গাছপালা দেখিতে লাগিল, সেই সকল নূতন পাতা জন্মিয়াছে, তাহাদের স্পর্শে শীতল হইয়া বায়ু তাহার অঙ্গ স্পর্শ করিল, সে কতকটা সোয়াস্তি বোধ করিল এবং দূর আকাশে যেখানে কতকগুলি পাখী উড়িতেছিল সেইদিকে এক দৃষ্টে চাহিয়া রহিল।

এদিকে মাণিকতারা স্বামীর খাওয়ার পরে নিজেও আহার শেষ করিয়া পান সাজিয়া নিজে খাইয়া পানের বাটা হাতে করিয়া স্বামীকে খুঁজিতে লাগিল। খুঁজিয়া খুঁজিয়া সে হয়রান হইল, কোথাও বাসু নাই। তারপরে গাছগুলির ফাঁক দিয়া দেখিতে পাইল একটা দূর গাছের নীচে দাঁড়াইয়া বাসু আসমানের দিকে চাহিয়া কি দেখিতেছে।

তাড়াতাড়ি স্বামীর কাছে যাইয়া সে বলিল, ‘আমি সারা বাড়ী তোমাকে খুঁজিয়া মরিতেছি, তুমি কোথায় ছিলে বল তো? এই গাছতলায় দাঁড়াইয়া উর্ধ্বমুখে কাহার চিন্তা করিতেছ? আমাকে এই কয়েক দিনের মধ্যেই মন হইতে বিদায় করিয়া দিয়াছ?’

বাসু বলিল—

‘তুই আমার কলিজার হাড় চোখের কাজল।  
কিবা কথা কইলি তারা, হইলা কি পাগল॥’



মাণিকতারা বলিল, ‘তবে আকাশের দিকে এমনধারা ধ্যানস্থ হইয়া কি দেখিতেছিলে?’

বাসু বলিল, ‘এই গাছটার উপর হরিকেল পাখী বাসা করিয়াছে, আমি হরিকেল পাখীর মাংস বড় ভালবাসি, কিন্তু পাখীগুলি টু শব্দটী হইলে উড়িয়া আকাশের উপরে—খুব উচুতে উড়িয়া যায়। এগুলি ধরিবার কোন উপায় দেখিতে পাই না।’

মাণিকতারা স্বামীকে আদর করিয়া বলিল, ‘এই কথা! তুমি হরিকেল পাখীর মাংস ভালবাস, আমাকে আগে বল নাই কেন? আমি এই পাখী ধরিবার কৌশল জানি। তুমি এখনই আমার বাপের বাড়ী চলিয়া যাও, সম্ভ্যার আগে ফিরিয়া আসা চাই। সেখানে বলিও, মাণিকতারা তাহার বাঁটুলি ও ধনুকটা চাহিয়াছে।’

বাসু চলিয়া গেল। এই অবসরে মাণিকতার কতকগুলি মাটির গুটি ও তীর ঘরে বসিয়া তৈরী করিল। সম্ভ্যার পূর্বেই বাঁটুলি ও ধনুক লইয়া বাসু বাড়ী ফিরিল এবং স্ত্রীর হাতে দিয়া বলিল, ‘এসকল তো পাইলে, এখন বাঁটুলি ও ধনুক চালাইবে কে?’ উত্তরে তাহার স্ত্রী বলিল, ‘কেন আমার ধনুক ও আমার বাঁটুলি আমিই চালাইব, ইহা আবার চালাইবে কে? এখন তুমি বল কয়টা হরিকেল পাখী তুমি চাও?’

বাসু বলিল, ‘আজকার জন্য দুইটা মার, তোমার ওস্তাদের পরিচয় পাইলে কাল হইতে রোজ এক এক গন্ডা করিয়া আমায় দিও।’

মাণিকতারা দুইটা গুলি লইয়া সম্ভান করিল। দেখিতে দেখিতে দুইটা পাখী তাহার পায়ের কাছে পড়িয়া আছাড়িবিছাড়ি করিতে লাগিল।

বাসু কহিল, ‘ধন্য মেয়ে, একেবারে দুইটাকে শিকার করিয়াছ? তোমার হাত এত পাকা, তুমি যে আমায় চমকাইয়া দিয়াছ!’

তাহার স্ত্রী বলিল, ‘আমি তীর দিয়া একবারে চারটা মারিতে পারি ও বাঁটুলি দিয়া একসঙ্গে পাঁচটা শিকার করিয়াছি। আমাদিগের অঞ্চলে রাজবাড়ীতে দারু ও সুমারু নামে কোচ জাতীয় দুইজন ধানুকী কাজ করিত। তারা এমনই তীরন্দাজ ছিল যে, তারা এক-একজন একশত শত্রু ঘায়েল করিতে পারিত। আমি এই দুই ওস্তাদের কাছে তীরচালনা শিখিয়াছি। যদি একশ শত্রু আমার কাছে দাঁড়ায় ও আমার হাতে তীরধনুক থাকে, তবে সেই একশ লোককে আমি হটাইয়া দিতে পারি।’

বাসু নিশ্বাস ফেলিয়া ভাবিল : ‘এমন স্ত্রী যদি আমার সঙ্গী হয়, তবে আমি রাজা হইয়া সিংহাসনে বসিতে পারি।’

### স্বামী র মনের কষ্ট

কিন্তু মাণিকতারা দেখিতে পায়, তাহার স্বামী যেন সর্বদা বসিয়া বসিয়া কি ভাবে। সে কাছে গেলে তাহার দিকে চাহিতে লজ্জা পায় ; কি যেন একটা গোপন ব্যথা সে ঢাকিয়া রাখিতে চেষ্টা করে, তাহার পূর্বের প্রফুল্লভাব আর নাই, এমনকি তাহারও সঙ্গ ছাড়িয়া সে একলা থাকিতে ভালবাসে।

মাণিকতারা ভাবিয়া পায় না তাহার স্বামীর কি হইয়াছে, অথচ সে নিজে না বলিলে উপযাচিকা হইয়া তাহার মনের কথা জিজ্ঞাসা করিতে সে সজ্জাচ বোধ করে। অথচ স্বামী-স্ত্রীর মধ্যে যদি একটা সরল ভাব না থাকে তবে দাম্পত্য জীবন সুখের হয় না। মাণিকতারা ভাবিয়া ভাবিয়া কৃশ হইয়া গেল।

কিন্তু একদিন সে মরীয়া হইয়া স্বামীর কাছে উপস্থিত হইয়া জিজ্ঞাসা করিল, ‘তোমার সোণামুখের এরূপ বিবর্ণতা আমি আর সহ্য করিতে পারিতেছি না। বল, তোমার কি হইয়াছে? আমাকে দেখিয়া তুমি পলাইয়া ফের কেন ; এভাবে কি সংসারের শান্তি থাকিতে পারে? বল তো প্রাণের স্বামী তোমার কি হইয়াছে, তোমার পায়ে যদি কুশ-কণ্টক বিধে তাহা উঠাইয়া ফেলিতে আমি যে প্রাণ পর্যন্ত দিতে পারি, তাহা কি তুমি জান না?’ বলিতে বলিতে মাণিকতারা আসিয়া বাসুর হাত দুটি ধরিয়া সজল চোখে মিনতির সুরে বলিল—

...  
‘আমারে না শুনাইলে কথা, খাইব না আর ভাত॥  
সেই কথাটা কও না পতি আমি তোমার দাসী।  
আমারে কহিতে ডরাও, আমি কি অবিশ্বাসী॥’

বাসু বলিল, ‘তুমি আমার গোপন কথার মালিক। আমি অবশ্য তোমাকে সকল কথা খুলিয়া বলিব, কিন্তু তারা, বড় ক্ষুধা পাইয়াছে, তুমি যাইয়া ভাল করিয়া রান্না কর। আমি তোমার সঙ্গে খাওয়ার পরে মনের সমস্ত কথা তোমাকে খুলিয়া বলিব।’ মাণিকতারা খুব রসাল করিয়া হরিকেল পাখীর মাংস রান্না করিল। উভয়ে তৃপ্তির সঙ্গে খাইয়া শয়নঘরে আসিয়া বসিল।

বাসু মাটি খুঁড়িয়া সেই অলঙ্কার ও মোহরের হাঁড়িটা বাহির করিল। জহরত ও অলঙ্কারের সেই বিশাল পোঁটলাটা দেখিয়া তারা বিস্মিত হইল—

...  
‘স্বপ্ন দেখিা মানুষ যেমন উঠেরে চমকি॥  
মাণিক তেমনই উঠল চক্ষু দুইটি মেইলা।  
পতির দিকে চাহি কহে এ সব কোথা পাইলা॥’

বাসু বলিল, ‘সেই কথা তোমাকে জানাইতে ভয় হয়, এই জন্য আমি খুব আতঙ্কিত। তোমার প্রাণে পাছে ব্যাথা দেই, এই ভয়ে আমি তাহা বলিতে পারি নাই। কানুদাদা ও তাহার মা আমাদের বড় দুঃখ-বিপদের দিনে যে উপকার করিয়াছে তাহা বলিবার নহে। শৈশবে কানুদাদার সঙ্গে বনে-জঙ্গলে ঘুরিয়া আমি কত ফল চুরি করিয়া খাইয়াছি। আমার মার অবস্থা অতি খারাপ ছিল, কানুদাদার মা আমাকে একরূপ প্রতিপালন করিয়াছে, ইহাদের ঋণ আমি জীবনে শোধ করিতে পারিব না। বড় হইলে কানুদাদা আমাকে চুরি ডাকাতি শিখাইয়াছে, মানুষের মাথায় বাড়ি দিয়া নুঠরাজ করা আমাদের অভ্যাস হইয়া গিয়াছে। এই সকল কথা শুনিলে

তোমার যদি আমার প্রতি ঘৃণা হয়, আমার উপর পাছে তুমি বিরূপ হও—এই আশঙ্কায় আমি মনে মনে বড় কষ্ট পাইতেছি। এই বিশ-পঁচিশ দিন আমি অর্থের চেষ্টায় কানুদার সঙ্গে বাহির হইতে পারি নাই। তোমার চাঁদমুখখানি যদি আমার প্রতি ঘৃণায় ফিরাইয়া লও, তবে আমি কোথায় যাইব? আমার পায়ের মাটি যে সরিয়া যাইবে।’

স্ত্রীর ভরসা দেওয়া

এই কথা শুনিয়া তারা হাসিতে হাসিতে বলিল—

‘এই কারণে প্রাণপতি তোমার এত ডর।  
সব কাজে আমি হব তোমার দোসর॥  
নারীর ইষ্ট দেখ হৈল পতি মহাজন।  
বিনা কথায় নারী করবে তার পথে গমন॥  
কুকাজ করিয়া যদি দিতে বসে প্রাণ।  
ঘরের নারী রাখবে দিয়া আপন জ্ঞান॥  
আমি হব তোমার দাসী ভাবনা লজ্জা নাই।  
আমার কাছে আছে যা জ্ঞানেন গোসাঞি॥’

বাসু নিজের স্ত্রীর কথা শুনিয়া খুব উৎসাহিত হইল, তাহার দেহে যেন নূতন বল সঞ্চারিত হইল। সে তখন খুলিয়া সমস্ত কথা তারার নিকট ব্যক্ত করিল, ‘আমি আর কানুদা ডাকাতি করি, কিন্তু আমাদের এক প্রধান শত্রু খমরার কালু সর্দার, তাহারও একটা দল আছে। তাহার সঙ্গে আমরা কিছুতেই আঁটিয়া উঠিতে পারি না, কতবার তাহা দ্বারা ধৃত হইয়া যে কত লাঞ্ছনা পাইয়াছি ও বিপদে পড়িয়াছি তাহা বলিবার নহে, কেবল প্রাণটা রাখিয়া ছাড়িয়া দিয়াছে। যাক সে কথা, কাল একটা খুব মস্ত সুযোগ হইবে। লাটের কিস্তি লইয়া কতকগুলি লোক বেলপাহাড়ী দিয়া চলিয়া যাইবে, তাহারা যখন রাখালরাজ্যের দীঘির পথে আসিবে, তখনই আমরা তাহাদের থলিয়া গুলি লুট করিব। কানুদাদার সঙ্গে এই পরামর্শ পাকা হইয়া আছে, কিন্তু রাত্রে আমি গেলে তুমি একলাটী কি করিয়া থাকিবে, তাই ভাবিয়া আমি কিছু ঠিক করিতে পরিতোষি না, কোন বিপদ আসিলে তোমাকে সাহায্য করিবার কোন লোক নাই।’

মাণিকতারা বলিল, ‘তুমি সে বিষয়ে নিশ্চিন্ত থাক, জ্ঞানিও আমি মেয়ে মানুষ হইলেও কুড়িটা পুরুষকে ঘায়েল করিতে পারি, আমি আর পঞ্চ থাকিব ; তুমি স্বচ্ছন্দে চলিয়া যাও।’ পরম সন্তোষ সহকারে বাসু যাইবার জন্য প্রস্তুত হইল। সেই গুপ্ত অলঙ্কারের ভাঙ তুলিয়া আনিয়া মাণিকতারাকে সে নিজ হাতে সাজাইল। তারা সেই সকল গয়না পরিয়া অঙ্গরায় ন্যায় ঝলমল করিয়া উঠিল। বাসু তাহার এই পরীর মত সুন্দরী স্ত্রীকে আজ কত সোহাগ ও আদর করিতে লাগিল। স্বামীর আদরে মাণিকতারা যেন হাতে স্বর্গ পাইল।

‘নারীর কাছে পতি যেমন অশ্বেশ্বর নয়ন।  
 পতি হৈল চাকের মধু, বৃক্ষেতে যেমন॥  
 পতির ভালবাসা পাইলে জুড়ায় নারীর বুক।  
 পতির কাছে আদর পাইলে নারীর যে কত সুখ॥  
 গয়নাগাটি পইরা তারা মনে সুখ পাইল।  
 বাসুর চরণের ধূলা মাথায় লইল।’

### ছয় তোড়া টাকা

গাছের আগ্রভাগে রোদ দেখা যাইতেছে, বেল প্রায় শেষ। কানু-বাসুর দলে বিশ জন বলিষ্ঠ লোক, তাদের হাতে ঢাল, সড়কি ও লাঠি। কানু আর বাসুর হাতে এক-একখানি হেঁড়া মাদুর। পলাশবাড়ীর কাছে যাইয়া তাহারা প্রতীক্ষা করিয়া রহিল। কানু ও বাসু হেঁড়া মাদুর পাতিয়া বসিয়া কতকগুলি চিড়া ও ‘চিনিচাঁপা’ কলা খাইয়া পেট ভরাইল। অদূরে রাখালরাজার দীঘি, জল অতি নির্মল স্ফটিকের মত স্বচ্ছ। সেই জল আঞ্জলি ভরিয়া পান করিয়া কানু দলের লোকদিগকে বলিল, ‘তারা টাকার থলিয়া লইয়া এই দীঘির পাড় দিয়া যাইবে। আজ ভাগ্যে শুক্রবার, কালু আজ আর বাহির হইবে না, জুম্বাবারে তারা দারু খায় না, সুতরাং এটা মস্তবড় সুযোগ, তোরা এখানে বসিয়া থাক। তোড়া লুটিয়া চলিয়া যাইবি, আর শত্রুপক্ষীয় কাহাকে পাইলে দরকার হইলে এই দীঘিতে কাটিয়া ফেলিয়া কালো জল লাল করিয়া ছাড়বি।’

অলক্ষণ মধ্যেই দূর হইতে গব্বুর গাড়ীর ঘ্যারঘ্যারানি শব্দ শোনা গেল। কানু বলিল, ‘ঐ আসিতেছে। তোরা ঠিক হইয়া লাঠি হাতে দাঁড়া।’ ইহার মধ্যেই হুম হুম করিয়া ছয় জন জোয়ান মর্দ ছয়টা বড় টাকার তোড়া মাথায় করিয়া আসিয়া পড়িল, একজন ঘোড়াসোয়ার, তাহাদের অগ্রবর্তী পাহারা। ইঠাং ঘোড়ার পায়ে ধূপ করিয় লাঠির বাড়ি পড়িল এবং ঘোড়াসোয়ারের মুণ্ডুটা সেইখানে গড়াইয়া পড়িল। ছয়টা বাহকের মৃতদেহ পরক্ষণেই দীঘির পাড়ে পড়িয়া হইল এবং তাহাদের মাথার টাকার তোড়া অদৃশ্য হইল। কানু সেই টাকার তোড়াসহ কয়েকজন লোক ও বাসুকে গঞ্জের হাটে বাড়ীতে পাঠাইয়া দিল। কিন্তু ইহার মধ্যে রাখাল-রাজার দীঘির পাড়ে একটা ধস্তাধস্তি কাণ্ড উপস্থিত হইয়াছে। কালু সর্দার কোন ক্রমে সংবাদ পাইয়াছে যে তাহার মুখের শিকার কানু ও তাহার দলে লইয়া গিয়াছে। অবিলম্বে কালু সর্দার পঞ্চাশ জন লোক লইয়া কানু ও তাহার দলকে অনুসরণ করিল। কানু ও তাহার দলের পঁচজন লোক বন্দী হইল।

### কালুর হুকুম

কালু সর্দার হুকুম দিল, ‘ঐ শালা কানুকে বাঁধ নায়ের গুড়া দিয়া’। পঁচজন লোককে পিঠমোড়া করিয়া হাত বাঁধিয়া তাহারা নৌকায় উঠাইল। কালু হুকুম করিল, ‘কাল সকালে ইহাদের বিচার হইবে। ইহাদের সকলকে খণ্ড খণ্ড করিয়া কাটিব। আজ

বিশ্রাম করা যাক। তোমাদের মধ্যে যাহাদের অবসর আছে, তাহারা মুরগী রসুই কর এবং খিচুড়ি রান্না কর। আজ রাত্রে খাইয়াদাইয়া বিশ্রাম করা যাক। কাল ইহাদিগকে হত্যা করিয়া টাকার তোড়ার সম্প্রদান করা যাইবে।’

ইহার মধ্যে ছয় তোড়া টাকা লইয়া বাসু আসিয়া কানুর মার বাড়ীতে পৌছিল। কানুর মা বলিল, ‘সে কি বাসু টাকা তো আসিল কিন্তু আমার কানুকে কোথায় রাখিয়া আসিলে?’

বাসু বলিল, ‘মাসীমা, ভয় নাই, কানুর সঙ্গে আমার দলের লোক আছে, আমি টাকার তোড়া কয়েকজন বাহকের কাঁধে চড়াইয়া দিয়া শীঘ্র শীঘ্র আসিয়াছি, কানুদা এখন আসিয়া পড়িবে।’

এমন সময় ৪।৫ জন লোক ছুটিতে ছুটিতে আসিয়া বাসুকে একটা নিরালা জায়গায় লইয়া গিয়া সমস্ত অবস্থা জানাইল। কানু ও তাহাদের দলের কয়েকটি লোককে যে কালু সর্দার ধরিয়া লইয়া গিয়াছে এবং পরদিন তাহাদিগকে কাটিয়া ফেলিবে এবং এখানে বাড়ী লুট করিতে আসিবে, এই সমস্ত সংবাদ বাসুকে দিল। বাসুও এই সংবাদে অত্যন্ত অভিভূত হইয়া পড়িয়া মাণিকতারার কাছে সমস্ত অবস্থা জানাইল এবং কানুদাকে উদ্ধার করিতে যে সে এখনই যাইবে তাহাও বলিল।

মাণিকতারাকে একা বাড়ীতে রাখিয়া বাসু রওনা হইয়া গেল, সে পথে সংবাদ পাইল কালু সর্দার আজ আর তাহার বাড়ীতে ফিরিবে না, খালের ঘাটে তাহার নৌকা বাঁধা। সে এবং তাহার দলের লোকেরা আহাতিদের পরে বেশ ঘুমাইতেছে।

কিন্তু বাসু সেই নৌকা আক্রমণ করিতে সাহস পাইল না। সুবিধার প্রতীক্ষায় সে একটা ঝোপের মুখে লুকাইয়া রহিল।

### নর্তকী সাজা ও দুলুকে বাঁধিয়া ফেলা

মাণিকতারা কানুকে কিরূপে উদ্ধার করিবে, তাহাও চিন্তা করিতে লাগিল। ভাবিয়া চিন্তিয়া সে তাহাদের ভাল নানা রঙের সুন্দর নৌকাখানি সাজাইতে হুকুম দিল এবং স্বামীর অনুরক্ত কয়েকজন খুব বলিষ্ঠ ডাকাতকে নৌকাতে উঠিতে বলিল। এদিকে ঘরে আসিয়া পঞ্চকে নানারূপ অলঙ্কারে দেবী প্রতিমার মত করিয়া সাজাইল এবং নিজেও সুন্দর বেশভূষায় সজ্জিত হইয়া নৌকায় উঠিল। নৌকা খয়রা খালের উপর দিয়া হেলিয়া দুলিয়া চলিল। সে জানিতে পারিয়াছিল যে আজ কালু সর্দার বাড়ীতে নাই, সুতরাং সেই বাড়ীর দিকে নৌকাখানি বাহিয়া লইয়া যাইতে আদেশ দিল। পঞ্চু খেমটা সাজিয়া ঝুমুর ঝুমুর শব্দে নূপুর বাজাইয়া নাচিতে লাগিল এবং মাণিকতারা তাল রাখিয়া গান করিতে লাগিল, দলের লোকেরা খুব হাস্যপরিহাস করিয়া দোহার করিতে লাগিল।

কালু সর্দার বাড়ী ছিল না, কিন্তু তাহার লক্ষণ শিরোমণি যুবক পুত্র দুলু বাড়ীতেই ছিল। সে দেখিল—একখানি সুন্দর রঞ্জীন নৌকা তাহাদের খাল দিয়া গিয়াছে, তাহাতে বহু দীর্ঘ জ্বলিতেছে : সেই দীপালোকে নানা অলঙ্কারে ভূষিতা এক ঘোড়শী রমণী নাচিতেছে এবং আর একটি সুন্দরী যুবতী অতি মিষ্ট স্বরে গান



করিতেছে। সজ্জীদের কলহাস্যে এবং পরিহাস-রসিকতায় নৌকাখানি যেন পাখীর মত উড়িয়া চলিয়াছে। কালু সর্দারের উপযুক্ত পুত্র দুলু শেখ চিংকার করিয়া বলিল—

‘সুন্দর নৌকাতে চৈড়া নাচ তোমরা কে?’

‘ভাল চাস্তো কালুর ঘরে পরিচয় দে।’

তাহার আদেশে মাঝিরা নৌকাখানি কালু সর্দারের ঘাটে লাগাইল। মাণিকতারা বলিল, ‘আমরা কাজি সাহেবের লোক। তিনি চরের উপর তাঁবু খাটাইয়া আছেন, আজ বাকী রাতটুকু আর আমাদের দিয়া তাঁহার কোন কাজ নাই ; আমরা এই সুযোগে একটু আমোদপ্রমোদ করিতে বাহির হইয়া পড়িয়াছি।’

‘এই সময়ে আমরা কিছু দাবু খাইয়া নাচি।

পাইলে বিদেশে বঁধু বুকে করে রাখি ॥

আপনার কাছে আসছি দাবু কর দান।

নৌকাতে আসিয়া বেস ঠান্ডা কর প্রাণ ॥’

দুলু শেখ মহানন্দে দাবুর ভাঁড় লইয়া নৌকাতে আসিয়া বসিল। মাণিকতারার ইজিাতে মাঝিরা খুব দ্রুতবেগে বাড়ীর দিকে নৌকা চালাইয়া গঞ্জের হাটে পৌঁছিল। দাবুপানে উন্মত্ত দুলু শেখের অন্য কোন দিকে খেয়াল ছিল না।

বাড়ীতে আনিয়া তারা দুলুকে একটা লোহার শিকল দিয়া ধামে বাঁধিল এবং দ্রুতমুখে কালু সর্দারের নিকট খবর পাঠাইল যে কানুকে খালাস দিলে তবেই দুলুর প্রাণের আশা থাকিবে। কালু যদি কানুর কোন অনিষ্ট করে, তবে ‘মাণিকতারার হাতে যাবে দুলু চোরার মাথা।’

এইরূপে মাণিকতারার কৌশলে ও সাহসে বাসু ও কানু বিপনুত্ব হইল।

### আলোচনা

স্বর্গীয় বিহারীলাল চক্রবর্তী কর্তৃক এই পালাটি সংগৃহীত হইয়াছিল। তিনি পালাটি আমাকে পাঠাইয়া দিবার পরে হঠাৎ পরলোকগমন করেন। অবশ্য তিনি বহুদিন হইতে ম্যালেরিয়া রোগে ভুগিতেছিলেন, কিন্তু তথাপি আমরা তাঁহার এই আকস্মিক মৃত্যুর জন্য প্রস্তুত ছিলাম না। আরও দুঃখের বিষয় এই পালাটি তিনভাগে বিভক্ত, তাহার প্রথমার্শ্ব বিহারী বাবু সংগ্রহ করিয়া গিয়াছেন। তিনি কাহার নিকট হইতে এই অংশ পাইয়াছিলেন এবং অপর দুই ভাগ কোথায় পাওয়া যাইবে, তাহার কোন সন্ধানই আমাকে দিয়া যাইতে পারেন নাই। শেষ পত্রে তিনি কেবল এই লিখিয়াছিলেন যে, পালাটী দীর্ঘ এবং একজন গায়ের সমস্ত পালাটী জানে না, যাহারা বাকী দুইভাগ জানে তাহাদের বাড়ী কতকটা দূরে ; সুতরাং সমগ্র পালাটী সংগ্রহ করিতে একটু বিলম্ব হইবে। কিন্তু এই বিলম্ব চিরদিবসের বিলম্বে পরিণত

হইল। পালায় বর্ণিত স্থানগুলি ঘটনাটার লীলাস্থল, ব্রহ্মপুত্র নদ, গঞ্জের হাট, খয়রা খাল, বাগুখালি দশ কাহনিয়া, সেরপুর প্রভৃতির উল্লেখ দ্বারা স্পষ্টই মনে হয় যে সেরপুর অঞ্চলে খোঁজ করিলে হয়ত এই গানের অবশিষ্টাংশ মিলিয়া যাইতে পারে, আমি এতদর্থে চেষ্টার ত্রুটি করি নাই। প্রথমত চন্দ্রকুমার দে মহাশয়কে পাঠাইয়াছিলাম। তিনি এই গানের কিছু কিছু ভগ্নাংশ সংগ্রহ করিলেও বাকী অংশ উদ্ধার করিতে পারেন নাই। শ্রীযুক্ত আশুতোষ চৌধুরী এবং কবি জসিমুদ্দিন সেরপুরে যাইয়া বিফলমনোরথ হইয়া ফিরিয়া আসিলেন। বিহারী বাবুর বাড়ীতে পরিত্যক্ত কাগজপত্র হইতে এই গানটির কোন হদিস পাওয়া গেল না, তথাপি আমি এ সম্বন্ধে নিরাশ হই নাই। ভাবিয়াছিলাম একদিন না একদিন আমার চেষ্টা সাফল্যমণ্ডিত হইবেই। কিন্তু বিশ্ববিদ্যালয় আমাকে কাজ হইতে অবসর দেওয়াতে আমার যে সুযোগ-সুবিধা ছিল, তাহা চলিয়া গেল। তাহার পরেও আমি চেষ্টা করিয়াছি, কিন্তু এই পদ্ধীগীতিকা সংগ্রহ করিতে যে ধৈর্য ও সহিষ্ণুতার দরকার হয় তাহা সময়সাপেক্ষ। কিছুদিন সেই স্থানে থাকিয়া নানাজনের দ্বারা চেষ্টা না করিলে সে কাজ সিদ্ধ হইবার নহে।

ভগিতায় দুইজন কবির নাম পাওয়া গিয়াছে। একজনের নাম আমীর, পালার বন্দনাগীতিটা তিনিই লিখিয়াছেন। তিনি বলিতেছেন, ‘আমি অতি বৃদ্ধ হইয়া পড়িয়াছি, তার উপর বিদ্যাবৃদ্ধি অতি সামান্য, আসরে আমার মত নির্গুণকে আপনারা আদর করিয়া থাকেন, ইহাই আমার জোর।’ এই সকল কথায় মনে হয়, তিনি শিক্ষিত না হইলেও পালাগান রচনা করিয়া সে অঞ্চলে তাঁহার বেশ প্রতিষ্ঠা হইয়াছিল। গানটা আদ্যন্ত পড়িয়া দেখিবেন, তিনি সরস্বতীর বরপুত্র না হইলেও প্রকৃতির বরপুত্র; তাঁহার মুখে কবিতা অনর্গল আসিয়াছে, ঘটনা নিয়ন্ত্রণ ও বিষয়বস্তুর প্রতি তাঁহার লক্ষ্য রাখার ক্ষমতা অদ্ভুত। এই গানের যে-সকল স্থান আমি উদ্ভূত করিয়াছি, তাহার ভাষা কতক কতক আমি বদলাইয়া দিয়াছি, তাহা না হইলে তাহা একেবারে দুর্বোধ্য হইত। মূল গল্পটা পূর্ববক্তা-গীতিকায় পাইবেন। সেখানে দেখিবেন, ভাষার রূপ একবারে প্রাকৃত। ‘নাটের খতি’ অর্থ যে নাটের কিস্তি তাহা সহজে কে বুঝিবে?

এই আশ্চর্য্য কবি যখন ব্রহ্মপুত্রের বর্ণনা করিয়াছেন তখন সেই মহান ও ভৈরব জলপ্রবাহের দর্শনে কবির স্বাভাবিক বিস্ময় যেন ফুটিয়া বাহির হইয়াছে; ইহার বাণী ঋদ্ধাক্ষরা; বাসুর মায়ের মৃত্যু ও কবিরাজের চিকিৎসা দুইটি পৃষ্ঠার মধ্যে যেভাবে চিত্রিত হইয়াছে, তাহা অদ্ভুত শক্তির পরিচায়ক। এই বর্ণনার একদিকে কবুগরস, অপরদিকে ব্যাঙ। চিকিৎসক জাতির প্রতি কবির একটা অশ্রদ্ধা হৃদয়ের খুব নিভৃত্তে বিদ্যমান ছিল, কিন্তু তাহা অতিমাত্র পরিহাস-রসিকতা বা অত্যধিক কবুগরস দ্বারা আচ্ছন্ন করেন নাই। বর্ণনাগুলি যথাযথ, কিন্তু তাহার মধ্যে অতি সজ্ঞোপনে ফল্লনদীর প্রবাহের মত একটা ব্যাঙের রসধারা বহিয়া যাইতেছে, এই ব্যাঙের এতটা প্রকাশ হয় নাই যে, মৃত্যুর কক্ষের নিস্তম্ভ পবিত্রতার হানি হয়, শেষ পর্যন্ত পড়িলে বরং বাসুর মার জন্য শোকেই পাঠকের মন আর্দ্র হইয়া যায়। এত অল্প কথায় বাসুর মার আমরণ যে ছবিখানি অঙ্কিত হইয়াছে তাহাতে এই কুটীরবাসিনী দরিদ্র বিধবার



দুঃখে মন বিগলিত হইয়া যায় এবং তাঁহার চিন্তের বিশুদ্ধতা ও ধর্মভীরুতা পাঠকের শ্রদ্ধা উৎপাদন করে। এই কবি হয়ত বাঁশ বা খাগের কলম দিয়া এই চরিত্রের রেখাঙ্কন করিয়াছেন কিন্তু তদন্তিকত চিত্রখানি দেখিলে মনে হয় যেন আমরা সভা করিয়া কবিকে সোনার কলম দিয়া সংবর্ধনা করি। বালুখালির পাড়ে মাণিকতারা ও বাসুর প্রথম দর্শনে নিতান্ত প্রাকৃত কৃষকজ্ঞানোচিত কথার মধ্যেও যেন বৈষ্ণব মহাজনদিগের পূর্বরাগের পদ ঝঙ্কত হইয়াছে।

সাধু শীলের গৃহে রক্ষনের বর্ণনা, বউদের রান্না, শশুর-শাশুড়ীর কথাবার্তা, পুরাতন ডাল চড়াইয়া দিয়া তাহা সিদ্ধ করিবার জন্য কড়াইয়ের উপর কাঁটা দিয়া ঘাঁটাঘাঁটি, মেজ ছেলের ক্ষুধার জ্বালায় স্ত্রীর চুলের মুঠি ধরিয়া প্রহারের চেষ্টা এবং গিন্নির আসিয়া তাহাকে হাত ধরিয়া নিরস্ত করা—ইত্যাদি দৃশ্য খুব রহস্যজনক ও উপাদেয় হইয়াছে। বাসুর শশুরগৃহে প্রথম ভোজন ব্যাপারটাও অতিশয় হৃদয়গ্রাহী ভাষায় চিত্রিত হইয়াছে। বাসুর স্ত্রীর কাছে নিজের ডাকাতি-বৃন্তির কথা সজ্ঞোপন করার চেষ্টা, মাণিকতারার পাখী শিকার প্রভৃতি অপরূপ কবিত্বচ্ছটায় উজ্জ্বল হইয়া উঠিয়াছে। মোটকথা, এই পুস্তকখানি পাইয়া প্রথমে আমার মনে হইয়াছিল যে আমি একটি স্বর্ণখনির আবিষ্কার করিলাম, সেই মূল্যবান ধাতু নানা আবর্জনা ও ধূলিবালি মিশ্রিত কিন্তু তাহাতে তাহার প্রকৃত মূল্য কমিয়া যায় নাই।

গ্রন্থভাগে যে হরিকেল পাখীর কথা আছে, এই পাখীটির নাম হইতেই কি প্রাচীন কালে বাঙ্গালার নাম হরিকেল হইয়াছিল?

এই গানে অমার্জিত ভাষার আধিক্য দেখিয়া মনে হইতে পারে যে ইহা খুব প্রাচীন কিন্তু ইহা অষ্টাদশ শতাব্দীর অধিক প্রাচীন নহে। চাষাকবির ভাষা প্রাকৃতজ্ঞানোচিত হইলেও ইহার পয়ার ছন্দ অনেকটা নির্দোষ। প্রাচীন কবিতায় এই ছন্দই প্রধানত সময়নির্দেশক।

দ্বিতীয়ত ডাকাতির যে-সকল বর্ণনা আছে তাহা মোগল রাজ্যের অবসানে এবং ব্রিটিশদের অধিকার পূরাপূরি স্থাপনের পূর্বসন্ধ্যার বলিয়া মনে হয়, সেই সময় এই দেশ অরাজকতাপূর্ণ ছিল এবং পল্লীতে পল্লীতে, বিশেষত নদীগর্ভে, ডাকাতি ও নির্মম লুণ্ঠনকার্য এইভাবেই অনুষ্ঠিত হইত ; কিন্তু সেরপুর অঞ্চলে তখনও টাকার প্রচলন বেশী ছিল না। নতুবা কড়ির স্তূপ দিয়া কেহই খেয়া পার হইত না।

এই গল্পটির নাম মাণিকতারা। এই ভাগে তাহার ছবিটা কেবল বিকাশ পাইতে শুরু করিয়াছে, কিন্তু দুঃখের বিষয় যখন ঘটনাগুলি ক্রমশ নিবিড়তর হইয়া পাঠকের কৌতূহল ও উৎসাহ বৃদ্ধি করিতেছিল, যখন মাণিকতারা দশভুজার মত নানা প্রহরণধারিণী হইয়া দনুজদলনে সবেমাত্র নামিয়াছেন—সেই ঘনীভূত কৌতূহলের মুখে পালা শেষ হইয়া গিয়াছে। এই পালাটি উদ্ভার করিবার কাহারও চেষ্টা নাই। বিদ্যালয়ের ছেলেরা শেলির সম্মুখে গুরুতর থিসিস লিখিয়া জগতের মহাকার্য সম্বাদন করিবেন ; গৈয়ো-ভূতের এই সকল আবর্জনা ঘাঁটাঘাঁটি করিয়া তাহাদের মূল্যবান সময় নষ্ট করিবার কি অবকাশ আছে?



## সোনাই

শৈশবাবস্থা।

সোনাই যে রূপসী হবে, অতি শৈশব হইতেই তাহা বুঝা গিয়াছিল। বসন্তের হাওয়া মাঘের শেষ হইতে বহে, 'সেই স্নিগ্ধ হাওয়া গায় লাগিলেই বুঝা যায় ঋতুপতি আসিতেছেন, ফাল্গুন-চৈত্র আসন্ন। সোনাই যখন দ্রুত হামাগুড়ি দিয়া মায়েঃ কোলে উঠে—চঞ্চলা মেয়ে দণ্ডেককাল একস্থানে থাকিবার নহে, অমনি হাসিতে হাসিতে মাটিতে নামিয়া হামাগুড়ি দেয়—তখন মনে হয় কুটীরের আঙ্গিনায় হীরামোতি লইয়া প্রকৃতিদেবী খেলা করিতেছেন। হাসিয়া খেলিয়া সারা আঙ্গিনাময় আছাড় খাইতে খাইতে সে ঘুরিয়া রূপের লহরী বিলাইয়া দেয়।

যখন সোনাই সাত বছরে পড়িল, তখন আর অত ছুটাছুটি করিয়া বেড়ায় না। মায়েঃ কোলে বসিয়া, মায়েঃ কাঁধে হাত রাখিয়া সে মৃদু মৃদু হাসিতে থাকে, মনে হয় যেন পূর্ণিমার জ্যোৎস্নায় বামুনদের আঙ্গিনা ভরিয়া গিয়াছে। আট বছর বয়সে সোনাইয়ের কৌকড়ানো কৌকড়ানো লম্বা কালো চুল, পদ্মফুলের চারিপাশে শৈবালের মত মুখের চারিদিকে দুলিতে থাকে—কি সুন্দর সেই কালো চাঁচর কেশপাশ, কি সুন্দর সেই চাঁপা ফুলের মত মুখখানি! নবম বৎসরে কন্যা কিশোরী হইয়া উঠিল, তখন ছুটাছুটি ও চাঞ্চল্য কমিয়াছে, স্বভাব সংযত ও সুন্দর হইয়াছে, সাজের দীপটীর মত সোনাই রূপের প্রতিমা হইয়া বসিয়া থাকে, সেই প্রদীপের জ্যোতিতে শুধু গৃহখানি নয়, বাড়ীসুন্দর সমস্ত স্থান রূপে ঝলমল করিয়া উঠে। এইভাবে দশম ও একাদশ বর্ষ পার হইল। এগার বছর বয়সে সোনাই তাহার বাপকে হারাইল। সেই পল্লীতে তাহাকে ও তাহার মাকে দেখিবার কেহ রহিল না। বৃক্ষ শূকাইয়া গেলে লতা যেমন পত্রপুষ্প লইয়া আলগা হইয়া পড়ে, লতা মরিয়া গেলে তার ফুলপাতা যেরূপ ঝরিয়া পড়ে, পিতৃহীন গৃহে কন্যা ও মাতার অবস্থা তেমনই হইল।

এদিকে সোনাইয়ের বয়স বাড়িয়া চলিল। চতুর্দশীর চাঁদ যেন পূর্ণিমার চাঁদ হইল। একলা ঘরে এই পরম রূপবতী কন্যাকে লইয়া বিধবা মাতা কিরূপে থাকিবেন, সোনাইয়ের রূপের খ্যাতি চারিদিকে প্রচার হইয়াছে, কোন্ দিন কোন্ বিপদ ঘটে মা তাহাই ভাবিতে লাগিলেন।

মায়েঃ কুণ্ঠিত কপাল দেখিয়া সোনাই তাঁহার দুর্ভাবনার কথা বুঝিতে পারিত। সে একলা ঘরে বসিয়া কেবল কাঁদিত। এই কান্না ছাড়া তাহার আর কিই বা অবলম্বন আছে?

• মাতুল লালয়ে গমন ও পতি সন্ধর্শন

দীঘলহাটি গ্রামে সোনাইয়ের মামার বাড়ী ; মা ও মেয়ে যুক্তি করিয়া, নিজ ভ্রাসন ছাড়িয়া সোনাইয়ের মা তাঁহার ভাইয়ের বাড়ীতে চলিয়া গেলেন। ভাইয়ের নাম ভট্টক

ঠাকুর—তাঁহার পেশা যজমানী। বেশী আয় নাই, কিন্তু যজমানী করিয়া তিনি যাহা উপার্জন করেন, তাহাই ভাটুক ঠাকুরের পক্ষে যথেষ্ট, কারণ তাঁহার সন্তানাদি কিছু নাই। সোনাইয়ের মামা ও মামী তাহাদিগকে পাইয়া খুসীই হইলেন; সোনাইয়ের মুখখানি চাঁপাফুলের মত, তার দীঘল চুল পায়ের তলায় যাইয়া পড়িয়াছে। মামা তাহাকে একখানি দামী নীলাম্বরী শাড়ী কিনিয়া দিলেন, সেই শাড়ী পরিয়া মেয়ে যখন নদীর ঘাটে যায়, তখন চারিদিকের লোক চাহিয়া থাকে। এমন সুন্দরী মেয়ে সে তল্লাটে নাই।

বাড়ীতে ভাইভগিনী দিনরাত্রি পরামর্শ করেন, এ মেয়ে কার হাতে দেওয়া যায়। এমন রূপসী কন্যাকে বিবাহ করিতে অনেকের ইচ্ছা, ঘটক রোজই আসে যায়। কিন্তু সোনাইয়ের মার মনটা বড় খুঁতখুঁতে, কিছুতেই তাঁর মন উঠে না। একদিন ঘটক একটা বরের সংবাদ দিল—ধনে, জেনে, বিদ্যায় সে বর খুবই ভাল। কিন্তু তাহার বর্ণটি একটু কালো। ‘এমন সোণার প্রতিমাকে আমি কি করিয়া একটা কালো ছেলের হাতে দেই’, সকলের আগ্রহ সত্ত্বেও মাতা ঘটককে ফিরাইয়া দিলেন। মা ঘটকদিগকে স্পষ্ট করিয়া বলিয়া দিলেন, ‘দেখুন আমার মেয়ের মত আর একটা মেয়ে এ অঞ্চলে পাবেন না, যোগ্যবরে একে দিব, ইহাই আমার ইচ্ছা। কার এরূপ ইচ্ছা না হয়? সুতরাং আমি যদি একটু বেশী প্রত্যাশা করি, তবে আপনারা আমাকে দোষ দিতে পারেন না।’

‘যেমন সুন্দর কন্যা গো তেমনই হবে বর।  
তার মধ্যে থাকবে জামাইর বার—বাংলার ঘর॥  
সোণার কার্তিক হইবে জামাই গো যেমন চাঁদের ছটা।  
কুলেশীলে বংশে ভাল, জমিদারের বেটা॥  
যতেক সম্বন্ধ আসল, সোনাইর মা নাহি বাসে।  
এহি মতে আইল ঘটক প্রতি মাসে মাসে॥’

রোজই সোনাই জল আনিতে নদীর ঘাটে যায়। আষাঢ়িয়া স্রোতে একখানি সুন্দর ডিজির মত সে রূপের হিল্লোল তুলিয়া চলিয়া যায়, পাড়াপড়শীরা কাণাঘুষা করে, এ দুর্গাপ্রতিমার যোগ্য বর আমাদের দেশে কোথায় পাওয়া যাইবে?

সেই নদীর ঘাটের পথ দিয়া এক তরুণ শিকারী রোজই আনাগোনা করে। কি সুন্দর বর্ণ! কি সুন্দর তার চোখমুখের গড়ন, সেই পথে ফুলের গাছ শত শত, ফুলগুলি নদীতীর আলো করিয়া ফুটিয়া থাকে, যুবক প্রতি সম্ম্যাকালে পোষা ঘুঘু হাতে লইয়া এই পথে যায় আসে। একটা থলিয়ার মধ্যে কতকগুলি খাগের শর, সে পাখীশিকারী।

‘দেখিতে সোণার নাগর গো চাঁদের সমান।  
সুবর্ণকার্তিক যেন হাতে ধনুকবাণ॥’

সোনাইয়ের মা যেমন বরটি চাহিয়াছিলেন, এ যেন ঠিক তেমনটী।

নদীর পারে বর্ষাকালে সারি সারি কেয়াবন। কেয়াফুলের গন্ধে নদীতীর সুবাসিত। এইখানে উভয়ের চারি চক্ষের মিলন হইল, উভয়ে ভাবিল, কোন্ বিধাতা তাহাদের মনের মানুষকে আনিয়া এ ভাবে পথে দেখাইলেন!

কন্যা মনে মনে এই বরের জন্য বিধাতার নিকট প্রার্থনা জানাইল।

‘পক্ষী হইলে সোণার বঁধুরে রাখিতাম পিঞ্জরে।  
পুষ্প হইলে প্রাণের বঁধুরে খোঁপায় রাখিতাম তোরে॥  
কাজল হইলে রাখিতাম বঁধুরে নয়ান ভরিয়া।  
তোমার সঙ্গে যাইতাম দেশান্তরী হইয়া॥’

নবযৌবনের নবরাগ এমনই দুর্জয় শক্তি বহন করে, লাজশীলার লাজের বাঁধ ভাঙিয়া দেয়, ঘরের বউকে কুলের বাহির করে, যাহার মুখে কথাটী নাই, তাহার মুখ হইতে সুধাবৃষ্টির মত অজস্র কথা বাহির করে।

যুবক একদিন সোণাইকে অতি ভয়ে ভয়ে অতি সন্তর্পণে বলিলেন, ‘কাল পদ্মদলের মধ্যে লিখিয়া যে চিঠিখানি তোমায় সেইয়ের হাতে দিয়াছি, তা কি তুমি দয়া করিয়া পড়িয়া দেখিয়াছ?’

সে চিঠি সোনাই পাইয়াছিল, বারংবার চোখের জলে ভিজিয়া চিঠিখানি পড়িয়াছিল, চিঠির অনেকগুলি আখর তাহার অশ্রুতে মুছিয়া গিয়াছিল। চিঠিতে লেখা ছিল —

‘আমার নাম মাধব, আমি বাপ-মায়ের এক ছেলে। আমার বাবার লাখের জমিদারী আছে, তুমি সম্মত হইলে কেয়াবনে সম্প্রদায় থাকিও, সেখানে তুমি কাহার জন্য মালা গাঁথ? যাহা হউক আমি সেখানে যাইয়া তোমার কাছে দুটী মনের কথা বলিব। তুমি কি তাহা শুনিলে না? তোমার গায়ের রঙ পদ্ম-ফুলের মত, আমি তোমাকে অগ্নিপাটের শাড়ী দিব, তাহা পরিলে তোমাকে বেশ মানাইবে। আমার বাড়ীর পাছে বড় একটা ফুলের বাগান আছে, মালী গাছের পাতা দিয়া টোপা বানাইয়া দিবে, আমি তোমার জন্য সেই টোপা ভরিয়া ফুল তুলিব। ফুলবাগানের কাছে যে দীঘিটা আছে, তাহার কালো জল কেমন নির্মল, তোমার ইচ্ছা হইলে আমরা দুজনে দীঘিতে সাঁতার কাটিব, দীঘিতে জলটুকী ঘর আছে, পদ্মগন্ধ-বাসিত হাওয়া সেই ঘরে আসিয়া আমাদের শরীর জুড়াইবে। আমার কামটুকী বৈঠকখানা ঘর। তুমি আমি দুইজনে সেখানে নিরালা রাত্রে পাশা খেলিব। আমার আরও কত সাধ আছে, তাহা কি লিখিব, লক্ষ্মী! তুমি কি তাহা পূরণ করিলে না?’

‘বাহুতে পরাইয়া দিব বাজুবন্দ্য তাড়।  
হীরামোতি দিয়া দিব তোমার গলার হার॥  
কত ছন্দে কত সাজে তোমারে সাজাইব।  
জোনাকীর মালা আনি তোমার গলায় দিব॥’

এই পত্র পাইয়া কন্যা তাহার উত্তর লিখিল। সে উত্তরে সকল কথা স্পষ্ট করিয়া লিখিতে তাহার বাধিল না—‘যেদিন তোমায় দেখিয়াছি, সেই দিনই আমি ভুলিয়াছি।’

‘ফুল হইয়া ফুটিতাম বঁধুরে যদি কেওয়া বনে ।  
 নিতি নিতি হৈত বঁধু দেখা তোমার সনে॥  
 তুমি যদি হৈতা রে বঁধু আসমানের চান ।  
 রাত্র নিশা চাহিয়া রৈতাম খুলিয়া নয়ান॥  
 তুমি যদি হৈতা বঁধু এ না নদীর পানি ।  
 তোমারে যাচিয়া দিতাম তাপিত পরাণী॥’

‘কিন্তু এগুলি তো আমার মনের কথা ; বনে যেমন ফুল ফুটিয়া শূকাইয়া মাটিতে পড়ে, মনের কথাও তেমনই মনে উদিত হইয়া ঝরিয়া বিলীন হইয়া যায়।’

‘আমার মা ও মামা আমার কর্তা, তাঁহারা দিনরাত্রি আমার জন্য ভাল বরের খোজ করিতেছেন, আমি কি বলিয়া তাঁহাদের কাছে তোমার কথা বলিব? আমি কিছুতেই উপায় খুজিয়া পাইতেছি না। আমার সই তোমার সঙ্গে দেখা করিবে, চিঠিখানি চন্দনবাসিত ও ফুলের মালা-জড়িত, তুমি ইহাই আমার মনের ভাবের স্নিগ্ধ নিদর্শন বলিয়া গ্রহণ করিও এবং আমাদের মিলনের যদি কোন উপায় থাকে, তবে সইয়ের কাছে বলিয়া দিও।’

### দুর্জন বাঘরা

সেই দীঘলহাটি গ্রামে বাঘরা নামক এক অতি দুর্জন লোক ছিল। সে সিন্দুরের ব্যবসা করিয়া খুব প্রতাপশালী হইয়াছিল। বড়লোক, বিশেষ মুসলমান রাজ-পুরুষদিগকে সুন্দরী কুলবধূর সন্ধান দিত এবং এই কার্যের জন্য বিশেষ পুরস্কার পাইত। বাঘরা সামান্য লোক ছিল না, এখনও নেত্রকোণা অঞ্চলে একটা প্রকাণ্ড জমি বাঘরার দাওর নামে পরিচিত ; এই বিলা জমিটা বাঘরা নিশ্চয় তাহার কার্যের পুরস্কারস্বরূপ পাইয়াছিল। এই জমি বর্ষায় ডুবিয়া যায়, তখন ইহা একটা বিশাল বিলে পরিণত হয়। গ্রীষ্মকালে জল শূকাইয়া যায়, কিন্তু মাঝে মাঝে ক্ষুদ্র জলাশয় থাকে।

বাঘরা যাইয়া দেওয়ানসাহেব ভাবনাকে বলিল, ‘হুজুর আপনার জমিদারীর মধ্যে এই দীঘলহাটি পল্লীতেই ভাটুক বামুনের এক পরমাসুন্দরী ভাঙ্গী আসিয়াছে। তাহার রূপের কথা কি বলিব! আপনি অবশ্য অনেক রূপসী দেখিয়াছেন, কিন্তু এমন রূপসী দেখেন নাই। যদি আপনি বলেন তবে আপনার জন্য মেয়েটিকে সংগ্রহ করিতে পারি।’

বাঘরাকে তখনই দেওয়ানসাহেব একটা কুলায় মাপিয়া স্বর্ণমুদ্রা দিলেন এবং বলিলেন, ‘এ কাজটা তোমার করা চাই-ই!’

বাঘরা গোপনে ভাটুক ঠাকুরের সঙ্গে দেখা করিয়া বলিল, ‘মেয়েটিকে দেওয়ানসাহেবকে দাও—পরম সুখে সে তাঁহার রাজপুরীতে থাকিবে,’ তাঁহার যতগুলি নিকার স্ত্রী আছে তাহারা সোনাইয়ের বাদী হইয়া থাকিবে, হীরামণি জহরতে তাহার সর্বাজ ঢাকা থাকিবে। সুতরাং সোনাই আজীবন সুখে কাটাইবে, ইহাতে তিলমাত্র সন্দেহ নাই।

‘আর তোমারও যে এ বিষয়ে লাভ না আছে, তাহা নহে! তোমার বাড়ীর কাছে দেওয়ান ভাবনা দীঘি কাটাইয়া দিবেন, তাহার চার পাড়ে চারটী শান-বাঁধা ঘাট থাকিবে। তোমাকে বাহান্ন কুড়া জমি তিনি দিবেন, তোমার আর পেটের ধান্দা করিতে হইবে না। নৌকায় তিনি জল-বিহার করিতে আসিয়াছিলেন। সেই সময় সোনাইকে দেখিয়াছেন। তিনি মেয়ের জন্য একেবারে পাগল হইয়া গিয়াছেন।’

‘একে তো ভাটুক ঠাকুর যজ্ঞমামী ব্রাহ্মণ।  
সেইতে আবার পাইল জমির লোভন॥  
সম্মতি জানাইল ভাটুক দুর্জনা ভাগরায়।  
জাতি মারি বিয়া দিব মনেতে গুছায়॥  
মায়ে না জানিল কথা না জানে কন্যায়।  
কানাকানি হানাহানি শব্দে শূনা যায়॥’

### মুক্তির বড় যন্ত্র

কাণাঘুমায় সোনাই সকল কথাই শুনিল। অতি ব্যস্ত হইয়া সে মাধবকে একখানা চিঠি লিখিয়া পাঠাইয়া দিল। চিঠিতে লেখা ছিল, ‘আজই সম্ম্যাবেলা ভাবনা আমাকে ধরিয়া লইয়া যাইয়া বিবাহ করিবে। আমার গুণের মামা সকল ব্যবস্থা করিয়া রাখিয়াছেন। ঐধ, তাম আমাকে এই ঘোর বিপদ হইতে রক্ষা কর। আজ যদি তুমি আমার না লইয়া যাও, তবে জন্মের শোধ তোমার মুখখানি আর আমার দেখা হইবে না। আর আমাকে সংসারে কেউ না দেখিতে পায় তাহাও ব্যবস্থা আমি নিজেই করিব।’

দূতীর মারফৎ মাদব জানাইলেন, ‘ঠিক সম্ম্যায় সময় নদীর ঘাটে অপেক্ষা করিয়া থাকিও, আমি তোমাকে সেখান হইতে লইয়া যাইব।’

প্রাতঃকাল হইতে সোনাইয়ের মন কেমন ভারাক্রান্ত হইয়াছিল। সে রাত্রে একটা দুঃস্বপ্ন দেখিয়াছিল, এজন্য সম্ম্যায় নদীর ঘাটে যাইতে তাহার পা উঠিতেছিল না। যখন সে খালি কলসী লইয়া নদীর ঘাটে যাইতে উদ্যত হইল, সেই মুহূর্তে আকাশে কাকগুলি ‘কা’ ‘কা’ করিয়া উঠিল, শুকনা ডালে ঝেঁড়ার বিকট রব শোনা গেল। সোনাই তার সখী সল্লাকে বলিল, ‘অকারণ আমার ঘুকে ভয় সৈন্য উঠিতেছে—পা দুটী চলিতেছে না। কি বিপদে পড়িব কে জানে, আত্ম না হইয়া না গেলাম। আজ রাত্রি মার বুকে মাথা গুঁজিয়া লুকাইয়া থাকি।’

একটুখানি পরে সোনাই পুনরায় সইকে বলিল, তখন তাহার চেহারা একবিন্দু অশ্রু, ‘আজ সম্ম্যায় না গেলে পাণের বঁধুকে হয়ত আর দেখিতে পাইব না। তিনি হয়ত আমাকে না পাইয়া হতাশ হইয়া ফিরিয়া যাইবেন, আর কি কখন তিনি আসিবেন? হয়ত জন্মের মত তাঁহাকে হারাইব। আমার যে বিপদই হউক না কেন আমি না যাইয়া পারিব না।’ এই বলিয়া সোনাই কলসীটা কাঁখে লইয়া তাহার সইয়ের সঙ্গে নদীর ঘাটে রওনা হইয়া গেল।

ঘাটে আসিয়া দেখিল মাধব তাহাকে লইবার জন্য আসেন নাই, কিন্তু আর—একখানি ডিজি নদীর ধারে কেয়াবনের কাছে বাঁধা—তাহা দেওয়ান ভাবনার লোকজনে ভর্তি। সোনাইকে দেখামাত্র কয়েকজন গুণ্ডা আসিয়া তাহাকে জোর করিয়া পানসীতে উঠাইল। শূন্য কলসীটি নদীর জলে ভাসিতে লাগিল। রোরুদ্যমানা সোনাই ক্ষীণ স্বরে সখীকে ডাকিয়া বলিল, ‘আমার মামাকে কহিও, ৫২ কুড়া জমির লোভে তিনি আমার এই সর্বনাশ করিলেন, তাঁহার ভাল হউক। মামীকে বলিও তাঁহার বাড়ীর কলসীটি নদীর জলে ভাসিয়া চলিয়াছে, তাহা তাঁহারা লইয়া যাউন। আমার মাকে বলিও, দেওয়ান ভাবনার লোক তাঁহার দাদার সাহায্যে আমাকে লইয়া গেল। এই কলঙ্কিত জীবন আমি রাখিব না, আমি আমার মাতাপিতার গ্লানিকর কোন কাজ করিব না। বিদায়কালে তাঁহার চরণে আমার শত প্রণাম দিও। আমার প্রাণের ঐধুর সঙ্গে কি তোমার দেখা হইবে? দেখা হইলে আমার অবস্থা তাঁহাকে জানাইও। আমি তাঁহার জন্যই আসিয়াছিলাম, তা না হইলে যজ্ঞের ঘি কি কুকুরে লেহন করিতে সাহসী হয়? আমি কলসী ও দড়ির সাহায্যে জলে প্রাণ বিসর্জন দিব, নতুবা আগুনে পুড়িয়া মরিব। বড় দুঃখ রহিল, আমি তাঁহার চন্দ্রমুখখানি আর একটীবার দেখিতে পাইলাম না। চন্দ্র, সূর্য, দিবারাত্রি, তোমরা সকলে সাক্ষী—ঐধু কোথায় তাহা তোমরা দেখিতেছ! আমার কথা তাঁহাকে বলিও। ঐ আকাশে পাখীর ঐধু, তোমরা কোথায় উড়িয়া যাইতেছ? তোমাদের দৃষ্টি বহুদূর প্রসারিত, তোমরা অবশ্যই আমার প্রাণের ঐধুকে দেখিতে পাইবে, তোমরা দয়া করিয়া তাঁহার চরণে আমার কথাগুণ্ডা বলিবে। হে কেয়াফুলের ঝাড়, হিজল গাছের নূতন পাতা, যদি ঐধু এখানে আসেন, তবে তোমাদের মর্মর শব্দে তাঁহাকে দুঃখিনীর দুঃখের কথা জানাইও।’

এই বলিতে বলিতে দেওয়ানের ডিজিতে হস্তপদবন্ধা বন্দীর বেশে রূপসী কন্যা অদৃশ্য হইল।

কিন্তু এই দুঃখের মধ্যে একটা প্রবল আশঙ্কা তাহার মনে হইতেছিল। ‘মাধব তালবেন বলিয়া দূতীকে বলিয়া দিয়াছিলেন, যিগুনাকে আশ্রয় দিয়া তিনি আসিলেন না কেন? তবে কি তাঁহার কোন বিপদ হইয়াছে? ঝাড় উঠিয়াছে, নদীর ঢেউগুলি তোলপাড় করিতেছে, ঐধুর নৌকায তো কোন বিপদ হয় নাই! তিনি কেন আসিলেন না?’ সোনাই আত্ননাদ করিয়া কাদিয়া উঠিল।

### উদ্দেশ্য ও বিবাহ

সহসা সেই ঝড়ের রব ছাপাইয়া একটা উচ্চ চীৎকার শুনিতে পাওয়া গেল! এক যুবক পানসী নৌকার মস্তিষ্ককে ডাকিয়া বলিতেছিল—‘তোমাদের পানসী কোথায় যাইবে, নৌকার মধ্যে এক আত্ন রমণীর ক্রন্দন শোনা যাইতেছে—ইনি কে? তোমরা কোন নারীকে জোর করিয়া লইয়া যাইতেছ?’



মাধবের কণ্ঠস্বর বুঝিতে পারিয়া সোনাই আরও তীব্রস্বরে চীৎকার করিয়া কাঁদিতে লাগিল। মাধব বুঝিতে পারিলেন, তিনি যাহাকে উদ্ধার করিতে যাইতেছেন, ইনিই সেই বিপন্ন রমণী।

দুই দলে সেই অশ্বকারে, মেঘাচ্ছন্ন রাত্রে, নদীর বক্ষে ভয়ানক দন্দ যুদ্ধ হইল। মাধব অগ্রসর হইয়া ভীম পরাক্রমে দেওয়ানের পানসী আক্রমণ করিলেন। তিনি সোনাইকে উদ্ধার করিবার জন্য লড়াই আশঙ্কা করিয়াই সৈন্য সহ গিয়াছিলেন, দেওয়ানের লোকজন অতর্কিত ও সম্পূর্ণরূপে নির্ভয় ও অপ্রস্তুত অবস্থায় ছিল। মাধবের লোকেরা ময়ূরপঙ্খীর গলুই ভাঙিয়া ফেলিল ও লোকজন মাঝিদের নৌকাসহ জলের নীচে ডুবাইয়া দিয়া সোনাইকে উদ্ধার করিয়া মাধবদের বাড়ীর দিকে চলিল।

আজি মাধবের পুরীতে বিপুল বাদ্যভাণ্ড, সমারোহপূর্ণ মিছিল। বহির্বাটীতে ও অন্তঃপুরে কলরবপূর্ণ উৎসব। কত মল্লবীর খেলা দেখাইতেছে, বাজীর বাজী ছুটাইতেছে, কত দোলা, চতুর্দোলা, যানবাহন। নিমন্ত্রিত সম্ভ্রান্ত ব্যক্তিগণের শুভাগমনে রাজপ্রাসাদ সরগরম, মেয়েরা কেহ শাঁখ বাজাইতেছে, কেহ জোকার দিতেছে, কেহ দল বাঁধিয়া নদীতে জল আনিতে যাইতেছে, কেহ পুষ্পচয়নে ও কেহ মালাগাঁথায় ব্যস্ত, কেহ চন্দন ঘষিতেছে। নাগরিকেরা নূতন পরিচ্ছদ পরিয়া রাজবাড়ীতে নৃত্য-গীতোৎসব দেখিতে আসিতেছে। আজ মাধব ও সোনাইয়ের বিবাহ। চন্দনচর্চিত ললাটে, বিবিধ অলঙ্কারে ভূষিত হইয়া রক্তপট্টাস্বরে স্বর্ণ প্রতিমার ন্যায় ঝলমল করিতেছে। বিবাহের রক্তোত্তরীয় ও পট্টবাস পরিহিত শূদ্র উপবীত ও তিলক পরিয়া কুমার মাধব কার্তিকের মত সুন্দর হইয়াছেন, আজ কি শূভদিন!

#### শ য তা ন দে ও য়া ন

বিবাহ হইয়া গেছে, অকস্মাৎ পুরীতে ক্রন্দনের কলরব! কি হইয়াছে? সর্বনাশ হইয়াছে, মাধবের পিতাকে দেওয়ান ভাবনার লোকেরা আসিয়া বাঁধিয়া লইয়া গিয়াছে। মাসকালব্যাপী উৎসব অর্ধপথে থামিয়া গিয়াছে। মাধব তখনই একটা বড় ভাওয়ালিয়া সাজাইতে হুকুম দিয়া বিবাহের বেণু ছাড়িয়া দরবারী পোশাক পরিয়া ভাবনার রাজধানী অভিমুখে চলিলেন—ধনপতি সদাগরকে ফিরাইয়া আনিবার জন্য তরুণ শ্রীমন্ত যেরূপ সমুদ্রযাত্রা করিয়াছিলেন, মাণিক চাকলাদারকে উদ্ধার করিবার জন্য বালক সুধন যেমন ছুটিয়াছিলেন—তেমনই মাধব তাঁহার পিতাকে উদ্ধার করিতে রওনা হইলেন।

কয়েকদিন পরে বিষণ্ণমুখে, সাক্ষাৎ শোকের মূর্তি শীর্ণ দেহে, কুণ্ঠিত ললাটে বৃন্দ নিজ গৃহে ফিরিয়া আসিলে, তিনি কাহাকেও কিছু বলিলেন না। এক নিভৃত কক্ষে সোনাইকে ডাকিয়া আনিয়া চোখের জলে প্রায় বৃন্দ কণ্ঠে বধূকে বলিলেন, ‘আমাদের সর্বনাশ উপস্থিত, তোমাকে সে কথা বলিতে আমার প্রাণ বিদীর্ণ হইয়া যাইতেছে, আমি সে নির্ঘাত কথা বলিতে পারিতেছি না, অথচ তাহা বলিতেই হইবে, না বলিলে উপায় নাই। মাধব দরবারে যাওয়ামাত্র দেওয়ান সাহেব আমাকে বন্দীশালা হইতে ডাকাইয়া আনিলেন এবং বলিলেন, “তোমাকে মুক্তি দিলাম, তোমার জায়গায় এই তরুণ কুমার এখানে নজরবন্দী রহিল। তুমি গৃহে ফিরিয়া যাইয়া

নববধূকে এখানে পাঠাইয়া দাও। আমি প্রতিশ্রুতি দিতেছি, বধূ এখানে আসামাত্র আমি তোমার পুত্রকে সসম্মানে মুক্তি দিব এবং সে বাড়ীতে ফিরিয়া যাইবে। কিন্তু যদি তোমার বধূ না আসেন কিম্বা তুমি তাঁহাকে পাঠাইতে অথবা বিলম্ব কর, তবে মাধবের শির দ্বিখন্ডিত করিয়া তাহার রক্তে বধ্যভূমি রঞ্জিত করিব।’ দ্বিভুক্তি করিতে অবসর না দিয়া দেওয়ান আমাকে মুক্তি দিলেন এবং মাধব তাঁহার হুকুমে বন্দীশালায় গেল।

‘এখন মা, আমি তোমার কাছে কি বলিব? সে কথা বলিতে কণ্ঠ রুদ্ধ হইতেছে, মাধব আমার একমাত্র পুত্র—বংশের প্রদীপ, তাহার অভাবে এই বংশ নির্বংশ হইবে। এই পিতৃপিতামহাধিষ্ঠিত বহু পুরুষের রাজধানী অশ্মকর হইবে। তোমাকে আমি আর কি বলিব? তুমি আমার পুত্রের প্রাণ রক্ষা করিতে পার। তাহাকে রক্ষা করার যদি অন্য কোন উপায় আমি উদ্ভাবন করিতে পারিতাম, তাহা হইলে এই নিতান্ত হীন প্রস্তাব লইয়া তোমার কাছে উপস্থিত হইতাম না।

‘শুন শুন বধূ যদি কৃপা নাহি কর।  
অকালে আমার পুত্র যাবে যমঘর॥  
দূরন্ত দুর্জন ভাবনা প্রতিজ্ঞা যে করে।  
তোমারে পাইলে ছাড়ি দিবে মাধবেরে॥  
বংশের নিদান পুত্র এক বিনা নাই।  
তোমারে ছাড়িয়া যদি প্রাণ—পুত্রে পাই॥’

নি জ্ঞ প্রাণ দি য়া পু ত্রি র উ ন্মা র

শ্বশুরের এই কথা শুনিয়া সোনাইয়ের চক্ষু হইতে অজস্র অশ্রুবিন্দু পড়িতে লাগিল। কিন্তু বধূ দৃঢ়প্রতিজ্ঞভাবে পরক্ষণেই চোখের জল মুছিয়া ফেলিল, নিজের হাতে অসংকৃত কেশপাশ বাঁধিয়া শ্বশুরকে ভাওয়ালিয়া সাজাইতে আদেশ দিতে বলিল এবং একটা কোঁটায় জহর বিষের কয়েকটি বটিকা লইয়া স্বামী উন্মাদ করিতে রওনা হইল। দেওয়ান ভাবনা দরবারে বসিয়াছিলেন, যে মুহূর্তে শুনিলেন, সোনাই রাজধানীতে পৌছিয়াছে, সেই মুহূর্তে তিনি তাহার ভাওয়ালিয়াতে গিয়া সোনাইয়ের সঙ্গে দেখা করিলেন। তিনি দেখিলেন, এ মনুষ্যমূর্তি নহে, দৈবশাপে কোন দেবী ধরাতলে অবতীর্ণ হইয়াছেন। এই অপূর্ব সুন্দরীকে দেখিয়া দেওয়ান একেবারে জ্ঞানহারা হইলেন।

সোনাই স্থির কণ্ঠে বলিল, ‘আমার নির্দোষ স্বামীকে আপনি বন্দীশালায় রাখিয়াছেন। তাহা যাহাই হউক, আমি যে এখানে আসিয়াছি, তাহা তাঁহাকে জানিতে দিবেন না, তাঁহাকে অবিলম্বে মুক্তি দিন এবং আপনার গৃহে আমার আগমনসংবাদ যাহাতে এদেশে কেহ না জানে তাহার ব্যবস্থা করুন। মোটকথা, এ কথা একান্তভাবে গোপন থাকিবে, এই সর্ত পালন করিলে আমি আপনার নির্দেশ পালন করিব।’

বন্দীশালায় মাধবের হস্তপদ হইতে শৃঙ্খল খুলিয়া ফেলা হইল, তাহার বুকের উপরে একখানি পাথর চাপা দেওয়া হইয়াছিল তাহা সরাইয়া ফেলা হইল। তারপর

যে ভাওয়ালিয়ায় চড়িয়া সোনাই আসিয়াছিল, সেই ভাওয়ালিয়াতেই মাধব বাড়ীতে ফিরিবার অনুমতি পাইলেন।

রাত্রি ঘোর অন্ধকার। তমসা যেন প্রেতরূপ ধরিয়া চতুর্দিক হইতে হি হি করিয়া হাসিতেছে—কখন একবার বিদ্যুৎ দেখা যাইতেছে। বার-বারের একখানি সুসজ্জিত প্রকোষ্ঠে দুগন্ধফেননিভ শয্যা নিরুপমা সুন্দরী শুইয়া আছে, গৃহের চারিদিকে প্রহরী, তাহারা ঘন ঘন গৌফ মোচড়াইতেছে এবং ক্ষণে ক্ষণে বিদ্যুতের আলোকে তাহাদের উন্মুক্ত কিরিচ জুলিয়া উঠিতেছে। সোনাই এই ঘোর নিশাকালে তাহার মাকে স্মরণ করিয়া হাহাকার করিয়া কাঁদিয়া উঠিল, মায়ের মুখখানি মনে পড়িতে তাহার বুকে দুঃখ জাগিয়া উঠিল, তাহার পর মাধবকে স্মরণ করিল, এত দুঃখেও যে সে তাহার জাগ্রত প্রত্যক্ষ দেবতা স্বামীকে মুক্তি দিতে পারিয়াছে, এই ভাবিয়া গৌরব বোধ করিল, তারপরে মা বনদুর্গার পায়ে সহস্র প্রণতি জানাইল, ‘জীবনে মাকে হারাইয়াছি কিন্তু তুমি আমার সর্বকালের মা, সন্তানকে পায়ে স্থান দিও।’

পিতা তাহার অল্পবয়সে মারা গিয়াছেন, তাহার কথা ভাল করিয়া মনে নাই। কতদিন তাহার মুখখানি মনে করিতে চেষ্টা পাইয়াছে কিন্তু পায় নাই। আজ এই ঘোর দুর্দিনে এই অপার সিম্ধুতুল্য দুঃখের অতল তলে মুমূর্ষু পিতার মুখখানি যেন স্পষ্ট দেখিতে পাইল। তাহার পিতার মৃত্যুর রাত্রে সমস্ত জগতের দুঃখ তাহাদের ভাঙ্গা কুটীরখানি গ্রাস করিয়াছিল, আজ তেমনই আর একটা দুঃখের দিন। সেই অমানিশার বিকট অন্ধকারে চারিদিক হইতে সে অন্ধকারের ডাক শুনিল। কাঁদিতে কাঁদিতে বিষের কৌটাটা খুলিয়া বিষবড়ি খাইয়া সে শয্যা পড়িয়া রহিল। অব্যবহিত পরে দেওয়ান সেই ঘরে প্রবেশ করিল। তখন আর সোনাইয়ের দেহে প্রাণ নাই।

‘না দেখিল অভাগী, মারে, আপন বন্ধুজনে।  
কোথায় রইল প্রাণের বঁধু আজ এ দুর্দিনে॥  
কোথায় রইল শাশুড়ী কোথায় সন্না দূতী।  
নিদানকালে কাছে না রইল প্রাণপতি॥  
দুর্জন দূশমন ভাবনার আশা না পুরিল।  
প্রাণবঁধুরে বাঁচাইতে সোনাই পরাণে মরিল॥’

### আলোচনা

অষ্টাদশ শতাব্দীতে মোগল রাজত্বের অবসানের মুখে বঙ্গদেশে চোর ডাকাতির উপদ্রব খুব বাড়িয়া গিয়াছিল, পূর্ব সীমান্ত হইতে হার্মাদ (পর্তুগীজ জলদস্যু) মগ এবং দুর্দান্ত বিদেশী বণিকেরা অকস্মাৎ প্লাবনের মত নিম্ন বজ্রের পত্নীগুলির উপর পড়িয়া লুটরাজ্য করিত, কেবল ধনসম্পত্তি কাড়িয়া লইয়া, তাহারা গৃহস্থকে রেহাই দিত না;

যদি কেহ এই লুণ্ঠনব্যাপারে বাধা দিত তবে তাহার ঘরে আগুন ধরাইয়া দিত। কিন্তু তাহাদের বিশেষ লক্ষ্য ছিল সুন্দরী রমণীদের উপর। তাহাদিগকে তাহারা জোর করিয়া লইয়া যাইত এবং দক্ষিণাপথের হাটে বিক্রয় করিত। রমণীদের উপর এই অত্যাচার এদেশবাসী চিরকাল সহিয়া আসিয়াছে, যখন খ্রীষ্টপূর্ব যুগে গ্রীকেরা আসিয়াছিল, তখনও তাহারা রূপসী ললনাকুল ছাড়িয়া দেয় নাই, শিল্পী-স্বপতি এবং স্ত্রীলোকদিগকে তাহারা হত্যা করিত না, ব্রাহ্মণেরা তাহাদের ধর্ম মানিত না এবং ক্ষত্রিয়েরা তাহাদের বিরুদ্ধে যুদ্ধ করিত, এই দুই শ্রেণীকে তাহারা হত্যা করিয়া নির্মূল করিতে চেষ্টা করিত। কিন্তু সেই ইতিহাস-পূর্ব যুগ হইতে ভারতের শিল্পী জগতের সেরা স্থান অধিকার করিয়াছিল, এবং ভারতীয় ললনাদের নানা অসামান্য গুণ ও রূপের খ্যাতি দেশ-বিদেশে প্রচারিত ছিল। পারস্য দেশের বাজারে ও আলেকজেন্দ্রিয়ার হাটে এই রমণীরা এবং শিল্পীরা বিক্রীত হইত। হ্যাভেল সাহেব লিখিয়াছেন ভারতীয় স্বপতি ও শিল্পীরা ভারতের অপ্রতিদ্বন্দ্বী কলাশিল্প ও মঠ-মন্দিরাদি নির্মাণ-রীতি জগতে প্রচলিত করিয়াছিলেন। মন্দিরাদিতে গম্বুজ লাগাইয়া, দেবমূর্তির স্থলে লতা, পাতা, ফুল ও কলার অত্যাচর্য সৃষ্ণ কর্মের আদর্শ দান করিয়া তাঁহারা শুধু এসিয়ায় নহে, ইউরোপেরও নানা স্থানে ভারতীয় সংস্কৃতির প্রচলন করিয়াছেন, ভারতীয় কত রমণী বিদেশে নীত হইয়া তদ্দেশীয় নাম, উপাধি ও ধর্ম গ্রহণ করিয়া বিদেশীয়দের সঙ্গে মিশিয়া গিয়াছেন তাহারও সীমাসংখ্যা নাই। বিদেশী পণ্ডিতেরা সিদ্ধান্ত করিয়াছেন, মধ্যযুগে ইউরোপীয় গল্পসাহিত্যে ভারতবর্ষই ইউরোপীয়দিগকে হাতে খড়ি দিয়াছে। পঞ্চতন্ত্র, হিতোপদেশ, কথাসরিৎসাগর প্রভৃতি মাগধ গল্পসাহিত্য এবং বৌদ্ধ-জাতকগল্প ও পূর্বভারতের অতুলনীয় কথাসাহিত্য হইতে ইউরোপ প্রেরণা পাইয়াছিল। পূর্বভারতের তাত্ত্বিক উপাখ্যানগুলিও ড্রুইড পুরোহিতেরা উত্তর-ইউরোপে চালাইয়াছিলেন। উইলসন, ম্যাকডোনাল্ড, হান্স অ্যাডারসন ও গ্রীম ভ্রাতৃদ্বয় এবং অন্যান্য বহু পণ্ডিত ভারতের নিকট ইউরোপের এই ঋণের কথা স্বীকার করিয়াছেন। কে জানে যে বিদেশগতা রমণীরা আরবে, পারস্যে ও ইউরোপে এই কথাসাহিত্যের বিস্তারের পক্ষে কতকটা সাহায্য করিয়াছেন কিনা?

মুসলমান আবির্ভাবের পূর্বেও হিন্দুরাজত্ব কালে এই প্রকার রমণী-নির্ধাতন প্রচলিত ছিল। পল্লীর গল্পসাহিত্য পর্যালোচনা করিলে তাহার প্রমাণ পাওয়া যায়। শ্রীবৎস ও চিত্তার গল্পে, রাজা তিলকবসন্তের আখ্যানে এবং মহিষাল বঁধুর গল্পে। মলুয়া চরিত্রে এবং ভেলুয়ার উপাখ্যানে রমণীদের প্রতি এইরূপ উৎপীড়নের কথা পাওয়া যায়। মেয়েরা পল্লীর নিভৃত পুরীতে পাতাঢাকা ফুলের মত লুক্কায়িত থাকেন। কিন্তু তাঁহারা নদীর ঘাটে জল লইতে এবং স্নান করিতে কখনও কখনও আসিতেন। সেই সুযোগে দুর্বৃত্ত বণিকেরা তাহাদের ডিঙা থামাইয়া এই অসহায় অবলাদিগকে তুলিয়া লইয়া যাইত। এই গৃহহারা স্বামীসজ্জা বঞ্চিতা দেবীকল্প রমণীরা যে কত বিলাপ করিতে করিতে স্বীয় গ্রাম ছাড়িয়া বলপূর্বক অপহৃত হইয়া চলিয়া যাইতেন, তাহা এখনও প্রাচীন কবুণ গীতগুলির সুরে আমাদের কাণে ভাসিয়া আসে।

সুতরাং এই লুণ্ঠন শুধু মুসলমানদের দ্বারা হইত না। দেওয়ান ভাবনা—সেই রমণীর রূপলোলুপ দুর্বৃত্ত বড়লোকদের একজন ছিলেন, অনেক হিন্দু ও অন্যান্য

ধর্মাবলম্বী অত্যাচারী যুবকেরা চিরকাল হিন্দু রমণীদের প্রতি এই দুর্ব্যবহার করিয়া আসিয়াছেন।

সোনাই বাল্যকাল হইতে রূপের খ্যাতি পাইয়া আসিয়াছিল। তাহার পিতৃবিয়োগের পরে দুঃখে কষ্টে লালিত পালিত হইয়া এই রূপের প্রতিমা সমাজের আদরে বঞ্চিতা ছিল না। এই ছোট কাব্যখানি আদ্যন্ত একটা কুসুম-ভূষণা পত্নীর চিত্রের মত। বর্ষাকালের কেয়াফুলের গন্ধ, কদম্বের শিহরণ এবং দর্দুরের কলরবের মধ্যে কুমার মাধব নলখাগড়ার শর লইয়া একহস্তে পোষা ঘুঘুটি স্থাপনপূর্বক বনেবাদাড়ে শিকার করিয়া বেড়াইতেন।

মাধব যখন সোনাইকে দেখিল এবং সোনাই যখন মাধবকে দেখিল, তখনই তাহারা কন্দর্পদেবের অর্ঘ্য সাজাইয়া তাঁহার পূজার মন্দির রচনা করিল। এমন সময় সোনাইয়ের মামা ভাটুক ঠাকুরের সঙ্গে ষড়যন্ত্র করিয়া দেওয়ান ভাবনা নদীর ঘাট হইতে লোকজনদ্বারা সোনাইকে অপহরণ করিতে চেষ্টা পাইল। কিন্তু মাধব তাহাকে উদ্ধার করিয়া নিজগৃহে লইয়া আসিল। কাব্যখানিতে যেন বঙ্গদেশের ষড়ঋতু হাসিতেছে, কোনও সময়ে আম্রমুকুলের গন্ধ, কোনও সময়ে বকুল ও কদম্বের চারিদিকে ভ্রমরের সমারোহ, কোথাও বর্ষার ঝরঝরধারা—এই বিচিত্রতাপ্রাপ্ত মনোরম দৃশ্যাবলীর মধ্যে সোনাই মাতুলদত্ত নীলাম্বরীখানি পরিয়া নদীর ঘাটে আনাগোনা করিতেছে এবং সখী সন্তার নিকট তাহার মনের কথাগুলি কহিতেছে, কোনও সময় পদ্মদলে প্রেমপত্র লিখিতেছে; এই রূপের প্রতিমাকে ভোরের সময় জাগাইবার জন্য ডাহুক ও কোকিল ডাকিতেছে ও কুমার মাধব সাক্ষাৎ মন্থের ন্যায় তাঁহার পুষ্প ধনুতে জ্যা আরোপণ করিয়া আছেন।

কিন্তু যে বিধাতা সোনার তুলি দিয়া নানা কুসুমখচিত সৌরকরোজ্জ্বল এই জগতের বিচিত্র চিত্র অঙ্কন করেন, তিনিই আবার সম্প্রায় একটা পাত্র হইতে সমস্ত কালিমা ঢালিয়া সেই সুন্দর দৃশ্যগুলি মুছিয়া ফেলেন। ইহাই ভগবানের লীলা! যিনি সৌন্দর্যের চরম পরিকল্পনা করিতে পারেন, তাঁহার এই চরম নির্মমতা কোন কথায় ব্যাখ্যা করা যায় না। হিন্দু কবি তাই তাহাকে ‘লীলা’ আখ্যা দিয়াছেন।

যে রাত্রিতে সোনাই বিষ খাইবে—সে রাত্রি কী ভীষণ! অমানিশার অন্ধকারে জগৎ নিমজ্জিত—একাকী নির্জন প্রকোষ্ঠে সোনাই শয়িতা। ঝিল্লিরবে, ডাহকের চীৎকারে, নানা পাখীর আর্তরবে চারিদিক মুখরিত। মৃত্যু সম্মুখে করিয়া সোনাই বসিয়া আছে, তাহার মাতাকে মনে পড়িল এবং অবিরল ধারায় অশ্রু পড়িতে লাগিল। অতি শৈশবে সে পিতাকে হারাইয়াছিল, পিতার মূর্তি তাঁহার মনে ছিল না। আজ এই ঘোর দুর্দিনে সে যেন তাহার মৃতকল্প পিতার মুখখানি দেখিতে পাইল। যঁত দুঃখ সে জীবনে পাইয়াছে, আজ সকলে মিলিয়া আসিয়া তাহার সাক্ষাৎ করিল। আজ একটা সোনার পুতুল খেলিতে খেলিতে ভাঙিয়া পড়িল, আজিনার ধূলাবাগির সঙ্গে সোণার রেণু মিশিয়া গেল।

আজ সে বুঝাইয়া গেল, হিন্দু-রমণী সতত হাস্যময়ী লীলাপরায়ণা, বনকুসুমের মত নির্মল ও প্রফুল্ল; সে যেন চিরবসন্তের একটা চিত্রপট—সোনার তুলিতে ঐকা স্বর্ণলেখা—কিন্তু সে দুইখের সময় ভাঙিয়া পড়ে না, তাহার চরিত্রের দাঢ় ও একনিষ্ঠ ব্রত বিস্ময়কর। সে কুসুমের মত মৃদু কিন্তু হঠাৎ প্রয়োজন হইলে সে বজ্রবৎ কঠিন হইতেও পারে।

কবি লিখিয়াছেন, সে মাধবকে হৃদয়ের প্রেম জানাইয়া যে—সকল কাব্যকথা বলিয়াছিল—তাহা শুধুই মুখের কথা নহে : ‘প্রাণবঁধুকেই বাঁচাইতে সোনাই পরাণে মরিল।’

এই কাব্যের আদ্যন্ত বসন্ত ঋতুর ভ্রমর ও কোকিলের সুরে গাঁথা, ইহা একস্থানি উৎকৃষ্ট গীতিকাব্য, বিয়োগান্ত নাট্য হিসাবেও ইহার তুলনা নাই।

দেওয়ান ভাবনা—ইশা খাঁর কোন দূর বংশধর ছিলেন বলিয়া মনে হয়। এই বংশ নজর মরিচার দৌলতে এত হিন্দু রমণীর গর্ভজাত সন্তানদ্বারা বিস্মৃতি লাভ করিয়াছিল যে, ইহাদের মধ্যে অনেক বাহিরের লোক প্রবেশ করিয়া বংশাবলীকে জটিল করিয়া তুলিয়াছিল। দেওয়ানদের মধ্যে বিবাহের ফলে হউক, বা অন্য কোনরূপে কিছু সংস্রব থাকিলে জনসাধারণের সৌজন্যে সকল সন্তান ‘দেওয়ান’ নামেই পরিচিত হইতেন।

উড়িষ্যা এককালে বাঁহারা সচিব ছিলেন, তাঁহাদের বংশধরগণ এখন দীন-দশাগ্রস্ত হইয়া ‘মহাপাত্র’ ইত্যাদি উপাধি তাঁহাদের নামের পাছে বজায় রাখিয়াছেন। এই সকল দেওয়ানগোষ্ঠীর কোন শাখা বিশুদ্ধ এবং কোন শাখার সরূপ গৌরব নাই তাহা নির্ণয় করা কঠিন। ১৯২২ খ্রীষ্টাব্দের ২২শে সেপ্টেম্বর এই গানটী ময়মনসিংহ জেলার কেন্দুয়ার সন্নিকটবর্তী পল্লীবাসী মাঝিদের দ্বারা সংগৃহীত হইয়াছিল। সংগ্রাহক চন্দ্রকুমার দে। আমি গানটী কতকগুলি অধ্যায়ে বিভক্ত করিয়া সুশৃঙ্খল করিতে চেষ্টা পাইয়াছি।

## নীলা

অ প য়া ক জ্ঞ

মৈমনসিংহ জেলার বিপ্রপুর গ্রামে গুণরাজ নামে এক ব্রাহ্মণ বাস করিতেন। তাঁহার স্ত্রীর নাম ‘বসুমতী’। এই দুইটি প্রাণী বহু কষ্টে কোন রকমে জীবিকা নির্বাহ করিতেন। ব্রাহ্মণ সারাদিন ভিক্ষা করিয়া সম্ভ্যাকালে মুষ্টিভিক্ষা লইয়া গৃহে ফিরিতেন, তাহাতে স্ত্রী—স্ত্রীর এক বেলার কোনরকমে অন্নের সংস্থান হইত।

ইহার মধ্যে বাড়ীতে এক নুতন অতিথির আবির্ভাব হইল। ব্রাহ্মণ ও তাঁহার পত্নী কোনদিন পুত্র কামনা করেন নাই, নিজেরাই খাইতে পান না—ছেলেকে খাওয়াইবেন কি? কিন্তু যে পুত্র চাহে না, সে পুত্র পায়, এবং যে চাহে সে পায় না—সংসারের এই দুর্জ্জ্বল রীতি অনুসারে গুণরাজ ও তাঁহার পত্নী একটা পুত্র লাভ করিলেন। ষষ্ঠীর দিন ব্রাহ্মণ তালপাতায় লিখিয়া তাহার নাম রাখিলেন ‘কজ্জ’।

তাঁহার বহু কষ্টে শিশুটিকে পালন করিতে লাগিলেন, কিন্তু শিশুটি অতি দুর্ভাগা। যখন তাহার দুই বৎসর বয়স, তখন মাতা বসুমতী হঠাৎ জ্বররোগে প্রাণ ত্যাগ করিলেন।

এখন কেই—বা শিশুটিকে দেখে, কেই—বা ভিক্ষা করিতে যায়। গভীর শোকে—দুঃখে পাগলের মত হইয়া স্ত্রীর মৃত্যুর অব্যবহিত পরে গুণরাজও পরলোকে গমন করিলেন।

অপয়া বলিয়া সেই শিশুকে কেহ স্পর্শ করিল না। দুইদিন দুই রাত্রি সে আজিনায় ধূলায় লুপ্ত হইয়া কাঁদিতে কাঁদিতে ঘুমাইয়া পড়িল, ঘুম ভাঙিলে পুনরায় ক্ষীণতর স্বরে কাঁদিতে লাগিল। এই আপদকে যে স্পর্শ করিবে তাহারই অদৃষ্টে ঘোর বিপদ হইবে, এই সংস্কারবশত ভদ্রসমাজের কেহ তাহার ছায়া মাড়াইল না।

প্রতিবেশীদের মধ্যে মুরারি নামে এক চন্ডাল ছিল, তাহার স্ত্রীর নাম কৌশল্যা। ইহারা নিঃসন্তান ছিল। সেই শিশুর নিঃসহায় অবস্থা দেখিয়া তাহাদের মনে দয়ার উদ্বেগ হইল। চন্ডাল ব্রাহ্মণবাড়ীতে যাইয়া সেই পরিত্যক্ত বালককে কোলে করিয়া লইয়া আসিয়া তাহার স্ত্রীকে দিল। কৌশল্যা যেন হারানো মাণিক পাইয়া তাহাকে বুকে করিয়া ‘গোপাল’ নাম দিয়া আদর করিতে লাগিল।

এই অপোগন্ড শিশুর কাছে চাঁড়ালই বা কি ব্রাহ্মণই বা কি ? অনাথ শিশু পিতামাতা পাইল এবং নিঃসন্তান পিতামাতার মন বাৎসল্যরসে পূর্ণ হইয়া গেল।





কঙ্কের বয়স যখন পাঁচ বৎসর, তখন তাহার ধর্মপিতা মুরারি ত্রিদোষ ক্ষেত্রের জ্বরে আক্রান্ত হইয়া একদিনের মধ্যে প্রাণ ত্যাগ করিল। তাহার স্ত্রী কৌশল্যা স্বামীর শোকে পাগলের মত হইয়া অনুজল ত্যাগ করিয়া অব্যবহিত পরেই শূকাইয়া মারা পড়িল। চন্ডালের শাশানে অনাথ কঙ্ক ছাইপাশের উপর পড়িয়া রহিল। বিশ্বে তাহার এমন কেহ নাই যে তাহাকে কিছু জিজ্ঞাসা করে। সে নিজের অবস্থা কিছুই বুঝিল না। বজ্রাহতের ন্যায় শাশানঘাটে পড়িয়া রহিল, কেহ তাহাকে আশ্রয় দিল না। পরিত্যক্ত, অশুভকর এবং সর্বলোকের বর্জনীয় শিশু পৃথিবীতে কাহারও কোন কৃপা পাইল না।

### ক্ৰীড়া - স হ চ র

সেই বিপ্রপুর গ্রামে গর্গ নামে একজন ঋষিতুল্য প্রৌঢ় ব্রাহ্মণ ছিলেন, তিনি বেদাদি সর্বশাস্ত্রে সুপণ্ডিত। সে অঞ্চলের লোকেরা এই মহামহোপাধ্যায় নির্মল-চরিত্র ব্রাহ্মণকে দেবতাজ্ঞানে মনে মনে পূজা করিত। নদীতে স্নান-আহিক সারিয়া তিনি গৃহে ফিরিতেছিলেন, শাশানে পতিত বালককে দেখিয়া তাঁহার হৃদয় অনুকম্পায় পূর্ণ হইল ; তিনি অতি যত্নপূর্বক কঙ্ককে নিজের নামাবলী দিয়া মুছাইয়া কোলে তুলিয়া লইলেন, এবং নানা মিষ্ট কথায় আদর করিতে করিতে তাহাকে স্বগৃহে আনিয়া তাঁহার পত্নী গায়ত্রী দেবীর হস্তে সমর্পণ করিলেন।

ব্রাহ্মণ যেরূপ উদার ছিলেন, গায়ত্রী দেবীও তাঁহার যোগ্য ছিলেন। তাঁহার লীলা নাম্নী একটা দুই বৎসর বয়স্কা ছোট কন্যা ছিল, গায়ত্রী দেবী এই পাঁচ বছরের বালককে তাহার ক্রীড়া-সঙ্গী করিয়া দিয়া কত স্নেহ ও আদরে তাহাদের খেলা দেখিতে লাগিলেন।

তাঁহার দেখিলেন বালকটি অতিশয় মেধাবী। গর্গ তাহাকে মুখে মুখে নানা শ্লোক শিখাইলেন এবং দশম বর্ষ বয়সে তাহার হাতে খড়ি দিয়া ক্রমে ক্রমে পুরাণ-সংহিতা প্রভৃতি শাস্ত্রে পণ্ডিত করিয়া তুলিলেন। টোলে কঙ্ক ফরমাইসী গান রচনা করিতে শিখিল এবং কত যে বারমাসী বাজলা গান সে মুখস্থ করিল, তাহার ইয়ত্তা নাই।

যখন লীলার আট বৎসর বয়স, তখন গায়ত্রী দেবী মৃত্যুমুখে পতিত হইলেন।

গায়ত্রী দেবীকেও কঙ্ক মা বলিয়া জানিত। এই তৃতীয়বার কঙ্ক মাতৃশূন্য হইল। লীলা ও কঙ্ক উভয়েই সেই গৃহে মাতৃহারা। কঙ্ক চিরদুঃখী। মাতৃহারা হইয়া লীলা বেশী করিয়া কঙ্কের দুঃখ বুঝিল।

‘অষ্ট বছরের লীলা মায়ে হারাইয়া।

বুঝিল কঙ্কের দুঃখ নিজ দুঃখ দিয়া॥’

লীলা একদণ্ডও কঙ্কের সঙ্গ ছাড়ে না। যখন লীলা কাঁদিতে থাকে, তখন কঙ্ক তাহাকে সাবুনা দেয়। উভয়ে সহোদর সহোদরার মত পরস্পরের সমদুঃখী হইয়া একত্র থাকে।

গর্গের সুরভি নাম্নী একটা গাভী ছিল, সে গাভীর একটা বৎস ছিল—তাহার নাম ছিল পাটলী। দুপুর বেলা আতপতাপে ক্লান্ত, বাঁশী ও পাঁচনবাড়ি হাতে কঙ্ক গরু চরাইতে প্রান্তরে যাইত। লীলা তাহাকে রৌদ্রের মধ্যে মাঠে মাঠে ঘুরিতে নিষেধ করিত। সে মাঠে গেলে লীলা ঘরে আসিয়া একবার শয্যা শুইত, তারপর উঠিত ও বসিত ; দরজার কাছে যাইয়া দূর প্রান্তরের দিকে তাকাইয়া কঙ্কের জন্য অপেক্ষা করিত ; কখনও কখনও সেই বাঁশীর সুর শুনিয়া মুগ্ধ হইয়া চাহিয়া থাকিত।

সারাদিন রৌদ্রের তাপে মুখখানি লাল করিয়া কঙ্ক যখন বাড়ী ফিরিত, তখন এই ভগিনীতুল্যা স্নেহপ্রতিমা কত আদরে তাহাকে তালের পাখা দিয়া বাতাস করিত, কত যত্নে তাহাকে খাইতে দিত এবং যখন সে খাইত, তখন এটুকু খাও, ওটুকু খাও, এই ভাবে আদর করিয়া খাইতে অনুরোধ করিত।

সহসা আষাঢ়িয়া প্রবাহের যেমন জল নামে, তেমনই লীলার দেহে যৌবন আসিয়া পড়িল। দেহে এই অতর্কিত যৌবনের সমাগমে লীলা বিস্মিত হইয়া গেল, দৈন্যেতে দেখিতে চাঁপাফুলের বর্ণে দেহখানি যেন উজ্জ্বল হইল। ডালিমের ফুলের মত অধর রঞ্জিত হইয়া উঠিল। শ্রাবণে নদীর জলের মত লীলার রূপ কূলে কূলে ভর্তি হইয়া গেল। সে যখন কলসী কক্ষে লইয়া নদীর ঘাটে যায়, তখন সেই অপরূপ রূপের প্রতিমাখানি দেখিবার জন্য সাধুদের নৌকায় লোকের ভিড় হয়।

‘নদীর কিনারে কন্যা গো কলসী লইয়া।

চাহিল নদীর জলে আঁখি ফিরাইয়া ॥

হেরি সে সুন্দর রূপ চমকে সুন্দরী।

শীঘ্রগতি ঘরে ফিরে লইয়া গাগরী ॥’

নিজের কাছে সে নিজে ধরা পড়িল—এই আবিষ্কারে তাহার নিকট জগৎ নূতন রূপ ধারণ করিল। গোষ্ঠ হইতে ফিরিয়া আসিয়া কঙ্ক গৃহের আজিনায় শুইয়া পড়ে, সুরভি ও পাটলীকে লীলা জল খাওয়ায়, কঙ্কের পার্শ্বে লীলা একখানি তালের পাখা রাখিয়া তাহার আতপক্লিষ্ট মুখখানি দেখিয়া দুঃখ অনুভব করে।

গুণমুগ্ধ পীর ও ভক্ত কঙ্ক

এই সময়ে বিপ্রপুর গ্রামে একজন ফকির পঞ্চশিষ্য লইয়া আগমন করিলেন। একটা বড় বটগাছের তলা চাঁচিয়া তথায় তাঁহার আস্তানা স্থাপন করিলেন। নামডাকের সাধু—তিনি অনেক অলৌকিক কাণ্ড করিয়া সেখানকার লোকদিগের মনে বিস্ময় জন্মাইলেন, তাঁহাকে দর্শন করিবার জন্য বহু লোক আসিয়া তাঁহার দরগায় ভিড় করিতে লাগিল ; এমনই তাঁহার আশ্চর্য ক্ষমতা যে তিনি কোন ঔষধপত্র না দিয়া ধূলিপড়া দিয়া কঠিন কঠিন রোগ সারাইতে লাগিলেন। কোন লোক কাছে আসিলে তিনি তাহাকে মনের কথা বলিবার কোন অবকাশ দিতেন না। তাহার মুখচোখের দিকে ক্ষণকাল চাহিয়া থাকিয়া সে কিজন্য আসিয়াছে, তাহার বেদনা কোথায়—সকল বিবরণ নিজে বলিয়া দিয়া প্রতিকারের উপায় বলিয়া দিতেন। ধূলা

দিয়া মোয়া তৈরী করিয়া শিশুদিগের হাতে দিতেন—তাহার অমৃত আশ্বাদে তাহারা বিস্মিত হইয়া যাইত। শত শত লোক তাঁহার দরগায় আসিত এবং যে যাহা মনে করিয়া আসিত, তাহার বাসনা সিদ্ধ হইত। নানা দিত হইতে স্তূপে স্তূপে চাউল, কলা, বাতাসা, মোরগ, ছাগল, পায়রা তাঁহার কাছে লোকে সিন্ধি দিত, কিন্তু পীর তাহার কোনটির কণামাত্রও খাইতেন না, সমস্ত খাদ্য দরিদ্রদিগকে বিলাইয়া দিতেন।

মাঠে গাভী ছাড়িয়া দিয়া অপরাপর রাখাল বালকের সঙ্গে কঙ্ক গান গাহিত ; কখনও বাঁশী বাজাইত, সেই বাঁশীর সুর ও সুমিষ্ট গান—ডালে বসিয়া কোকিল শুনিত, তাহার পঞ্চম স্বর থামিয়া যাইত। পোষা জন্তুগুলি ঘাস খাওয়া ভুলিয়া সেই বাঁশী শুনিয়া তাহার কাছে আসিয়া চুপ করিয়া বসিয়া থাকিত। কুলবধূরা জল ভরিতে যাইয়া নদীর তীরে কলসী নামাইয়া রাখিয়া সেই বাঁশী শুনিত।

পীর কঙ্কের গান শুনিলেন, তাহার বাঁশীর সুরে তাঁহার চক্ষু হইতে অশ্রু নামিয়া আসিল। কি মিষ্ট সেই বাঁশীর সুর! কি মিষ্ট তাহার গলা! তিনি কঙ্ককে ডাকিয়া আনিয়া তাহার সহিত আলাপ করিলেন, ধর্মবিষয়ক যে সব আলোচনা হইল, পীর দেখিলেন, তরুণ বয়সে সেই সকল বিষয়ে তাহার আশ্চর্য অধিকার। এই অল্প বয়সে কঙ্ক ‘মলয়ার বারমাসী’ নামক একখানি কাব্য রচনা করিয়াছিল। পীর সেই কাব্যের আবৃত্তি কবির নিজের মুখে শুনিয়া তাহার অসাধারণ কবিত্বশক্তি দর্শনে মুগ্ধ হইয়া পড়িলেন। তিনি দেখিলেন অল্পবয়সে কঙ্ক যে দরদ লইয়া জন্মিয়াছে, তাহা দুর্লভ। কঙ্ক কাব্যগুলি গান করিয়া শুনাইত ও পীর ক্রমাগত চক্ষু মুছিতেন।

পীর যেমন কঙ্কের গুণমুগ্ধ হইল, কঙ্কও তেমনই তাঁহার অন্তরঙ্গ ভক্ত হইয়া দাঁড়াইল। কঙ্ক জাতিবিচার রাখিল না, ভক্তিতরে পীরের পায়ে মাথা লুটাইয়া প্রণাম করিত। তাহা ছাড়া পীরের উচ্ছ্রিষ্ট খাদ্য অমৃতজ্ঞানে প্রসাদ বলিয়া খাইত। পীরের নিকট কঙ্ক মুখে মুখে কলমা শিখিল এবং তাঁহার উপদেশ বেদের মত জ্ঞান করিয়া হৃদয়ের সমস্ত শ্রদ্ধা দ্বারা তাহা মনে গাঁথিয়া রাখিত। কিন্তু সে অতি গোপনে ফকিরের কাছে যাতায়াত করিত, গর্গ এই বিষয়ের বিন্দুমাত্রও জানিতেন না।

পীর কঙ্কের অদ্ভুত কবিত্ব শক্তি দেখিয়া তাহাকে একখানি সত্যপীরের পাঁচালী লিখিতে আদেশ করিলেন। আদেশ প্রদানের অব্যবহিত পরেই তিনি বিপ্রপুর গ্রাম ত্যাগ করিয়া কোন দূর দেশে প্রস্থান করিলেন।

কঙ্ক গুরুর আদেশ শিরোধার্য করিয়া সত্যপীরের কাব্য লিখিয়া ফেলিল। সেই অঞ্চলে এই পাঁচালীখানির খুব আদর হইল।

‘গুরুর আদেশ মানি,  
পাঠাইলা দেশ আর বিদেশে।  
কঙ্কের লিখনকথা,  
ব্যক্ত হৈল যথা তথা,  
দেশ পূর্ণ হৈল তার যশে ॥  
কঙ্ক আর রাখাল নহে,  
কবি কঙ্ক সবে কহে,  
শুনি গর্গ ভাবে চমৎকার।  
হিন্দু আর মুসলমানে,  
সত্যপীরে উভে মানে,

পাঁচালীর হৈল সমাদর ॥  
 যেই পূজে সত্যপীরে, কঙ্কর পাঁচালী পড়ে,  
 দেশে দেশে কঙ্কর গুণ গায়।  
 বুঝি কঙ্কর দিন ফিরে, রঘুসূত কহে ফেরে,  
 দুঃখিতের দুঃখ নাহি যায় ॥’

### সামাজিক গণের গোঁড়ামি ও ষড়যন্ত্র

এই অপূর্ব মেধাবী বালকের জন্য স্বভাবত দয়ার্দ্র গর্গের মন দয়াতে ভরিয়া গেল। তিনি দেখিলেন, কঙ্ক মেধাবী, বিনয়ী ও ধার্মিক, তাঁহার নিকট সংস্কৃত ও বাঙ্গলা পড়িয়া সে যাহা শিখিয়াছে, তাহা লইয়া তিনি গৌরব করিতেন—খুব অল্প ছাত্রের মধ্যেই এইরূপ প্রতিভা দৃষ্ট হয়। তিনি মনে মনে স্থির করিলেন কঙ্ককে জাতিতে তুলিতে হইবে।

তিনি নিজগৃহে বিশিষ্ট ব্রাহ্মণদের এক সভা করিয়া প্রস্তাব করিলেন, কঙ্ককে জাতিতে তোলা হউক। তিনি বলিলেন, ‘এই কঙ্ক বিশুদ্ধ ব্রাহ্মণবংশে জন্মগ্রহণ করিয়াছে, সে যে অবস্থায় চন্ডালের অনু খাইয়াছে, তাহাতে তাহার কোন দোষ দেওয়া যায় না, সে তখন অপোগন্ড শিশু ছিল। নিতান্ত অবোধ, সহায়সম্পদহীন ও নিঃসম্মল অবস্থায় শিশু যাহা করিয়াছে, তাহার উপর তাহার কোন হাত ছিল না।’

সামাজিকগণ একত্র হইয়া বিচারে বসিলেন, কিন্তু গর্গ ছিলেন মহাপণ্ডিত, তাঁহার হৃদয় ছিল উদার ও মহানুভব, তাঁহার সঙ্গে কোন পণ্ডিতই বিচারে ঐটিয়া উঠিতে পারিলেন না।

গোঁড়া দলের নেতা নন্দপণ্ডিত ও তাঁহার দল বিচারের দিক দিয়া গেলেন না। তাঁহারা বলিলেন, ‘এই কঙ্ক চন্ডালগৃহে চন্ডালের অন্নে পালিত, ইহাকে আমরা কিছুতেই সমাজে লইতে প্রস্তুত নহি।’ কোন যুক্তিতর্ক নাই, শুধুই ঘাড় নাড়িয়া তাঁহারা অসম্মতি জানাইলেন। শেষে এই বলিয়া চলিয়া গেলেন, ‘গর্গ পণ্ডিত ইচ্ছা করিলে কঙ্ককে লইয়া থাকিতে পারেন, কিন্তু তাহা হইলে তিনি আর আমাদের পাণ্ডিত্যে হইবেন না। যে ব্যক্তি জন্মের পরেই চন্ডালের অন্ন খাইয়াছে তাহাকে সমাজে গ্রহণ করার প্রস্তাব যে করে, সেও ব্রাহ্মণ নহে। অনাচারে জাতি, কুল নষ্ট হইয়া যায়, মাটিতে ফুল পড়িয়া গেলে তাহার দিয়া দেবতার পূজা হয় না।’

সেই ক্ষুদ্র পল্লীতে হাটে মাঠে ঘাটে আর কোন কথা নাই, কঙ্ক নাকি সমাজে উঠিবে! সকলের মুখে এই একই কথা! কোন কোন উদারচরিত্র লোক গর্গের কার্য শাস্ত্রসঙ্গত মনে করিলেন, অন্য সকলে বিদ্বেষ ও কটুক্তি করিতে লাগিলেন; কেহ কেহ গর্গের সম্মুখে উদারতার ভাণ করিয়া তাঁহার মনস্তুষ্টি সাধনে তৎপর হইলেন, কিন্তু আড়ালে যাইয়া ষড়যন্ত্রে যোগ দিলেন। সমাজের বহু লোক গর্গের মতের বিরোধী হইলেন।

‘কত তর্ক যুক্তি গর্গ সকলে দেখায় ।  
তবু না সে বিধি দিল পণ্ডিতসভায় ॥  
কেহ বলে তুলি ঘরে, কেহ বলে নয় ।  
এই মতে নানা স্থানে বহু তর্ক হয় ॥’

ষড়যন্ত্রকারীরা ক্রমশ খোঁট পাকাইতে লাগিল। তাহারা প্রচার করিল, কঙ্ক শুধু চণ্ডালের গৃহে পালিত নহে ; সে দস্তুরমত কলমা পড়িয়া মুসলমান পীরের নিকট দীক্ষিত হইয়াছে। সে মুসলমান ধর্ম গ্রহণ করিয়াছে। জোর হাওয়ায় আগুনের শিখা যেনুপ অল্প সময়ের মধ্যে দিগদিগন্তে ব্যাপ্ত হয়, বিরুদ্ধবাদীদের চক্রান্তে এই কথা সেইরূপ সমস্ত পল্লীসমাজে প্রচারিত হইয়া পড়িল—

‘রটে কঙ্ক নহে শুধু চণ্ডালের পুত ।  
মুসলমান পীরের কাছে হয়েছে দীক্ষিত ॥  
হিন্দু যত সবে কঙ্কে মুসলমান বলি ।  
কেহ ছিড়ে কেহ পোড়ায় সত্যের পাঁচালী ॥  
জাতি গেল মুসলমানের পুঁথি লৈয়া ঘরে ।  
যথাবিধি সবে মিলে প্রায়শ্চিত্ত করে ॥’

কিন্তু এখানেই শেষ নহে। জনসাধারণ যখন কোন ব্যক্তির বিরুদ্ধে দাঁড়ায় তখন তাহারা সহজে নিরস্ত হয় না, একেবারে চূড়ান্ত করিয়া ছাড়ে। কঙ্কের আরও নানা শত্রু জুটিয়া প্রচার করিল—সে লীলার সঙ্গে ব্যাভিচারে লিপ্ত।

‘একে তো কুমারীকন্যা অতি শূদ্রমতি ।  
কলঙ্ক রটাইল তার যত দুষ্কর্মতি ॥’

#### গর্গের মতিভ্রম

‘দশচক্রে ভগবান ভূত’—জনরব নানাদিক হইতে গর্গের কাণে পৌছিল। এমন যে শূদ্র শান্ত ধীর পুরুষ, নানা মিথ্যা প্রমাণ ও কল্পিত যুক্তিতর্কে তাঁহার মন বিযাক্ত হইয়া গেল। তিনি কঙ্কের বিরুদ্ধে অভিযোগ বিশ্বাস করিলেন। ঘড়ির দোলনদন্ডের ন্যায় তাঁহার মন একদিক হইতে অপরদিকে অতি দ্রুত চলিতে লাগিল। তিনি তাঁহার স্নেহশীলা কন্যার কলঙ্কের কথা শুনিয়া জ্বলিয়া উঠিলেন। এ মহাপাপ হইতে তাঁহার গৃহ ও গৃহাধিষ্ঠিত দেবতাকে কিরূপে রক্ষা করা যায়? মাথায় আগুন, তখন সুবৃন্দ কোথায় থাকিবে? স্থির করিলেন, কঙ্ককে বাড়ী হইতে তাড়াইয়া দিলেই এই কলঙ্কের মোচন হইবে না, তিনি তাহাকে হত্যা করিবেন। তারপরে লীলাকে সেই পথে প্রেরণ করিয়া নিজে অগ্নিতে আত্মবিসর্জন করিয়া প্রায়শ্চিত্ত করিবেন।

লীলা তাঁহার মনের ভাব লক্ষ্য করিল, যে মন প্রশান্ত এবং নিষ্কল্মষ দীপশিখার ন্যায় ছিল, তাহা যেন ঘূর্ণিপাকে পড়িয়া বিক্ষুব্ধ হইয়া উঠিয়াছে। তাঁহার বর্ণ বিবর্ণ

হইয়াছে, চোখের কোণ রক্তিমাজ্জড়িত ও উগ্র, সে পিতাকে কোনদিন এমন দেখে নাই। গর্গ দেবমন্দিরের কাছে যাইয়া উন্মত্তের ন্যায় চাহিয়া আছেন, লীলাকে দেখিয়া বলিলেন, ‘শীঘ্র নদীতে যাও, কলসী ভরিয়া জল লইয়া আইস। দেবতার মস্তকের তুলসীতে কুকুরে মুখ দিয়া বিগ্রহ অপবিত্র করিয়াছে। আমি এই মন্দির, শালগ্রাম ও সিংহাসন সমস্ত নদীর জল দিয়া ভাল করিয়া মার্জনা করিব, তুমি শীঘ্র জল লইয়া আইস।’

তাঁহার স্বরে চির অভ্যস্ত স্নেহের একটি বিন্দু নাই, বরং ভাষা কঠোর ও নির্মম—লীলার চোখ দুটি জলে ভরিয়া আসিল। সে কাঁদিতে কাঁদিতে কলসী কক্ষে জল আনিতে গেল। সে ভাবিতে লাগিল, তাহার জগতে কে আছে। পিতা বিরূপ হইলে সে আর কাহার মুখ দেখিয়া মনে শান্তিলাভ করিবে?

এমন সময়ে পিতার গুরুগম্ভীর মেঘগর্জনের মত স্বর শুনিয়া লীলা ঘাটের পথে থমকিয়া দাঁড়াইল। গর্গ বিরক্তি ও ক্রোধ মিশ্রিত স্বরে বলিলেন, ‘তোমাকে আর জল আনিতে হইবে না, আমি নিজে জল লইয়া যাইব, তুমি গৃহে ফিরিয়া যাও।’ এই বলিয়া ক্ষিপ্তের মত পাদক্ষেপে গর্গ কলসী জলে পূর্ণ করিয়া দেব-মন্দিরে প্রবেশ করিলেন। লীলার হাতের তোলা সমস্ত ফুল মন্দির হইতে ঝাঁট দিয়া ফেলিলেন; তাহার হাতের বেলপাতাগুলি ও ঘষা চন্দন দূর করিয়া ফেলিয়া নিজ হাতের আনা নদীর জলে তাম্বকুণ্ড, সিংহাসন ও শালগ্রাম ধুইলেন, মন্দিরটি স্বহস্তে মার্জনা করিলেন, তবুও মন শান্ত হইল না। প্রতিদিন যে একাগ্রতা লইয়া পূজা করিতে বসেন, সেদিন আর সে একাগ্রতা ফিরিয়া পাইলেন না।

এদিক সেদিক চাহিয়া কোনরূপে পূজা সারিয়া একা যাইয়া খাইতে বসিলেন। অন্য দিন লীলাকে ডাকিয়া তাঁহার নিকটে বসিতে বলেন, লীলা পরিবেষণ করে এবং তিনি কত স্নেহের কথায় আদর করেন, আজ লীলাকে ডাকিলেন, খুঁজিলেন না। কোনরূপে আহার শেষ করিয়া রান্নাঘরের বাহিরে যাইয়া একদৃষ্টে আকাশের একটা কোণ দেখিতে লাগিলেন। ঘরের দেয়ালের রম্ভ দিয়া লীলা সকলই দেখিতেছিল, তাহাকে খাওয়ার সময় একটীবার পিতা ডাকেন নাই, এই অভিমানে তাহার গণ্ড বাহিয়া অশ্রু পড়িতেছিল। সে ভয়ে তাহার পিতার মুখের দিকে চাহিতে পারে নাই। উদ্দাম ঝড়ের মুখে তরলীখানি বাঁধা ঘাটে যে রূপ কাঁপিতে থাকে লীলা অজানিত আশঙ্কায় ঘরে বসিয়া তেমনই কাঁপিতেছিল।

পিতার আহার করার পর লীলা কঙ্কের জন্য ভাততরকারি পরিচ্ছন্নভাবে সাজাইয়া একটা ঢাকনি দিয়া ঢাকিয়া সিকায় ঝুলাইয়া রাখিল এবং রন্ধনশালা ত্যাগ করিয়া চলিয়া আসিল।

এদিকে গর্গ দেখিলেন, রান্নাঘরে জনপ্রাণী নাই। তখন একটা কোঁটা হইতে হলাহল বিষ বাহির করিলেন, এবং চোরের মত মৃদু পাদক্ষেপে ঘরে ঢুকিয়া সেই অনুব্যঞ্জনের থালা বিষ মিশ্রিত করিয়া দ্রুতপদে নিষ্কাশিত হইলেন। লীলা গর্গের প্রতি স্থির লক্ষ্য বন্দ্য করিয়াছিল। গর্গের অগোচরে সে তাঁহার এই অমানুষিক নির্মম কাণ্ড দেখিতে পাইয়া একেবারে সংজ্ঞাশূন্যের মত রান্নাঘরের দ্বারে বসিয়া পড়িল।

কঙ্কের গৃহত্যাগ

সম্ভ্রাম্য সুরভি ও পাটলীকে লইয়া কঙ্ক গৃহে ফিরিল। কঙ্ক দেখিল বিমনা হইয়া লীলা অনুব্যঞ্জনের থালাখানি সম্মুখে করিয়া বসিয়া আছে। সে লীলাকে বলিল, ‘আজ

তোমার মুখ এরূপ মলিন কেন লীলাদেবী? আমি বাড়ী ফিরিবার পথে পিতাকে দেখিলাম, অন্যদিন আমার শ্রমক্লান্ত শরীর দেখিয়া তিনি কত আদরের সঙ্গে কথা বলেন, আজ আমাকে দেখিয়া অন্যদিকে মুখ ফিরাইলেন, একটা স্নেহের কথা বলিলেন না। আর তোমায় জ্ঞপ্তিয়া কত আনন্দ পাই! কিন্তু তোমার মুখে কে যেন কালিমা ছড়াইয়া দিয়াছে! ওকি! কাঁদিতেছ কেন? অনেক দিন তো তোমার চোখে জল দেখি নাই! আমার কাছে সকল কুখা খুলিয়া বল।’

লীলা বলিল, ‘কঙ্ক তুমি এখনই এ গৃহ ত্যাগ কর—যে দেশে আত্মীয়বান্ধব কি পরিচিত কেহ নাই, যে দেশ একেবারে জনবিরল ও নির্বান্ধব তুমি সেইখানে যাও—আজই যাও—এখনই যাও।’ বলিতে বলিতে লীলা একটি সোণার পুতুলের ন্যায় ভাঙ্গিয়া পড়িল, তাহার মুখ দিয়া আর কোন কথা বাহির হইল না। শেষে বলিল, ‘আমি রাক্ষসী, বিষ-মাখা ভাত খাওয়াইয়া তোমাকে মারিতে বসিয়া আছি।’

কিছুকাল পরে লীলা নিজেকে কতকটা সংবরণ করিয়া লইল এবং দুর্ঘটলোকের কথায় গর্গ করূপ বিচলিত হইয়া ক্ষিপ্তের মত হইয়া গিয়াছেন, তাহা কঙ্ককে জানাইল। কঙ্ককে বধ করিবার জন্য যে গর্গ অনুব্যঞ্জে বিষ মিশাইয়াছেন তাহা বলিতে যাইয়া লীলার বুক ভাঙ্গিয়া যাইতে লাগিল; দুই হাতে অঞ্চল দিয়া চক্ষু মুছিয়া লীলা ফোঁপাইয়া কাঁদিতে লাগিল।

কঙ্ক চুপ করিয়া দাঁড়াইয়া রহিল। কোন বৃক্ষের উপর বজ্রাঘাত হইলে প্রাণহীন তরু যেৰূপ স্থির হইয়া মাটির উপর ক্ষণকালের জন্য দাঁড়াইয়া থাকে, কঙ্ক সেইরূপ খানিকটা নিস্তম্ভ হইয়া রহিল; তারপর দুঃখার্ত স্বরে বলিল, ‘লীলা ভগবান জানেন, আমার কোন অপরাধ নাই। চন্দ্রসূর্য সাক্ষ্য দিবেন, দিবারাত্রি সাক্ষ্য দিবেন। পিতা মহাজ্ঞানী ব্যক্তি, কুলোকের কথায় তাঁহার বৃদ্ধি ক্ষণকালের জন্য মেঘাচ্ছন্ন হইয়াছে। কিন্তু এই মোহের ভাব বেশী সময় থাকিবে না; আমি আপাতত কোন তীর্থস্থানে যাইতেছি; পিতার এইভাব কাটিয়া গেলে আবার আমি আসিব। আর লীলা, পিতার প্রতি শ্রদ্ধাহীন হইও না, তিনি তোমার আমার পরম গুরু, ক্ষণতরে তাঁহার বৃদ্ধিভ্রংশ হইয়াছে।’

লীলা বলিল, ‘তুমি যাও, আমি এই বিষাক্ত অনুব্যঞ্জন খাইয়া প্রাণত্যাগ করিব, সংসারে আমার আর কোন আকর্ষণ নাই।’

কঙ্ক তাহাকে অনেক রকমে বুঝাইল, ‘আজ কোন দুর্ঘটনার পূর্বাভাস পাইয়া সুরভি ও পাটলী তৃণ কি ঘাস খায় নাই, এই বাড়ীর দিকে ফ্যালফ্যাল করিয়া চাহিয়াছিল; ইহারা আমার অভাব বিশেষ করিয়া অনুভব করিবে, তুমি ইহাদের দেহে হাত বুলাইয়া দিও। তোমার নিকট বিদায় চাহিতেছি, যদি অজ্ঞাতসারে কোন অপরাধ করিয়া থাকি, তবে আমায় ক্ষমা করিও।’

কঙ্কের গদগদ কণ্ঠ শোকবেগে ক্ষণতরে থামিয়া গেল। পুনরায় সে বলিতে লাগিল—

‘ঘরে আছে পোষা পাখী হীরামন শারী।  
তাহারে ডাকিও লীলা কঙ্ক নাম ধরি ॥  
নাহি পিতা নাহি মাতা নাহি বন্ধু ভাই।  
যেদিকে কপাল নিবে যাব সেই ঠাই ॥

রইল রইল লীলা তোমার তোতা শারী ।  
 ক্ষীর সর দিয়া তারে পালিও যত্ন করি ॥  
 রইল রইল রে লীলা পুষ্প তরু যত ।  
 জল সেচন দিয়া পালিও অবিরত ॥  
 রইল রইল রে লীলা মালতির লতা ।  
 আজি হৈতে রইল পড়ি তোমার মালাগাঁথা ॥  
 সুরভি পাটলী রইল প্রাণের দোসর ।  
 তৃণজল দিয়া সবে করিও আদর ॥’

‘গৃহদেবতা শালগ্রাম আছেন ; পিতা যতদিন ক্ষিপ্তভাবে থাকিবেন, ততদিন যেন পূজার কোন ত্রুটি না হয়।

‘তোমার আমার গুরু রে লীলা রইলেন পিতা ।  
 জীবনমরণে তিনি সাক্ষাৎদেবতা ॥  
 অত্যাচার করেন যদি লইও শির পাতি ।  
 নারায়ণে স্মরিও লীলা অগতির গতি ॥  
 দুঃখ না করিও লীলা আমার লাগিয়া ।  
 আবার হইবে দেখা, আসিলে বাঁচিয়া ॥’

গর্গ পাগল হইয়া ছুটাছুটি করিয়া একবার ঘর একবার বাহির হইতেছেন। চক্ষু দুটী জবা ফুলের মত টকটকে লাল। ‘আজ হতভাগ্য কঙ্ককে শেষ করিয়া দিয়াছি, কিন্তু এখানেই শেষ নহে। যে পাষাণী কন্যাকে বুকে জড়াইয়া ধরিয়া সংসার পাতিয়াছিলাম—গৃহহারা হইয়া তো বিবাগী হইয়া কবে চলিয়া যাইতাম—যাহার মায়ায় আটকা পড়িয়াছি, যাহার মুখ দেখিলে পাষাণের প্রাণেও দয়ার উদ্বেক হয়, চিরশত্রুও যাহার মুখ দেখিয়া ভালবাসিতে চায়, সেই স্নেহের পুতুলকে আজই জলে ডুবাইয়া মারিব এবং ঘরবাড়ী—মন্দিরে আগুন ধরাইয়া সেই জ্বলন্ত আগুনে প্রাণ ত্যাগ করিব।’ গর্গ একদিকে যেমন সাধু যেমন সরল অপরদিকে তেমনই বজ্রের মত কঠোর ও নিষ্ঠুর।

কঙ্ক ঘরে আসিয়া বসিল—সে আজই এই প্রিয়স্থান ত্যাগ করিয়া যাইবে। গায়ত্রী দেবীকে মনে পড়াতে চক্ষে অবিরল জলবিন্দু পড়িতে লাগিল—‘কোথায় যাইব—যেখানে জনমানব নাই, যেস্থান হিংস্র পশুসজ্জ্বল—আমি তাহাদের খাদ্য হইব।’ গণ্ডে হস্ত স্থাপন করিয়া কঙ্ক সেই দূর অজ্ঞাত প্রবাসযাত্রার কথা ভাবিতেছে এমন সময় পাগলের মত চীৎকার করিয়া লীলা তথায় উপস্থিত হইয়া বলিল, ‘সুরভিকে সাপে কাটিয়াছে, তুমি শীঘ্র ওঝা ডাকিতে চলিয়া যাও, আমি সুরভির কাছে যাই।’ স্থলিতপদে চঞ্চল চরণে নিদারুণ মনোবেদনায় লীলা এই বলিয়া চলিয়া গেল ; কঙ্ক তাহাকে দ্রুতপদে অনুসরণ করিয়া যাইয়া দেখিল সুরভি দারুণ বিষে পিজ্জাল বর্ণ হইয়া গিয়াছে এবং অন্তিম নিশ্বাস টানিতেছে। সে লীলাকে জিজ্ঞাসা করিল, সেই বিষাক্ত অনুব্যঞ্জন কোথায় ফেলিয়াছিল? সহসা লীলার কাছে সব কথা পরিষ্কার হইয়া গেল। সে বলিল ঐ জায়গাটায় তো সুরভি গিয়াছিল। কঙ্ক



বলিল, ‘কি সর্বনাশ! ঐ ভাতব্যঞ্জন খাইয়া আমি মরিলে কি আর ক্ষতি হইত! ব্রাহ্মণের বাড়ীতে ঠাকুরের মন্দিরের কাছে গোহত্যা হইল—কি সর্বনাশ!’ কঙ্ক দেখিল সুরভির বৎস পাটলী ঘুরিয়া ঘুরিয়া মৃত্যু মায়ের শবের কাছে যাইতেছে—সেই কল্প দৃশ্য দেখিয়া সে সেখানে তিষ্ঠিতে পারিল না। লীলা আত্ননাদ করিয়া কাঁদিতে লাগিল। রান্নাঘরে যাইয়া সে ভূমিতে আঁচল পাতিয়া শয়ন করিল।

আড়াই প্রহর রাত্রি পর্যন্ত কঙ্ক বাহিরের ঘরে বসিয়াছিল, তারপরে উঠিয়া গিয়া একটা নিমগাছের নীচে ঘুমাইয়া পড়িল। তাহার ঘুম হইল না, তন্দ্রায় দেখিতে পাইল, চার দিকে ভয়াল মূর্তি প্রেতের দল ঘুরিতেছে। তাহারা ছায়ার ন্যায় আসিয়া কঙ্ককে ধরিয়া চিতার আগুনে দগ্ধ করিতে লাগিল। কঙ্ক যন্ত্রণায় চিৎকার করিতে লাগিল, ‘কে আছ আমায় পরিত্রাণ কর।’

সেই বিপদের মুহূর্তে সে স্পষ্ট দেখিল—ইহা ঘুমের স্বপ্ন নহে, তন্দ্রার আবেশ নহে, আরক্ত গৌরবর্ণ এক যুবক তাহার শীতল করপদ্ম দ্বারা তাহাকে সেই চিতা হইতে উদ্ধার করিলেন, এবং বলিলেন, ‘আয়, আমার কাছে আয়, যদি জুড়াবি তবে আমার কাছে আয়।’

কঙ্ক চাহিয়া আর দেখিল না, বুকিল সেস্থান পদ্মগন্ধময়, গৌরাজ্ঞ অদৃশ্য হইয়াছেন, কিন্তু তাহার গায়ের পদ্মগন্ধ সেখানে ফেলিয়া গিয়াছেন।

‘রক্তগৌর তনু তাঁর কাঞ্চনের কায়া।  
আগুন হইতে কঙ্কে দিল বাঁচাইয়া ॥  
স্বপনে আদেশ তাঁর পাইয়া কঙ্কধর।  
প্রভাতে গৌরাজ্ঞ বলি ত্যজিলেক ঘর ॥’

প্রত্যুষে কোকিল ও কাকের রবে মুখরিত বিপ্রপুর পল্লীর ছায়া—শীতল নিবিড় তরুতলে কঙ্ককে আর কেহ দেখিতে পাইল না।

প্রাতে অজুলায়িতকেশা, অসম্মত—বসনা লীলা হঠাৎ উঠিয়াই কঙ্কের ঘরে গমন করিল—শূন্য শয্যা, কঙ্ক নাই। তারপরে গোয়ালঘরে যাইয়া শুনিল, পাটলীর হাম্মারব থামে নাই। সারারাত্রি সে অবিরাম চিৎকার করিয়াছে, কঙ্ক সেখানে নাই।

‘নয়নেতে নিদ্রা নাই, পেটে নাই অন্ন।  
সর্ব স্থানে খোঁজে লীলা করি তন্ন তন্ন ॥’

হেমন্তের নদী উজ্জান স্রোতে চলিয়াছে—তাহার পাড় ধরিয়া লীলা কঙ্ককে খুঁজিতে লাগিল, কিন্তু কঙ্ক কোথাও নাই।

‘এক স্থানে শতবার করে বিচরণ।  
কোথা কঙ্ক বলি লীলা ডাকে ঘন ঘন ॥  
পোষ্যমানা পাখীরে লীলা কাঁদিয়া শুধায় ॥  
তোমরা কি দেখেছ কঙ্ক গিয়াছে কোথায় ॥  
উড়িয়া ভ্রমর বইসে মালতীর ফুলে।  
তাহারে জিজ্ঞাসে কন্যা ভাসি আঁখি জলে ॥

যাইবার আগে মোরে নাহি দিলে দেখা।

এই ছিল অভাগীর কপালের লেখা ॥

### গর্গের অনুতাপ ও দেবতার প্রত্যাদেশ

সারা রাত্রি গর্গ বনেবাদাড়ে ঘুরিয়া বেড়াইলেন, আহার নাই, ক্লাস্তি নাই, যেন এক ঘোর উন্মাদ। আকাশে শাচান ও গাথচিল উড়িতেছে, ঘোর রব করিয়া দিবাভাগে শৃগাল ডাকিতেছে। প্রকৃতির এই দুর্লক্ষণ দেখিয়া আশঙ্কায় গর্গের মুখ শুকাইয়া গেল। প্রভাতে তিনি বাড়ী ফিরিলেন, দেখেন বাড়ী শূন্য, সমস্ত দরজায় খিল দেওয়া—এত বেলা কিন্তু প্রাতঃকালের ঘণ্টা মন্দিরে বাজিতেছে না, কাল রাত্রে আরতি হইয়াছে বলিয়া মনে হইল না।

শত শত মালতী ফুল মাটিতে ঝরিয়া পড়িয়াছে। কেহ ফুল তোলে নাই, কেহ মালা গাথে নাই, তাহাদের পাশ কাটিয়া ভ্রমর উড়িয়া যাইতেছে, ফুলের উপর বসিতেছে না। তাহার পাদক্ষেপ শুনিয়া হাম্মা হাম্মা রব করিয়া পাটলী ছুটিয়া আসিল, তাহার মূতা মাতা আজিনায় পড়িয়া রহিয়াছে। পাটলী এক-একবার আসিয়া গর্গের পদতলে লুটাইতেছে—সে দৃশ্য দেখিয়া গর্গের বুক বিদীর্ণ হইল। তিনি মন্দিরে প্রবেশ করিয়া খিল লাগাইলেন। সেইখানে দেবতার ঘরে তিনি প্রাণ দিবেন। পূজার আর কোন উপচার নাই—শুধু অশ্রুজল।

দুই দিন চলিয়া গেল, শিষ্যেরা আসিয়া ফিরিয়া গেল, ঠাকুর দোর খোলেন নাই। সহরে বাজারে সর্বত্র রক্ত হইল গর্গঠাকুর ঘরে হত্যা দিয়া আছেন। অনাহার অনিদ্রা ও নিদারুণ দুঃখে ঠাকুরের নিকট শুধু অশ্রু নিবেদন ; কোন মন্ত্র পড়িলেন না, কোন অনুষ্ঠান করিলেন না, পূজা, জপ, গায়ত্রী পাঠ তুলিয়া গেলেন, ঠাকুরের উদ্দেশে, শিশু যেমন মায়ের জন্য কাঁদে—কথা বলিতে শিখে নাই, কি চাহে তাহা সে জানে না—তেমনি দুঃখভারাক্রান্ত চিন্তে, তেমনি নিঃসহায় ভাবে মর্মবেদনায় গর্গ কাঁদিতে লাগিলেন। দুই দিন পরে তাহার আত্মা নির্মল হইল। তিনি স্পষ্ট ভাষায় দেবতার আদেশ শুনিতো পাইলেন—

‘গর্গ, তুমি নির্দোষ সরলা নিজকন্যাকে অবিশ্বাস করিয়া মারিতে সজ্জন করিয়াছ, যে নিরাশ্রয় যুবক তোমাকে ভিন্ন জানে না, যাহার প্রকৃতি সরল ও মধুর, যে সম্পূর্ণ নির্দোষ এবং তোমার একান্ত আশ্রিত তাহাকে তুমি মারিতে তাহার ভাতে বিষ মাখাইয়া দিয়াছ, সেই অনু খাইয়া সুরভি মরিয়াছে। এজন্য দেবতা তোমার উপর বিরূপ হইয়াছেন—

‘আপন কন্যায় যে মারিতে যুক্তি করে।

পালিত জনারে যেবা বিষ দিয়া মারে ॥

এই না কারণে তোমার এতেক সর্বনাশ ॥

সেই বিবে সুরভির হৈল প্রাণনাশ ॥’

অনুতাপে গর্গ দগ্ধ হইতে লাগিলেন, ‘স্বর্গের কুসুমের ন্যায় মাতৃহীনা নিজকন্যা, পুত্রের অধিক প্রিয় সরল সচ্চরিত্র বালক—ইহাদিগকে মারিতে চেষ্টা করিয়াছি !

সূরভিকে আমি মারিয়া ফেলিয়াছি। পরের কথা বিশ্বাস করিয়া আপনজনের বিরুদ্ধে ষড়যন্ত্র করিয়াছি। হায়! আমার গতি কি হইবে!’ এই বলিয়া গর্গ কিছু কাল মোহগ্রস্ত হইয়া ঠাকুরঘরে পড়িয়া রহিলেন। নিজে প্রাণ ত্যাগ করিয়া এই ঘোর পাপের প্রায়শ্চিত্ত করিবেন এই সজ্জন তাঁহার মনে দৃঢ় হইল। কিভাবে প্রাণ দিলে আমার মত নারকীর উদ্ধার হইতে পারে! এই ভাবিতে ভাবিতে গর্গ শালগ্রাম শিলার কাছে আবার হত্যা দিলেন।

আরও দুইদিন কাটিয়া গেল। গর্গ ঠাকুরঘরের খিল খুলিলেন না। শিষ্যেরা চিন্তিত হইয়া পড়িল। চতুর্থ দিন শেষ রাত্রে গর্গ আবার আদেশ শুনিলেন, সেই আদেশ কঠোর হইলেও অতি মধুর—মায়ের কথার মত গঞ্জনাময় ও মায়ের কথার মত স্নেহ—মাখা। যাহা শুনিলেন, তাহাতে তাঁহার সর্বাঙ্গের তাপ জুড়াইয়া গেল। কে যেন তীব্র ঔষধ দিয়া তাঁহার উৎকট ব্যাধি প্রশমিত করিয়া গেল। গর্গ শুনিলেন—

‘তুমি যে ফুল মন্দির হইতে ঝাঁট দিয়া ফেলিয়া দিয়াছ, তোমার কন্যার তোলা সেই ফুল ও দুর্বাদলে ঠাকুরপূজা কর—তোমার কৃত গোহত্যার পাপের ইহাই প্রায়শ্চিত্ত।’

গর্গ যাহা শুম্ব মনে করিয়াছিলেন, নিজের হাতে তোলা সেই কলঙ্কিত ফুলগুলি মন্দির হইতে ফেলিয়া দিলেন ; মন্দিরের বাহির হইতে লীলার তোলা বাসি ও শুম্বফুলগুলি মাথায় ঠেকাইয়া আবার পূজার আসনে বসিলেন। সারারাত্রি যোগাসনে বসিয়া গর্গ দেবতার কাছে মার্জনা চাহিলেন, তাঁহার চক্ষু দুটি কাঁদিয়া কাঁদিয়া ফুলিয়া গিয়াছে।

পঞ্চম দিন প্রাতে গর্গ মন্দিরের দরজা খুলিলেন। তাঁহার অশ্রুপ্রাবিত মুখে স্বর্গীয় জ্যোতি। বিচিত্র এবং মাধব নামে দুই শিষ্য দ্বারে দণ্ডায়মান ছিল। গুরুদেব বলিলেন, ‘দুষ্ট লোকের ষড়যন্ত্রে পড়িয়া আমার প্রাণের কঙ্ককে আমি বিষ খাওয়াইতে গিয়াছিলাম। চিরদিন যাহাকে পুত্র বলিয়া স্নেহ করিয়াছি সে আমার ঘোর পাপে বিবাগী হইয়া চলিয়া গিয়াছে, যাহাকে আমি তোতাপাখীর মত মুখে মুখে আবৃত্তি করিয়া শ্রোক শিখাইয়াছিলাম, আমার সে তোতাপাখী কোথায় গেল? তাহার চরিত্রগুণে তোমরা তাহাকে প্রাণের মত ভালবাসিয়াছ, সে শুধু তোমাদের বশু ছিল না—সহোদরের মত ছিল। তোমরা তাহাকে ঝুঁজিয়া আন ; তোমরা তাহার দেখা পাইলে বলিও—আমার মাথার দিব্য সে যেন ফিরিয়া আসে, তাহার হাত ধরিয়া তাহাকে সাধিয়া আনিও ; পাটলীকে তৃণজল দিবার কেহ নাই। হীরামন পাখী কঙ্ক কঙ্ক বলিয়া ডাকিয়া ক্ষান্ত হইয়া গিয়াছে ; সে আর কিছু আহার করে না। কঙ্কের দেখা পাইলে বলিও তাহার উপর আমার আর কোন সন্দেহ নাই। সে যেন আমাকে ক্ষমা করিয়া আশ্রমে আসে, সে ছাড়া আশ্রম শূন্য হইয়া গিয়াছে, আমি চতুর্দিক অশ্মকার দেখিতেছি। আমি এই ঠাকুরঘরে তার প্রতীক্ষায় রহিলাম, যতদিন সে ফিরিয়া না আসে ততদিন অনুজল না খাইয়া শুকাইয়া থাকিব। সে না আসিলে এই আসনেই আমি প্রাণ দিব—

‘আর যদি দেখা পাও কইও করে ধরি।

অপরাধ করিয়াছি, ক্ষমা ভিক্ষা করি ॥’

লীলা, বিচিত্র ও মাধবের কঙ্কের উদ্দেশ্যে বিদেশে যাত্রার কথা শুনিল। সে ঘরে ঢুকিয়া আঁচল পাতিয়া শয্যা তৈয়ারী করিল ও অনাহারে অনিদ্রায় দিনরাত্রি যাপন করিতে লাগিল। সে আর কাহাকে কি বলিবে! আকাশের সূর্য ও চন্দ্রকে সে নিজ মনোবেদনা জানাইল, ‘পৃথিবীর সর্বস্থান তোমাদের বিদিত, জগতের এমন কোন আঁধার কোণ নাই যেখানে তোমাদের আলোকরশ্মি প্রবেশ না করে, তোমরা নিশ্চয়ই কঙ্কের সম্মান জান —

‘নাগাল পাইলে তারে আমার কথা কইও ।  
আলোকে চিনাইয়া পথ দেশেতে আনিও ॥’

নৌকাগুলি পালের জোরে তরঙ্গ ভেদ করিয়া চলিয়াছে। লীলা তাহাদিগকে বলিল, ‘তোমাদের গতিবিধি সর্বত্র, তোমরা যদি কঙ্কের সম্মান পাও, তবে তাহাকে ধরিয়া আনিও ।’

এইভাবে লীলা, নক্ষত্র তারা চন্দ্র সূর্য প্রভাতী বায়ু উষা বনমুঞ্জরিত লতা, পুষ্পবিতান, ফলফুলভারনত ডাল, নানা বর্ণের নানা পাখী বিশ্বে যাহাকে দেখিতে পায় বিমনা হইয়া তাহাকেই কঙ্কের সম্মান জিজ্ঞাসা করে। প্রকৃতির সঙ্গে ব্যথিত মনের এই নিবিড় সম্বন্ধ ঋতুভেদে বিচ্ছেদকাতর মনের ক্ষোভ, আশা ও আশাভঙ্গা পৃথিবীতে চিরকাল চলিয়া আসিয়াছে। এই নারীর হৃদয়ের দুঃখ মুখ ফুটিয়া বলিবার সুযোগ নাই। এইজন্য প্রকৃতির সঙ্গে তাহার সম্বন্ধ ঘনিষ্ঠতর ও নিবিড়তর। কবি যত কিছু বারমাসীতে লিখেন, তাহা তাঁহার কল্পনা নহে ; গাঢ় অনুভূতি ও নিষ্কাম নিঃস্বার্থ প্রেমে তাঁহার মন ‘পতিত পত্রে, বিচলিত পত্রে’—প্রিয়ের পাদক্ষেপের পরিকল্পনা মনে জাগাইয়া তোলে।

এইভাবে শৈশবের সঙ্গী, কৈশোরের সখা, যৌবনের প্রিয় কঙ্কের জন্য লীলার মনে হাহাকার ধ্বনি উঠিল। তাহার আহরনিদ্রা চলিয়া গেল। যে দিকে চায়, যাহাকে দেখে, অমনই তাহার চক্ষু অশ্রুতে ভিজিয়া উঠে। গায়ত্রীর মৃত্যুর পর সমস্ত সহোদরের স্নেহ কঙ্ক তাহাকে দিয়াছিল, শত শত ক্ষুদ্র ঘটনায়, কঙ্কের সরল মধুর ব্যবহারে তাহার মন কঙ্কময় হইয়া গিয়াছিল। তাহারই জন্য মিথ্যা কলঙ্কের ভাজন হইয়া পিতার ক্রোধের পাত্র হইয়া নির্দোষ, নিরপরাধ কঙ্ক কত কষ্ট পাইয়াছে! আজ প্রতি ক্ষুদ্র কথা মনে পড়িয়া তাহার হৃদয় বিদীর্ণ হইতে লাগিল। সে শূকাইয়া কাঠ হইয়া গিয়াছে। তাহার সে বিদ্যুতের মত রূপের জ্যোতি আর নাই। সে দিনরাত্রি আঁচল পাতিয়া বাম বাহু শিখান করিয়া চক্ষের জলে ভাসে এবং সম্মুখে মৃত্যুর ছায়া দেখিয়া শিহরিয়া উঠে।

ফাল্গুনে মাসে গাছের ডাল ভরিয়া লাল ফুল ফুটিল, কঙ্ক যে মালতীলতা পুঁতিয়া গিয়াছিল, এইবার তাহার ডালে প্রথম ফুল ফুটিয়াছে, কঙ্ক থাকিলে আজ সে একটা উৎসব করিত। ভ্রমরগুলি সেই ফুলের কাছে আসিলে লীলা কহিতে থাকে—

‘কৈও কৈও কঙ্কের কাছে শুন অলিকুল ।  
মালতীর গাছে তার ফুটিয়াছে ফুল ॥’

চৈত্র মাসে বাগান ভরিয়া প্রস্ফুট ফুলের বাহার-লীলা সেই ফুল লক্ষ্য করিয়া 'মালধে ফুটিয়া ফুল হৈয়া গেল বাসি' বলিয়া আক্ষেপ করে :

### আবার সম্মান

ছয় মাস পরে বিচিত্র ও মাধব বার্থমনোরথ হইয়া আশ্রমে ফিরিয়া আসিল। কঙ্ককে কোথাও পাওয়া যায় নাই। লীলার অবস্থা দেখিয়া তাহারা শঙ্কিত হইয়া বলিল, 'শুন ভগিনী লীলা, আমরা কঙ্কের জন্য চেষ্টার ত্রুটি করি নাই। বৃহৎ বনস্পতিসঙ্কুল, লতাজাল-আবদ্ধ গারো প্রদেশের যেখানে সিংহ, ব্যাঘ্র ও তল্পকের লীলাভূমি—সেই ঘোর অরণ্যানীতে আমরা প্রাণের আশা ত্যাগ করিয়া কঙ্ককে খুঁজিয়াছি। পূর্বদিকে শ্রীহট্ট অঞ্চল, খরসোতা সুরমা নদী ও পার্বত্যপথ অতিক্রম করিয়া কামরূপে যাইয়া কামাখ্যাদেবীর দর্শন করিলাম, তন্ন তন্ন করিয়া সম্মান করিলাম, কোথাও কঙ্ক নাই। পশ্চিম দিকে কাশী বৃন্দাবন ঘুরিয়া নবদ্বীপ হইয়া ফিরিয়া আসিয়াছি, কাহারও কাছে কঙ্কের কোন সংবাদ পাই নাই—

‘শৈশব সুহৃদ মোদের প্রাণের বন্ধু ভাই।  
প্রাণ দিতে পারি যদি তারে খুঁজে পাই ॥  
কত যে খুঁজিনু তারে নাহি লেখাজোখা।  
নিখোঁজ হইল বুঝি, না পাইলাম দেখা ॥’

গর্গ সতত্ব হইয়া রহিলেন, পরে চীৎকার করিয়া কাঁদিয়া উঠিয়া দুইজনের হাত ধরিয়া বলিলেন—

...  
‘যেরূপেতে পার বাছা কঙ্কে আন ঘরে ॥  
কঙ্করে আনিয়া তোমরা দেও দুইজনে।  
লোকালয় ছাড়ি মোরা যাব ঘোর বনে ॥

‘এই হিঙ্গ্র, ভয়ঙ্কর ষড়যন্ত্রকারী মনুষ্যসমাজে আমি আর থাকিতে চাই না —

‘নগর ছাড়িয়া মোরা হব বনবাসী।  
ব্যাঘ্রভক্ষক হবে পাড়া-প্রতিবেশী ॥  
গুরুর দক্ষিণা দেও কঙ্করে আনিয়া।  
পরানে মরিব নৈলে তাহারে ছাড়িয়া ॥  
মহাযাত্রার আর নাই বেশী দিন বাকী।  
সুখেতে মরিব যদি কঙ্কে সামনে দেখি ॥’

গুরুর সনির্বন্ধ অনুরোধে বিচিত্র ও মাধব ক্ষণতরে চুপ করিয়া বসিয়া রহিল। তাহারা কোথায় কোন্ পথে যাইবে চিন্তা করিতে লাগিল। গুরুর কাতরতা দেখিয়া তাহারা মনে করিল, প্রাণও যদি যায় তবুও তাহারা সে আদেশ লঙ্ঘন করিতে পারিবে না।

ধীরে ধীরে গর্গ বলিলেন—

‘শুন শুন বিচিত্র আর মাধব সুন্দর।  
আজি হতে পুনঃ তোমরা যাবে দেশান্তর ॥  
কিন্তু এই কথা মোর শুন দিয়া মন।  
গৌরাজের পূর্ণ ভক্ত হয় সেইজন ॥  
যে দেশে বাজিছে গৌর চরণ-নুপুর।  
সেই পথ ধরি তোমরা যাও কতদূর ॥  
যে দেশেতে বাজে প্রভুর খোলকরতাল।  
হরিনামে কাঁপাইয়া আকাশপাতাল ॥  
সেই দেশে কঙ্কেরে করিবে অন্বেষণ।  
অবশ্য গৌরাজ্ঞাতক্বে পাবে দরশন ॥  
যে দেশে গাছের পাখী গায় হরিনাম।  
নামসঙ্কীর্তনে নদী বহয় উজান ॥  
শিষ্যপদধূলি মেখে ছাইছে পবন।  
সে দেশে অবশ্য প্রভুর পাবে দরশন ॥’

আবার তাহারা কঙ্কের সম্মানে চলিয়া গেল।

### নীলার দেহত্যাগ

এদিকে বিপ্রপুর গ্রামে জনরব শোনা গেল যে, কঙ্ক জলে ডুবিয়া মরিয়াছে। এই জনশ্রুতির মূল কোথায় কেহ বলিতে পারিল না। কাহাকে এ বিষয়ে কিছু জিজ্ঞাসা করিলে সে নিরুত্তর হয়, ‘বলে আমি জানি না’ অথচ না জিজ্ঞাসা করিয়া সময়ে সময়ে এই কথাটা শোনা যায়—

‘বলাকওয়া করে লোকে এই মাত্র শুনি।  
শুধাইলে উত্তর নাই, না শুধালে শুনি ॥’

লীলার কাণে একথা পৌছিল, কিন্তু কেহ ঠিক করিয়া কিছু বলিতে পারিল না। লীলার বুক দুর্দুর্দুর করিয়া কাঁপিয়া উঠে।

‘কাণে কাণে কহে কেউ যেন কঙ্ক নাই।  
কাহারে শুধালে বল কঙ্কের খবর পাই ॥’

একদিন লীলা স্বপ্নে দেখিল, দুর্ঘোগের মধ্যে উত্তাল ঢেউয়ের উপর কঙ্ক জলে ভাসিতেছে। লীলা সেদিন আর একবিন্দু জলও খাইল না।

কিছুদিন পরে মাধব ফিরিয়া আসিল। কিন্তু তাহার সঙ্গে কঙ্ক নাই। লীলার সঙ্গে মাধব দেখা করিল, আবুল প্রশ্নের উত্তরে মাধব আস্তে আস্তে বলিল, ‘বহিন গো, তোমার বুকের ব্যথা আমি বুঝি, গুরুদেবের সঙ্গেই বা আমি কি বলিয়া দেখা করিব! কত কষ্টে কত জায়গা অনুেষণ করিয়াছি, কেহই কঙ্কের সম্বন্ধ দিতে পারিল না।’

লীলা জিজ্ঞাসা করিল, ‘ভাই বল তো তুমি কঙ্কের সম্বন্ধে কোন কথা শুনিয়াছ কি?’

দ্বিধাভাবে মাধব আস্তে আস্তে বলিল, ‘প্রবল গুজব যে কঙ্ক গৌরাজ্ঞের দর্শনাভিলাষী হইয়া চলিয়া গিয়াছিল, ঝড়ের মুখে তরণী ডুবিয়া যায়, জলে পড়িয়া কঙ্ক মৃত্যুমুখে পতিত হইয়াছে—

‘জনরব এইমাত্র লোকমুখে শুনিল।  
জলেতে ডুবিয়া কঙ্ক ত্যজিয়াছে প্রাণী ॥  
বিদায় লইয়া কঙ্ক আমাদের স্থানে।  
সংসার ত্যজিয়া যায়—গৌর অনুেষণে ॥  
আধারে পাগল নদী খর ধারে বয়।  
অকস্মাৎ কাল মেঘ গগনে উদয় ॥  
ঝড় তুফানেতে ডুবে সাধুর তরণী।  
জলেতে ডুবিয়া কঙ্ক ত্যজিয়াছে পরাণী ॥’

‘প্রাণের অধিক, সহোদরের অধিক ভাই আমার জলে ডুবিয়া মরিল; একবার মৃত্যুকালে তাকে দেখিলাম না! জীবন ভরিয়া কত দুঃখ পাইলে; কোন দুঃখে তোমার চিন্ত দমাইতে পারে নাই, অবশেষে মিথ্যা কলঙ্কে জর্জরিত হইয়া পিতার স্নেহে বঞ্চিত হইয়া বিদেশে বিতুষ্টে তুমি সলিল-সমাধি লাভ করিলে, এমন সোণার ভাই হারা হইয়া আমি কোন্ সাধে বাঁচিব!’

সেইদিন হইতে লীলার আহারনিদ্রা সমস্তই গেল। হেমন্তের নীহারে যেরূপ পদ্মবন শূকাইয়া যায়, লীলার শরীরের যৌবনসুখমা সেইরূপ লুপ্ত হইল। যে কেশ গজ্জার তরঙ্গভঞ্জে পৃষ্ঠের উপর দুলিয়া দুলিয়া শোভা পাইত, তাহা ছিন্নভিন্ন পাটের আঁশের মত হইয়া গেল। তাহার যে নখরকান্তি পদ্মলতার মত পেলব ছিল, তাহা ইক্ষুর পাতার মত বিশীর্ণ ও শূক হইল। এইভাবে লীলা একদিন চিরকালের জন্য পৃথিবী হইতে বিদায় হইল। গর্গের আশ্রমে তাহার সুমিষ্ট কলরব আর শোনা গেল না।

#### কঙ্কের অগমন

গর্গ এই শোক সহিতে পারিলেন না। তিনি কাঁদিয়া মৃতা কন্যার গায়ে হাত বুলাইয়া বলিলেন, ‘আমি কাহাকে লইয়া দেবতার আরতি করিব! কে আমার সাঁজের ঘরে

বাতি জ্বলাইবে? কে আমার পূজার ফুল তুলিবে? লীলা, দেখ এসে, তোমার জলের কলসী পড়িয়া রহিয়াছে, তোমার পোষা পাখীরা অনাহারে শুকাইয়া গিয়াছে।’

‘পড়িয়া রহিল আমার মনের যত আশা।  
• সর্বস্ব ত্যজিয়া হৈল নদীর কূলে বাসা ॥’

বিচিত্রের সহিত কঙ্কের দেখা হইয়াছিল, তাহার মৃত্যু হয় নাই, সে সতীর্থের মুখে সমস্ত বিবরণ শুনিয়া পাগলের মত আশ্রমে ছুটিয়া আসিল। কঙ্ক বাড়ী আসিয়া শুনিল, গর্গ তাঁহার প্রাণপ্রতিম কন্যাকে শ্মশানে লইয়া গিয়াছেন। আশ্রম আলোকশূন্য—চতুর্দিক অন্ধকার। সে সেখানকার বাতাসের তীব্র দাহন সহ্য করিতে পারিল না। দ্রুতগতি শ্মশানে যাইয়া গর্গের সহিত মিলিত হইল—

‘বজ্রাঘাতে বৃক্ষ যেমন জ্বলিয়া উঠিল।  
হাহাকার করি গর্গ কঙ্কেরে ধরিল ॥  
হায় কঙ্ক এতকাল কোথা তুমি ছিলে।  
তোমারে ডাকিছে কন্যা মরণের কালে ॥  
কিসের সংসারঘর কি হবে আমার।  
মায়ের বিহনে আমার সব অন্ধকার ॥  
পঞ্চ বছরের শিশু মা গেল ছাড়ি।  
এতকাল পালিলাম কোলে কাঁথে করি ॥  
বোধনে প্রতিমা আমার ডুবাইলাম জলে।  
কি কব এ কর্মফল আছিল কপালে ॥  
আর না ফিরিব ঘরে তোমরা সবে যাও।  
শালগ্রাম শিলা যত সায়েরে ভাসাও ॥  
আগুন জ্বালিয়া মোর পোড়াও গৃহ বাসা।  
আজি হতে সাজা মোর সংসারের আশা ॥  
আকাশে দেবতা কাঁদে গর্গের কাঁদনে।  
ভাটিয়ালে কাঁদে নদী না বহে উজানে ॥  
গর্গের কাঁদনে দেখ পাথর হয় জল।  
বনের পাখী ডালে বসি ফেলে অশুজল ॥  
অনলে তাপিত হৃদি করিতে শীতল।  
কঙ্কের সহিত মুনি যায় নীলাচল ॥  
সজ্ঞা চলে অনুগত শিষ্য পঞ্চজন।  
সংসার তেয়াগি গেল জন্মের মতন ॥’

#### আলোচনা

এই কঙ্ক ও লীলার পালাটি ঐতিহাসিক। লীলার ভালবাসা ও কঙ্কের জন্য তাহার ব্যাকুলতায় কবিকল্পনার ছটা পড়িয়াছে। কিন্তু বাকী সকল অংশই ইতিহাস—



তথ্যমূলক। কঙ্কের নিবাস ময়মনসিংহ জেলায় নেত্রকোণা সর্ব-ডিভিসনের মধ্যে কেন্দ্রিয়া থানার অন্তর্গত বিপ্রপুর গ্রাম। তাঁহার পিতা গুণরাজ ও মাতা বসুমতী অতি দরিদ্র ছিলেন। কঙ্ক শৈশবে বিপ্রবর্গ বা বিপ্রপুর গ্রামে পণ্ডিতপ্রবর গর্গের বাড়ীতে থাকিয়া লেখাপড়া শিখিয়াছিলেন। এই গ্রাম রাজেশ্বরী বা রাজী নদীর তীরে অবস্থিত। যেখানে পীর আসিয়া আস্তানা স্থাপন করিয়াছিলেন, সেখানে এখনও একখানি পাথর আছে, লোকে তাহা ‘পীরের পাথর’ নামে অভিহিত করে। হিন্দু-মুসলমান সকলেই সেই স্থানটিকে তীর্থের মত শ্রদ্ধা করে।

কঙ্ক যেমন রূপবান তেমনই গুণশালী ছিলেন। কবিত্ব প্রতিভাও শীঘ্র শীঘ্র পল্লীসমাজে প্রচার হইয়া পড়িয়াছিল। তৎকৃত ‘মলয়ার বারমাসী’ তাঁহার কিশোর বয়সের রচনা। সেই ত্রয়োদশ-চতুর্দশ বৎসরের বালক এই কাব্যখানি এমন সুললিত ছন্দে ও অপূর্ব কাব্যকথায় রচনা করিয়াছিলেন যে উহা পল্লীর বালক-বৃন্দের সকলেরই কণ্ঠে কণ্ঠে আবৃত্তি হইত। সেই বয়সে তিনি গর্গের বাড়িতে থাকিয়া সুরভি ও পাটলী নামক গাভীদ্বয়কে গোচারণের মাঠে চরাইতেন এবং বাঁশী বাজাইয়া সকলের মনোরঞ্জন করিতেন। সেই বয়সেই—‘কঙ্ক আর রাখাল নহে, কবিকঙ্ক সবে কহে’।

সকলে তাঁহাকে কবিকঙ্ক বলিয়া ডাকিত। পীরের আদেশে কঙ্ক আর-একখানি পুস্তক রচনা করেন, তাহার নাম ‘সতাপীরের পাঁচালী’—এই পুস্তকের অপর নাম বিদ্যাসুন্দর। বঙ্গদেশে কৃষ্ণরামের বিদ্যাসুন্দর, রামপ্রসাদের বিদ্যাসুন্দর, ভারতচন্দ্রের বিদ্যাসুন্দর ও প্রাণরাম চক্রবর্তীর বিদ্যাসুন্দর প্রভৃতি পাঁচ-ছয়খানি বিদ্যাসুন্দর আছে কিন্তু কবিকঙ্কের বিদ্যাসুন্দরের মত কোনখানিই এত প্রাচীন নহে। কঙ্ক চৈতন্যদেবের সমসাময়িক ছিলেন ; সুতরাং প্রায় ৪৫০ বৎসর পূর্বে তাঁহার বিদ্যাসুন্দর রচিত হয়। এই কাব্যের আর একটী বৈশিষ্ট্য এই যে ইহার উদ্দিষ্ট দেবতা কালিকাদেবী বা অনুপূর্ণা নহেন। পীরের আদেশে এই পুস্তক রচিত হয় এবং ইহার উদ্দিষ্ট দেবতা ‘সতাপীর’ হিন্দু-মুসলমান উভয়েরই পূজ্য।

পৃথিবীতে যতপ্রকার দুঃখ আছে, শৈশবে কঙ্ক তাহার সমস্তই সহিয়াছিলেন। বিনা দোষে সামাজিক গ্রানি ও কলঙ্কের ভাজন হইয়া তাঁহাকে কতই না লাঞ্ছনা সহ্য করিতে হয়! অবশেষে শত্রু ও ব্রাহ্মণ গৌড়াদের ষড়যন্ত্রে পড়িয়া তিনি গৃহহারা ও সুখশাস্তিহারা হইয়া বনে বনে ও নানা পল্লীতে পর্যটন করিয়াছিলেন। এই দুঃখের মধ্যে পড়িয়া তাঁহার মন পরদুঃখকাতর, দয়ার্দ্র ও উদার হইয়াছিল। তিনি গর্গকে যেরূপ শ্রদ্ধার চক্ষে দেখিতেন মুসলমান পীরকেও তদ্রূপ ভক্তির সহিত দেখিতেন। আহা—বিহারে তাঁহার আদৌ গৌড়ামি ছিল না। যে ব্যক্তি জন্মিয়াই চন্ডালের অন্ত্রে পালিত, তাহার আবার বৃথা আচারনিষ্ঠার বাড়াবাড়ি থাকিবে কিরূপে! তিনি চন্ডাল-জননীকে যেভাবে বন্দনা করিয়াছেন এভাবে কোন ব্রাহ্মণকবি হীনজাতীয়া রমণীকে শ্রদ্ধা দেখাইতে পারিতেন না। সংসারের নানা বিরুদ্ধ অবস্থায় নিপতিত হইয়া তিনি যে উদারতা ও ভ্রাতৃত্ব শিখিয়াছিলেন, তাহাতে তাঁহার চরিত্র সাধারণ মানব-সমাজের বহু উর্ধ্বে উঠিয়াছিল। তাঁহার জীবন-আখ্যায়িকা, রঘুসূত, দামোদর, নয়ানচাঁদ ঘোষ ও শ্রীনাথ বানিয়া—এই চারিজন কবি লিখিয়াছেন। তাঁহারা সত্যের ক্ষুরধার সীমার মধ্যে তাঁহার কাহিনী যথাসম্ভব সতর্কতার সহিত আবদ্ধ

রাখিয়াছিলেন, কেবল লীলার বিরহ ও প্রেমকথার মধ্যে তাঁহারা কিছু কাব্যলীলা দেখাইয়াছেন, কিন্তু সাংসারিক জীবনের সমস্ত খুঁটিনাটিই তাঁহারা বাস্তব জীবন হইতে সংগ্রহ করিয়াছিলেন। তাঁহারা হৃদয় দিয়া, মনের দরদ দিয়া কবির জীবনকাহিনী এমনই সহানুভূতির সঙ্গে লিখিয়াছেন যে মনে হয় তাঁহাদের নির্মল ও দরদী হৃদয়ে কঙ্কের জীবন যথাযথভাবেই প্রতিবিম্বিত হইয়াছিল। গর্গের চরিত্র অতি বিশাল—পাণ্ডিত্যে, আদর্শের উচ্চতায়, জপতপের প্রভায় ও সহানুভূতিতে তাহা মৈনাক বা গৌরীশঙ্করের ন্যায় আমাদের চক্ষে নভস্পর্শী হইয়া দাঁড়ায়। কিন্তু তরুণ বয়সে কঙ্ক যে বুদ্ধিমত্তা, ধৈর্য ও সংযমের পরিচয় দিয়াছেন, তাহা অপূর্ব। যে ধর্মপিতা তাঁহাকে বিনাদোষে বিষ মিশ্রিত অন্ন খাওয়াইয়া মারিয়া ফেলিবার ষড়যন্ত্রে লিপ্ত, তাঁহার উপর তাঁহার কি উদার ক্ষমাশীলতা! কঙ্ক গর্গের চরিত্রের পরিচয় যেমন পাইয়াছিলেন, লীলাও তাহা পায় নাই। কঙ্ক বলিয়াছিলেন, ‘পিতা অতি মহান ব্যক্তি, তিনি শত্রুদের ষড়যন্ত্রে পড়িয়া মুহূর্তের জন্য জ্ঞান হারাইয়াছেন, কিন্তু তিনি অতি ধর্মপ্রাণ এবং বুদ্ধিমান। তাঁহার এই মোহাচ্ছন্ন ভাব কিছুতেই বেশীকাল স্থায়ী হইতে পারে না, তুমি ইহার প্রতি শ্রদ্ধা হারাইও না, তিনি তোমার ও আমার উভয়ের পূজ্য, যদি মুহূর্তের উদ্বেজনা উদ্ভাস্ত হইয়া তিনি কোনরূপ অত্যাচার করেন, তবে সহিষ্ণু হইয়া তাহা সহ্য করিয়া লইও।’ তরুণ বয়সে কঙ্ক পরিণত বুদ্ধি ও সংযম দেখাইতে পারিয়াছিলেন। এইজন্য বলিতেছি, তিনি গর্গের মত প্রবীণবয়স্ক না হইয়াও তাঁহার ধর্মপিতার অপেক্ষাও পরিণত বিচারশক্তি লাভ করিয়াছিলেন।

বিদায়কালে তাঁহার উক্তি কি মর্মস্পর্শী, গৌরাজকে স্বপ্ন দেখার কথাটা কবি চারটি ছত্রের মধ্যে কি আন্তরিকতা ও ভক্তি দিয়া দেখাইয়াছেন। দুটি ছত্রে অপরূপ রূপলাবণ্য ও স্বর্গীয় জ্যোতি লইয়া গৌরাজ যেন ফুটিয়া উঠিয়াছেন!

লীলার চরিত্র অনন্ত মধুর। লীলা ও কঙ্ক শৈশবের সঙ্গী, উভয়ে মাতৃহারা ও পরস্পরের সান্ত্বনা—দায়ী ও অনন্যাশরণ—এ যেন একটি বৃন্তের দুইটি ফুল। লীলার হৃদয় সুকোমল ভাবে পূর্ণ, কঙ্ক তাহার সহোদর না হইয়াও সহোদরপ্রতিম। লীলা তিলমাত্র কঙ্কের সঙ্গ—বিচ্যুত হইলে ছটফট করিতে থাকে। তিনি গোষ্ঠে গেলে সম্ম্যার প্রাক্কালে সে পথে যাইয়া দাঁড়াইয়া থাকে ও তাঁহার প্রতীক্ষা করে। কঙ্ক বাঁশী বাজাইতে বাজাইতে গান ও তাহার বৎসনী লইয়া যখন বাড়ী ফিরিতে থাকেন, সেই বাঁশীর সুর শোনামাত্র আনন্দে লীলা চঞ্চল হইয়া ওঠে।

কিন্তু যখন সে দেখিল, পল্লীবাসীরা তাহাকে ও কঙ্ককে লইয়া মিথ্যা অপরাধের চেষ্টা করিয়া ষড়যন্ত্র করিতেছে তখন তাহার কঙ্কের প্রতি অনুরাগ আরও বাড়িয়া গেল। সে জানিত, কঙ্ক ও সে নন্দনবনের দুইটি ফুলের ঝুঁড়ির ন্যায় নির্মল, পরস্পরের প্রতি তাহাদের অনুরাগ অকৃত্রিম, তাহা সূচির সাহচর্য ও সহানুভূতির উপর প্রতিষ্ঠিত, তাহা দেবমন্দিরের পূজার ফুলের ন্যায় ভগবানে সমর্পিত, অথচ তাহাই লইয়া কত বিশ্রী আলোচনা চলিতেছে, এমনকি তাহার ঋষিতুল্য জনকও জন-অপবাদের জালে পড়িয়া কঙ্ককে বিষ খাওয়াইয়া মারিতে চেষ্টা করিতেছেন। তখন তাহার নিজের এই নিরাশ্রয় ও অসহ্য দুর্দশায় ও কঙ্কের জীবনের আশঙ্কায় সে একেবারে উন্মত্ত হইয়া গেল। এই সৌভাগ্য, কবিদের হস্তে পড়িয়া কতকটা প্রেমের ছন্দ ও ভাষা অবলম্বন করিয়াছে, তাহা কোন দোষের না হইলেও সেই অনুরাগের

কিছুটা বাড়াবাড়ি আছে, কবিরা তাহাতে পূর্বরাগের ছন্দ দিয়াছেন। বাজালী কবি বসন্তকালে কোকিলের কুহু ও বর্ষায় কেতকী-কদম্বের সুঘ্রাণ এবং গ্রীষ্মে মলয়সমীরের সুখস্পর্শ পাইলে তাহার মাত্রা ঠিক রাখা একটু কঠিন হইয়া পড়ে। এইজন্য লীলার বারমাসী ও বিরহে কতকটা বৈষ্ণবপদের তরল মোহ আসিয়া পড়িয়াছে, কিন্তু আমরা পূর্বেই বলিয়াছি, একটু অতিরিক্ত মাত্রায় লালিত্য ও মাধুর্যের পরশ থাকিলেও তাহা দোষের হয় নাই। কঙ্ক ও লীলা আদ্যন্ত আমাদের চক্ষে দেব-আজ্ঞিনার দুইটা ক্রীড়াশীল পুতুল। দুঃখের বিষয় তাহাদের খেলা শেষ হইবার পূর্বেই নিষ্ঠুর দৈব সে খেলা ভাঙিয়া দিল। লীলা সে আঘাত সহ্য করিতে পারিল না, তদপেক্ষা সংযত ও কঠিন স্নায়ুবলসম্পন্ন কঙ্ক তাহার সংসারের সমস্ত আশা বিসর্জন দিয়া তীর্থবাসী হইলেন।

এই চারটা কবি আখ্যানটিকে যে ভাবে লিখিয়া গিয়াছেন, তাহাতে মনে হয়, তাঁহারা একই আসরে গাহিতেন এবং একে অন্যের দোহার করিতেন। তাহাদের সুর এক, ছন্দ এক, এমনকি কবিত্বও এক ছন্দে ঢালা। সে কবিত্বের শেষ নাই—বর্ষা, শরৎ, গ্রীষ্ম, বসন্ত প্রভৃতি ঋতুভেদে কবিদের চক্ষে প্রকৃতি যেরূপ ধরা দেন, তাহাতে মনে হয় যে তাঁহাদের অঙ্কিত চিত্রগুলি এক হস্তেরই সীলমোহর মারা ; একই প্রকারের দরদ ও অন্তরঙ্গতার সহিত লেখা।

কঙ্ক ও লীলার লেখক দামোদর, রঘুসূত, নয়ানচাঁদ ঘোষ, ও শ্রীনাথ বানিয়া—ইহাদের মধ্যে রঘুসূত ৩০০ বৎসর পূর্বে জীবিত ছিলেন। ইহারা জাতিতে ছিলেন পাটুনী। বহুপুরুষ যাবৎ ইহারা পালাগান গাহিয়া জীবিকা অর্জন করিতেন, এজন্য ইহাদের উপাধি হইয়াছিল ‘গায়ন’। রঘুসূতের নিম্নতম বংশধর শিবু গায়ন এই পালাগানটা খুব চমৎকার ভাবে গাহিতে পারিতেন, অথচ বন্দনায় তিনি জানাইয়াছেন যে তিনি একেবারে নিরক্ষর ছিলেন। শিবু গায়ন ৩০।৩৫ বৎসর হইল মৃত্যুমুখে পতিত হইয়াছেন। মৈময়সিংহ গৌরীপুরের জমিদারগণ ইহার অপূর্ব গান গাহিবার শক্তির পুরস্কার স্বরূপ ২০। ২৫ বিঘা জমি ইহাকে দান করিয়াছিলেন। শিবু গায়নের বাড়ী ছিল নেত্রকোণার অন্তর্গত আন্তাজিয়া গ্রামে।

শ্রীনাথ বানিয়ার নাম আরও কয়েকটা পালাগানের ভূমিকায় আমরা পাইয়াছি। পূর্ববঙ্গ-গীতিকায় প্রকাশিত ‘শান্তি’ নামক ক্ষুদ্র গানটার ভণিতায় শ্রীনাথ বানিয়ার নাম পাওয়া যায়।

এইসকল কবি একেবারে স্বভাবের শিশু। কঙ্কের বিরহে যখন লীলা বাগানে বাগানে ঘুরিয়া ভ্রমরের নিকট কঙ্কের সংবাদ জিজ্ঞাসা করিতেছে তখন কবি লিখিয়াছেন, যে ভ্রমরটা আজ জিজ্ঞাসিত হইয়া চলিয়া গেল, কাল আর সে বাগানে আসিল না, সুতরাং সংবাদ দিবে কে?

‘নিত্য আসে নব পাখী নূতন ভ্রমর।

কাদিয়া শুধালে কেহ না দেয় উত্তর ॥’

বর্ষাকালের সেই নবনীল জলদকান্তি, মধ্যে মধ্যে বিদ্যুতের চমক। রঘুসূত কবি এই ষড়ঋতুর যে চিত্র আঁকিয়াছেন তাহাতে মনে হয় যেন প্রকৃতির সম্মুখে বসিয়া তিনি দৃশ্যের পর দৃশ্য নকল করিয়া গিয়াছেন।

পৃথিবীর জ্বালাময় বুকে শীতল জল ঢালিবার জন্য বর্ষারাগী আসিতেছেন। কবি গাহিতেছেন—‘হাতেতে সোণার ঝারি বর্ষা নেমে আসে।’ এই সোণার ঝারি বিদ্যুৎ ; স্বর্ণখচিত ঝারির ন্যায় সবিদ্যুৎ মেঘ জলবিন্দু ঢালিতেছেন, বর্ষারাগীর এই রূপ পল্লীকবিরে যাহা দেখেন, আমরা শহরবাসীরা যে রূপ দেখিতে পাই না।

বর্ষার আর—একটি বর্ণনা কবি রঘুসূত যাহা দিয়াছেন, তাহা নিরুপম—

‘শ্রাবণ আসিল মাথে জলের পশরা।  
পাথর ভাসায়ে বহে শাওনের ধারা ॥  
জলেতে কমল ফোটে আর নদী—কূল।  
গন্ধে আমোদিত করে ফোটে কেয়া ফুল ॥  
শাওনিয়া ধারা শিরে বজ্র ধরি মাথে।  
“বউ কথা কও” বলি কাঁদি ফিরে পথে ॥’


কি দুর্যোগ, শ্রাবণের বৃষ্টিতে সর্বাঙ্গ সিক্ত, মাথার উপর বজ্রের ভীষণ গর্জন, কখন মাথায় পড়িবে তাহার ঠিকানা নাই, তবু একটা ক্ষুদ্র পাখী বিপদ গ্রাহ্য না করিয়া বধূর মান ভাজিবার জন্য পথে পথে ‘বউ কথা কও’ বলিয়া কাঁদিয়া বেড়াইতেছে!

কবিকঙ্কর ‘সত্যপীরের পাঁচালী’তে যে আত্মপরিচয় দিয়া আরম্ভ করিয়াছেন, তাহা পড়িলে পাঠক বুঝিবেন, রঘুসূত প্রভৃতি কবিরে তাঁহার জীবন-আখ্যায়িকা যেভাবে বর্ণনা করিয়াছেন, তাহা তাঁহারই বিবৃতির অনুগত। আমি পূর্বেই বলিয়াছি শুধু লীলার তাবোচ্ছাসবর্ণনায় পূর্বোক্ত কবিরে তাঁহাদের কবিত্বশক্তির পরিচয় দেওয়ার ব্যপদেশে এদেশের প্রথা অনুযায়ী বারমাসীর ভঙ্গীটি অনুসরণ করিয়াছেন, কিন্তু অন্য সমস্ত স্থলেই ইতিহাসের পিছন পিছন গিয়াছেন। কবিকঙ্করের প্রদত্ত আত্মপরিচয়টি এইরূপ—

পিতা বন্দি গুণরাজ মাতা বসুমতী।  
যার ঘরে জন্ম নিলাম আমি অল্পমতি॥  
শিশুকালে বাপ মইল মা গেল ছাড়ি।  
পালিল চন্ডাল পিতা মোরে যত্ন করি॥  
জ্ঞানমানে খাই অনু চন্ডালের ঘরে।  
চন্ডালিনী মাতা মোরে পালিলা আদরে॥  
গজ্ঞার সমান তার পবিত্র অন্তর।  
সেও তো রাখিলা মোর নাম কঙ্কধর॥  
জনম অবধি নাহি দেখি বাপ মায়।  
শিশু থুয়ে মোরে তারা স্বর্গপুরে যায়॥  
মুরারি চন্ডাল পিতা পালে অনু দিয়া।  
পালিলা কৌশল্যা মাতা স্তন্যদুগ্ধ দিয়া॥  
মুরারি আমার পিতা ভক্তির ভাজন।  
বারে বারে বন্দি গাই তাঁহার চরণ॥

গর্গ পন্ডিতে বন্দি পরম গেয়ানী।  
 যাঁর আশ্রমে থাকি ধেনু চরাইতাম আমি॥  
 পুনঃ পুনঃ বন্দি আমি গর্গের চরণ।  
 যাঁর সম জ্ঞানী নাই—এ তিন ভুবন॥  
 বেদপুরাণ-সার কণ্ঠে যাঁর গাঁথা।  
 সাধনার ঘরে বাঁধা সরস্বতী মাতা॥  
 বেদবিধি শাস্ত্রে যাঁর ক্ষমতা অপার।  
 আরবার বন্দি গাই চরণ তাঁহার॥  
 শূশানের বক্ষু মোর দুঃসময় পাইয়া।  
 জীবন করিলা দান পদে স্থান দিয়া॥  
 দুই দিন নাহি খাই অন্ন আর পানি।  
 হাতে ধরি আশ্রমে লইলা মোরে মুনি॥  
 ক্ষীর সর দিলা মোরে গায়ত্রী জননী।  
 মরিবার কালে মোর বাঁচাইলা প্রাণী॥  
 কাঁদিয়া কহিছে কঙ্ক সবার চরণে।  
 শোধিতে মায়ের ঋণ না পারি জীবনে॥  
 নদী মধ্যে বন্দি গাই রাজরাজেশ্বরী।  
 তিয়াস লাগিলে যার পান করি বারি॥  
 তাহার পাড়েতে বইসা সুন্দর গেরাম।  
 জন্মভূমি বন্দি গাই নাম বিপ্রপুর গ্রাম॥

এই বন্দনায় কোন দেবদেবীর নাম নাই, কোন তীর্থস্থানের উদ্দেশ্যে প্রণাম নাই, নির্ভীক সত্যবাদী কবি তাঁহার চণ্ডাল জননীকে ‘গঙ্গার সমান যার পবিত্র অন্তর’ বলিয়া করজোড়ে প্রণাম করিয়াছেন। কঙ্ক ভিন্ন আর কোন ব্রাহ্মণতনয় কি এইভাবে চণ্ডালিনীকে বন্দনা করিতে পারিত? তাঁহার স্বগ্রাম এবং গ্রামের প্রান্তবাহী রাজরাজেশ্বরী নদী তাঁহার চক্ষে সর্বাপেক্ষা শ্রেষ্ঠ তীর্থ। এই প্রত্যক্ষ্যবাদী, সত্যভাষী কবি অপর কোন তীর্থের নাম করেন নাই। রাজ্জী নদী ও বিপ্রপুর গ্রাম তাঁহার চক্ষে প্রধান তীর্থ, এই দুই তীর্থের মহিমা তিনি নিজে উপলব্ধি করিয়া তাহাদের স্তুতি গান করিয়া বন্দনাটি পরিসমাপ্ত করিয়াছেন।



## শ্যামরায়

শ্রেয়সী নিবেদন, উত্তর-প্রত্যুত্তর

শানবঁধা ঘাটে ডোমের ষোড়শী কন্যা রোজ কলসী ভরিয়া জল আনিতে যায়, তাহার বক্রান্ত সুদীর্ঘ কেশ ও লাবণ্যময় গঠন ও অঙ্গরার মত সুন্দর মূর্তি দেখিয়া রাজ্যের লোক পাগল হইয়া যায়।

সে দেশের তরুণবয়স্ক রাজকুমার শ্যামরায় তাহার রংমহল হইতে প্রত্যহ এই সুন্দরীকে দেখিতে পায়। দেখিয়া চক্ষুর তৃপ্তি হয় না, সে রোজ এই নারীর রূপমাধুরী পান করে। অবশেষে সে ডোম-নারীকে সংবাদ পাঠাইল, ‘তুমি কি আমাকে ভালবাসিয়া আত্মসমর্পণ করিবে? তাহা হইলে সমাজবিধি যাহাই থাকুক না কেন আমি তোমায় বিবাহ করিয়া তোমার মাথার কৌকড়ানো কৌকড়ানো চূর্ণকুন্তল সোণার ঝুরি দিয়া বাঁধিয়া দিতাম। হাতীর দাঁতের শীতলপাটি সোণার পালঙ্কের উপর পাতিয়া তোমার সুখশয্যা তৈরি করিয়া দিতাম, ঐ পাটের খুণ্ডা ফেলিয়া দিয়া দিব্য নীলাম্বরী শাড়ী তোমায় পরিতে দিতাম এবং কাঁচপোকার মালার পরিবর্তে গজমুক্তার হারে তোমার কণ্ঠ পরিশোভিত করিতাম। তোমার হাতে বাজুবন্ধ এবং গলায় সোণার মাদুলি দিয়া তোমাকে একখানি প্রতিমার মত সাজাইতাম এবং নিজ হাতে তোমার ঐ দুটী পাগল-করা চোখে কাজল পরাইয়া দিতাম ও সারারাত্রি ঘিয়ের বাতি জ্বালাইয়া তোমার চন্দ্রমুখখানি দেখিতাম। তুমি যদি আমাকে ভালবাসিতে, তবে আমার সুখের অবধি থাকিত না।’

দ্বিতীয় নিকট ডোমের মেয়ে বলিয়া পাঠাইল, ‘কি করিয়া তাঁহার সঙ্গে আমার দেখা হইবে! দিনরাত শাশুড়ী আমায় পাহারা দিতেছেন। সম্ম্যাবেলা ঘরে আলো থাকে না, পশরা লইয়া স্বামী কখন ঘরে ফিরেন তাহার কোন নির্দিষ্ট সময় নাই, ভাদ্রমাসে বাড়ীর অতি নিকটে বর্ষার গাঙ্গোর জল থৈ থৈ করিতেছে। আমার অদৃষ্টে সুখের নদীতে চড়া পড়িয়াছে। আমি কোন ছুতায় কলসী লইয়া জল আনিতে যাইব? এখন তো ম্রানের সময় নয় যে, ভরা কলসীর জল ফেলিয়া পুনরায় জল আনিতে যাইয়া বঁধুর সঙ্গে মিলিতে পারিব।

‘দুতী, আমি বেগে নই যে, পশরা মাথায় করিয়া সেই ছুতায় বন্ধুকে একবার দেখিয়া আসিব, আমি রাখাল নই যে, গোষ্ঠে যাইবার ছলে রাজবাড়ীর দুয়ারের পথ দিয়া যাইব। আমি মালীর ঘরের মালিনী নই যে, মালা লইয়া বঁধুর কাছে বিক্রয় করিতে যাইব, ধুবনী নই যে কাপড়ের বস্তা লইয়া রাজবাড়ীতে যাইব। তুমি আমার দুটী চোখের জল দেখিয়া যাও, আমার বুকের ভিতর কত দুঃখ জমিয়া আছে, একবারটা তাঁহাকে জানাইও।

‘দূতী, আমি যদি শূকশারী হইতাম, তবে শূন্যে উড়িয়া যাইয়া বঁধুকে দেখিয়া আসিতাম। আমি জোড়ের পায়রা নই যে, খাদ্য কুড়াইবার ছলে তাঁহার কাছে যাইব। আমি যদি ডালের পুষ্প হইতাম, তবে নিজেকে মালায় গাঁথিয়া দিতাম, তুমি সেই মালা লইয়া যাইয়া বঁধুর হাতে দিতে। আমি ছোট সুগন্ধি ফুল নই যে, ফুরফুরে হাওয়ায় উড়িয়া যাইয়া বঁধুর হাতে পড়িব। আমি ডাব কি ডালিম নই যে তাঁহার পাত্র ভরিয়া পিয়াসা মিটাইব। পলান্ন বা পরমান্ন নই যে, বাটা ভরিয়া তাঁহাকে পরিবেষণ করিব। আমার যৌবন, গাজের পানি নয় যে বঁধুর চরণযুগল ধুইবার জন্য লোটা ভরিয়া লইয়া যাইব। আমি বনের কোকিল নই, পুষ্পের ভ্রমরী নই যে, মধু আনিবার ছলে উড়িয়া তাঁহার কাছে যাইব। ধাই দাসী নই যে তাঁহার পাদপদ্ম ধোয়াইব—

‘নয়ত গাজের পানি দূতী এ মোর যৌবন।  
লোটায় ভরিয়া দিতাম ধোয়াতে চরণ॥  
বনের কুইলা হইতাম যদি পুষ্পের ভ্রমরী।  
মধু না আনিবার ছলে যাইতাম উড়ি॥’

ডোমকন্যা আরও বলিল, ‘এই দুঃখ সহিতে পারি না—এমতি নিদানে কেন না হয় মরণ’।

কবি নিতাইচাঁদ বলিতেছেন, ‘নারীজীবনের যৌবনকাল একটা রহস্য—এই আশ্চর্য ভুবনবিজয়ী জিনিস বিধাতা কোন্ উপাদানে গড়িয়াছেন?’

কবি নিতাইচাঁদে বলে—‘ভুবন জিনিয়া।  
যৌবন গড়িল বিধি কোন্ চিজ দিয়া॥’

ডোম-নারী দূতীকে বিদায়ের কালে বলিল—

‘বাঁশের বাঁশী হইতাম দূতী লো পাইতাম সুখ।  
বাজনের ছলে দিতাম বঁধুর মুখে মুখ॥’

‘আমার সাঁজের বাতি নিবু নিবু। তাহা তৈল দিয়া জ্বালাইতে হইবে। আজ ঘরে যাও—তাঁহার সঙ্গে আজ দেখা হইবে না—আমার এই নিবেদন তাঁহাকে জানাইও।’

দূতী ফিরিয়া যাইয়া পুনরায় আসিয়া বলিল, ‘তুমি নিবিষ্ট হইয়া ঘরের কাজ করিতেছ, আমায় আবার শ্যামরায় পাঠাইয়া দিলেন। তিনি গাজের ঘাটে তোমার প্রতীক্ষায় দাঁড়াইয়া আছেন, দয়া করিয়া একবারটা যদি আসিতে!’

ন দী তী রে র দৃশ্য

ডোমের মেয়ে বলিতেছে, ‘কুমার পথ ছাড়, বেলা যায়। আমি ডোমের মেয়ে—আমার গায় হাত দিও না। তুমি অতি বড়, আমি অতি ছোট। আমার সঙ্গে



ভাব করিলে তোমারই জাতি যাইবে। তুমি বাগানের সেরা ফুল—আমি কাঁটার মত পথ আগলাইয়া আছি। আমার সঙ্গে তোমার মিলন হইলে সকলে তোমাকে খোঁটা দিবে। তুমি বঁধু, রাজার ছেলে—আমি সামান্য ডোম-নারী। আমার সঙ্গে ভাব করিয়া সুখ পাইবে না। তুমি সাগর ও সমুদ্রের যাত্রী—এই শূকনা ডাঙ্গায় নৌকা বাহিয়া কেন বিড়ম্বিত হইতে চাও—

‘রাজার ছাওয়াল তুমি পুনুর্মাসী চাঁদ।  
আসমান ছাড়িয়া কেন জমিনে বিছান।’

‘তোমার বাড়ীতে খাট-পালঙ্ক আছে, কঠিন মাটির শয়্যায় তোমার কন্ঠ হইবে। এই অসময়ে নদীর ঘাটে আসিয়া তুমি কেন বিপদ ঘটাইতেছ? তোমাকেই বা কি বলিব! আমার দুটি চক্ষু তো আমার শত্রু—

‘কোথা থেকে দুশমন চক্ষু উকি মারি দেখে।’

‘বঁধু, তুমি আম খাইবে বলিয়া আমড়া গাছের তলায় আসিয়াছ। ময়ূর হইয়া তুমি কদাকার ভেউরা পাখীর পেখম পরিতে চাহিতেছ। তুমি খঞ্জন—চড়ুইপাখীর কাছে নাচ শিখিতে আসিয়াছ! মণিমুক্তা ফেলিয়া তুমি কড়ির থলি হাতড়াইতেছ। মহামূল্য হার ফেলিয়া গলায় দড়ি বাঁধিতেছ। সমুদ্র ছাড়িয়া কুয়ার জল চাহিতেছ এবং গজমোতির হার ফেলিয়া হাড়ের মালা বাছিয়া লইতেছ, আবির—কুঙ্কুম ছাড়িয়া গায়ে ধূলি মাখিতেছ, চন্দন ফেলিয়া মাথায় ছাই দিয়া তিলক রচনা করিতেছ—

‘আমড়া খাইলে বুঝিবে কি বঁধু আমের সুস্বাদ।  
ঘোরে কি পাইবে বশু দধির আশ্বাদ॥  
ময়ূরা হইয়া কেন ভেউরের পেখম।  
খঞ্জনা হইয়া কেন চড়ুই নাচন॥  
মণিমুক্তা থুইয়া কেন বাছ্যা তুলছ কড়ি।  
হার রাখিয়া কেন বঁধু গলায় বাঁধছ দড়ি॥  
হীন জাতি ডোমনী আমি, বঁধুরে নাই সে বুঝ দায়।  
সায়র থুইয়া কুয়ার পানি কোন গাবরে\* খায়॥  
গজমোতি থুইয়া রে বঁধু পর হাড়ের মালা।  
আবির—কুঙ্কুম থুইয়া বঁধু অঙ্গে মাখ ধূলা॥  
বিধি বিড়ম্বিল তোমা করতে পার খাই।  
চন্দন থুইয়া বঁধু কেন অঙ্গে মাখ ছাই॥  
তুমি-তো রাজার বেটা বঁধুরে আমি তো ডোমনী।  
পাথর নিড়েইয়া বঁধু পাইতে চাও কি পানি॥’

রাজকুমার শ্যামরায়ের প্রেম, লৌকিক আচার ও সমাজবিধি এ সকলের উপরে, তিনি বলিতেছেন—‘হউক কলঙ্ক—সেই কালি আমি কাজল করিয়া চোখে পরিব। শত্রুরা যদি নিন্দা করে, তাহাতে আমি তোমাকে ছাড়িতে পারিব না। প্রেম তো ধূলিমাটি নয় যে, লোকের কথায় আমি ছাড়িয়া দিব, জাতি অতি অকিঞ্চিৎকর ; প্রেমের মূল্যের সঙ্গে তাহার তুলনা হয় না। এই রাজ্য ছাড়িয়া আমি আর এক রাজ্যের রাজা হইব। জঙ্ঘলে বৃক্ষতলে আমি বাড়ী করিব, গজমোতি ফেলিয়া দিয়া হাড়ের মালা পরিব, সুগন্ধি চন্দন ফেলিয়া আমি গায় ছাই মাখিব এবং দধিদুগ্ধ ছাড়িয়া বনের ফল খাইয়া তৃপ্ত হইব। তোমায় যদি পাই তবে এসকল কষ্ট আমার সুখের কারণ হইবে, জীবন সার্থক হইবে, উত্তম পরিচ্ছদের বদলে বাকল পরিয়া সুখী হইব—

‘সায়রের লোনা পানি মুখ হৈল তিতা।  
তা হইতে কুয়ার পানি শতগুণে মিঠা॥  
থাকুক কলঙ্ক লো কন্যা লোক অপযশ।  
পাথর নিংড়াইয়া দেখি পাই কিনা রস॥’

ডোমকন্যা শেষে বলিল, ‘সম্ভ্রা ঘনাইয়া আসিয়াছে, আমার কুঁড়ে ঘরে এখনও সাজের বাতি জ্বালা হয় নাই, কাঁথের কলসী কাঁথে রহিয়াছে, এখনও তাহাতে জল ভরা হয় নাই। আমার শাশুড়ীর বড় কোপন স্বভাব, গালিমন্দ দিবেন। আজ তুমি চলিয়া যাও। ঐ দেখ, সম্ভ্রার আকাশে পাখীগুলি অদৃশ্য হইয়া যাইতেছে, আমি একা জাঁধার পথে কি করিয়া যাইব। কাল আমার স্বামী বাঁশ কাটিবার জন্য যাইবে।’

কুমার বলিল, ‘আমি জলের ঘাটে তোমার কলসী ভরিয়া দিব।’

—‘কিন্তু তুমি পরপুরুষ, আমি একলা নারী, ইহা কেমন করিয়া হয়।’

রাজকুমার, ‘আমি তোমাকে তোমার কুঁড়েতে পৌছাইয়া দিব।’

—‘তা হলে তোমার কলঙ্ক পাড়াময় প্রচারিত হইবে।’

রাজকুমার, ‘চল তাহা হইলে আমরা দুজনে পলাইয়া অন্য দেশে যাই।’

‘তাহা হইলে কলঙ্কের অবধি থাকিবে না, এবং আমিই বা কদাকার জল্লী লতা হইয়া কোন্ সাহসে চন্দনতরুকে বেড়িয়া ধরিব। আজকার দিন ক্ষান্ত দাও। কাল আমার স্বামী বাড়ীতে থাকিবে না। শাশুড়ীর অপ্রত্যক্ষে খিড়কীর দুয়ার খোলা রাখিব—

‘আজকার রাত্রি বঁধু চিন্তে ক্ষমা দিও।  
কালিকা নিশিতে বঁধু আমার বাড়ী যাইও॥  
ভাঙ্গা ঘরে তোমার লাগি থাকিব একেলা।  
শাশুড়ীর অপরখে রাখব পাছের দুয়ার খোলা॥’

## মিলন

শ্যামরায় এবং ডোম-নারীর মিলন হইল। কিন্তু রমণী গৃহত্যাগিনী হইবে, অনেক জ্বালাযন্ত্রণা পাইবে। তাহাতে তাহার অনুতাপ নাই। সে বলিতেছে—

‘যেদিন খাইয়াছি বঁধু পীরিতি গাছের ফল।  
কলঙ্ক মরণ দূর—জীবন সফল॥’

‘এই অপার আনন্দে, সুখ-দুঃখ, কলঙ্ক ও মৃত্যু দূর হইয়াছে। আমার কোন ভয় নাই—জীবন সার্থক হইয়াছে। আমার খাটপালঙ্ক নাই। সামান্য হেঁড়া মাদুরে কেমন করিয়া শুলিবে—

‘এই না ভাবে শুলিয়া বঁধু পাও যদি ক্লেশ।  
মেজেতে বিছায়ে দিব চাঁচর চিকুর কেশ॥  
কেশের বিছানা যদি সুখ নাহি পাও।  
অবলার বৃকে শুলিয়া নিরালা ঘুমাও॥  
চক্ষের জলে ধুইয়া রে পা বঁধু কেশেতে মুছাব।  
শিথানের সিন্দুর দিয়া চরণ রাজ্যাইব॥’

কন্যা আবার বলিল, ‘আলো নিবাইয়া ফেলিয়াছি, আধারে তোমার চাঁদমুখ দেখিতে পাইতেছি না—

‘হাত বুলাইয়া বঁধু তোমার মুখ দেখি।  
একটু খানি রঙ রে বস্তু একটু খানি রঙ।  
মুখেতে রাখিয়া মুখ মনের কথা কও॥  
আমি যে অবলা নারী আর বা কারে দোষী।  
বৃকেতে ঝাঁকিয়া রাখি তোমার মুখের হাসি॥  
নিশি বুঝি যায় রে বঁধু ঘুমেতে কাতর।  
গাছেতে কুইল ডকে পুষ্পেতে ভ্রমর॥  
সোয়ামী গেছে নল কাটিতে দূরের হাওরে।  
কাল নিশি আইস বঁধু আমার বাসরে॥’

## স্ব গ ণের শত অনু রো ধ উপ রো ধ

মাতা ও ভগিনী অনেক বুঝাইলেন, কিন্তু শ্যামরায়ের সেই এক গৌ : ‘আমাকে ঐ ডোমের মেয়ের সঙ্গে বিবাহ দাও।’

ভগ্নীরা বলিলেন, ‘রূপে গুণে কুলে শীলে সব বিষয়ে এক সেরা কন্যার সঙ্গে তোমার বিবাহ দিব। ডোমকন্যার সঙ্গে বিয়ে! ছিঃ! একথা মুখে আনিও না—

‘জাতি নাশ, ধরম নাশ, ভাইরে এ তো বড় দায়।  
 হীন ডোমের নারী ছুঁইলে জাতি যায়॥  
 পথ থুইয়া কেন ভাইরে গর্তে দেও পারা।  
 জাতি-সাপ হৈয়া কেন হৈতে যাও টোড়া॥  
 পদ্ম ফুল হৈয়া কেন গোবরেতে আশা।  
 শুক পাখী হৈয়া কেন মূত্রে কর বাসা॥’

‘তুমি শুক পাখী, আকাশের অবাধ অসীম সর্বোচ্চ স্থানে তুমি উড়িয়া  
 বেড়াইবে, মাটির নিম্নে কুৎসিত পাখীর ন্যায় তুমি কেন বাসা করিবে।’

‘মায়েতে বুঝায় বহিনে বুঝায়, বুঝান হৈল দায়।  
 সাক্ষা সাপে খাইল যারে কি করবে ওঝায়॥’

এইখানে কবি নিতাইচাঁদ উচ্চ সহজিয়াদের সুরে কতকগুলি কথা বলিয়াছেন।

‘জাতি ধরম ভূয়া কথা নিতাইচাঁদ বলে।  
 বিষ অমৃত হয়, ওঝায় পাইলে॥  
 সুস্থান-অস্থান নাই, সৃজন-কুজন।  
 ধূলা মাটি বেছে লও পীরিতি বড় ধন॥  
 আসল পীরিতি, নাহি জানে জরা-মরা।  
 দূশমনের কাটিলে অজ্ঞা পীরিতি লাগে জোড়া॥  
 নিতাইচাঁদ কয়, পীরিতি আসল যদি হয়।  
 হউক না ডোমের নারী তাতে কিবা ভয়॥’

ডো মের বা ডী ঘর ভাঙ্গা

চাঁদরায় সমস্ত কথা শুনিলেন। ডোমের কন্যাকে তাঁহার পুত্র বিবাহ করিবে শুনিয়া  
 শ্যামরায়ের পিতা জ্বলন্ত আগুনের মত ক্রোধে উত্তেজিত হইয়া উঠিলেন :—

‘লোক-লেঠেল ডাকি রায় কোন্‌ কাম করিল।  
 বাড়ীঘর ভাঙ্গি ডোমের সায়রে ভাসাল॥’

এদিকে ডোমকন্যা দেশান্তরী হইবে। শ্যামরায় যাইতে প্রস্তুত হইলেন। কিন্তু  
 মেয়েটি তাঁহার হাত ধরিয়া মানা করিতে লাগিল, লক্ষ্মীটি তুমি ঘরে ফিরিয়া যাও,  
 একবার যাইয়া মাকে মা বলিয়া ডাক ও বহিনদিগকে আদর কর, তাহাদের বুক  
 ছুড়াইবে। কত শত সুন্দরী কন্যা তোমার পায়ে পড়িয়া তোমার স্ত্রী হইতে চাহিবে।  
 আমার অদৃষ্টে যাহা আছে তাহা হইবে। তুমি আমার জন্য ভাবিও না। তোমার  
 চিন্তায় আমার মৃত্যু হইলেও মজল, সেই মৃত্যুই আমার জীবন, তোমার সমস্ত

বালাই মুছিয়া লইয়া আমি চলিয়া যাই, তুমি পায়ের ধূলির মত আমাকে ঝাড়িয়া ফেল। তুমি পিড়ির বদলে কেন সিংহাসন ছাড়িবে ; রত্ন ফেলিয়া আঁচলে কেবল শুধু গেরো বাঁধিতে চাহিতেছ কেন? অমৃতের বদলে কেন বিষ খাইতে চাহিতেছ। আমি তোমার জীবনপথের কাঁটা, আমার সঙ্গে বাস করিলে কখন তোমার কোন্ বিপদ হইবে ঠিকানা নাই। সোণার ঝুরি ছাড়িয়া ধূলা কুড়াইবে কেন? আমাকে লইয়া তুমি বিপদে পড়িবে—একথা তুমি বুঝিতেছ না।’

কিন্তু এত অনুনয় বার্থ হইল—ডোমকন্যা মুখে যাহা বলে, তাহার প্রেমময়ী স্বর্ণমূর্তি বিপরীত দিকে নীরবে তাহা আকর্ষণ করে। কুমারের কি সাধ্য সে আকর্ষণ রোধ করে ?

আর এক দেশ, সে অসভ্য গাবরিয়াদের রাজ্য। তাহাদের আচার-ব্যবহার অতি কদর্য। রাজা সর্বদাই সুন্দরী নারী খুঁজিয়া বেড়ায়, এ তাহার চোখের নেশা, আজ যাহাকে সুন্দরী দেখিয়া বিবাহ করিল কালই সে চোখের বালি হইল। তারপরে রাজা তাহাকে উচ্ছিষ্টের মত ফেলিয়া দেয়।

‘টাতকা ফুলের কলি না হইতে বাসি।  
আজ যে জয়ের রাণী কাল সেই দাসী॥’

সে-দেশবাসীরা নিতান্ত অসভ্য। এক-একজনের গাল ভরিয়া কড়া দাড়ি এবং আট-দশটা স্ত্রী। তাহারা রাক্ষসের ন্যায় দুর্দান্ত ও নিষ্ঠুর।

শ্যামরায় ডোম সাজিয়াছেন, নলখাগড়া ও সরু বাঁশ দিয়া বিজনী, কুলা, সাজি তৈরী করেন ; বনে জঙ্গলে ঘুরিয়া বেড়ান।

‘ফাল্গুন চৈতের রোদে অজ্ঞা জ্বলি যায়।  
কাঁদেরে ডোমের নারী করি হাস্য হয়॥  
রাজার ছাওয়ায় বঁধুরে ছিলে রাজার বেটা।  
মুই অভাগিনীর লাগি হইল এতক লেঠা॥  
আর কারে বা দোষী আমি নিজে কর্ম-দোষী।  
রাজার ছাওয়ায় বঁধু হৈল বনবাসী॥’

ডোমের মেয়ে বলে—

‘গাবরিয়া জাতির দয়া-ধর্ম, নাই।  
এই দেশ ছাড়ি চল বঁধু ভিন্ন দেশে যাই॥’

খবরিয়া\* সংবাদ দিল, ‘মহারাজ তোমার মূলুকে এক ডোমের মেয়ে আসিয়াছে, তাহার লাবণ্য তাঁদের মত, তোমার রাণীরা তাহার দাসী হইবারও যোগ্য নহে—তোমার গাবরিয়া মূলুকে এরকম সুন্দরী কেহ চোখে দেখে নাই।’

\* খবরিয়া—সংবাদদাতা।

‘এরে শূন্য গাবর রাজা কোন্ কাম করিল।  
ডোমনীরে লইয়া তবে নগরে আসিল॥  
হুকুম করিল রাজা ডোমেরে দাও শূলে।  
রায়রে বাম্শিয়া তারা লইল হাতে গলে॥’

শ্যামরায় এইভাবে শূলের উপর মৃত্যুদণ্ডের জন্য বন্দী হইলেন। রাজার নিভৃত কক্ষে ডোমকন্যাকে আনা হইল। সে যেন একখানি অগ্নিপ্রতিমা, সে রাজাকে গ্রাহ্য না করিয়া বলিতে লাগিল—

‘গাবররাজ! আপনার এ কি ব্যবহার? আপনি কি জোর করিয়া রমণীর মন অধিকার করিতে চান? নারীর যৌবন শিকল দিয়া বাঁধিয়া রাখা যায় না, জোর করিয়াও তাহার মন পাওয়া যায় না। আপনার সঙ্গে পরিচয়ই হয় নাই, এর মধ্যেই ভালবাসার দাবী!—

‘গাছ না রোপিয়া আগে ফল খাইতে আশ।  
না বঞ্চিলাম ঘরে তোমার দুই চারি মাস॥  
ফল না পাকিতে আগে কোথা পাবে রস।  
বলে কি করিতে চাও অবলারে বশ?  
ক্ষুধা লাগিলে ভাত না জুড়াইয়া খাও।  
আগে তো পীরিত কর পাছে সুখ পাও।’

রমণী উত্তেজিত সুরে উপসংহারে বলিল—

‘ধাক্কার গাবর জাতি তাহাতে বর্বর।  
একদিন না করিয়াছ ভাল নারীর ঘর॥  
প্রেম পীরিতের কিছু নাহি জান ভাও।  
পুষ্ণ বাটিয়া খাইলে মধু কোথা পাও॥’

কত রমণী এই বর্বর রাজা জোর করিয়া আনিয়াছে, কিন্তু এমন রূপসী, এমন নির্ভীক ও এমন সত্যভাষিণী নারী সে দেখে নই। যদিও সে অনেক গালিমন্দ খাইল, তথাপি রাজার বরং ভালই লাগিল।

‘বিয়া করিবে রাজা মন স্থির কৈল।  
ডোমনীর কথায় রাজা ডোমেরে ছাড়িল॥’

শ্যামরায় অব্যাহতি পাইলেন।

বহুদিন পরিয়া বিবাহের উৎসব বাদ্যভাণ্ড চলিল; নারী-পুরুষেরা একত্র হইয়া দরবারে তাহাদের অদ্ভুত অজ্ঞাভঙ্গীসহ নৃত্য করিতে লাগিল।

‘মইষের চামড়া দিয়া বানাইয়াছে ঢাক।  
নারীগুলা নাচে যেন কুমারের চাক।  
মইষের শিং দিয়া বানাইয়াছে শিঞ্জা।  
ডউয়ার ছাল খাইয়া ঠোট করিছে রাজ্ঞা।’

এদিকে গাবর রাজার পাটরাণী ভয় খাইয়া গিয়াছে, এরূপ সুন্দরী কন্যা এ তো দুইদিনে আমার স্থান দখল করিয়া লইবে। কিন্তু নিজের মনের ভাব গোপন করিয়া সে ডোমকন্যাকে বলিল—

‘ভিনদেশী সুন্দর কন্যা বলি যে তোমায়।  
গোয়ার সোয়ামীর গুণ কথা নাহি যায়।  
ভাত জুড়াইয়া গেলে নাক চুল কাটে।  
একটু করিলে দোষ, বেচে নিয়া হাটে।  
পানে যদি চুন কমে—চুল দেয় ছিঁড়ি।  
খোলা পিঠেতে মারে দোহাতিয়া বাড়ী।  
শুনিলে গুণের কথা গায়ে আসে জ্বর।  
তুমি কি করিবে কন্যা এমন গোয়ারের ঘর।’

ডোমের মেয়ে এত দুঃখের মধ্যে রাণীর অভিসম্বিধি বুঝিয়া না হাসিয়া থাকিতে পারিল না, ‘আষাঢ়ের মেঘ যেমন রোদে যায় গলি’ ; তাহার এত দুঃখ হাসিতে ভাসিয়া গেল, সে বলিল, ‘তাহা যাহাই বল, এস দুইজনে ভাণ করিয়া রাজত্ব করি—

‘দুই সতীনে বৈসা হেথা সুখে বাস করি।  
পাইয়াছি রাজত্ব—পাট অঙ্গে কেন ছাড়ি।’

এই উত্তরে রাণীর মুখ শুকাইয়া গেল। গোখের অশু কিছুতেই বারণ মানে না। রাণী যাহা বলিয়াছিল তাহা সত্য কথা। আসলে সে নিজের অধিকার শত কষ্ট সহিয়াও ছাড়িতে পারে না।

‘এত দুঃখ পাইয়া তবু ছাড়িতে না জুয়ায়।  
মড়ার কীরা\* যেমন মড়াতে লুকায়।’

ডোমকন্যা তাহার ভয় দেখিয়া ব্যথিত হইল। সে বলিল, ‘সত্য বলিতেছি, আমি এমন গোয়ারগোবিন্দের ঘর করিতে চাহি না। তুমিই রাজার পাটরাণী হইয়া থাক ; দেখ, আমার যে কনের সজ্জা রাজা বিবাহের জন্য আনিয়াছে, সেই অর্ধ-জলজকার ও সুন্দর “পবনবাহার” শাড়ী পরিয়া তুমি নূতন বধূ সাজিয়া বসিয়া থাক। আমাকে একটা দাসীর বেশ পরাইয়া পলাইবার পথ দেখাইয়া দেও। কিন্তু আমার এই গুপ্ত

\* কীরা—ক্রিমি—কীট।

পলায়নের কথা যেন কেউ জানিতে না পারে। চারিদিকে গন্ডগোল, বাদ্যভাঙ, ইহার মধ্যে আমার গতিবিধির দিকে কাহারও লক্ষ্য থাকিবে না।

‘হুমে-ধূমে গোলমালে যাই পলাইয়া।  
গাবররাজারে তুমি ফিরিয়া কর বিয়া॥’

শ্যামরায়ের বড় ভাই বাড়ীতে আসিয়া কনিষ্ঠের এই দুর্দশার কথা শুনিলেন। তাঁহার পিতার এই দুর্ব্যবহারের কথা শুনিয়া তিনি অত্যন্ত বিরক্ত হইলেন। অশ্বারোহণে তখনই গাবরের দেশে রওনা হইলেন।

“ছয় শত লাঠিয়াল সঙ্গেতে করিয়া।  
দুরন্ত গাবরের দেশে মিলিল আসিয়া॥  
গাবরের বাড়ীঘর ভাঙ্গিয়া ফেলায়।  
বাড়ীঘর ভাঙ্গি তবে সায়ে ভাসায়॥  
দাড়িতে বাঁধিয়া দাড়ি কোপে মুণ্ড কাটে।  
পলাইতে না পায় পথ গাবরেরা কাঁদে॥  
ধরিয়া গাবররাজায় শূলেতে চড়ায়।  
গাবরের লোহে” নদী রাজ্ঞা হৈয়া যায়॥”

একজন গাবরের হস্ত-নিষ্কিন্ত বিষাক্ত বাণ হঠাৎ শ্যামরায়ের মর্মস্থল বিদীর্ণ করিল, মৃত্যু আসন্ন দেখিয়া কুমার নৈরাশ্যপূর্ণ স্বরে বলিলেন, ‘আমি সংসারের সুখ ছাড়িয়া চলিলাম—

‘নিদান কালে না দেখিলাম তোমার চাঁদমুখ।’

‘আর ঘরের কোণে আমার বিছানা তুমি পাতিয়া দিবে না, বিদেশে যাওয়ার কথা শুনিলে আঁত হইয়া আমার পদতলে পড়িয়া মানা করিবে না। তোমার মুখের হাসি আর দেখিতে পাইলাম না। আর-জন্মে যদি আমি বৃক্ষ হইয়া জন্ম লই, তবে তুমি লতা হইয়া আমায় বেড়িয়া থাকিও। দুইজনে নিরালো আমরা মনের কথা কহিব। আমি যদি পক্ষী হই, তবে তোমাকে যেন পক্ষিণীরূপে পাই।’

‘পক্ষী যদি হই কন্যা হইও পক্ষিণী।  
উড়িয়া ঘুরিয়া কহিতাম দুঃখের কাহিনী॥

...

...

নদী যদি হই লো কন্যা তুমি হইও পানি॥  
শুয়া যদি হই লো কন্যা হইও শারী।  
ভ্রমর যদি হই লো কন্যা হইও ভ্রমরী॥  
দুঃখের মনুষ্য জন্ম আর নাহি চাই।  
জীবন-মরণে কন্যা তোরে যেন পাই॥’



ডোমকন্যা হাহাকার করিয়া শ্যামরায়ের মৃতদেহ কোলে করিয়া বসিল, সে শোকে উন্মত্ত। আর্দ্রকণ্ঠে বলিল—

‘কেমনে ভুলিবে কন্যা তোমার পীরিত॥  
 গলায় পুষ্পের মালা না হইল বাসি।  
 একবার না দেখিলাম তোমার মুখে হাসি॥  
 মা-বাপ রাজ্যপাট পায় না ঠেলিয়া।  
 বনবাসী হৈলা বঁধু আমার লাগিয়া॥  
 সুন্দর রাজার পুত্র আমি তো ডোমনী।  
 হেলায় হারালাম রত্ন আমি অভাগিনী॥  
 দারুণ গাবরিয়া বঁধুরে বধিল পরাণ।  
 এই বিষ খাইয়া আমি ত্যজিব পরাণ॥’

#### আলোচনা

এই পালাটা শ্রীযুক্ত চন্দ্রকুমার দে মৈমনসিংহ গুপ্ত-বন্দাবনবাসী কমলদাস গায়কের মুখে শুনিয়া সংগ্রহ করেন। কমলদাস ছাড়া আরো দুই-তিনটি গায়কের কথা তিনি আমাকে লিখিয়া জানান, তাঁহারা এই গানের সামান্য অংশ জানিতেন। কমলদাস একটা একতারা মাত্র সম্বল লইয়া পল্লীতে পল্লীতে তাঁহার অপূর্ব সংগ্রহ হইতে গানগুলি গাহিয়া ফিরিতেন, তাঁহার স্মৃতি পালাগানের বিরাট রত্নাকর। যে বিধাতা ভ্রমরকে গুঞ্জন করিতে শিখাইয়াছিলেন, ও কোকিলের কণ্ঠে পঞ্চম স্বর দিয়াছিলেন, সেই বিধাতার বরে কমলদাস বাবাজীর কণ্ঠের স্বর তিনি মধু হইতে মধুর করিয়া সৃষ্টি করিয়াছিলেন।

ধোপার মেয়ে, শ্যামরায়, মহুয়া প্রভৃতি কয়েকটি পল্লীসঙ্গীতের ভাব ও ভাষাগত একটা সাদৃশ্য আছে, ইহারা সাহিত্যের একটা বিশেষ যুগের লক্ষণ বহন করে। সহজিয়ারা প্রেমকে ভাবরাজ্যের যে উচ্চ গ্রামে লইয়া গিয়াছিলেন, এই তিনটি গানেই তাহার সুস্পষ্ট পরিচয় আছে। এই তিনটি গানের নায়কেরা সকলেই বড় ঘরের লোক, কিন্তু তাঁহারা নিম্নশ্রেণীর মেয়েদের প্রেমের ফাঁদে পড়িয়াছিলেন; এই ভালবাসার জন্য এমন ত্যাগ বা দুঃখ, এমন বিপদ নই, যাহা ইহারা অম্লান বদনে সহ্য না করিয়াছেন। বিশাল সম্পত্তি, আত্মীয়গণের আন্তরিক স্নেহের আকর্ষণ ও পার্শ্বব সমস্ত সুখস্বচ্ছন্দ্য উপেক্ষা করিয়া ইহারা বিপদের সমুদ্রে ঝাঁপাইয়া পড়িয়াছেন। এই প্রেমের প্রতি তরঙ্গো মনোবেদনার যে উচ্চাঙ্গের ঝঞ্ঝা বহিয়া গিয়াছে, তাহা ইহলোকের নহে, সুরলোকের। ডোমনী ও আঁধা-বঁধুর নায়িকা

উভয়েই পরস্ত্রী, কিন্তু এই গান দুইটার সুর এত উচ্চগ্রামের যে তাহাদের কলঙ্কের কথা একবারও মনে হয় না, মনে হয় যেন তাহারা প্রভাতের সদ্যবিকশিত পদ্ম বা গজাজলের ন্যায় পবিত্র। তাহাদের স্বামীর দিকটা আড়াল করিয়া যে দিকটার উপর কবিরাজের দিয়াছেন, তাহা একবারে স্বর্গীয় আলোকে উজ্জ্বলিত। তাঁহারা তেত্রিশ কোটি দেবদেবীর মন্দিরের উপর পরদা টানিয়া শুধু কন্দর্পের মঠের জন্য অর্ঘ্য সাজাইয়াছেন। তাঁহাদের সেই পূজায় ‘কামগন্ধ নাহি তায়’।

এই গাথাটিতে কবি বাংলার প্রকৃতি হইতেই তাঁহার সমস্ত কবিত্বসম্পদ আহরণ করিয়াছেন, সংস্কৃত অলঙ্কারশাস্ত্রের কোন ঋণ তিনি গ্রহণ করেন নাই। নিজের গৃহে যাহার এক বিশাল ভান্ডার আছে সে অপরের কাছে মাথা হেঁট করিয়া ঋণ চাহিতে যাইবে কেন? যত উৎপ্রেক্ষা ও উপমা তাহা স্বীয় ক্ষেত্রজ পুষ্প, লতা ও তরুর নিকট হইতে দুই হাত পাতিয়া গ্রহণ করিয়া শিরোধার্য করিয়াছেন। এই কাব্যে যতগুলি প্রতিমা গঠিত হইয়াছে, তাহার খড়, কাঠ ও বর্ণ তিনি বাংলার সবুজ আরণ্য শোভা হইতে গ্রহণ করিয়া ধন্য হইয়াছেন।

---